

165

ՀԻՅՏԵՐՈՒ ԳԱԳՆԵՒԲԸ

Ա. Ս. ԵՄԻՆՅԱՆ

2

L-44

LIBRARY
OF THE
HAIGAZIAN COLLEGE

This Book Is Presented by:

Armenian Cong. Church
5450 N. Sheridan Rd.
Chicago, Ill.

IN MEMORY OF


WITHDRAWN FROM HAIGAZIAN
COLLEGE LIBRARY

(The above spaces can be filled in if desired)

2
L-44

Վ Ի Շ Տ Ե Ր ՈՒ Գ Ա Ղ Տ Ն Ի Բ Ը

Գրեց
ՎԵՐ. Բ. Ս. ԼԵՒՈՆԵԱՆ



~~12/12/29~~

EFFICIENT PRINTING COMPANY
PHILADELPHIA, PA.
1929

2 MAY 2013



158-901

1391-91



206

Ի Յիշատակ

Բոլոր Հայ Նահապետաց

որոնք

իրենց Հաւատքը պահելով

Մարտիրոսացան

տարագրութեան նամբաներուն վրայ

ԲՈՎԱՆԴԱԿՈՒԹԻՒՆ

	Էջ
ՎԻՇՏԵՐՈՒ ՊԷՍՊԻՍՈՒԹԻՒՆԸ	9
Ո՞Վ է ՊԱՏԱՍԽԱՆԱՏՈՒՆ	21
ՄԵՂՔԻ ՊԱՏԻԺԸ	33
ՅԱԻԵՐՈՒ ԻՄԱՍՏԸ	47
ԴԱՍՏԻԱՐԱԿԻԶ ՎԻՇՏԵՐ	61
ԿԵՆԱՐԱՐ ՏՐՏՄՈՒԹԻՒՆ	79
ԱՍՏՈՒԾԱՅԱՅՏ ՎԻՇՏԵՐ	95
ԶԱՐԵՐԸ ԻՆՉՈ՞Ւ ԿԸ ՅԱԶՈՂԻՆ	111
Ի՞ՆՉ է ԻՐԱԿԱՆ ՅԱԶՈՂՈՒԹԻՒՆԸ	125
ՅԻՍՈՒՍԻ ԳԱՂԱՓԱՐԸ ՎԱՐՉԱՏՐՈՒԹԵԱՆ ՄԱՍԻՆ	141
ԱՌԱՔԵԱԼՆԵՐՈՒ ՀԱՅԵԱՅՔԸ	157
ՅՈՒԲԻՆ ՄՂԶԱԻԱՆՁԸ	175
ՅՈՒԲԻՆ ԴԱՍԸ	193
ԱՍՏՈՒԾՈՅ ՅԱԻԸ	211
ՓՈԽԱՆՈՐԴԱՅԻՆ ՏԱՌԱՊԱՆՔ	225

Յ Ա Ռ Ա Ջ Ա Բ Ա Ն

Վիշտը ընդհանրական է: Ամէն մարդ, առաւել կամ նուազ չափով, եւ ուշ կամ կանուխ, վիշտերու կ'ենթարկուի: Մանաւանդ Հայ ազգը ենթարկուած է երկարածիք տառապանքներու եւ արհաւիրալից տաղնապներու եւ նահատակութեանց: Այս երկին հեղինակը բաժնեկից եղած է Հայու դառն ցաւին, իր բարեհամբաւ հայրը, Բրօֆ. Սարգիս Լեւոնեանը, կորսնցնելով Ատանայի ջարդին մէջ, իսկ իր բարեյիշատակ մայրը զոհ տալով վերջին տարագրութեանց ատեն:

Ի տես այս սահմուկեցուցիչ տեսարաններու, բազմաթիւ ազգայիններու Քրիստոնէական հաւատքը խախտած է, եւ ցնցիչ տարակոյսներ ու շուարումներ արթնցած են արդար եւ սիրող Աստուծոյ մը գոյութեան մասին: «Իրաւցընէ արդարին համար վարձք կա՞յ. իրաւցնէ Աստուած կա՞յ, որ երկրի վրայ դատաւոր է» հին հարցումը կրկին կը յեղյեղուի շատ մը մտքերու մէջ: Մարդիկ իրաւունք ունին իրենց մտաւոր շփոթութեանց համար բացատրութիւններ խնդրելու: Մարդիկ այսպանելի չեն իրենց այս պահանջումներուն համար:

Մարդս կ'ապրի յոյսով եւ հաւատքով: Մարդը դիւցազնաբար կը մարտնչի կեանքի փորձանքներուն դէմ, եւ կը պահէ իր տոկունութիւնը եւ «moral»ը, ցորչափ չէ կորսնցուցած իր հաւատքը եւ յոյսը: Սակայն յոյսը ցնորային եւ հաւատքը կոյր ըլլալու չէ: Մեր կրօնական համոզումները բանաւոր հիմերու վրայ պէտք է հաստատուած լինին, եթէ ոչ ցնցումներու չեն կրնար դիմանալ:

Այս հատորին մէջ աշխատած ենք բանաւոր լուսաբանութիւններ տալ մեզ իսկապէս վրդովող շատ մը հարցերու մասին: Անշուշտ, յաւակնութիւնը չունինք վիշտերու գորգեան հանդոյցը լման քակելու եւ ամէն դադտնիք քողաղերծելու: Վիշտերու գոյութեան մէջ դադտնիք մը կայ, եւ պիտի մնայ միշտ: Սակայն կը յուսանք թէ տրուած բացատրութիւնները պիտի հարթեն շատ մը կնճիռներ, եւ պիտի մատակարարեն մտաւոր գոհացում եւ հոգեւոր քաջալերութիւն:

Այս հատորին բովանդակութիւնը նախապէս խօսուեցաւ իբր քարոզներու շարք մը, Ֆիլատելֆիոյ Հայ Նահատակաց Ժողովական Միացեալ Եկեղեցւոյ բեմէն: Պատճառներ ունինք խորհելու թէ անոնք ունեցան իրենց շինարար արդիւնքները: Փափաքելով սոյն օրհնութիւնները բաժնել աւելի ընդարձակ հասարակութեան մը հետ, նամանաւանդ մեր դժբաղդ եւ տարագիր Հայ աղգի բազմաչարչար բեկորներուն հետ, որոնց անձնապէս ծառայելու արտօնութեանէն զրկուած ենք դժբաղդարար, այժմ դայն կը մատուցանենք գրքի ձեւով: Կը յուսանք թէ ատոր մէջ արտայայտուած խորհուրդները, պիտի ամբաստանեն շատերու խախտած հաւատքը, պիտի յուսադրեն շատ մը յուսահատները, պիտի մխիթարեն շատ մը տրամեայները, եւ աստուածապաշտութեան ու արդարութեան շաւիղներուն պիտի մղեն շատ մը շուարած հոգիներու քայլերը:

Ֆիլատելֆիա, Փէնն.
Փետր. 14, 1928

ԲԻԻԶԱՆԴ Ս. ԼԵՒՈՆԵԱՆ

Ա

ՎԻՇՏԵՐՈՒ ՊԷՍՊԻՍՈՒԹԻՒՆԸ

«Վասնզի Մարդ արեւուն տակ քաշած իր բոլոր աշխատանքէն ու սրտի տանջանքէն ինչ օգուտ կ'ունենայ, Գանգի անոր բոլոր օրերը վիշտերով, ու գործը տրամուծեամբ լեցուն են. անոր սիրտը գիշերը անգամ հանգստութիւն չ'գտներ: Ասիկա ալ ունայնութիւն է»

ԺՈՂ. Բ. 22, 23:

ՄԱՐԴԿԱՅԻՆ միտքը դբաղեցնող եւ խռովեցնող կարեւորագոյն հարցերէն մին է վիշտերու հարցը: Երբոր մարդս կը ծնանի, ցաւերով ու վիշտերով լեցուն աշխարհի մը մէջ կը բանայ իր աչքերը: Մարդս նախ կը կարծէ թէ այս աշխարհի վրայ ամէն բան գեղեցիկ ու երջանկաւէտ է: Մանկութեան մէջ ամենայնինչ փայլուն եւ գողտրիկ կ'երեւի: Պատանեկութեան մէջ, ամէն բան դրաւիչ եւ բերկրառիթ կը տեսնուի: Երիտասարդութեան մէջ, ամէն բան հրապուրիչ եւ խոստմնալից ըլլալ կը թուի: Մարդս կը նետուի կեանքի ասպարէզին վրայ բաղձանքով եւ եռանդով: Այս կեանքէն ցանկալի հրճուանքներ եւ յազեցումներ կ'ակնկալէ: Կեանքը կը դիմաւորէ փայլուն յոյսերով:

Սակայն, կամաց կամաց դառն փորձառութեանց մէջն անցնելով, մարդ կը հասկնայ, թէ այս աշխարհը անանկ կարծուածին պէս զեղափայլ եւ հրճուալից վայր մը չէ եղեր. այս կեանքը ակնկալուածին պէս քաղցր ու ցանկալի վայելք մը չէ եղեր. Տակաւ առ տակաւ, մարդս փորձառաբար կը հասկնայ, թէ այս երկրագունդին վրայ քաղցրութեան բաժակին մէջ լեղութիւն խառնուած է. այս կեանքի մէջ տրամութիւնը ուրախութեան ընկերն է, ցաւը բերկրանքի ուղեկիցն է: Այս երկրաւոր անցքի մէջ, մարդ շատ մը ցաւոց ձորերուն մէջէն պիտի անցնի: Այս աշխարհը, կարծուածին պէս, անուշաբոյր ծաղիկներով, պտղալից ծառերով, կանանչ մարդագետիկներով, կարկաչուն առուակներով պատուած Եդէմի պարտէզ մը չէ: Երկիրը փուշեր եւ տատասկներ բուսցնող նեղութեան վայր մըն է: Նոյն իսկ քաղցրաբոյր վարդերը, փուշերու մէջ կը մեծնան: Հետեւաբար, կարելի չէ, այս աշխարհին վրայ անդառն եւ անտաժան կեանք մը անցնել: Կարծես թէ մարդս հոս եկած է նեղութիւն քաշելու համար: Յորի ըսածին պէս, կարծես թէ մարդը «թշուառութեան համար կը ծնի: Մարդը որ կնոջմէ ծնած է կարճ կեանք ունի, եւ թշուառութիւնով լեցուն է: Ծաղիկի պէս կ'ելլէ ու կը կտրուի, ու շուքի պէս կը փախչի ու չի կենար:»

Յեղի գոյութենէն ի վեր, այսպէս եղած է մարդուն փորձառութիւնը: Ամէն անհատի կեանքին մէջ, կուգայ ժամանակը, երբ հարուածը կ'ուտէ իր գլխէն, եւ անուշ երազներէն արթնցող մարդու մը պէս կ'սթափի ու կը տեսնէ թէ իր գտնուած միջավայրը հոգեթով անուրջներու որորան մը չէ եղեր: Այս հիասթափումի գործողութիւնը նախամարդով սկսաւ: Ադամ եւ Եւա իրենց աչքերը բացին պանծալի միջավայրի մը մէջ: Եւ կարծեցին թէ կեանքը

խնդալով ու խաղալով պիտի անցնի, թէ կեանքը հաճոյքէ և վայելքէ պիտի բաղկանայ: Սակայն ասիկա սոսկ պահ մը տևեց: Եդէմի դրախտին խրախճանքներուն յաջորդեց, փշալից կեանքի մը նեղութիւնները: Եւ անոնք իրենք զիրենք գտան տաժանքներու եւ երկունքներու դատապարտութեան ներքեւ: Անկէ ի վեր, աշխարհս մուտ գործող ամէն մէկ անձ նոյն նեղ անցքին մէջէն անցած, եւ մատուցուած դառն բաժակը խմած է:

Մարդոց հանդիպող վիշտերը այլազան են: Կան կարգ մը վիշտեր, որոնք անխտրաբար բոլոր մարդոց ալ կը հանդիպին: Կան ուրիշներ ալ, որոնք մասնաւորներուն կը հանդիպին: Երբեմն վիշտեր հասարակաց են, երբեմն վիշտեր մասնայատուկ են: Ինչ նեղութիւն որ մէկը կը կրէ, ուրիշ մը չի կրեր: Սակայն սա մէկ փորձառութեան մէջ բոլոր մարդիկ կը միանան, այսինքն՝ ամէնքն ալ վիշտերու կ'ենթարկուին, ամէնքն ալ դառնութիւնը կը ճաշակեն: Արդարեւ, վիշտերու տարբեր տեսակները եւ աստիճանները կան: Ոմանց վիշտերը ուրիշներէն շատ եւ ծանր կ'ըլլան: Սակայն վիշտ կրելու մէջ բոլոր մարդիկ վիճակակից են: Երկրիս վրայ մէկ անհատ իսկ չկայ, որ տուայտանքէ բոլորովին զերծ եղած ըլլայ:

Մարդկային վիշտերը թուել ու դասաւորել երկար ու դժուարին գործ մըն է: Անոնց տեսակը բերաւոր է, անոնց թիւը լեզուն է: Մարդկային ցաւերու խոշոր մի հատուածը մարմնաւոր է. սա հողեղէն մարմնոյ կաղմուածքին կը վերաբերի: Կայտառ ու առողջ մարդու մը վրայ, կը տեսնես որ օրին մէկը տկարութիւն մը, դէշ ախտ մը կը յարձակի. եւ զայն կը խոցոտէ ու կը վշտացնէ: Եւ ահա անոր գորութիւնը կը պակսի, անոր կարմիր այտերը կը թոշնին, մարմինը կը հիւծի, կը հալի, կը մաշի: Կրծող հիւանդութեան մը գոհ ըլլալ ի՞նչ սոսկալի վիճակ է: Ան-

բուժելի ախտով մը վարակուելի, եւ մոմի պէս վառիլ ու սպառելի, ի՞նչ տանջալից մղձաւանջ է: Եւ ահա երկրիս վըրայ Փիզիքական ցաւերով տառապողներու թիւը հարիւրաւորներ չեն, բիւրաւորներ են: Սոչոր հիւանդանոցներու տրուած մէկ այցելութիւն բաւական է մարմնաւոր տառապանքի ընդարձակութեան եւ սաստկութեան պատկերը կենդանադրելու: Անթիւ հիւանդանոցները լեցնող ամէն տարիքէ, դասէ, եւ ցեղէ բազկացեալ հիւանդներու բանակներ, կենդանի վկաներն են ցեղի Փիզիքական տուայտանքներուն: Մարմնաւոր տկարութիւնը ամէն անհատին կ'այցելէ մէկ կամ ուրիշ ձեւով, ուշ կամ կանուխ: Ամենէն առողջ մարմինն իսկ երբեմն գլուխ կը ծռէ, անագորոյն հիւանդութեան մը յարձակումներուն առջեւ:

Երբեմն հիւանդութիւնները մահացու ըլլալու աստիճան ծանր կ'ըլլան, եւ կեանքը ժամանակ մը տանջելէ յետոյ անոր վերջ կը դնեն: Իսկ մահը, տխրութեան ու սուգի սաւան մը կը տարածէ իր ձեռքով: Մահը կ'ընդհատէ կեանքի խայտանքը: Եւ գերեզմանին մթին ստուերները կ'իյնան ամէն էակի ճամբուն վրայ: Ամէն սիրտ կը դառնանայ մահուան լեզի բաժակով: Մահը ուշ կամ կանուխ կ'այցելէ ամէն մէկ ընտանիքին, եւ անոր սեւեր կը հազցնէ: Մահուան կսկիծը ճաշակելու տեսակէտէն, բոլոր մարդիկ վիճակակից են:

Երկրիս վրայ, թշուառութեան ու չքաւորութեան երեսէն տառապող էակներու շարքերն ալ լեզէոններ կը կազմեն: Երկրիս վրայ հարստութիւնը շատ է: Բայց խեղճութիւնն ալ շատ է: Հոս մեծահարուստն ու Ղազարոսը քով քովի կը կենան: Եւ ղեղխութեան մէջ յարեցողներու բարձրաչինդ խրախճանքներուն կը խառնուին, չքաւորութեան մէջ ողբացողներու աղեկտուր ճիչերը: Այս աշխարհին վրայ, աղքատներուն թիւը անհամեմատ-

օրէն կը գերակշռէ հարուստներու թուոյն: Այսօր քանի՞ հողիներ կան որոնք չոր հացի մը համար կը տքնին, փշրանքի մը համար հողի կուտան: Այսօր քանի՞ հողիներ կան, որոնց աղօտ աչքերուն մէջ պիշ պիշ կը նայի անօթութեան զարհուրեցուցիչ ճիւղաղը: Երկրիս վրայ որքա՞ն անօթիներ, մերկեր, որբեր եւ որբեւայրիներ կան: Թշուառներու ստուար բանակները համրել անկարելի է: Անոնց սրտակեղէք հառաչանքները մթնոլորտը կը լեցնեն վշտագին հեկեկանքներով:

Դարձեալ առեւտրական ասպարէզին վրայ պատահող դժբաղդութեանց երեսէն, քա՞նի հողիներ անձկութիւն կը քաշեն: Առեւտուրի մէջ շատեր կը վնասուին, ճախողութեան թակարդներուն մէջ կը բռնուին: Երբ կը տքնին յառաջ երթալ, ետ կը մնան: Դժբաղդութեան մը հանդիպելով, իրենց ասրանքները, կալուածները, հարստութիւնը, վերջապէս քրտնաթոր աշխատութեան բոլոր հունձքերը կը կորսնցնեն. եւ մեծ նեղութեան ու խոռվութեան մէջ կ'իյնան:

Երբեմն, բնական փորձանքներու վրայ արուեստական աղէտներ ալ բարդուելով, մարդկային ցաւը կը բազմապատկեն: Պատերազմներու երեսէն, հազարաւոր ընտիր կեանքեր կը փճանան, չէն աւաններ կը քանդուին, գեղաճիծաղ երկիրներ կ'աւերուին, եւ անմեղ ժողովուրդներ անպատմելի նեղութեանց կը մատնուին: Բռնակալներու բռնապետութիւնը, կեղեքիչներու ասպատակութիւնները, հարստահարիչներու անիրաւութիւնները, ցեղին ցաւերը կ'ուռճացնեն: Ոստիներու դաւերը, թշնամիներու յարձակումները, մարդուն տանջանքները կ'աւելցնեն:

Երբեմն, մարդկային չարիքներու վրայ բնական աղէտներ ալ կը բարդուին: Մեծ փոթորիկներ, կիկլոններ, հեղեղներ, կարկուտներ, սովեր, հրաբուխներ, երկրա-

չարժներ, եւ ասոնց նման ուրիշ բնական աղէտներ, երկրագունդի վրայ ահագին աւերմունքներ յառաջ բերած, եւ մարդիկը սոսկալի տաղնապներու ենթարկած են: Կարծես թէ բնութիւնն ալ երբեմն կը շարժի, մարդուն կիսկատար մնացած տառապանքը լրացնելու համար:

Կան ուրիշ կարգ մը վիշտեր եւս, որոնք մարդու մարմինէն աւելի, անոր միտքը, սիրտը եւ հոգին կը խոցոտեն: Կեղծաւորներու կեղծիքները, ռիսակախներու զրպարտութիւնները, բամբասողներու վարկաբեկումները, նախանձոտներու խճրճանքները, վատասիրտներու պարսաւանքները մարդոց սրտերուն մէջ խոր վէրքեր կը բանան, եւ կեանքի կսկիծները կ'աւելցնեն: Ատելութիւններ եւ հալածանքներ մարդոց հոգին կը դառնացնեն: Սրտնեղութիւններ եւ հոգեր մարդու սիրտը կը կրծեն: Փորձութիւններ եւ անկումներ մարդը կ'ընկճեն:

Մարդս ներսէն ու դրսէն յարձակումներու ենթարկուած է: Մարդս ամէն կողմանէ նեղութիւններով պաշարուած է: Երկրի վրայ մարդուն համար հանգստութիւն չի կայ: Հոմերոսի ըսածին պէս, «Բաղբը կեանքի թելերը ցաւով հիւսած է, եւ նոյն իսկ ծննդեան օրէն երկուորեակներ են թշուառութիւնը եւ մարդը»: Կեանքի ճամբորդութիւնը խաղաղ ջուրերու վրայէն չընթանար, այլ փոթորկայոյզ ծովու մը վրայէն կ'ընթանայ: Կեանքի ովկէանը քիչ անգամներ անխռով եւ խաղաղ կ'ըլլայ: Մարդ հաղիւ թէ կ'սկսի այս խաղաղութիւնը վայելել, երբ յանկարծ մըրիկ մը կը փրթի, ծովը կը փոթորկի, ալիքներ կը փրփրին ու կը գոտան, եւ կեանքի նաւը կուլ տալ կ'սպառնան: Բաղմաթիւ կեանքեր այս լեռնակուտակ ալիքներուն մէջ ծովամոյն կը կորնչին: Միայն քաջարի եւ անվատ հոգիները, այս փոթորիկներուն դէմ խիզախօրէն կը մարտնչին, եւ վերջապէս խաղաղութեան նաւահանգիստը կը հասնին:

Սակայն, դիւրին գործ չէ կուրծք պարզել այս մոլեգին փոթորիկներու: Կեանքի կսկիծներուն ներքեւ, մարդ շատ անգամ ուժասպառ կ'ըլլայ, կը ճգմուի, կը յուսալքուի: Յաւոց մութ ամպեր յաճախ կենաց փայլուն արեգակը կը մթազնեն: Եւ խոր մթութեան մէջ, մարդ իր ճամբան կը կորսնցնէ, ասդին անդին կը թափառի, կը հառաչէ, յուսահատական եւ տրտնջող ճիչեր կ'արձակէ, Յորի նման իր ծնած օրուան անէծք կը կարգայ, մարդոցմէ օգնութիւն կը փնտռէ, սակայն օգնող չի գտնուիր. երկինքէն գթութիւն կը խնդրէ, սակայն պատասխանող չ'ըլլար: Երկերք սառ եւ երկինքը պղինձ կը կտրուի: Եւ ամէն յոյսէ կըտրուած մարդը, մոռալ եւ աղեկտուր յուսահատութեամբ մը կ'աղաղակէ, «Աստուած իմ, Աստուած իմ, ինչո՞ւ զիս թողուցիր:»

Մարդու կեանքը անհանգիստ ընող այս խռովմունքները, անոր միտքն ալ կը խռովեն: Այս վիշտերու ցանցերուն մէջ, մարդս լոյս եւ բացատրութիւն կը փնտռէ: Մարդ ինքնիրեն կը հարցնէ, «Ինչո՞ւ այսքան վիշտեր կը կրենք, ինչո՞ւ այսքան անողոք տէրտերու կը հանդիպինք: Կեանքը նեղութենէն զատ ուրիշ բան մը չունի՞ մեզի հրամցնելիք: Մենք ցաւ ու տանջա՞նք քաշելու համար այս աշխարհ եկած ենք:» Մարդկային միտքը այս հարցումներուն պատասխաններ կը փնտռէ: Մարդ, կ'ուզէ հասկնալ վիշտերու պատճառները: Նա կ'ուզէ գիտնալ թէ աստուածային միտք մը եւ նպատակ մը կա՞յ ասոնց ետեւ: Յաւերու ճնշման ներքեւ, մարդ բնականօրէն կը հարցնէ, «Թէ որ տիեզերքի մէջ կայ գթոտ Աստուած մը, ինչո՞ւ համար ցաւերու թոյլատու կ'ըլլայ, ինչո՞ւ համար աղէտներ կը զրկէ, ինչո՞ւ համար ցեղը տառապանքներով կը խոցոտէ և կը նեղէ: Մարդկային վիշտերը ի՞նչպէս կարելի է հաշտեցնել Աստուծոյ սիրոյն եւ ողորմութեան հետ:»

Այս մտախռով հարցումներուն տրուած պատասխանները գլխաւորաբար երեք խումբերու կը բաժնուին :

Առաջին խումբը կը ներկայացնեն շնականները (cynic) և անհաւատները : Ասոնք կը յայտարարեն , «Աստուած չկայ . Աստուած ըսուած բանը մարդու սին երեւակայութեան ստեղծութիւնն է : Տեսանելի նիւթը յաւիտենական է : Տիեզերքը ի սկզբանէ գոյութիւն ունեցած է , եւ ներկայ վիճակին հասած է բնական ուժերու ինքնավար ներդրութեամբ : Աշխարհի մէջ բարոյական տնօրինութիւն մը չի կայ : Տիեզերքի կազմութիւնը անկատար է : Եւ այսպիսի կիսկատար տիեզերքի մը մէջ բնականօրէն խառնաշփոթութիւններ տեղի պիտի ունենան : Եւ այս անկարգութեանց մէջ զգայուն էակները պիտի նեղուին :»

«Հետեւաբար» , կը յորդորեն այս մարդիկը , «վիշտերու համար գերբնական պատճառներ մի՛ հետախուզէր : Անոնց ետեւ դադանի նպատակներ մի՛ փնտռէր : Ձանոնք ընդունէ իբր իրողութիւններ : Անոնց գալուստը ակնկալէ : Եւ անոնց հանդէպ ըրէ քու լաւագոյնդ : Կարելի եղածին չափ կարծրասիրտ եւ անփոյթ եղիր : Դժբաղդութիւնները հեզնէ : Թէ որ անոնցմէ աւելի գորաւոր ելլես , դո՛հ եղիր : Իսկ թէ որ անոնց տակ ընկճուիս , քու ճակատադրիդ առջեւ գլուխ ծռէ , անխռով ու վէս անտարբերութեամբ : Այս աշխարհին վրայ տիրող օրէնքը , «յարմարագոյնի վերապրում»ին (survival of the fittest) օրէնքն է : Եթէ կարենաս ինքզինքդ յարմարցնել միջավայրիդ պայմաններուն , պիտի կրնաս ապրիլ :»

Ուստի այս կեանքէն աղէկ բաներ մի՛ ակնկալէր : Հանդերձեալին վրայ յոյս մի՛ դնէր : Այս աշխարհին վրայ ապրէ , գործէ , ճգնէ , առանց ծայրահեղութեան երթալու : «Վասն զի մարդ արեւուն տակ քաշած իր բոլոր աշխատանքէն ու սրտին տանջանքէն ի՞նչ օգուտ կ'ունենայ : Քանզի

անոր բոլոր օրերը վիշտերով , ու գործը տրտմութեամբ լեցուն են . անոր սիրտը գիշերը անգամ հանգստութիւն չ'դնէր : «Ասիկա ալ ունայնութիւն է :» Այս կեանքէն մեծ հրճուանք մի՛ սպասեր : Նոյն ատեն աշխատէ այս կեանքէն կրցածիդ չափ հաճոյք քաղել : Սակայն հաճոյասիրութեան մէջ ալ ծայրահեղութեան մի՛ երթար : Քանզի անոր վախճանն ալ պարապ է : Շնականներու կեանքի փիլիսոփայութիւնը ամփոփուած է ժողովողի սախօսքերուն մէջ . «Արեւուն տակ բոլոր գործուած գործերը տեսայ , եւ ահա ամէնն ալ ունայնութիւն եւ հոգիի տանջանք է : ... Ունայնութիւն ունայնութեանց , ամէն բան ունայնութիւն է :» (1:14,2) :

Վիշտերու մասին տրուած երկրորդ պատասխանը անգետական (agnostic) բացատրութիւնն է : Անգետականները կը հաւաստեն թէ տիեզերքի մէջ Աստուած մը կայ , Գերակայ Միտք մը գոյութիւն ունի : Այս տիեզերքը Արարիչի մը ստեղծագործութիւնն է : Սակայն տիեզերքի կազմը կարգի ու կանոնի մէջ դնելէ յետոյ , Անիկա երկնից բարձունքները քաշուած է : Լարուած ժամացոյց մը ինչպէս որ կը բանի , այս տիեզերքն ալ այնպէս կը բանի : Աստուած այս աշխարհէն հեռացած է : Անոր մէջ իբր ներկայ գորութիւն մը չ'ներգործեր : Աստուած մարդոց հետ չի յարաբերիր , եւ անոնց վիճակով չի շահագրգռուիր : Աստուած անծանօթ էակ մըն է . կարելի չէ անոր մասին բան մը գիտնալ : Կարելի չէ անոր միտքը եւ ծրագիրները հասկնալ : Կարելի չէ անոր բարոյական բնութեան տէր էակ մը եղած ըլլալը կուսակ : Երկրիս վրայ ի յայտ եկող անհամար վիշտերն ու տուայտանքները , Աստուծոյ բարոյական բնութիւնը չեն մատնանշեր , Աստուծոյ մարդասիրութիւնն ու ինամատարութիւնը չեն յայտներ , Աստուծոյ գթութիւնն ու ողորմութիւնը չեն փաստեր :

106-85 / 16-1881 7391-9



Երեւոյթներէն դատելով, այս տիեզերքին կառավարութիւնը ոչ-բարոյական (unmoral) է: Երկրիս վրայ, մարդ իր վիճակին ձգուած է: Բնական ուժերու փոխներգործութեանց իբր հետեւանք, այս կեանքին մէջ մարդուն ցաւեր եւ աղէտներ պիտի հանդիպին: Մարդը այս դժբաղդութեանց դէմ քաջասրտութեամբ մաքառելու է: Մարդ աշխատելու է զանոնք յաղթահարել: Սակայն այս կատաղի դոյամարտին մէջ, դերբնական ուժի մը օժանդակութեան յուսալու չէ: Իր ճակատամարտը ինքն իւր ձեռքով մղելու է: Մարդս իր լաւագոյն ճիւղը թափելու է չընկճուելու եւ չ'յուսահատելու համար: Նա ջանալու է որ այս աշխարհին վրայ կարելի եղածին չափ լաւ, գործունեայ, զօրեղ, յուսալից կեանք մը անցնէ:


Վիշտերու մասին տրուած երրորդ պատասխանը աստուածահաւատներու (theist) տուած պատասխանն է: Անոնք կը հաւատեն թէ այս աշխարհին մէջ Աստուած մը կայ: Անիկա համայն տիեզերքին եւ արարածներուն արարիչն է: Անիկա տիեզերքէն դուրս քաշուած չէ: Անիկա այս աշխարհին մէջ կ'ապրի ու կը գործէ: Անիկա ամէն բանի վրայ կը տիրապետէ անհուն զօրութեամբ եւ իմաստութեամբ: Անիկա իր ձեռքերուն մէջ բռնած է այս տիեզերքին ղեկը:

Աստուած այս աշխարհը կը կառավարէ բարոյական սկզբունքներով եւ օրէնքներով: Անոր գերագոյն նպատակն է, այս ստեղծագործութեան մէջ բայորական կատարելութիւն ստեղծել: Եւ Անիկա կ'աշխատի իր այս բարձր նպատակը իրագործել մարդ արարածին մէջ, զորս ստեղծած է իր նմանութեամբ:

Աստուած այս աշխարհի մաքառումներուն ու տաղնապներուն մէջն է: Այս կեանքի վիշտերը Աստուծոյ

սիրոյն ու ողորմութեան հետ անհաշտելի բաներ չեն: Աստուած մարդուն կակիծներն ու տանաջնքները բարձրագոյն նպատակի մը կը ծառայեցնէ: Անիկա այս նեղութիւններու միջոցաւ իր վսեմ նպատակները յառաջ կը տանի: Բարոյական կատարելագործումի հոլովոյթին մէջ, ցաւերը ունին հարկաւոր տեղ մը եւ բարերար դեր մը: Ուստի, վիշտերու վրայ պէտք չէ նայիլ իբր անխառն չարիք:

Այս երեք տեսութիւններէն ո՞ր մէկը ճշմարտութեան աւելի մօտ է, ո՞ր մէկը իրողութիւնները աւելի լաւ եւ գոհացուցիչ կերպով կը մեկնէ, եւ ո՞ր մէկը ցեղին համար աւելի նպաստաւոր եւ շինարար եղած է, յաջորդ ուսումնասիրութեանց մէջ պիտի դբաղինք այս հարցերու վերլուծութեամբ:



Ո՞Վ Է ՊԱՏԱՍԽԱՆԱՏՈՒՆ

«Ապրող մարդը ի՞նչու տրտունջ ընէ
իր մեղքերուն պատիժին համար»:

ՈՂԲԳ ԵՐԵՄԵԱՅ 3.39.

ԵՐԿՐԱԽՈՐ գոյութեան մէջ ստիպուած ենք վիշտերը ընդունիլ իբրեւ կեանքի անբաժան ընկերը: Այս աշխարհին վրայ աղատ չենք կրնար ըլլալ այլազան նեղութիւններէ: Ինչպէս որ երկիրը փուշեր կը հասցնէ, անանկ ալ կեանքը տառապանքներ կը բուսցնէ: Որքան որ կ'աշխատինք ցաւերէ հեռու փախչիլ, բայց եւ այնպէս անոնք մեզ կը գտնեն: Կեանքի գեղածիծաղ ափերն իսկ, կը մտրակուին կեանքի մշտածուփ ուկէանին փրփրայոյզ ու բարձրագոռ ալիքներով:

Ոմանք կը ջանան նեղութիւնները խափանել, հարըստութեան մոգական դաւազանով: Ուրիշներ կ'աշխատին տրտմութիւնը հեռացնել հրճուանքի ուսպերով: Սակայն, յամենայն դէպս, այս խուսափումները ձախողութեան կը դատապարտուին, եւ նեղութիւնները յանկարծակի անոնց առջեւ կը ցցուին գարշատեսիլ ուրուականներու նման: Մարդոց մէկ դասակարգն ալ կը ջանայ, կեանքի կսկիծներէն ձերբազատիլ, անոնց գոյութիւնը ուրանալով: «Քրիստոնէական Գիտնականներ» (Christian Scientist) կոչուած կրօնական աղանդը այս վարդապետութեան

Ղատագովն է: Անոնք կը յայտարարեն թէ աշխարհի վրայ իրականութեան մէջ ցաւ գոյութիւն չունի: Յաւ ըստուած բանը միայն մոլորած ու հիւանդոտ մտքին ինքնախար եւ շինծու երեւակայութիւնն է: Եթէ մարդը կրնայ սա համոզումը արմատացնել իր մտքին մէջ թէ ցաւ չկայ, յայնժամ բոլոր ցաւերը պիտի անէանան: Սակայն «Քրիստոնէական Գիտնականները» ի դուր կը պայքարին կեանքի դառն իրականութեանց դէմ: Ի հեճուկս իրենց քաղցրահնչուն յայտարարութեանց, անոնք ալ երբոր ակոսյի ցաւէն կը բռնուին, ատամնաբոյժին կը վազեն. եւ երբոր արմուկնին կը կոտորուի՝ բժիշկին կ'ըտապեն: Երբոր իրական ցաւը գիրենք կը տանջէ, չեն կրնար դայն խարուած երեւակայութեան պատրանքին վերադրել: Կարելի բան չէ կեանքի դառնութիւնները ուրանալ: Անոնք իսկապէս գոյ են: Անոնց գոյութիւնը ուրանալ բացարձակ կուրութիւն եւ տխմարութիւն է:

Սա հարցը կը ծագի թէ ինչո՞ւ համար կեանքի տուայտանքները գոյ են. թէ ինչո՞ւ չարչարանք կրելու համար աշխարհ բերուած ենք: Այս տառապանքները քիչ չպէս կրնանք հաշտեցնել Աստուծոյ գթութեան հետ: Նախորդ քարոզին մէջ յիշեցինք այս հարցումին տրուած երեք գըլխաւոր պատասխանները: Ոմանք կ'ըսեն թէ Աստուած գոյութիւն չունի: Ուրիշներ կ'ըսեն թէ Աստուած գոյութիւն ունի, սակայն անիկա աշխարհէն անջատուած է, եւ բարոյական բնութենէ զուրկ է: Ուրիշներ կ'ըսեն թէ Աստուած գոյ է, անիկա տիեզերքին մէջն է իբր ներկայ եւ գործօն ուժ մը, եւ թէ ցաւերու միջոցաւ կ'իրազործէ իր բարոյական վեհ նպատակները:

Անոնք որ Աստուծոյ գոյութիւնը կ'ուրանան՝ մակերեւոյթապէս կը խորհին. անոնց միտքը չափազանց կարծատես է, եւ դատողութիւնը խակ: Անոնք որ կեանքի

տուայտանքները տեսնելով, կ'եզրակացնեն թէ Աստուած երկնից առանձնութեան մէջ կ'ապրի, եւ մարդոց ցաւերով չի հետաքրքրուիր, անոնք ալ ծանծաղօրէն կը խորհին, եւ հեռահայեաց տեսողութենէ ու խորաթափանց խորհողութենէ զուրկ են: Եթէ կեանքի նեղութիւնները, իրենց լայն առումով եւ հեռահաս յարաբերութիւններով ուսումնասիրելու ըլլանք, պիտի տեսնենք թէ վերոյիշեալ եզրակացութիւնները տրամաբանական և համոզիչ չեն: Յաւերն ու նեղութիւնները ոչ միայն չեն հերքեր Աստուծոյ գոյութիւնը եւ կամ անոր հոգածութիւնը, ընդհակառակը կը փաստեն անոր ներկայութիւնը, ինչպէս նաև բարութիւնը: Այսուհետև տրուելիք լուսարանութիւնները պիտի պարզեն թէ ի՞նչպէս:

Այս հարցի վերլուծութեան մէջ, առաջին կէտը որ մեր խորհուրդին առարկայ ըլլալու է, սա է թէ, ո՞վ է ցաւերու պատասխանատուն: Եթէ ցեղի տանջանքներուն պատասխանատուն Աստուած է, եւ մարդս զերծ է ունէ պատասխանատուութենէ, յայնժամ առանց վարանելու կրնանք եզրակացնել թէ Աստուած անգութ եւ անողորմ էակ մըն է, եւ անարժան մեր հնազանդութեան եւ պաշտումին: Սակայն եթէ մարդն է իսկական, եւ թերեւս միակ պատասխանատուն ցեղի տառապանքներուն, յայնժամ զԱստուած այլանելու պատճառ մը չի մնար, եւ մարդը կը շալկէ իր յանցանքներուն ծանր լուծը: Ուստի հիմա աշխատինք որոշել թէ որու վրայ կը ծանրանայ նեղութեանց պատասխանատուութիւնը:

Երբոր այս տիեզերքի տնօրինութիւնը կը հետախուզենք, կը տեսնենք որ ատոր մէջ տիեզերական օրէնք մը կը ներգործէ, եւ ատիկա է «Պատճառ եւ Արդիւնք» ի օրէնքը: Այս տիեզերքին մէջ ոչինչէն բան մը յառաջ չի դար: Ամէն բան արտադրիչ ուժէ մը կը բղխի: Ամէն

արդիւնք պատճառ մը կ'ունենայ. եւ արդիւնքը համապատասխան կ'ըլլայ պատճառին: Առանց բացառութեան, ինչ բան կամ երեւոյթ որ կը տեսնես այս տիեզերքին մէջ, կրնաս բացարձակօրէն վստահ ըլլալ թէ այդ բանին ետեւ, դայն արտադրող բաւարար պատճառ մը կայ: Բնութեան մէջ ներգործող այս օրէնքը, մարդկային կեանքի եւ յարաբերութեանց մէջ ալ կը ներգործէ: Մարդս ազատ չէ այս օրէնքին իշխանութենէն: Մարդն ալ հպատակ է այս բացարձակ օրէնքի տիրապետութեան:

Ուստի, մարդկային փորձառութեանց մէջ, երբ ոեւէ երեւոյթ կամ արդիւնք կ'երեւի, մարդ կրնայ վստահ ըլլալ թէ ատիկա անտարակոյս պատճառ մը ունի, եւ կրնայ փնտռել բուն պատճառը: Ինչ որ է, եւ կամ ով որ է, արդիւնքի մը պատճառ տուողը, ատիկա է այդ բանի պատասխանատուն: Ուստի, պատասխանատու ըսելով ուրիշ բան պէտք չէ հասկնանք, բայց եթէ պատճառ տուող:

Մարդկային ցաւերն ալ երեւոյթներ են, որոնք աղբիւրէ մը կը բղխին: Մարդկային տառապանքները փորձառութիւններ են, որոնք պատճառէ եւ կամ պատճառներէ կը ծագին: Ուստի ցաւը հասկնալու համար, պէտք է անոր պատասխանատուն գտնել:

Երբոր մարդկային նեղութիւններու պատճառները կը փնտռենք, որոշապէս կը տեսնենք թէ մարդ է պատասխանատուն անոնց մեծագոյն մասին: Այս իրողութիւնը արեգակի չափ յստակ է: Ասիկա չտեսնող մէկը կամ կոյր ըլլալու է եւ կամ անմիտ: Մարդս պատճառ կուտայ շատ մը դժբաղդութեանց: Մարդը իր ձեռքով կ'ստեղծէ շատ մը նեղութիւններ: Մարդ ինքզինքը կ'ենթարկէ շատ մը վիշտերու: Եւ մարդը այս չարիքները կը բերէ իր գլխուն, քանզի թերի է իմաստութեամբ եւ բարոյական նկարագրով:

րով: Եթէ բոլոր մարդիկ կատարեալ եղած ըլլային մըտքով ու հոգիով, երկրիս վրայ ցաւ գոյութիւն պիտի չունենար: Սակայն քանի որ մարդս շատ թերի է, անիկա հակամէտ է սխալմունքներ եւ յանցանքներ գործելու, որոնցմէ կը ծնին անխուսափելի խռովութիւններ եւ կըսկիծներ:

Ուստի, մարդկային նեղութիւններուն շատ խոշոր մէկ զանգուածը պէտք է ուղղակի վերագրել, մարդոց թերութիւններուն եւ յանցանքներուն: Երբոր, մարդոց ցաւերը մօտէն հետազօտելու ըլլաս, պիտի գտնես որ անոնց մեծագոյն մասին խկական պատճառն է անհատի մը տգիտութիւնը, կամ սխալմունքը եւ կամ անօրէնութիւնը:

Օրինակի համար, առ հիւանդութիւնը: Որքա՞ն անձինք կը չարչարուին հիւանդութեանց անողոք ճիւղերուն մէջ: Սակայն ո՞վ է հիւանդութեանց պատասխանատուն: Անշուշտ, կան կարգ մը հիւանդութիւններ, որոնց համար մարդ պատասխանատու չի կրնար նկատուիլ: Սակայն Փիզիքական տկարութեանց մեծագոյն մասին ստոյգ պատասխանատուն մարդը ինքն է: Երբոր մարդ մը առողջապահական կանոններու կարեւորութիւն չընծայեր, բնականօրէն եւ անխուսափելիօրէն անոր վնասակար հետեւանքները կը կրէ: Շատ մը մարդիկ հիւանդ կ'ըլլան, քանզի իրենց մարմինները մաքուր չեն պահեր, բաւարար սնունդ չեն առներ, եւ կամ որկրամոլութեամբ պէտք եղածէն աւելի կ'ուտեն, օդատուն եւ լուսաւէտ բնակարաններու մէջ չեն ապրիր, բաւականաչափ մարդանոց չեն ըներ, իրենց յոգնած ու մաշած մարմիններուն կը զլանան հարկաւոր եղած հանգիստը եւ քունը: Եւ ասոնց հետեւանքը ըլլալով, Փիզիքապէս կը տկարանան, եւ իրենք զիրենք կը նշաւակեն սոսկալի հիւանդութեանց անողոք միջբոստներուն: Զղային հիւանդութիւնները,

որոնք ներկայ դարուս մէջ ահարեկիչ համեմատութեամբ կը շատնան, բնական հետեւանքներն են արդի ժամանակներուն յատուկ եղող անբնականոն, գեղիս, յուղումնալից ու ջղազրգիւ կենցաղավարութեան :

Շատ մը հիւանդութեանց բուն պատճառը մարդոց անզգուշութիւնն ու անհոգութիւնն է : Կարմրախտի նման տարափոխիկ հիւանդութիւններ, ուրիշներուն կը փոխանցուին շփումով : Մարդ թոքախտէն կը բռնուի, երբոր թոքախտաւորի մը հետ նոյն յարկին տակ կը բնակի, եւ նոյն ամանէն կ'ուտէ : Ժանտախտի եւ հնտախտի նման վարակիչ ախտերէն անոնք կը վարակուին, որոնք իրենց կերած կերակուրներուն եւ խմած ջուրերուն հոգ չեն տանիր : Թիւրքիոյ մէջ երբոր այս տեսակ վարակիչ ախտեր ծայր կուտային, տասն անգամ աւելի թուրքեր կը մեռնէին քան թէ Հայեր, քանզի Հայերը գիտէին աւելի զգոյշ ըլլալ քան թէ թուրքերը : Սմերիկայի մէջ, երբ տարափոխիկ հիւանդութիւն մը կ'սկսի, բժիշկները անմիջապէս անոր տարածումը կ'արգելեն խստապահանջ արգելափակումով : Եթէ այս տեսակ կանխազգուշութիւններ չառնուէին, անկարելի պիտի ըլլար Փիլատելֆիոյ պէս խոշոր քաղաքներու մէջ ապրիլ :

Վենեզական ախտերու երեսէն միլիոնաւոր անձեր կը տանջուին եւ կեանքեր կը քանդուին, քանզի մարդիկ կ'անտեսեն մարդկային եւ աստուածային օրէնքները : Փրանկախտաւոր մարդ մը իր տուայտանքներուն համար զԱստուած պարսակելու պատճառ մը չունի : Երբոր մէկը իր ձեռքը կրակին մէջը խոթէ, անիկա բնականաբար կ'այրի : Կրակով չի խաղացող մէկը այրումէ գերծ կը մնայ :

Ատամնաբոյժները կը յայտարարեն թէ երբոր ակուաներուն հարկաւոր եղած խնամքը տրուի, անոնք երբէք չեն փտտիր (decay) : Թէ որ այս է եղելութիւնը,

եւ մեր ակուաներուն փտտումը կը շարունակուի, ո՞Վ է պատասխանատուն :

Վերոյիշեալ իրողութիւնները մեզ կը հասցնեն սա եզրակացութեան թէ, երբեմն բացառութիւնները յարգելով, Աստուած մեզ հիւանդ չի շիներ, հապա մենք զմեզ հիւանդ կը շինենք, առողջապահական օրէնքներուն անաստելով : Նոյն իսկ բացառութեանց կարգին մէջ դասուած ցաւերը, հաւանաբար անգիտակցաբար գործադրուած օրինազանցութեանց, ուղղակի եւ կամ շեղակի պտուղներն են : Կատարելապէս օրինապահ մարդ մը, կրնայ կատարելապէս առողջ կեանք մը անցնել :

Այս առիթով, պատեհ պիտի ըլլայ իմացնել որ արդիւնքի տեսակէտէն շատ տարբերութիւն չընէր թէ մարդ սխալմունքը գիտակցաբար կը գործէ թէ անգիտակցաբար : Երկուքն ալ նոյն արդիւնքը կ'արտադրեն : Ինչպէս որ մարդ մը իր գիտակցաբար գործած յանցանքներուն հետեւանքէն չի կրնար ազատ մնալ, նոյնպէս ալ իր անգիտակցաբար գործած սխալմունքներու հետեւանքէն չի կրնար խուսափիլ : Դուն պատիժ գերծ չես մնար, սխալմունք մը անգիտակցաբար գործելուդ համար : Եթէ մէկը չգիտնալով, փոխանակ դեղ խմելու դալ մը թոյն կը խմէ, իր տգիտութեան համար չի չքմեղանար, կրկին կը թունաւորուի : Այսպէս ալ անգիտաբար անօրէնութիւն գործող մէկը իր արարքին պատիժը կը կրէ, սակայն անոր պատիժը բազդատաբար թեթեւ կ'ըլլայ : Որքան որ կ'աւելնայ մարդու մը գիտութիւնը, նոյն համեմատութեամբ կ'աւելնայ նաեւ անոր պատասխանատուութիւնը :

Առնենք նաեւ առեւարական ասպարէզին մէջ պատահած ճախողութիւնները, որոնց երեսէն շատեր կը տառապին : Ես կ'ընդունիմ թէ, երբեմն մարդուս կամքէն ան-

կախ փորձանքներ կը պատահին: Զօրօրինակ, աշխարհաւեր պատերազմի ընթացքին Հայեր իրենց տեղերէն ու տուներէն տեղահանուեցան: Եւ բազմաթիւ հարուստ Հայեր, այս դժբաղդութեան հետեւանքով, տնանկ ու սընանկ եղան: Երբեմն կը պատահի որ մարդ մը սաստիկ երկրաշարժի մը եւ կամ քանդիչ կիկլոնի մը աղէտին կը հանդիպի, եւ իր բոլոր ստացուածքը մէկ րոպէի մէջ կը կորսնցնէ: Ասոնք սոսկալի աղէտներ են, որոնց վրայ մարդ ուժ չունի, եւ որոնց համար պատասխանատու չէ: Սակայն կը հանդիպին շատ մը փորձանքներ ալ, որոնց համար մարդս ուղղակի կամ անուղղակի պատասխանատու է:

Զօրօրինակ, կը տեսնես մարդ մը որ ինչ գործի ալ ձեռնարկէ, անյաջող դուրս կուգայ: Եթէ մօտէն քննելու ըլլաս, պիտի տեսնես թէ այդ անձը այս դժբաղդութեան մէջ բաժին մը ունի: Կամ այն անձը դանդաղ եւ յամրաշարժ է: Եւ կամ անընդունակ է ոեւէ բան սորվելու: Եւ կամ անհաւատարիմ է իր գործին մէջ: Եւ կամ անտենչ է իր լաւագոյնը ընելու եւ արտադրելու համար: Եւ կամ ծայրայեղօրէն ծոյլ է: Շատերուն գործի մէջ չի յաջողելուն պատճառը պարզապէս ծուլութիւնն է:

Կը տեսնես ուրիշ մարդ մը, որ արհեստաւոր մըն է, բայց յաջողութիւն չի գտներ: Անոր ալ վրիպելուն պատճառները եթէ հետազօտելու ըլլաս, պիտի տեսնես թէ անիկա կամ գործելու փառասիրութիւնը չունի, կամ իր արհեստին մէջ պէտք եղած հմտութիւնը չունի, կամ մեթոտիկ գործունէութեան սիստեմ չունի, կամ գործին մէջ յարատեւելու ձիրքը չունի, կամ գործ կառավարելու իմացական կարողութիւն չունի. վերջապէս տեղ մը պակասութիւն մը ունի:

Կը տեսնես ուրիշ առեւտրական մը, որ առեւտուրի մէջ կը ձախողի. կը փորձէ ու կրկին կը ձախողի. նորէն կը փորձէ ու դարձեալ կը ձախողի: Եւ ամբողջ կեանքը առեւտրական ձեռնարկներու շարունակական վրիպակ մը կ'ըլլայ: Այս մարդն ալ անպատճառ թերութիւն մը ունի: Անիկա կամ անպատշաճ եւ անատակ է առեւտրական գործին, կամ առեւտուրի համար հարկաւոր եղող խոհականութիւնը եւ յառաջատեսութիւնը չունի, կամ իր գործին նուիրուած չէ, կամ առեւտուրի բարձրագոյն օրէնքներուն եւ պահանջներուն ներհակ կը գործէ, եւ ուղղութեամբ ու արդարամտութեամբ չի գործեր, եւ շուտ հարստանալու փափաքով կը նենգէ ու կը խաբէ: Կամ ընչաքաղցութեան անձնատուր ըլլալով, շահագիտական բազդախաղերու մէջ կը մտնէ, եւ անհնարին գիներով չէնքեր, կալուածներ, հողեր, այգիներ կը գնէ, եւ ասանկով ինքզինքը անհարկի վտանգի, եւ սոէպ կորուստի կ'ենթարկէ: Անխոհական շահագիտումներու (speculation) երեսէն, որքա՞ն դրամներ կորսուած եւ որքա՞ն հարստութիւններ փճացած են: Ամէն մարդ գիտէ թէ մեր ազգայինները միլիոնաւոր տօլարներ կորսնցուցին այս երկրին մէջ, շահագիտական գործառնութեանց ջրապտոյտին մէջ բռնուելով: Շուտ հարստանալու տենչանքը շատերը փոսի մէջ ձգեց:

Երկրիս վրայ տեսնուած անպատում թշուառութեանց մեծագոյն պատասխանատուն մարդը ինքն է: Մարդը իր թերութիւններով, սխալմունքներով եւ յացանքներով, ինքզինքը կը թշուառացնէ: Տարակոյս չկայ թէ աղքատութիւնն ու թշուառութիւնը աշխարհէս մեծաւ մասամբ կը վերնայ, եթէ մարդիկ վերցնեն զանոնք առթող պատճառները:

Այս աշխարհին մէջ ամէն յանցանք եւ անօրէնութիւն, իր պատիժը իրեն հետ միատեղ կը բերէ: Մարդ մը արբեցողութեան մոլին կ'ըլլայ, եւ այս մոլութեան իբր հետեանք, ինք՝ անկեալ ու չքաւոր կ'ըլլայ, իր ընտանիքը անհուն զրկանքերու եւ նեղութեանց կը մատնուի, եւ իր սերունդները անխոր զժբաղդութեանց ու տառապանքներու: Ուրիշ մարդ մը ոճիւր մը կը գործէ, եւ ցկեանս բանտարկութեան կը դատապարտուի: Ուրիշ մէկը կառավարական իշխանութեան դէմ կ'ապստամբի, եւ չարաչար կը պատժուի: Ուրիշ մէկը գողութիւն կ'ընէ, եւ նախատինքի ու պատուհասի կ'ենթարկուի: Ուրիշ մէկը կը բարկանայ, կամ կը նախանձի, կամ կ'ատէ, կամ կը չարախօսէ, եւ ասոնց համար ծանրօրէն կը տուժէ: Ամէն մէկ յանցանք իր պատիժը կը կրէ: Ամէն չարիք, չարագործի գլխուն չարիք կը բերէ: Սաղմոսերգուի ըսածին պէս. «Ամբարիշտը իր ձեռքին գործերովը որոգայթը կ'իյնայ (9:16.)»: Եւ կրկին, «Ան անօրէնութեան երկունքը բռնեց գանիկա. չարութիւն յղացաւ ու ստութիւն ծնաւ: Հոր փորեց ու խորունկցուց. բայց իր շինած փոսին մէջ ինք պիտի իյնայ. անոր չարութիւնը իր գլուխը պիտի դառնայ, ու անոր բռնութիւնը իր գագաթին վրայ պիտի իջնէ» (Սաղ. 7:14-16.):

Այս տիեզերքին մէջ օրէնք կը տիրապետէ: Երբոր անհատ մը նիւթական կամ բարոյական աշխարհին մէջ տիրապետող օրէնքներէն մէկը կը կոտորէ, ատոր համար իրաւացիօրէն կը պատժուի: Ինչպէս որ Առակախօսն ալ կը յայտարարէ. «Չարագործը իր անօրինութիւնները պիտի բռնեն, ու անիկա իր մեղքին չուաններովը պիտի բռնուի (5:22.)»: Ամէն անօրէնութիւն անկասկած իր պատիժը կը բերէ:

Սակայն պատիժ ըսելով պէտք չէ հասկնանք Փիղիքական տանջանք մը, որ գործուած յանցալից արարքին հետ կապակցութիւն չունի: Բուն պատիժը արարքէն անջատ եւ անկապակից կսկծանք մը չէ, այլ արարքին կցուած անախորժ փորձառութիւնն է, որ անոր անբաժան մի մասնիկը կը կազմէ: Պատիժ ըսուած բանը ուրիշ բան մը չէ, բայց եթէ սխալ արարքի մը գէշ հետեւութիւնը, վատ պատճառի մը վատթար արդիւնքը: Պատիժը անօրէնութեան բնական պտուղն է: Պատիժը, ըստ արարքի որակին, կրնայ Փիղիքական կամ բարոյական ըլլալ, բայց արարքին հետ միշտ սերտ կապ և առնչութիւն ունի:

Հետեւաբար, յանցաւորը պատժուելու համար, պատժողի մը պէտք չունի: Յանցաւորը ինքզինքը կը պատժէ: Անիկա իր խղճմտանքի ատեանին առջեւ կը դատապարտուի: Անիկա իր ձեռքով իր վրայ կ'իջեցնէ պատիժի խարազանը: Ճշմարիտ եւ իմաստալից են Առակախօսին սա խօսքերը. «Կատարեալներուն արդարութիւնը անոնց նամբան կը շտկէ. բայց անիրաւը իր անիրաւութիւնովը կ'իյնայ (11:5.)»: Շիտակ է Սաղմոսերգուին սա յայտարարութիւնը. «Ամբարշտին տրտմութիւնները շատ պիտի ըլլան:» Անօրէնը ինքզինքը կը նեղէ ու կը տանջէ:

Վերոյիշեալ դիտողութիւնները ամփոփելով կը հասնինք սա եզրակացութեան, թէ աշխարհին վրայ բազում ցաւեր ու նեղութիւններ կան, բայց անոնց մեծագոյն պտասխանատուն մարդը ինքն է: Շիտակ չի պիտի ըլլայ յայտարարել թէ բոլոր տառապանքներուն եւ աղէտներուն պատճառը մարդն է: Մարդու կամքէն անկախ, և պատժումի սահմանէն դուրս մնացող տառապանքներ ալ կան, որոնց ուրիշ առթիւ պիտի անդրադառնանք: Սակայն կրնանք ապահովաբար ըսել թէ ցաւերու շատ հըս-

կայ մէկ զանգուածը, թերեւս հարիւրին ինիսունը եւ կամ ավելին, ուղղակի մարդու սխալմունքին եւ օրինազանցութեան հետեւանքներն են: Այս պատճառաւ մարդը պատասխանատու է անոնց համար: Եթէ ասոնց երեսէն մարդը կը պատժուի, արդարօրէն կը պատժուի:

Հետեւաբար, իր կրած արդարացի ցաւերուն և տանջանքներուն համար, մարդս պատճառ եւ իրաւունք չունի զԱստուած մեղադրելու, հապա պարտի մեղադրել ինքզինքը: Երբ օրինապահը անպատիժ կը մնայ՝ մինչ օրինազանցը կը պատժուի, մարդուն կ'իյնայ օրէնքի եւ ուղղութեան ճամբուն մէջ քալել: Իսկ եթէ կը մերժէ քալել, իրաւունք չունի ուրիշ մը այլանկելու եւ դատապարտելու:

Այս պատճառաւ, շատ մը մարդոց Աստուծոյ դէմ բառձած տրտունջներն ու բողոքները բոլորովին անտեղի են: Աստուած զրկած չէ այդ տրտմութիւնները, հապա իրենք հրաւիրած են իրենց վրայ: Երբոր մարդը իր յանցանքը եւ պատասխանատուութիւնը կը տեսնէ, յայնժամ պիտի դադարի Տէրոջ դէմ դանդատելէ եւ սրդողելէ: Շատ իմաստալից եւ պատշաճ է մեր բնաբանին խօսքերը. «Ապրող մարդը ինչո՞ւ տրտունջ ընէ իր մեղքերուն պատիժին համար:»



Գ

ՄԵՂՔԻ ՊԱՏԻԺ

«Այս բաները բու ճամբաներդ ու գործերդ բերին բու վրադ. ասիկա բու չարութեանդ պտուղն է»:

ԵՐԵՄ. Գ. 18.

ԱՅՍ տիեզերքին մէջ օրէնք կը տիրէ: Ով որ սոյն օրէնքներուն կը հնազանդի, անիկա խաղաղութեան մէջ կ'ապրի. բայց ով որ անոնց կ'անսաստէ, նեղութիւններու եւ վնասներու կ'ենթարկուի: «Պատճառ եւ արդիւնք» ի օրէնքը տիեզերական օրէնք մըն է: Արդիւնքը թէ քանակով եւ թէ որակով արդիւնքին կապակից եւ համապատասխան է: Ինչ որ է պատճառին բնութիւնը, նոյնն է նաեւ արդիւնքին բնութիւնը: Ինչ որ է սերմին նկարագիրը, նոյնն է հունձքին նկարագիրը: Գէշ պատճառները գէշ արդիւնքներ կ'արտադրեն: Ընդհակառակը, աղէկ պատճառներ, աղէկ արդիւնք առաջ կը բերեն:

Այս պատճառաւ, ստէպ կարելի է արդիւնքի բնութեանէն կռահել պատճառին բնութիւնը: Վատթար պտուղէն կարելի է հետեւցնել, սերմին գէշութիւնը: Լեզի ջուրէն կրնաս մակաբերել աղբերակին լեղութիւնը: Ուստի ուր որ կը տեսնես գէշ երեւոյթ մը եւ կամ վիճակ մը, կրնաս վստահ ըլլալ թէ ատոր ետեւը կը կենայ գէշ պատճառ մը:

Այս աշխարհին մէջ ամէն ազգեցողութիւն հակազդեցողութիւն մը յառաջ կը բերէ: Ամէն արարք հականերդործութիւն մը կ'արտադրէ: Չի կայ ոեւէ շարժում որ առանց հետքի մնայ: Ամէն մէկ գործք, իր բնական ազդեցողութիւնը եւ ստիպողական արդիւնքը կը ձգէ: Այս արդիւնքը երբեմն աչքի կ'երեւի, երբեմն չ'երեւիր. երբեմն բացայայտ կ'ըլլայ, երբեմն դաղտուկ կը մնայ: Հետեւաբար, արդիւնքի դաղտնի կամ անծանօթ մնալէն, պէտք է հետեւեցնենք թէ երբեմն արարքներ ապարդիւն կը մնան, երբեմն բարութիւններ անվարձ կը մնան, երբեմն յանցանքներ անպատիժ կը մնան: Տիեզերական օրէնքը ասոր թոյլ չի տար, եւ չի կրնար տալ:

Փիղիքական մարդերու մէջ ներգործող այս օրէնքը, բարոյական եւ հոգեւոր ոլորտներու մէջ ալ կը ներգործէ: Սակայն, իր բնութեան բերմամբ, կարելի չէ ասոր ներգործութիւնը այնքան յստակօրէն տեսնել բարոյական աշխարհին մէջ, ինչպէս կը տեսնենք նիւթական աշխարհին մէջ. կարելի չէ պատճառի եւ արդիւնքի փոխ-յարաբերութիւնները, անտեսանելի մարդի մը մէջ որոշել այնքան ճշգրիտօրէն, ինչպէս կարելի է որոշել տեսանելի ոլորտներուն մէջ:

Ըսուածը բացատրենք: Մարդ մը պատուհանէն վար կ'իջնայ և ոտքը կը կոտրի. այս դիպուածին մէջ դիւրին է տեսնել ձգողականութեան օրէնքին կիրարկումը: Մէկուն ձեռքը կրակին կը դպչի եւ կ'այրի. ասիկա հասկնալ դիւրին է: Ուրիշ մը աչքին մէջ փուշ կը մխրձուի, եւ աչքը կոյր կ'ըլլայ. ասիկա ըմբռնել դիւրին է: Ուրիշ մը առողջապահական կանոնները կը կոտրէ եւ հիւանդ կ'ըլլայ. ասիկա բացատրել դիւրին է: Սակայն, մարդ մը սուտ կը խօսի, ասիկա ենթակային և այլոց ի՞նչ վնասներ կը հասցնէ, ասիկա որոշապէս ըսել կարելի չէ: Բարոյական աշխարհին մէջ ի յայտ եկող շարիքներուն, ինչ պատճառ-

ներէ գոյացած ըլլալը հետադատել, հասկնալ, բացատրել, այնքան դիւրին գործ մը չէ: Բարոյական աշխարհին մէջ պարզուող անկարգութիւնները բացատրելու համար, մարդը հեռաթափանց տեսողութիւն, նրբազգած խիղճ, զգայուն սիրտ, ճշմարտասէր ոգի եւ հոգեւոր ըմբռնողութիւն ունենալու է: Անոնք որ զուրկ են այս էական յատկութիւններէն, երբոր կը մատնուին այլ եւ այլ նեղութիւններու, շփոթութեան մէջ կ'իջնան, եւ շուարած ու սրդողած կը հարցնեն, «Այս վիշտերը ի՞նչու կուզան. այս փորձանքները ո՞ւրկէ կուզան»: Իսկ եթէ անոնք բարոյական հասկցողութիւն եւ հոգեւոր ըմբռնում ունեցած ըլլային, պիտի տեսնէին թէ այդ ցաւերը բարոյական անկարգութեանց եւ յանցանքներու պտուղներն են:

Մենք պէտք է որոշապէս գիտնանք թէ բարոյական ամէն մէկ յանցանք, իր փոխադարձ վնասը կը հասցնէ: Ամէն մեղք, իր պատիժը կ'ընդունի: Երբեմն տեսանելի եղանակներով, երբեմն ալ անտեսանելի եղանակներով, սակայն անհրաժեշտօրէն կ'ընդունի:

Օրինակի համար, նախանձը մարդս կը մերկացնէ իր ազնիւ զգացումներէն եւ բարի տենչանքներէն, եւ զայն ատելի վատութեանց կը մղէ: Նախանձը Յովսէփին եղբայրները դրդեց եղբօր դաւաճաններ ըլլալու: Բամբասող լեզուն, ուրիշներու բամբասանքներուն նշաւակ կը լինի: Ուրիշները դատաւիետող մէկը, ուրիշներէն կը չարախօսուի: Ան որ կ'աշխատի ուրիշները անպատուել, իր անունը կ'արատաւորէ: Ան որ կը ջանայ իր դրացին վար քաշել, ինքզինքը վար կը ձգէ: Ան որ դաւեր կը լարէ, իր դաւերէն կը բռնուի: «Փոս փորողը ինք մէջը պիտի իյնայ. եւ ան որ քար կը գլորէ, իրեն պիտի դառնայ»: (Առակ. 26.27) Ան որ ոխ կը պահէ, իր ոխին կեր կ'ըլլայ: Ազգագոյի Համան, Եբրայեցի Մուրթթէին հանդէպ պահած ատե-

լուծիչները յազեցնելու համար, յիսուն կանգուն բարձր փայտ մը պատրաստեց, բայց սոյն փայտը իրեն համար իբրեւ կախաղան ծառայեց: Բազմաթիւ անմեղ Հայերու արիւնը թափող վայրագ թուրք դահիճներէն եւ արիւնարբու իշխաններէն շատերուն բաղդին վերջապէս վիճակուեցաւ անողոք կախաղանը: «Ամէն սուր առնողները սրով պիտի կորսուին»: (Մատթ. 26.56): Անոնք որ նենգութեան ճամբուն կը հետեւին, հուսկ յետոյ իրենց խաբեպատիր լարերուն մէջ կը բռնուին: Յակոբ Նահապետ իր եղբայրը խաբեց. վերջը իր որդիներուն կողմէն խարուեցաւ. եւ խաբեբայութիւնը իբր ժառանգութիւն ձգեց իր յաջորդ սերունդներուն: Ստախօսութիւնը մարդուն յարգն ու վարկը կը կտորէ: Եւ անոր հողին կը մթաղնէ: Անանիա եւ Սափիրա ստախօսութեան երեսէն կորսուեցան: Ազահութիւնը մարդս կը մոլորեցնէ ուղիղ արահետէն, եւ հողիին ծովը կը քամէ: Գէեղին ընչասիրութեան երեսէն զարչելի բորոտութեամբ զարնուեցաւ: Արբեցութիւնը մարդս խենդ ու խայտառակ կը շինէ: Յանկութիւնը մարդս կ'անասնացնէ, եւ աստուածային շնորհքէ կ'անջատէ: Իր տուփանքին պատճառաւ, Սամփսոն զրկուեցաւ՝ նախ իր ուժէն, ետքը իր աչքերէն եւ հուսկ յետոյ իր կեանքէն:

Ամէն չարիք գործողը չարիք կը գտնէ: Ուեւ մեղք անպատիժ չի մնար: Ամէն մէկ մեղք անպատճառ իր պատիժը կը կրէ: Մեղքը աստուածային օրէնքներու բեկանումն է: Ով որ Աստուծոյ կանոնները կը կտորէ եւ անոր դատաստաններուն դէմ կ'ըմբոստանայ, անիկա նեղութեան ու փորձանքի մէջ կ'իյնայ: Սաւուղ թագաւոր իր անհնազանդութեան պատճառով իր դահէն ու թագէն զրկուեցաւ: Մեղքին հետեւանքը անկում, կործանում եւ մահ է:

Շատեր զԱստուած կ'այսպէս են, իրենց վրայ եկող փորձանքներուն համար: Սակայն մեղաւորը, իր ձեռքովը ինքզինքը կը պատժէ: Չարագործը իր ձեռքովը իր գլխուն վրայ չարիքներ կը բերէ: Ինչպէս որ Երեմիա Մարգարէն ալ կը յայտարարէ, «Այս աղէտները քու քաղաքներդ ու գործերդ բերին քու վրայ. ասիկա քու չարութեանդ պատուին է»: Աստուած մարդս քմահաճօրէն չի պատժեր: Մարդը իր անմտութեամբ եւ ապօրինութեամբ, ինքզինքը կը պատժէ: Յուդան ո՞վ կախեց: Անիկա ինքզինքը կախեց:

Արդարեւ, չարագործը ուրիշները անհանդիստ կ'ընէ, սակայն ինքզինքը ամենէն շատ անհանդիստ կ'ընէ: Եսայի Մարգարէին յայտարարութիւնը ճշմարիտ է. «Ամբարիշտները պիտուի ծուլու պէս եմ, որ չի կրնար հանդարտիլ, որուն ջուրերը տիղմ ու ցեխ դուրս կը նետեն: Ամբարիշտները խաղաղութիւն պիտի չունենան, կ'ըսէ իմ Աստուածս»: (57.20,21):

Հետեւարար ամենէն յիմարական քայլը զոր մարդ մը կրնայ առնել, Աստուծոյ կամքին հակառակ ընթանալն է: Մարդուս համար ամենէն վնասակար բանը Աստուծոյ օրէնքներուն հակառակ գործելն է: Անկարելի բան է զԱստուած յաղթահարել: Անկարելի բան է Աստուծոյ օրէնքները առանց վնասուելու բեկանել: Ով որ կը փորձէ Աստուծոյ օրէնքները կտորել, ինք կը կտորուի: Մարդս դժուարաւ ինքզինքը կը խաբէ. ո՞ւր կը մնայ Ամենազէտ Իսկը խաբել:

Ինչպէս որ անհատներ, նոյնպէս ալ ազգեր, հպատակ են աստուածային օրէնքներուն: Ազգեր իբրեւ հաւաքական մարմիններ են թակայ են Ամենակալի դատաստաններուն: Ազգերն ալ արտօնութիւն չեն վայելեր բարոյական օրինաց դէմ գործելու: Եւ թէ որ գործելու ըլլան, նեղութիւններ

րու եւ կսկիծներու կը հանդիպին : Ազգային յանցանքներ ազգային վիշտեր կ'ստեղծեն : Ազգային անօրէնութիւններ, ազգային աղէտներ կը ծնին : Ամէն ազգ կը պատժուի իր մոլութիւններուն ու չարութիւններուն համար : Ամէն ազգ ծանր տուգանք կը վճարէ իր անհնազանդութեան համար : Չար ըլլալը մարդոց վրայ շատ աւելի սուղի կը նստի քան թէ բարի ըլլալը :

Իսրայէլացոց պատմութիւնը, այս եղելութեան իբր պերճախօս վիճան, աշխարհին առջեւ դրուած է, օրինակ եւ դաս ըլլալու համար : Ուրիշ ցեղերու պատմութիւններն ալ կը հաստատեն Իսրայէլի պատմութեան դատավճիռը : Քանանու երկիրը չի մտած Մովսէս ըսաւ Իսրայէլի ժողովուրդին, «Թէ որ Աստուծոյ պատուիրանքները ի դործ դնէք, Աստուած իր առատ ու բազմապիսի օրհնութիւնները պիտի թափէ ձեր վրայ եւ ձեր բոլոր ունեցածներուն վրայ : Բայց եթէ Անոր խօսքերը չի պահէք, երկնից նդովքին տակ պիտի իյնաք, եւ բազմազան չարիքներու ու դժբաղդութեանց պիտի հանդիպիք : (Կարգա Գիրք Բ. Օրինաց 28րդ գլուխ) :

Դատաւորաց ժամանակաշրջանին, Մովսէսի այս բաժները տառականօրէն կատարուեցան : Իսրայէլացիք, երբոր մոռցան աստուածատուր կոնոնները եւ Աստուծմէ ուծացան, ազգային այլազան անձկութեանց ու դժբաղդութեանց մէջ ինկան : Սակայն, երբոր Աստուծոյ դարձան եւ անոր պատուէրներուն հնազանդեցան, թշնամիներու կեղեքումներէն աղատելով, անդորրութիւն եւ բարեյաջողութիւն վայելեցին : Երբոր անոնք իրենց մեղքերէն ապաշխարեցին, Տէրը անոնց ողորմութիւն ցուցուց, անոնց մէջէն ազատարարներ հանելով :

Թագաւորներու ժամանակամիջոցին ալ, Իսրայէլի ամենէն հզօր ու բարգաւաճ շրջանը զուգադիպեցաւ, այն

շրջանին, երբ արդարութիւնն ու աստուածաշտութիւնը ամենէն բարձր եւ ծաղկեալ վիճակին մէջ էր : Դաւիթի և Սողոմոնի շրջանը կը ներկայացնէ Իսրայէլի փառքին ու զօրութեան գէնիթը : Միեւնոյն շրջանին մէջն էր նաեւ որ ժողովուրդը բարոյապէս կը կենար իր ամենաբարձր մակարդակին վրայ : Սողոմոնէն վերջ, Իսրայէլացիք բարոյապէս ինկան, եւ քաղաքականապէս տկարացան : Բարոյական անկման յաջորդեց ազգային փլուզում : Ժողովուրդը Աստուծմէ հեռացան : Անոր պատուիրանքները մոռցան : Անոր օրէնքները կոտորեցին : Փոխանակ կենդանի Յճովան պաշտելու, անկենդան մամոնան եւ կուռքերը պաշտեցին : Ինչքի եւ դրամի ետեւէ ինկան : Հարստութիւն դիզելու տենչին մէջ, ուղղամտութիւնն ու առաքինութիւնը մոռցան : Ազահ եւ դրամապաշտ եղան : Իրաւունքը հովերուն տուին : Տկարները ոտնակոխ ըրին : Որբերու եւ որբեւայրիներու իրաւունքները չորթեցին : Դատարանները փոխանակ արդարութեան մեհեաններ շինելու, կաշառակերութեան օրջեր շինեցին : Իրաւունքը փոխանակ արդարին տալու, զօրաւորին տուին : Անզօրը բռնակալին կեր ըրին : Գութն ու ողորմութիւնը հեզնեցին : Անիրաւ վաստակով հաճոյական պարտէզներ եւ փառաւոր ապարանքներ շինեցին : Բեհեղեայ հանդերձներով եւ անգին դոհարեղէններով իրենց մարմինները պըճնաղարգեցին : Փղոսկրեայ անկողիներու վրայ պառկեցան : Բազոսի դիցուհիին երկրպագութիւն ըրին : Հաճոյամոլ դարձան : Հեշտանքներու եւ ցանկութեանց անձնատուր եղան : Պղծութիւն եւ անառակութիւն գործեցին : Աստուծոյ բոլոր բարոյական օրէնքները աւրեցին :

Մարգարէները չէին կրնար անփոյթ եւ անտարբեր կենալ ի տես այս մոլորութեանց : Իբրեւ տեսանողներ, անոնք նշմարեցին որ այս ընթացքին վախճանը վտանգա-

լից է : Անոնք կռահեցին թէ այս ճամբան դահավէժի մը վրայ պիտի յանգի : Անոնք յստակօրէն տեսան թէ անօրէնութիւնը չարիք պիտի յղանայ : Անոնք նշմարացին թէ այս պղծութիւնները պատուհաս պիտի բերեն : Անոնք գիտցան թէ անբարոյականութիւնը անկում պիտի պատճառէ , եւ չարութիւնը աղէտ : Եւ անոնք իրենց ազգակիցները զգուշացուցին իրենց սխալ և կորստաբեր ընթացքէն : Եւ ջանացին որ զանոնք ազատ պահեն անխուսափելի նեղութիւններէն : Անոնք յայտնապէս կանխագուշակեցին դալիք փորձանքը : Անոնք աղաղակեցին թէ սոսկալի եւ մօտալուտ փոթորիկ մը կը պատրաստուի : Անոնք աշխատեցան տունը՝ դեռ չի բռնկած՝ հրդեհէն ազատել :

Սակայն օգուտ չ'ըրաւ : Անոնց խօսքերուն մտիկ ընող չեղաւ : Անոնց ազգարարութեանց անսացող չի գտնուեցաւ : Անոնց աղերսանքներուն ուշադրութիւն տուող չեղաւ : Ժողովուրդը ետ չի դարձաւ իր Աստուծոյն : Իրենց ճամբաները չ'ուղղեցին : Իրենց յանցանքներուն գիտակցելով չ'ապաշխարեցին : Եւ կոյրօրէն շտապեցին դէպի դահավէժը : Եւ մեռելային անփութութեամբ , երբոր հաճոյքի պարտէզներուն մէջ արբշիտ կը հրճուէին , աղէտի հեղեղը յանկարծակի իրենց վրայ հասաւ , եւ զիրենք աւլեց ու տարաւ : Անոնց չէն աւանները գերեզմաննոցներու , և բարգաւաճ երկիրը աւերուկոյտներու վերածուեցաւ : Ժողովուրդը կոտորակուեցաւ , եւ մնացորդը աշխարհի չորս կողմը ցրուեցաւ :

Մարգարէները այդ դարու ամէնէն հեռատես տեսանողներն էին : Անոնք խորաթափանց տեսողութեամբ կանխատեսեցին ապագային տեղի ունենալիք բաները : Անոնք որոշ տեսան թէ ազգային ընթացքը ուր պիտի վախճանի , ազգային բարքն ու վարքը ինչպէս պիտի արդիւնաւորուի : Անոնք ազգին հիւանդութիւնը ախտազըն-

նող քաջահմուտ բժիշկներ էին : Սակայն , հոգեւոր հասկցողութենէ զուրկ եղող ժողովուրդը անոնց խօսքերուն արժէք չ'ընծայեց : Մէկ մասը զանոնք ծաղրեցին , միւս մասը զանոնք արհամարհեցին , ուրիշ մաս մըն ալ զանոնք հալածեցին իբրեւ ազգային դաւաճաններ : Մարգարէներէն շատեր ողջակիղուեցան , սակայն անոնց յայտնած ճշմարտութիւնները հաստատուեցան : Եւ բանը բանէ անցնելէ յետոյ , Ժողովուրդը ըմբռնեց թէ անոնք Աստուծոյ կողմէն խօսող պատգամախօսներ են եղեր , ճշմարտութիւնը հռչակող մունետիկներ են եղեր , ժողովուրդը կործանումէ փրկելու աշխատող ազգասէրներ են եղեր :

Թէ Իսրայէլի եւ թէ ուրիշ ազգերու պատմութիւնները բացորոշ կերպով կը վկայեն թէ ազգային ապականութիւնը ազգային քայքայման մէջ կը յանգի : Ուր որ ազգային անկում կայ , հոն ազգային փտութիւն կայ : Բարոյական առողջութեան տէր եղող ոեւէ ազգի իյնալը եւ կորսուիլը , դեռ արձանագրուած չէ մարդկային պատմութեան մէջ : Ազգի մը ամենամեծ թշնամիները դուրսէն չեն , հապա ներսէն են : Ինչպէս անհատներու , նոյնպէս ազգերու համար ճշմարիտ է թէ անոնք իւրեանց լաւագոյն բարեկամներն են , ինչպէս նաեւ վատթարագոյն սոսիները :

Ազգ մը կամ պետութիւն մը դուրսէն եկած յարձակումներէն չ'իյնար , այլ ներսէն բղխած ապականութիւններէն կ'իյնայ : Ազգ մը հրացանի գնդակներով չի մեռնիր , իր մարմնոյն մէջէն ծագում առնող ախտերէն կը մեռնի : Ոչ թէ թշնամիներու բանակներ , հապա հոգիի քաղցկեղներ կը բնաջնջեն ժողովուրդները : Ազգի մը կործանման իրական պատճառներն են խաբէութեան , ստութեան , անիրաւութեան , դեղխութեան , շուայտութեան , ամբարտաւանութեան , ատելութեան եւ այս կարգի ուրիշ մոլու-

թեանց միջրոպներ: Մէկ խօսքով, ազգը կործանող բանը անօրէնութիւնն է, մեղքն է: Ընդհակառակը, ազգ մը քաջառողջ եւ հաստատուն պահող ազգակիներն են, արդարութիւն, ճշմարտասիրութիւն, պարկեշտութիւն, ժուժկալութիւն, մաքրութիւն, կանոնապահութիւն, ընկերասիրութիւն և ասոնց նման ուրիշ առաքինութիւններ: Այսպիսի զրահներով զրահաւորուած ազգ մը ոչ մէկ բան կրնայ սասանեցնել:

Սակայն, երբ ազգի մը ներսի դին փտութիւն սպրդած է, անիկա վերջապէս պիտի իյնայ, հոգ չէ թէ որքան հզօր եւ հարուստ եղած ըլլայ. քանզի զայն վեր բռնող բարոյական նեցուկները փտած են: Երբոր յետադարձ ակնարկ մը նետենք հին պատմութեան վրայ, կը տեսնենք որ Եգիպտացոց, Ասորաց, Բաբելացոց, Պարսից, Յունաց և Հռովմայեցոց պէս հսկայ կայսրութիւններ, որոնք իրենց թեւերը տարածած էին մինչև աշխարհի ծայրերը, եւ ժողովուրդները կը սոսկացնէին իրենց անդիմադրելի զօրութեամբ, այժմ անհետացած են. քանզի երբ անոնք ամէն կերպով հուժկու եւ հարուստ էին, բարոյապէս սնանկացած էին: Ինչպէս որ ներքուստ որդերէն կրճուած վիթխարի կաղնի մը չի կրնար դիմանալ բուռն փոթորիկին և գետին կը տապալի, անանկ ալ ներքնապէս որդերէն կրճուած ազգ մը, դուրսէն եկող ողէտներու չի կրնար դիմանալ եւ կ'իյնայ: Առողջ կաղնի մը փոթորիկներէն ոչ միայն չի տապալիր, հապա ալ աւելի կ'արմատանայ, կ'ամրապնդուի: Այսպէս ալ, բարոյական առողջութիւն ունեցող ազգեր չեն տապալիր արտաքին մորիկներէն, ընդհակառակը ալ աւելի կ'արմատանան ու կը զօրանան:

Հետեւաբար, կարելի է իբրեւ ընդհանուր կանոն մը յայտարարել թէ ազգի մը անկման պատճառը, ազգային

ապականութիւնը եւ խտաւորութիւնն է: Եւ ազգային աղէտը, ազգային յանցաւորութիւնը մատնանշող նշան մըն է: Ազգերու գլխուն յումպէտս եւ առանց պատճառի փորձանքներ չեն դար: Միայն այն ազգերը դառն փորձանքներու կ'ենթարկուին, որոնք կը չեղին Աստուծոյ դժած ճամբաներէն:

Մեր ազգն ալ այս ընդհանրական կանոնին բացառութիւն մը չի կրնար կազմել: Մեր գլուխը եկած ահաւոր փորձանքին մէջ, մեր ազգը բոլորովին անմեղ եղած չի կրնար ըլլալ: Ո՞վ կրնայ յանդգնութիւնը ունենալ յայտարարելու թէ մենք մեր տառապանքներուն մէջ ոեւէ բաժին չ'ունեցանք, մեր զժբաղդութեանց ոեւէ պատճառ չի տուինք, մեր աղէտներուն մէջ ոեւէ պատասխանատուութիւն կամ յանցանք չ'ունեցանք: Երկրիս վրայ, ինչպէս որ անմեղ անհատ մը չ'կայ, նոյնպէս ալ անմեղ ազգ մը չ'կայ: Խորագէտ տեսանող մը ըլլալու հարկ չէ կայ, տեսնելու համար մեր ողբալի յանցանքները, տրդիւթութիւնները, սխալմունքները: Բնականաբար շիտակ չի պիտի ըլլար մեր փորձանաց ամբողջ պատասխանատուութիւնը բեռնել մեր գլխուն: Ուրիշներ ալ մեղսակից են մեր տառապանքներուն մէջ, սակայն մեր հիմակուան խօսքը անոնց մասին չէ: Ամէն ոք իր մեղքերուն համար պատասխանատու է: Մենք մեր մեղքերը որոնենք, եւ խոնարհաբար խօստովանինք:

Ընդհանուր աղէտներու մէջ, թացերն ալ բնականաբար կ'այրին չորերուն հետ: Սակայն հրդեհը չ'սկսիր, մինչեւ որ չորերը թացերէն շատ աւելի չ'ըլլան: Ո՞վ կրնայ հաւաստել թէ մենք ազգովին արդարութիւնն ու ճշմարտութիւնը սիրած ենք, Աստուծոյ ուզած ճամբաներուն մէջ քալած ենք, անկեղծ բարեպաշտութիւնը եւ կենդանի հաւատքը պահած ենք, Աստուծոյ մօտ ապրած եւ

անոր խօսքերուն հնազանդած ենք: Զ՞ է որ մեր դիտու-
թիւնը շատ, իսկ մեր կեանքը չափազանց թերի եղած է:
Զ՞ է որ մեր մտքերը լուսաւորուած են, մինչ մեր հոգի-
ները մթութեան մէջ մնացած են:


Աւելի իմաստուն, վեհանձն ու քաջ քայլ մը առած
պիտի ըլլանք, թէ որ փոխանակ մեր յանցանքները պար-
տըկելու, զանոնք տեսնենք եւ խոստովանինք: Մեզի հաս-
նող չարիքները մեզի համար բարերար պիտի ըլլան, թէ
որ անոնք մեզ զգաստացնեն, մեզ զղջումի մղեն, եւ մեզ
զրգոեն մեր ճամբաները ուղղելու: Ազգային աղէտները
մեզի համար ծպտեալ օրհնութիւն պիտի ըլլան, թէ որ
անոնք մեզ առաջնորդեն ազգային ապաշխարութեան:

Վարդանանց պատերազմը կը ներկայացնէ Հայկական
պատմութեան ամենէն պատկառելի էջը, ամենէն փառա-
պանծ դրուագը: Այդ պատերազմը վճռած է մեր ճակա-
տագիրը, եւ գծած է մեր ազգային ուղղութիւնը: Աւար-
այրի ճակատամարտին կենսական նշանակութիւնը ասոր
մէջ կը կայանայ, թէ հոն մեր քաջարի ազգակիցները հե-
րոսարար մարտնչեցան հիմնական սկզբունքի մը համար,
ճշմարիտ կրօնքի մը համար եւ իրենց արեան դնով պահ-
պանեցին իրենց հաւատքը: Անոնք ամէն բանէ վեր դասե-
ցին Աստուած, Քրիստոս, հաւատք: Եւ անոնք թէպէտեւ
նահատակուեցան, բայց եւ այնպէս պանծացուցին Հայ
ազգին պատիւը, պաշտպանեցին հոգիի եւ խղճի ազատու-
թիւնը:

Հայ ազգը չի կրնար մեռնիլ, եւ չի պիտի մեռնի, որ-
քան ատեն որ կը պահէ Վարդանի հոգին, կ'առաջնորդուի
Վարդանի սկզբունքներով, կը տողորուի Վարդանի դա-
դափարականներով, կը ներշնչուի Վարդանի հաւատքով:
Հայը կենդանի եւ անյաղթելի պիտի մնայ որքան ատեն որ

ամուր կը կառչի Քրիստոնէական անկեղծ հաւատքին, եւ
կը մարմնացնէ Քրիստոնէական առաքինութիւնները: Բա-
րոյական մեծ արժանիք ցուցադրող ազգ մը կ'անմահանայ
ի հարկէ:

Թէ որ մենք նուիրուինք մեր մարտիրոսներու խէչալ-
ներուն եւ հաւատքին, եւ անոնց նման ճշմարտութեան եւ
արդարութեան համար հոգի տալու պատրաստ ըլլանք,
յայնժամ Թուրքին բռնակալութիւնը անկարող պիտի ըլլայ
մեզ ընկճելու, Թուրքին սուրը անկարող պիտի ըլլայ մեզ
ընաջնջելու: Եթէ մենք նահատակուինք իսկ, կրկին պի-
տի ապրինք, քանզի ապրելու արժանաւորութիւնը պիտի
ունենանք: Ծշմարտասէր ազգ մը չի տապալիր: Արդար
ցեղ մը չի յաղթահարուիր: Աստուածապաշտ ժողովուրդ
մը չի կորսուիր, եւ չի կրնար կորսուիլ:



ՑԱԻԵՐՈՒ ԻՄԱՍՏԸ

«Աղէկ եղաւ ինձի որ վշտացայ,
որպէսզի բու կանոններդ սորվիմ»:

ՍԱՂ. ճԺԹ. 71.

ՄԵՐ նախորդ քարոզին մէջ դիտել տուինք թէ ամէն արարք իր հակադրեցութիւնը կ'ունենայ, ամէն յանցանք իր դէշ հետեւութիւնները կ'արտադրէ. և ամէն մեղք իր պատիժը կը կրէ: Ասիկա տիեզերական օրէնք մըն է, որմէ խուսափիլ կարելի չէ: Աստուած, իբրեւ օրինաց տէրը եւ հսկիչը, օրինապահներուն կողմնակից եւ վարձահատոյց կ'ըլլայ, իսկ օրինազանցներուն հակառակորդ և պատժահատոյց կ'ըլլայ: Տէրը կը հատուցանէ չարութիւն ընողին իր չարութեան համեմատ: Տէրոջ համար, հնազանդութիւնը խնկարոյր եւ ընդունելի պատարագ է, իսկ ըմբոստութիւնը ատելի գարշութիւն: «Տէրը ամբարիշտին քամբայէն կը գգուի. բայց արդարութեան հետեւողը կը սիրէ»: (Առակ. 15.9):

Ինչպէս որ անհատներ, նոյնպէս ալ ազգեր հպատակ են բարոյական օրէնքներու իշխանութեան: Անհատներուն ման, ազգերն ալ, արդարութեան համար կը վարձատրուին, եւ անօրէնութեան համար կը պատժուին: Ինչպէս որ Սամուէլ խօսեցաւ Իսրայէլի ժողովուրդին. «Եթէ Տէ-

րոջը խօսքին հնազանդութիւն չ'ընէ՛ք, ու Տէրոջը հրամանին դէմ կեցա՛ք, այն ատեն Տէրոջը ձեռքը ձեր վրայ եւ ձեր հայրերուն վրայ պիտի ըլլայ» (Ա. Թագ. 12.15) : **Ճշմարիտ է Հրէայ պատմաբանին, Իսրայէլի պատմութեան մասին տուած վկայութիւնը.** «Տէրը շատ անգամ վերկեց գանձո՛ք – Իսրայէլացիները – բայց անոնք իրենց խորհուրդներովը դառնացուցին զԱնիկա, ու նուաստացան իրենց անօրէնութիւններուն համար» : (Մաղ. 106.43) : **Ոեւէ ազգ, իր մոլորութեանց ու չարութեանց դէջ հետեւանքներէն զերծ չի կրնար մնալ :** Ինչ որ Ովսէա Մարգարէն կը յայտարարէ Իսրայէլի մասին, կը յարմարի ամէն ազգի, «ԱՆՈՆՔԻ խիստ շատ ապականեցան. Տէ՛րը անոնց անօրէնութիւնը պիտի յիշէ, ու անոնց մեղքերուն այցելութիւն պիտի ընէ» : (9.9) : **Ջրհեղեղի աղէտը՝ աշխարհի պատմութեան մէջ մէկ անգամ պատահած չէ :** Ծատ աղբեր իրենց անօրէնութեանց ջրհեղեղներուն տակ խորասուզուած եւ կորսուած են : Ամէն ազգ ինքզինքը կը բարձրացնէ կամ կը նուաստացնէ : Ամէն պետութիւն ինքզինքը կը զօրացնէ եւ կամ կը տկարացնէ :

Ուրեմն, անօրէնութիւնը մարդոց կրկնակի վնաս կը հասցնէ : Նախ, զանոնք ցաւերու եւ դառնութեանց մէջ կ'ընկղմէ. երկրորդ, զանոնք աստուածային օրհնութիւններէն կը զրկէ : **Ձստուած ուրացողը, մէկ կողմէն չարիք կը շահի, և միւս կողմէն բարիք կը կորսնցնէ :** Ինչպէս որ Երեմիա Մարգարէն ալ կ'ըսէ. «Ձեր անօրէնութիւնները ասոնք – այս բարեբարութիւնները – հեռացուցին. ձեր մեղքերը բարիքը ձեզմէ արգիլեցին» : (5.25) : **Յովնան Մարգարէն ալ միեւնոյն ճշմարտութիւնը կը շեշտէ.** «Սուտ ունայնութիւններու նայողները, իրենց ըլլալու սղորմութիւնը կը թողուն» (Forsake their own mercy) (2.8) :

Սակայն, սա հարցումը կրկին կը ծագի մեր մտքերուն մէջ թէ ի՞նչու համար մարդիկ Աստուծոյ ողորմութիւններէն զրկուելու են իրենց սխալմունքներուն համար : Արդարացի՞ է որ մարդիկ այսքան խստօրէն պատժուին իրենց մեղքերուն համար : Մարդկային սաստիկ ցաւերը եւ դառնակսկիծ աղէտները ի՞նչպէս կարելի է հաշտեցնել Աստուծոյ սիրոյն եւ զթութեան հետ : Այս կարեւոր հարցումները բացատրութիւն կը պահանջեն : Արդ՝ հիմա պիտի աշխատինք այս շփոթեցուցիչ հարցին զոհացուցիչ լուսարանութիւն տալ :

Այս հարցումները յաճախ մարդոց մտքերը կը խրոնվեն, քանզի անոնք պատիժի մասին չիտակ դադարիար չեն տածեր : Մարդիկ ընդհանրապէս կը խորհին թէ Աստուած ինքնակամ բռնակալ մըն է, որ իր քմահաճոյքին համաձայն, ուղածին ողորմութիւն կ'ընծայէ, եւ ուղածին պատուհաս. ուղածը կը բարձրացնէ և ուղածը կը խոնարհեցընէ : Ասիկա բոլորովին սխալ ըմբռնում մըն է, զոր մի անգամ ընդ միշտ պէտք է մեր մտքերէն վտարել : Աստուած ինքնակամ եւ հաճոյակատար բռնապետ մը չէ : Անիկա Ամենակարող էակը ըլլալով հանդերձ, ինքզինքը ենթարկած է բարոյական որոշ կանոններու տրամադրութեանց : Անիկա յանձնառու եղած է անյեղլի զործելակերպերու : Եւ Անիկա չի կրնար իր զօրծելակերպը փոխել, առանց իր իսկութիւնը զօհելու եւ իր բնութիւնը փոխելու : Աստուած չի պիտի կրնար մարդոց վրայ բարոյական պահանջներ դնել, եթէ ինք միեւնոյն բարոյական օրէնքներու իշխանութեան ենթարկուած չ'ըլլար : Աստուած մեզմէ չի պահանջեր ոեւէ հնազանդութիւն, որուն ինք սիրայօժար կամքով չի հպատակիր : Բարոյական օրէնքները որքան որ ստեղծուածներուն կը վերաբերին, նոյնքան ալ Ստեղծողին կը վերաբերին :

Հետեւաբար, Աստուած պարտաւորուած է բարոյական կանոնները գործադրել ամենունի համար հաւասարապէս: Անիկա մարդոց մէջ աչառութիւն չի կրնար ընել: Անիկա արարածներուն միջեւ խտրութիւն չի կրնար ընել: Անիկա արդար ըլլալու համար, ստիպուած է օրէնքներու պահանջները գործադրել անաչառօրէն: Եթէ Անիկա ասկէ տարբեր կերպով շարժէր, իր արդարութիւնը պիտի խափանէր, եւ իր բարոյական նկարագիրը պիտի աւերէր: Քանի որ Աստուած իր անձին հանդէպ ներհակ (inconsistent) չի կրնար ըլլալ, Անիկա իր հաստատած օրէնքները կը գործադրէ անվրէպ:

Ուրեմն, դժուար չէ հասկնալ թէ քանի որ աստուածային օրէնքները պարտաւորիչ եւ անյեղլի են, բնականօրէն դժուարութիւններ կը ծագին երբոր մէկը կը փորձէ զանոնք կտորել: Այս անփոփոխելի օրէնքներու բեկանումը անխուսափելիօրէն խառնաշփոթութիւններ կ'ստեղծէ: Աստուածային օրինաց համաձայն ապրողներուն, երկինքը գործակից եւ օգնական կ'ըլլայ սակայն սոյն օրինաց հակառակ գործողներուն, Աստուած հակառակորդ եւ ընդդիմադիր կ'ըլլայ: Աստուծոյ հետ հաշտ եղողներուն նաւերը, նպաստաւոր հովերու օգնութեամբ հեղասահօրէն յառաջ կ'ընթանան, բայց Աստուծոյ հետ անհաշտ եղողներուն առաքաստանաւերը, աննպաստ փուքերու անդիմադրելի հակահարուածներուն դէմ ի դերեւ կը աքնին ճամբայ կտրել: Կեանքի մականթացութիւնները, Աստուծոյ հնազանդ եղողներուն յառաջխաղացութեան կը նպաստեն, մինչդեռ Աստուծոյ անհնազանդ եղողները ետ կը մղեն: Այս կեանքի ճամբորդութեան մէջ, օրինապահները կը վայելեն Աստուծոյ օժանդակութիւնը եւ թեւարկութիւնը, մինչդեռ օրինազանցները կը զրկուին աստուածային հովանաւորութենէ: Աստուած կ'ուզէ հաւասարապէս բա-

րերար ըլլալ ամենունի, սակայն իր բարիքները կը շոյակէ անոնց որոնք պատրաստ կ'ըլլան զանոնք ընդունելու: Անօրէնները Ամենակարողին դէմ գէնք կը վերցնեն, եւ երկինք դէմ կը մղեն անյոյս կռիւ մը:

Որքան որ անօրէնները կ'ապստամբին Աստուծոյ գերակայ կամքին դէմ, Աստուած անոնց հանդէպ թշնամական դիրք մը չի բռներ: Աստուած իրեն հակառակորդներուն դէմ ոխ եւ ատելութիւն չի պահեր: Իր բացարձակ զօրութեամբ զանոնք չի ընկճեր. քմահաճօրէն զանոնք չի պատժեր: Թէ որ ուզեր, Անիկա կրնար չարերը վայրկենապէս բնաջնջել: Սակայն Անիկա այս տեսակ բան մը չընէր: Անիկա մարդոց հետ ծայրահեղ փափկանկատութեամբ եւ բարեացակամութեամբ կը վերաբերուի: Անիկա իր արդարութեան կը խառնէ գթութիւն: Անիկա իր խըստութիւնը կը մեղմացնէ ողորմութեամբ, եւ իր բարկութիւնը կ'աքօղէ նորոգամտութեամբ: Անիկա երբէք ատելալատ ու վրէժխնդիր ոգի մը չի կրեր: Անոր ցասումը մարդկային բարկութեան բնոյթը չունի: Անիկա իր անհնազանդ զաւակներուն հետ իսկ հայրական սիրով և դուրդուանքով կը վերաբերուի: Անիկա շատ անգամներ չարութեան փոխարէնը անմիջապէս չի հատուցաներ: Անիկա զարմանալի կերպով համբերատար է: 'Անիկա յաճախ մեղաւորին արդար վարձքը կը յապագէ, անօրէնին պատիժը կը յետաձգէ: Եւ ասով կը յայտնէ թէ ինք «բարեգութ եւ ոգորմած է, երկայնամիտ եւ առատ ոգորմութիւնով: Անիկա միևնչեւ վերջը չի հակառակիր: Լ յաւիտեան ոխ չի պահեր» (Սաղ .103.8,9): Անիկա մոլորած մարդոց հետ անհասկնալի գթութեամբ կը վարուի: Անիկա իր մեծութեան չափ լայն եւ ներող սիրտ մը կը կրէ: Անիկա պատրաստ է ներելու ամէն ատեն: Անիկա վատթարագոյն մեղաւորին իսկ կորուստը չուզեր, հապա ապաշխարելով

փրկուելը կ'ուզէ : Երբոր մարդիկ ետ կը դառնան իրենց չարութիւններէն, Աստուած ալ ետ կը դառնայ իր արդար ցասումէն :

Աստուած մեզ չի պատժեր, մինչեւ որ չստիպուի պատժել : Եւ երբոր կ'ստիպուի պատժել, մեր յանցանքներու ծանրութեան համապատասխան եւ արժանի չափով չի պատժեր, հապա աւելի թեթեւ եւ դթոտ կերպով կը պատժէ : Սաղմոսերգուի ըսածին պէս. «Անկա մեր մեղքերուն համեմատ չըբաւ մեզի. ու մեր անօրէնութիւններուն համեմատ հատուցում չըբաւ մեզի :» (103 : 10.) : Եթէ անիկա մեր յանցանքներուն արդար եւ լման հատուցումը տալու ըլլար, ոչ մէկ արարած պիտի կըրնար անոր առջեւ կայնիլ : Անոնք որ կը խորհին թէ Աստուած զիրենք աւելի սաստկօրէն պատժած է, քան ինչ որ իրենց յանցանքը կը պահանջէր (deserve), ասանկ կը խորհին՝ մեղքին ծանրութիւնը եւ նուաստութիւնը ըստ արժանւոյն չի գիտնալնուն համար : «Մեղքին վարձքը մահ է :» Եւ քանի որ բարի Տէրը ամէն մեղքը մահով չի հատուցաներ, ատով կը յայտնէ թէ ինք «երկայնամիտ է եւ առատ ողորմութիւնով :» Աստուծոյ կշիռքին մէջ, ողորմութեան նժարը աւելի ծանր կը կշռէ քան արդարութեան նժարը : Աստուծոյ վերաբերումին մէջ ինծի ամենամեծ զարմանք պատճառող կէտը սա չէ թէ Աստուած ինչո՞ւ այսքան խստօրէն կը պատժէ, հապա սա է թէ Աստուած ինչո՞ւ այսքան ազնւօրէն համբերատար եւ ներողամիտ կը գտնուի :

Պատիժի խսկութեան մասին, շատեր սխալ գաղափարներ կը տածեն : Իբր թէ պատիժը յանցանքէ անջատ եւ անկախ բան մը եղած ըլլար : Իբր թէ երկուքին միջեւ սերտ կապակցութիւն մը, գործարանական միաւորութիւն մը եղած չըլլար : Մարդիկ գոյացուցած են այս

գաղափարը, տարուելով պատժական օրէնքներու մարդկային կիրարկումէն, ուր յաճախ պատիժը յանցանքին հետ ուէէ յարմարութիւն չունենար : Սակայն, պատիժի մասին տածուած այս ըմբռնումը հիմնովին սխալ է եւ զարտուղի : Իրական պատիժը յանցանքէն անջատ բան մը չէ, այլ յանցանքին անբաժան մի մասը : Պատիժը միշտ յանցանքին մէջն է. յանցանքին մէջ բովանդակուած է : Պատիժը գործուած յանցանքին բնական հետեւութիւնն է : Պատիժը դուրսէն յանցաւորին վրայ չի բարդուիր, այլ մեղսալից արարքին մէջէն կը բղխի : Ինչպէս որ պտուղը կը յարմարի ծառին, անանկ ալ պատիժը կը յարմարի յանցանքին : Չար արարք մը իր պատիժը իրեն հետ կը բերէ : Ամէն մէկ գէշ արարքի գէշ արդիւնքը, այսինքն պատիժը, այդ արարքին կցուած կ'ըլլայ :

Երբոր պատիժը այս իմաստով կ'ըմբռնենք, կը հասկնանք թէ պատիժէ դերձ մնացող յանցանք մը չի դըտնուիր : Շիտակ է թէ շատ մը բարոյական յանցանքներ ֆիզիքական պատժումներէ դերձ կը մնան, սակայն բարոյական պատժումներէ ո՛չ երբէք : Ամէն մեղք կ'արտադրէ բուն ինքն իր պատիժը : Ամէն մեղք իր ստոյգ պատիժը կը բերէ, մտքի վրդովում, սրտի անհանգըստութիւն, խղճի խայթ, յիշողութեան արատաւորում, նկարագրի եղծանում, հոգիի նուաստացում եւ կեանքի քայքայում պատճառելով : Ասոնք են մեղքի ամենածանր պատիժը, որմէ խուսափիլ անկարելի է : Մեղքին բուն վնասը, հետեւաբար բուն պատիժը, անոր պատճառած բարոյական անկումը եւ փչուզումն է :

Պատիժի նպատակի մասին ալ շատեր սխալ գաղափարներ կը տածեն : Շատերու մտքերուն մէջ պատիժի գաղափարը տանջանքի գաղափարին լծորդուած է : Ա-

նոնք կը խորհին թէ պատժել կը նշանակէ չարչարել: Յանցաւոր մը կը պատժուի տանջուելու համար: Մարդիկ պատիժի մասին այս ըմբռնումը ունեցած են, քանզի մարդոց մէջ պատիժը այս հանգամանքը առած է: Անցեալին մէջ, յանցաւորներ եւ ոճրապարտներ Ֆիզիքական բուռն տանջանքներու ենթարկուած են: Սահմուկեցուցիչ հնարքներ եւ ճիւղային գործիքներ հնարուած են, յանցաւորները տանջելու համար: Դժոխքի դաղապիտակն ալ կաղապարուած է այս ըմբռնումին վրայ եւ պատկերացուած է իբրեւ զգայարանական եւ անորակելի տանջարան մը: Ասոր համար, շատերու մտքին մէջ պատիժ եւ տանջանք գրեթէ հոմանիշ բառեր դարձած են:

Սակայն, չարչարել չէ պատիժին բուն նպատակը: Տանջել չէ պատիժի իսկական նպատակակէտը: Աստուածային մտքին մէջ պատիժը տանջանքի նշանակութիւնը չունի: Աստուած չի պատժեր չարչարելու համար: Պատիժը իր բնութեան բերմամբ ցաւ ու տրտմութիւն կ'արտադրէ. սակայն պատիժը ցաւ արտադրելու նպատակաւ չի տրուիր: Պիտի հարցուի թէ, եթէ պատիժը ցաւցնելու համար չէ, ուրեմն ինչո՞ւ համար է:

Աստուածային ծրագրին մէջ պատիժին բուն նպատակն է զգուշացնել եւ ուղղել: Աստուած մարդը կը պատժէ, որպէս զի զայն շիտակ ճամբուն առաջնորդէ: Աստուած ո՞ր կամ քէն առնելու համար չի պատժեր, այլ մարդը իր սխալ ճամբաներէն ետ դարձնելու համար կը պատժէ: Յաւը Աստուծոյ կողմէն մարդուն տրուած բարի զեկուցում մըն է, օգտակար ազդարարութիւն մըն է: Եթէ մարդը ցաւի չի ենթարկուէր, անիկա երբէք պատեհութիւն պիտի չունենար գիտնալու թէ ինք սխալ մը կամ յանցանք մը գործած է: Առողջ վիճակի մէջ

եղող անձ մը ցաւ չունենար, սակայն հիւանդ վիճակի մէջ եղող անձը ցաւ կ'ունենայ: Եւ այս ցաւը, չարիք մը չէ, հապա մեծագոյն բարիքն է հիւանդին համար: Քանզի ցաւը կը մատնանչէ թէ մարմնոյն մէջ տկարութիւն մը կամ փտութիւն մը կայ. եւ կը մղէ անձը որ այս անկարողութեան գիտակցի, եւ շուտ ընդ փոյթ անոր առջեւ առնէ:

Թէ որ Ֆիզիքական մարդին մէջ ցաւ ըսուած բանը գոյութիւն չունենար, մարդիկ արագօրէն պիտի մեռնէին, եւ ցեղը կարճ ժամանակամիջոցի մէջ երկրիս վերայէն պիտի բնաջնջուէր, քանզի մարդիկ պիտի հիւանդանային, առանց իրենց հիւանդ ըլլալին գիտնալու: Յաւն է որ մարդոց կը յայտնէ թէ իրենք ապառուջ վիճակի մէջ են: Մեր գլխուն ցաւը մեզի կը յայտնէ թէ մեր մարմնաւոր գործարանին մէջ տեղ մը անկարգութիւն մը կայ: Մեր ստամոքսին ցաւը մեզի կը յայտնէ թէ մենք տկար վիճակի մը մէջ ենք: Մեր երիկամունքին ցաւը մեզի կը յայտնէ թէ այս գործարանը իր գործը լաւ չի կատարեր, եւ կամ անոր մէջը քար կայ: Մեր ակոյսին ցաւը մեզի կը յայտնէ թէ ակոյսին մէջ փտութիւն մը կայ, որ պէտք է անմիջապէս դարմանուի:

Մարդուն համար սոսկալի աղէտ մը եւ մահացու չարիք մը եղած պիտի ըլլար, եթէ նա ցաւ չունենար: Իժիշկները կը հաւաստեն թէ ամէնէն վտանգաւոր հիւանդութիւնները ցաւ չի պատճառող հիւանդութիւններն են, որոնք անգիտակցաբար ախտաւորին մահ կ'սպառնան: Անձնապէս կը ճանչնամ անհատներ, որոնց ակոյսներուն ներքեւ թարախ ժողվուեցաւ, առանց ցաւ պատճառելու, եւ անոնք աստիճանաբար տկարացան, ուժաստատ եղան, գլխացաւ եւ յոգացաւէ բռնուեցան, եւ արեան թունաւորումէ պիտի մեռնէին, եթէ Գ-ճառագայթի պատկերը

երեւան չի հաներ տկարութեան իսկական պատճառը: Ինծի ծանօթ են քանի մը պարագաներ, ուր ենթականեր ակռայի պալար (abscess) ունեցան, առանց ցաւ զգալու, եւ տակաւ առ տակաւ իրենց աչքերուն լոյսը կորանցուցին, եւ բոլորովին կուրացան: Այս խեղճերուն համար, ակռայի ցաւը, ոչ թէ տաժանք, հասպա երկնառաք շնորհ եւ օրհնութիւն եղած պիտի ըլլար:

Դարմանումէն առաջ կուգայ գիտնալ: Եւ գիտութիւնը կ'ստեղծուի ցաւով: Ուրեմն, ցաւը մեզի համար բարիք մըն է: Քանզի երբ անիկա մէկ կողմէն մեր տկարութիւնը երեւան կը հանէ, միւս կողմէն մեզ սխալմունքներ գործելէ կ'զգուշացնէ: Մարդիկ փորձով հասկցած են, թէ ամէն անգամ որ ձեռքերնին կրակին դըպցնեն՝ կ'այրեն. ամէն անգամ որ առողջապահական կանոնները կ'անտեսեն՝ հիւանդ կ'ըլլան: Ուստի անոնք այս ցաւերէն զերծ մնալու համար, մոլորումներէ կը խուսափին, եւ օրինապահութեան ճամբուն մէջ կ'ընթանան: Շատեր շիտակ ճամբու մէջ կը քալեն, ոչ թէ անոր համար որ շիտակ քալել կը սիրեն, այլ անոր համար որ հասկցած են թէ շիտակ ըլլալ իրենց համար օգտակար է, ուղղութիւնը իրենց համար բարերար է: Ասանկով, ցաւը՝ երբ մէկ կողմէն մարդս սխալէն կ'զգուշացնէ, միւս կողմէն դայն շիտակին կը մղէ:

Ինչ որ ճշմարիտ է Ֆիզիքական մարզին մէջ, առաւելապէս ճշմարիտ է բարոյական եւ հոգեւոր մարզերու մէջ: Հոգեւոր կսկիծներու նպատակն է մարդիկը յանդիմանել եւ ուղղել: Աստուած մեր տառապանքներուն միջոցաւ մեզի յայտնել կ'ուզէ թէ մենք սխալ քայլ մը առած ենք, մոլորած ենք, եւ կամ յանցանք մը գործած ենք: Մեր հոգեւոր ցաւերը մեզի մատնանիչ կ'ընեն թէ մենք հոգեւորապէս տկար եւ ասպառողջ վիճակի մէջ

ենք, եւ հոգեւոր դարմանումի կը կարօտինք: Մեր նեղութիւնները մեզի կ'իմացնեն թէ մենք Աստուծոյ կամքին դէմ ըմբոստացած ենք, եւ անոր պատուէրները չենք պահած: Հետեւաբար, ցաւերը մեզի համար ազդարարութիւններ են, վիշտերը մեզի համար զգուշացումներ (warning) են: Տուայտանքներու միջոցաւ Աստուած մեզ կը յանդիմանէ եւ ասպաշխարութեան կը հրաւիրէ:

Եթէ օրինազանցութիւնը ցաւ չի պատճառէր, բոլոր մարդիկ օրինազանց պիտի ըլլային: Ինչպէս Սաղմոսերգուն ալ կը վկայէ. «Քանի որ վշտացած չեի՝ կը սխալէի, բայց հիւսա քու խօսքդ կը պահեմ:» (119:67.): Եթէ մարդիկ վիշտերու չենթարկուէին, Աստուծոյ օրէնքները չի պիտի գիտնային: Մեր բնաբանը այս կարեւոր ճշմարտութեան յայտարարն է. «Աղէկ եղաւ ինծի որ վշտացայ, որպէս զի քու կանոններդ սորվիմ:» Մարդիկ սխալ գործելով, շիտակը կը սորվին: Մարդիկ օրէնքը կոտորելով, օրէնքին ինչ ըլլալը կը հասկնան: Մարդիկ կեանքի դառն փորձառութիւններով կ'ըմբռնեն թէ նեղութիւն արտադրող արարքները, եւ վիշտ պատճառող բնթացքները, աստուածային օրէնքներու հակառակ եղող բաներ են:

Աշխարհիս վրայ անօրէնութիւնը չափաւորող եւ սահմանափակող բանը ցաւն է. մեղքը դսպող եւ սանձող բանը վիշտն է: Եթէ երկրիս վրայ տառապանք ըսուած բանը գոյութիւն չունենար, աշխարհիս վրայ ասպականութիւնը եւ զարշուրթիւնը ծայր աստիճան պիտի շատնար: Հետեւաբար, տառապանքը, չարութիւնը կասեցնող արգելք մըն է, անօրէնութիւնը խափանող թուժք մըն է: Յեղի գերագոյն բարւոյն համար, ցաւը անգանցառելի հարկաւորութիւն մըն է:

Այս պատճառաւ, դատաստանը (judgment) մեր բարեկամն է: Ինչպէս որ Եսայի մարդարէն ալ կը յայտարարէ, «Քանզի երբ քու դատաստաններդ երկրի վրայ ըլլան, աշխարհի բնակիչները արդարութիւն պիտի սորվին»:» (26:9): Այն անձը որ կը տեսնէ այս ճշմարտութիւնը, Օմար Խայյամին պէս զԱստուած պիտի չամբաստանէ մարդոց վիշտերու համար, եւ պիտի չաղաղակէ.

«Ով, Դու, որ վիճով եւ որոգայթով
Պատեցիր քամբան յորում պիտ' շրջիմ,
Դուն նախասահմանուած չարիքով պիտի չփաթթես
Զիս, եւ վերջն ալ անկումս մեղքին վերագրես:

«Ով, Դու, որ մարդը շինեցիր անարգ հողէ,
Եւ դրախտով իսկ հնարեցիր օճն ի չգոյէ.
Բոլոր մեղաց համար որով մարդուն երես
կը սեւնայ, — Մարդուն ներում կուտաս — եւ կանես:»

Կեանքի մէջ ցաւերու օգտակար դերը տեսնող հոգի մը, Աստուծոյ այցելութեանց մէջ կը տեսնէ, ոչ թէ Տէրոջ անպատասխանատու անարդարութեան ցոյցը, այլ անոր բարերար արդարութեան արտայայտութիւնը. եւ խոնարհաբար կը խոստովանի, «Գիտեմ որ քու դատաստաններդ արդարութիւնով են. եւ իրաւունքով զիս վըշտացուցիր:» (Սաղ. 119:75.):

Բարձրագոյն հայեցակէտէ, ցաւերը իրական օրհնութիւններ են: Զարիք կարծուած շատ մը բաներ ծրարտեալ բարիքներ են: Այս պատճառաւ, մենք պէտք չէ նեղուինք երբոր կը տանջուինք, հասկա պէտք է ալ աւելի ուրախ ըլլանք, որ Աստուծոյ մոռցուած չենք: Բարձրագոյն հայեցողով, պատիժը երանութիւն է: Ինչպէս որ Սաղմոսերգուն ալ իրաւամբ կ'ըսէ. «Երանի՛ այն մարդուն գոր դուն կը խրատես (chasten), ով Տէր, եւ քու օրհնեմէդ անոր կը սորվեցնես» (94: 12.):

Իմաստուն անձը ցաւերու համար պէտք չէ յուզուի, հասկա պէտք է իր յուզմունքները հանդարտեցնէ, եւ լուրջ խոհումով անոնց նշանակութիւնը որոնէ: Յաւերը մեզի համար օգտակար կ'ըլլան, երբոր մեզ կը գրգռեն ատոր պատճառները հետադատելու: Վիշտերը մեզի համար ստոյգ օրհնութիւններ կը դառնան, երբոր անոնք մեզ կը յանդիմանեն եւ կ'ուղղեն: Պատուհասները մեզի համար երջանկաբեր բարիքներ կ'ըլլան, երբոր անոնք մեզ արդարութեան եւ պարկեշտութեան կը մղեն: Սխալմունքները մեզի համար աղէկ դասեր կ'ըլլան, երբոր անոնք մեզի կը սորվեցնեն օրէնք եւ օրինապահութիւն:

Երբոր կ'ունենանք այս բարձրագոյն տեսակէտը, յայնժամ ցաւերը մեզի համար կը մեղմանան, վիշտերը կ'այլափոխուին, եւ մութ ամպերը լուսաշող եզրերով կը շրջափակուին: Եւ մենք մեր ցաւերուն համար փոխանակ դանդատելու՝ կը գոհանանք: Քանզի անոնց մէջ աստուածային սիրոյ հաւաստիքը կը տեսնենք: Ճշմարիտ հաւատացեալ մը իր դառնաղէտ տագնապներուն մէջն ալ կ'ընայ երգել.

«Իբրեւ մանուկ, Հայր, անվրդով,
Իմին բաժինս գրկեմ սիրով.
Փուշ, խաչ եւ ցաւ, վիշտեր համայն՝
Թող ինձ քըլին սիրոյդ նշան:»



ԴԱՍՏԻԱՐԱԿԻՉ ՎԻՇՏԵՐ

«Վասն զի Տէրը իր սիրածը կը
խրատէ, ինչպէս հայր մը իր սիրա-
կան զաւակին կ'ընէ»:

Առակ. Գ. 12:

ՅԱՒԸ մատնանիչ է սխալ ընթացքի. ուղղեցոյց է շիտակ
ճամբու: Յաւը մեզ կ'ղգուչացնէ յանցանքէ, և կը մղէ
ուղղութեան: Յաւը իսկապէս կեանքի պահապանն է:
Նոյն իսկ մահը կեանքի պահպանութեան եւ բարեշրջու-
թեան մի էական պայմանն է: Աստուած մեզ կը վշտացնէ,
ոչ թէ մեզ կորսնցնելու համար, հասլա մեզ կենդանացնե-
լու համար:

Բնականաբար, երբոր մարդ ցաւերու եւ նեղութեանց
կը հանդիպի, ասանկ չի զգար: Վիշտերու ճնշման ներ-
քեւ կը հառաչէ: Անտանելի տանջանքներու մէջ կը դա-
լարուի, եւ «ինչո՞ւ այսքան կը կեղեքուիմ» ըսելով կը
զանդատի: Սակայն ցորչափ մարդս կը մնայ տգիտու-
թեան եւ սխալմունքի մէջ, անիկա այս դառնակսկիծ
անցքին մէջէն պիտի անցնի: Եթէ Աստուած կարենար
մարդը ուրիշ եղանակով մը կրթել, պիտի ընէր: Աստ-
ուած հաստատած է իր բնական եւ բարոյական օրէնքները

այս տիեզերքին մէջ: Եւ զանոնք մինչեւ մէկ աստիճան յայտնած է մարդոց: Աստուած պատուիրած է մարդոց որ այսինչ արարքներէն հեռու կենան, այնինչ ընթացքներէն զգուշանան: Աստուած ըստ բաւականի դիտցուցած է մարդոց թէ ի՞նչ բաներ պէտք է ընեն, եւ ի՞նչ բաներ պէտք չէ ընեն: Սակայն, մարդոց համար սոսկ լսողութեամբ դաս սորվիլ անկարելի ըլլալ կը թուի: Մարդս ետ չի կենար այն բաներէն, որոնց սխալ ու վնասակար եւ արգելուած ըլլալը կը սորվի: Հետեւաբար, Աստուած կը ստիպուի մարդոց մտքերուն եւ սրտերուն վրայ տպաւորել այն դասերը, որոնք խօսքով չի կրնար սորվեցնել:

Փորձառութիւնը մարդուն գլխաւոր եւ ամենամեծ դաստիարակն է: Այն անձը որ գրքէն դաս չի սորվիր, փորձառութենէն կը սորվի՝ կամայ ահամայ: Գիւղի մը դպրոցի պատէն սա գրութիւնը կախուած էր. «Փորձառութիւնը լեզի դպրոց մըն է, բայց յիմարները ուրիշ կերպով չեն սորվիր»: Ուրիշմ Տէյվիդ իրաւամբ ըսած է. «Տեսական ու չի փորձուած կրօնքի եւ փորձարկուած կրօնքի միջեւ մեծ տարբերութիւն մը կայ: Եւ սա եղած է իմ հասած եզրակացութիւնս թէ վարկածներով մենք ոեւէ բան չենք սորվիր. եւ ասիկա է պատճառը թէ կեանքը ի՞նչու այսքան դժուարին դպրոց մըն է: Մեզի համար արժէք ունեցող ամէն բան երկունքով ձեռք բերուած փորձառութիւն մըն է: Ուրիշ կերպով քիչ կամ ոչինչ կ'իւրացնենք: Ամէն բարեշրջութիւն տառապանքներու միջոցաւ կ'ըլլայ, եւ յառաջդիմութեան ու զարգացման ուրիշ եղանակ մը չկայ: Այս է իմ խուզարկութիւնս»: Քարլայլ յայտարարած է. «Փորձառութիւնը աղէկ դաստիարակ մըն է, բայց անոր դպրոցագիւղը բարձր է»:

Երբոր նեղութիւններու վրայ այս հայեցողութեամբ կը նայինք, անոնց նշանակութիւնը արմատապէս կը փոխուի, եւ անոնց խայթը կը մեղմանայ: Վիշտերուն բուն նպատակը տանջել չէ, հապա կը թել է: Յաւը վիշտին վերջին հանգրուանը չէ, այլ անոր մի պատահական ընկերն է: Ուստի, մենք մեր վիշտերուն համար փոխանակ բողոքելու, եթէ դասեր առնենք, անոնք մեզի համար բարեաց միջոց կ'ըլլան: Նեղութիւններու միջոցաւ ցեղին ընդունած արգասիքներն ու օրհնութիւնները մեր երեւակայածէն շատ աւելի է: Այժմ տեսնենք թէ նեղութիւններէն ի՞նչ բարիքներ ծնած են:

Նախ եւ առաջ, ցաւերն ու նեղութիւնները խթան մը եղած են մարդոց, որպէսզի նիւթական ասպարէզին մէջ զարգանան, բնական ուժերը սանձեն, եւ դիտական մարդերու մէջ հսկայաքայլ յառաջդիմեն: Աշխարհ իր հիմակուան վայելած դիւրութիւններէն եւ առաւելութիւններէն մեծ մասը կը պարտի անցեալին մէջ քաշած ձախորդութեանց եւ տաժանքներուն: Եթէ մարդիկ տազնապներու եւ փորձանքներու մէջէն անցած չըլլային, իրենց վիճակը բարւոքելու մասին մասնաւոր ջանք մը չի պիտի թափէին: Անդդիերէնի մէջ իմաստալից ասացուած մը կայ. «Ստիպումը բոլոր գիւտերու մայրն է»: Հարկաւորութիւնը եւ անձկութիւնը մարդս մղած եւ հարկադրած է շատ մը հնարքներ հնարելու: Մարդիկ երբոր մատնուած են նեղ եւ տաժանելի կացութեանց, անոնցմէ ձերբազատուելու համար ստիպուած են միջոցներ խորհիլ եւ իրենց ուղեղները յոգնեցնել:

Բնական աղէտները, որոնք կը չարչրկեն ժողովուրդները, դրդած են մարդիկը խորհելու թէ զանոնք սանձելու համար ի՞նչ միջոցներու կրնան դիմել: Մարդիկ երբոր

տանջուած են սոսկալի ախտերէն, խթանուած են որպէս զի անոնց պատճառները խուզարկեն եւ անոնց առջեւը առնեն: Մարդիկ երբոր չքաւորութիւնէ նեղուած են, աշխատած են ատոր պատճառները գտնելու եւ վերցնելու: Մարդիկ երբոր տանջուած են պատերազմի անէծքներէն, դրդուած են զայն արգելելու համար միջոցներ խորհելու: Եզրպտոս անցեալին մէջ կը նեղուէր երբեմն երաշտութենէն եւ երբեմն ալ զետի յորդայորդումէն: Այս երկու չարիքներուն առջեւն ալ առնուեցան Նեղոս զետին առջեւ մի քանի տեղերէն հսկայ թումբեր կանգնելով: Եւ այս պէսով թէ սովահարութիւնը վերջացաւ եւ թէ երկիրը շինցաւ: Այն կործանարար հեղեղը որ այժմ կ'աւերէ Միսիսիսիի հովիտը, վաղը միեւնոյն հովիտը արգասաւորելու եւ ծաղկեցնելու սատար պիտի հանդիսանայ: Այսօրուսան չարիքը վաղուան համար բարիք պիտի յղանայ:

Ամէն մէկ աղէտ, մարդուն մէջ տենչ մը կ'ստեղծէ, անոր յաղթելու եւ անոր կրկնումը արգելելու համար: Մարդս կը մղուի քանդիչ ուժերէն շինարար ուժեր արտադրելու: Եւ շնորհիւ իր անխոնջ ջանքերուն, մարդս կարողացած է շատ մը աւերիչ ուժերը զսպելու եւ զանոնք իր օգտին եւ բարօրութեան ծառայեցնելու: Ահա այսպէս, մարդս շանթը փոխակերպած է երկկտրական ուժի եւ լոյսի: Եողին սանձած եւ հարկադրած է որ անիւներ ու մեքենաներ դարձնէ, շոգենաւեր եւ գործարաններ բանցընէ: Հովը զսպած եւ լծած է աղօրիքներու եւ առագաստանաւերու:

Ասկէ կը հետեւի թէ մարդուն նեղութիւնները իրեն համար օգտակար եղած են: Դժբաղդութիւնները յառաջդիմութեան ճամբան բացած են: Մարդուն անհանգստուէ: Մարդուն դժուարութիւնները իրական պատեհութիւնը անոր հանգստաւէտութեան գետինը պատրաստած

թեանց դռները բացած են: Մարդուն ճախորդութիւնները մեծագոյն յաջողութեանց հասնելու գրդիւններ եղած են: Մարդուն տրտմութիւնները աւելի ճոխ երջանկութեան հասնելու միջոցներ եղած են: Զրկանքներու մէջէն ծլած են ամէնէն անոյշ վայելքները: Ուրիշը՝ ճ. Ճորտըն կ'ըսէ. «Չախողութիւնը (failure) Աստուծոյ դաստիարակներէն մին է: Չախողութիւնը յաճախ ժայռէ հիմն է իրական յաջողութեան: Թրթուրին ճախողութիւնը՝ թիթեռնիկին ծնունդն է. կոկոնին անցնիլը՝ վարդին գոյտութեան դալն է. հունտին մահը նախերգանքն է անոր յարութեան իբրեւ ցորեն: Գիշերանց, արշալոյսին կանխող ամենէն մութ ժամերուն մէջն է, որ բոյսերը ամենէն աղէկ կ'աճին»:

Ասանկ ալ մարդս նեղութիւններու մէջ ամէնէն աղէկ կ'աճի, ընդդիմութեան մէջ ամենէն աղէկ կը յառաջդիմէ: Տաժանքը մարդուն մէջ գտնուող պահեստի ուժերը մէջտեղ կը հանէ, ստեղծագործող հանճարները շարժման մէջ կը դնէ, թագուն կարողութիւնները կը քողաղերծէ, ժանգոտած տաղանդները կը փայլեցնէ: Մարդու ստեղծագործութիւնը եղող ամենաընտիր երկերը, ամենաճարտար կերտուածքները, ամենէն հոգեգմայլ մեղեդիները, ամենէն հիասքանչ նկարները, ամենէն անզուգական քանդակները, նեղութիւններու մէջէն անցնող հոգիներու արտադրութիւններն են:

Սըր Ուօլթըր Սքաթ, առեւտրական ճախորդութեանց պատճառաւ ստիպուեցաւ գրիչը ձեռք առնել եւ գրել: Մնանկացումը զայն մղեց դերագոյն ճիգի մը: Եւ անիկա եղաւ աշխարհի անմահ գրագէտներէն մին: Եւ անոր գրի առած պատմական վէպերը միլիոնաւոր հոգիները դիւթեց, յուզեց, վերացուց: Անոր երեւութական անյաջո-

դուժիւնը պատճառ եղաւ որ անիկա յաջողութեան ու փառքի փառաւորագոյն պսակովը պսակուի :

Նոյնպէս, Միլէ, մեծահամբաւ նկարիչը, երբոր կը գծէր իր ամենաընտիր նկարը, “Angelus” կոչուած պատկերն, սաստիկ արտմութեան ներքեւ կը տքնէր, եւ ժամանակին հետ կը մրցէր : Անիկա չքաւորութեան մէջ ինկած էր, եւ իւր պաշտելի կինը մահամերձ վիճակի մէջ հիւանդ կը պառկէր, եւ դարմանումի կը կարօտէր : Միլէ, որ թշուառացած էր նկարչութեան սիրահար ըլլալուն համար այս յուսահատական օրերուն մէջ, ի մի կէտ ամփոփեց իր էութեան մէջ ամբարուած ամենէն նուրբ եւ վսեմ կարողութիւնները : Չքաւորութեան եւ կսկիծի խայթը անոր վրձինին շնորհեց գերբնական ճարտարութիւն եւ պերճութիւն, եւ ծնունդ տուաւ իր անդուգական նկարին, զորս երբէք չի պիտի կրնար արտադրել բարեբաստութեան օրերուն մէջ :

Պէյթովէնի աննման երաժշտութիւնները խուլութեան ողբերգութեան մէջէն բողբոջեցան : Այս դժբաղդ արգելքը անոր երաժշտական հանճարին գերազանց սրութիւն եւ փայլ ընծայեց :

Թէնիսընի շքեղ բանաստեղծութեանց մէջ գլուխ դործոց կը նկատուին “In Memorium” և “Crossing the Bar” ոտանաւորները, որոնք գրուեցան ողբացեալ եւ պաշտելի բարեկամի մը բաժանման առթիւ : Բանաստեղծը յուսոյ եւ պայծառութեան ամենագեղեցիկ եւ ներշնչեալ պատգամները կը հնչեցնէ, երբոր կ’անցնի սուգի եւ մթութեան ձորին մէջէն :

Պետրոս Դուրեանի սրտայոյզ բանաստեղծութիւնները պոռթկումներն են թոքախտի անողոք հիւանդութեան հետ մարտնչող զգայուն հոգիի մը : Նմանապէս, Բապըթ Լուի Սթիվընսըն, իր ամենապատուական զրական

երկերը յղացաւ այն ատեն երբ կը մաքառէր միւսնոյն անդուժ ախտին դէմ :

Հոմերոս կոյր աչքերով երգեց իր անդերազանցելի տաղերը : Նմանապէս, Միլտոն, լոյս չի տեսնող աչքերով դիտեց տիեզերքին սքանչելիքները, եւ գունագեղ ու զարմանահրաշ նկարումներով նկարեց աշխարհին գեղեցկութիւնները : “On His Blindness” խորագիրը կրող բանաստեղծութիւնը, որ իր հոգիին խորքերէն բղխեցաւ, յաղթութեան երգն է անձի մը, որ անհամբերութեան վրայ կը տիրէ, եւ վիշտերու վրայ կը յաղթանակէ :

Տանթէն աքսորութեան տառապանքներուն մէջ պատկերացուց դժոխքի թանձրացեալ եւ ահարկու պատկերը, «Քրիստիանոսի ճամբորդութիւնը» բանտարկութեան տուայտանքներուն մէջէն ծնունդ առաւ շան Պընեանի դանկէն եւ հոգիէն :

Ամէն ինչ որ կ’արժէ ձեռք բերել այս կեանքի մէջ, ձեռք բերուած է նեղութեամբ : Նոյն խի կեանքը նեղութիւններու միջոցաւ շահուած է. եւ մարդիկ երկնելով եւ կեանքերնին վար դնելով տիրացած են այն բոլոր բաներուն՝ որոնք կեանքի փառքն ու պսակն են : Քաղաքական ազատութիւն, մտքի ազատութիւն, խղճի ազատութիւն, գիտութեանց յաղթանակները եւ դեղարուեստից գլուխ դործոցները մարդոց արտասուքներով եւ արիւններով շաղախուած են : Աշխարհի ամենէն թանկագին գանձերը մարդկային ողբերգութեանց մէջէն ծնունդ առած են : Յաւերը ուրախութիւններէն աւելի թոխք տուած են մարդկային հանճարին :

Ստեղծագործութեան մէջ Արարիչին նպատակն է մարդուն ստեղծութիւնը : Աստուծոյ գերազոյն հետաքրքրութիւնը կը կեդրոնանայ մարդու հոգիին վրայ :

Եւ մարդու հոգին կրնայ զարգանալ մաքառումով միայն : Մարդ մի միայն պայքարելով կրնայ բարեշրջուիլ : Մարդ միայն ցաւերու եւ նեղութիւններու մէջէն անցնելով կրնայ հասնիլ բարոյական կատարելութեան : Մարդ միայն տաղնապներու եւ տաժանքներու հնոցին մէջէն անցնելով կրնայ աճիլ դէպ ի Քրիստոսի լման հասակին չափը : Այն անձը որ նեղութիւն չի կրեր, տկար ու կիսկատար կը մնայ . այն անձը որ նեղութիւն կը կրէ, զօրաւոր եւ կատարեալ կ'ըլլայ :

Մարդուն մէկը կը պատմէ թէ անգամ մը տեսաւ խողակ մը որ քչիկ մը բացուած էր, եւ մօտ տեսնէն ազատ պիտի արձակէր իր բանտարկեալը : Պատմիչը կը յարէ . «Ես անոր ազատումը շտապել ուզեցի . եւ անոր վրայ խղճալով մատովս թելերը կտրեցի եւ ծակը մեծցուցի : Եւ թիթեռնիկը դուրս եկաւ, բայց առանց ուժ եւ կենսունակութիւն ունենալու դուրս եկաւ, եւ քիչ ետքը մեռաւ : Օր մը եւս անցաւ, եւ ահա ուրիշ խողակ մը հասունցած էր : Ես հետաքրքրութեամբ դիտեցի դայն : Եւ տեսայ թէ այս պղտիկ թիթեռնիկը իր բանտէն դուրս ելլելու համար ի՞նչպէս կը տքնէր ու կը զալարուէր եւ ի՞նչ ահագին ճիգեր կը թափէր : Սակայն այս տաղնապներէն վերջ տեսայ թէ գեղեցիկ թիթեռնիկ մը դուրս եկաւ, եւ մի քանի րոպէ յետոյ հուժկու թեւերով թռաւ դնայ» :

Մարդու կեանքն ալ այս թիթեռնիկին կը նմանի : Այս աշխարհը խողակ մըն է որ անոր հոգին կը բանտարկէ : Մարդ կը տենչայ այս բանտարկութիւնէն ազատիլ եւ երկնից լուսափայլութեան մէջ սաւառնիլ : Սակայն թըռչելու կարող թեւեր ստանալու համար, անիկա նախ խողակը պատռելու է, եւ պատռելու համար երկնելու եւ ճգնելու է : Մարդոց ճգնումները պակսեցնել կը նշանակէ անոնց ուժը եւ կենսունակութիւնը պակսեցնել :

Տեղին պատմութիւնը այս իրողութեան ամենալաւ ապացոյցն է : Այդ բոլոր անձերը, որոնք այս աշխարհին մէջ մեծ դործեր տեսած են եւ մեծ համբաւ շահած են, պրեթէ առանց բացառութեան դժուարութեանց դէմ մաքառող, սաստիկ նեղութիւններ կրող, եւ ծանր բեռեր վերցնող անձեր եղած են : Անոնք մեծցած ու զօրացած են տաժանքներու մէջ եւ անոնց միջոցաւ : Վիշտերը կը զօրացնեն մարդը, անոր տկար մասերը կ'ուժովցնեն, անոր թոյլ մկանունքները կ'ամրացնեն, եւ դայն դիմացկուն ու կորովի կը շինեն : Ինչպէս որ մըրիկները ծառերու արմատները կ'ամրապնդեն, անանկ ալ փորձութիւնները մարդոց կեանքերը կ'ամրապնդեն :

Իննի Հաուլըրտ, Աբրահամ Լինքընի վրայով գրած ոտանաւորին մէջ հետեւեալ բացատրութիւնները կը գործածէ :

“His strength was grounded in adversity,
As grasp the mighty roots of some great pine
The rocks on which it grew. And holding out—
Benevolently spread, like branches wide—
His arms, to all who clung upon their might,
Comfort and courage gave he to the weak . . .
The clouds might gather, menacing and black,
Yet steadfast in his faith, and undismayed,
He met unbroken all the shock of storms
And the icy blasts that strove to beat him down;
Till, like the stately ermine-mantled pine,
Royal in robes the very winds have wrought,
Worn with unconscious grandeur, still he towers
High in immortal majesty of soul.”

Լինքըն ցեղի աշխարհահռչակ անմահներէն մին եղաւ, քանզի անիկա շատ նեղութիւն կրեց, խիստ շատ ճգնեցաւ,

ծանր վիշտեր տարաւ: Եթէ Լինքըն, փոխանակ խոնարհ իրծիթի մը մէջ ծնանելու, փառայեղ ասպարանքի մը մէջ ծնած ըլլար, այսօրուան Լինքընը չի պիտի կրնար ըլլալ: Նոյնպէս, ճօրճ Ուաշինկթըն, որ այս «երկրին հայրը» կը յորջորջուի, եթէ կրած չ'ըլլար անկախութեան պատերազմին աննկարագրելի նեղութիւնները եւ Վէլլի Փօրճին աղեկտուր տանջանքները, չի պիտի կրնար Ամերիկայի «առաջին քաղաքացի»ն ըլլալ: Նմանապէս եթէ ԹՀէոտոր Րօզվէլթ, արգելքներու եւ դժուարութեանց դէմ կտրիճօրէն կռուող եւ յամառօրէն պայքարող մէկը եղած չըլլար Միացեալ Նահանգաց ամենէն ժողովրդական նախագահը չի պիտի ըլլար, եւ մեծ անուն ու բարձր դիրք չի պիտի շահէր: Նոյնպէս, եթէ Վարդան Մամիկոնեան, Վարդանանց պատերազմի կրակներովը չի մկրտուէր, եւ իր հաւատքը իւր արիւնովը չի կնքէր, Հայ ազգի մեծագոյն առաջնորդներէն եւ անմահ հերոսներէն մին չի պիտի ըլլար: Նեղութիւնները մեծ անձնաւորութեանց ծնունդ տուած են. մինչդեռ հանգստաւէտութիւնն ու պերճանքը, պատմութեան մէջ մէկ հաստ իսկ վիթխարի անձնաւորութիւն չէ յղացած:

Աստուծոյ նպատակն է մեր մէջ աստուածային նկարագրի ստեղծել, եւ այդ նկարագրին մասը կազմող գեղեցիկ յատկութիւնները եւ վեհ առաքինութիւնները ծաղկեցընել: Աստուած իր այս կարեւոր նպատակը միայն վիշտերու միջոցաւ կրնայ իրագործել: Աստուած մեզ փորձութիւններու միջոցաւ կը կրթէ, մեր կեանքերը կը բարձրացնէ ու կը սրբազործէ, մեզի մաքուր եւ փառաւոր հանդերձներ հազցնելու կը ձգտի, մեզ առաքինի եւ կատարեալ մարդիկ շինելու կ'աշխատի: Քրիստոնէական յատկութիւնները մէկիկ մէկիկ աչքէ անցուր, եւ պիտի

տեսնես որ անոնց իւրաքանչիւրը կրնայ ծաղկիլ աշխարհի փորձութիւններուն եւ նեղութիւններուն մէջ:

Օրինակի համար, առ համբերութիւնը: Համբերութիւնը վսեմ առաքինութիւնն է: Համբերատար ըլլալ մեծ շնորհ է: Բայց անիկա կրնայ իւրացուիլ սոսկ փորձութեանց մէջ: Մարդս չի կրնար իր կեցած տեղը համբերող ըլլալ. չի կրնան դայն սորվիլ մտաւորապէս. լոկ տաժանքներու հանդուրժելով համբերատար ըլլալու կը վարժուի: Համբերութիւնը վարժութեան ու կրթութեան խնդիր է: Փորձութեանց դպրոցին մէջէն անցնելով մարդ կը սորվի համբերութեան գիտութիւնը: Յոր ցեղին առջև կը դրուի իրբեւ համբերութեան տիպար օրինակը: Սակայն Յոր իր աննման համբերատարութիւնը ձեռք բերաւ անորակելի տառապանքներու տոկալով: Հետեւաբար, համբերատար ըլլալու համար վշտակիր ըլլալ պէտք է: Համբերութեան տիրանալու համար ցաւ եւ «տէրտ» քաշել պէտք է: Այս խորհուրդով, Յակոբոս առաքեալ կը յայտարարէ. «Եղբայրներ, բոլորովին ուրախութեան սրժանի բան սեպեցէք, երբ կերպ կերպ փորձանքներու մէջ կ'իյնաք, գիտնալով որ ձեր հաւատքին փորձառութիւնը համբերութիւն կը գործէ» (1. 2, 3):

Դարձեալ առ խոնարհութիւնը, որ Քրիստոնէական հաղուադիւտ ու պատուական առաքինութիւնն է: Հպարտութիւնը մարդու համար չարիք մըն է, խոնարհութիւնը բարիք մը: Պարծենկոտութիւնը անկատարութեան ու պղտիկութեան նշան է, խոնարհամտութիւնը կատարելութեան եւ բարձրութեան նշան: Տէրը կ'ուզէ ամենքս ալ խոնարհ շինել, ամենուս մէջ ներարկել հեղութեան ոգին: Տէրը ինքնահաւաններէն չի հաճիր. Անիկա դուռողները կ'ատէ: Նա իրօխտ գլուխները կը խոնարհեցընէ: Սակայն Տէրը մարդը ցածցնելու համար չի խո-

նարհեցներ, հապա բարձրացնելու համար կը խոնարհեցնէ: Վասնզի նա գիտէ թէ, «Ով որ իր անձը կը բարձրացնէ, պիտի խոնարհի. եւ ով որ իր անձը կը խոնարհեցնէ, պիտի բարձրանայ»:

Սոնարհութիւնը Քրիստոնեայ ըլլալու պայմաններէն մին է: Սակայն ի՞նչպէս պիտի ստանանք այս առաքինութիւնը: Մենք չենք կրնար խոնարհ ըլլալ, ըսելով թէ խոնարհ պիտի ըլլանք: Սոնարհութիւնը չենք կրնար մտքով սորվել, գրքէն ուսանիլ: Մարդուն համար բնական չէ խոնարհ ըլլալ: Բնական մարդուն համար բնական է պարծենկոտ եւ խրոխտ ըլլալ: Բնական մարդը կ'ողջ ինքզինքը մեծ տեսնել եւ մեծ ցուցնել: Անիկա իր մեծագործութեանց վարկը կ'ողջ ինքնիրեն վերապահել: Անիկա երբոր գեղեցիկ բան մը կ'արտադրէ, պարծանքով եւ սքանչացումով անոր վրայ աչք կը սեւեռէ, եւ Նաբուքոդոնոսորին պէս կը յոխորտայ. «Այս չէ՞ այն մեծ Բարելոնը գործեալս քան իմ գործքիսնո՞ւ ու կարողութիւնսնո՞ւ իմ մեծութեանս փառքիսն համար քաղաքութեանս տուն շինեցի» (Դան. 4 30): Բարեյաջողութեան մէջ հարստ ըլլալ ամէն մարդուն ներկայացող փորձութիւն եւ վտանգ մըն է: Բարձր դադաթներ մագլցիլ, սովորաբար մարդուն գլուխը կը դարձնէ: Բարեբաղդութիւնը սովորաբար գոռոզութիւն կը ծնի. մինչդեռ դժբաղդութիւնը հեղութիւն կը ծնի: Այս պատճառաւ, Աստուած մեզ խոնարհ պահելու համար երբեմն փարձանքներու կ'ենթարկէ. մեզ խորունկ ձորերու մէջ կ'իջեցնէ որպէս զի գլխու պտոյտէն ազատինք: Աստուած երբեմն մեր գործութիւնը եւ պատիւը կը կտորէ, որպէս զի մեզի սորվեցնէ թէ ամէն փառք եւ պատիւ ու գործութիւն իրեն կը պատկանի, եւ մենք ինչ պատիւ եւ գործութիւն որ ունինք, իրեն կը պարտինք:

Պետրոս երբ դեռ ինկած չէր, ինքն իւր մասին շատ մեծ համարում ունէր: Սակայն երբոր իր Տէրը ուրացաւ, իր սին պարծենկոտութենէն մերկացաւ: Եւ այդ դառն փորձառութենէն յետոյ, գոռոզ Պետրոսը խոնարհ Պետրոս եղաւ: Քանզի երկրի վրայ բազմաթիւ աքաղաղներ կային. եւ աքաղաղին ամէն խօսիլը իրեն կը յիշեցնէր իր ամօթալի սայթաքումը եւ ապիկարութիւնը: Պետրոսին համար այդ մէկ գործնական դասը, հազար վերացական դասէն աւելի օգտակար եղաւ: Անիկա տրտմութեան ճամբուն մէջ ուսանեցաւ խոնարհութեան դասը:

Գարձեալ, առ անձնազսպութիւնը: Անձնազսպութիւնը մեծարժէք առաքինութիւն մըն է, որ կը յայտնէ մարդուն մեծութիւնը եւ արժանաւորութիւնը: Իր անձը չի զսպող մէկը, որքան ալ տաղանդաւոր ըլլայ, կրկին ինքզինքը կը ցածցնէ ու կը պզտիկցնէ: Անձնազուսպ ըլլալ ճշմարիտ մարդկութեան պահանջն է: Բայց անձնազսպութիւնը միայն փորձութիւններու մէջ ձեռք կը բերուի, նեղիչ և գրգռիչ պարագաներու տակ կ'ստացուի: Անխռովութեան ու անկարօտութեան մէջ մէկը անձնազսպութեան դասը չի կրնար սորվել: Մարդս յուզմունքի եւ տանջանքի մէջ կը սորվի անձնազսպութեան դասը:

Գարձեալ առ քաղցրութիւնը: Քաղցրութիւնը ի՞նչ պատուական հանդամանք մըն է: Քաղցրութիւնը կորկոն է վեհանձնութեան և ազնուականութեան: Սակայն քաղցրութիւնը անուշ եւ կակուղ մթնոլորտներու մէջ չի մըշակուիր: Անգրգիւռ և անխայթ պարագաներու տակ, մէկը չի կրնար իրական քաղցրութիւնը ի գործ դնել: Քաղցրութեան վարժութիւնը միայն նեղացուցիչ պայմաններու տակ կրնայ կատարուիլ:

Գարձեալ, առ սէրն ու կարեկցութիւնը: Ասոնցմէ աւելի վսեմ և դերընտիր առաքինութիւններ կրնա՞ն ըլլալ: Ասոնք են որ մարդուն աստուածային կերպարանք կը շնորհեն եւ զայն փառաց պսակով կը պսակեն: Անսէր մարդը դադան է. անկարեկից մարդը անասուն է: Աշխարհըս գեղեցկացնող, տաքցնող, վերացնող, մազնխացնող բանը սէրն ու կարեկցութիւնն է: Սակայն սէրը առաւելապէս կը ծաղկի վիշտերու մէջ: Այդ բարեկամութիւնները որոնք վիշտերու մէջ կը դարբնուին, աւելի հաստատուն և մնայուն կ'ըլլան: Այն ամոլները, որոնք կեանքի դժուարութիւնները միատեղ կը տանին, և վիշտերու մէջ վշտակիր կ'ըլլան, աւելի խորունկ եւ անքակտելի սիրով մը իրարու կապուած կը մնան: Զաւակին հիւանդութիւնը ծընողաց սէրը կը սաստկացնէ անոր հանդէպ:

Այն անձը որ նեղութիւն եւ զրկանք չէ կրած, չի կրնար շատ համակրութիւն ունենալ: Դժբաղդութեան մը հանդիպել մեզ աւելի համակրալից կը շինէ միեւնոյն դժբաղդութեանց հանդիպողներուն: Անձկութիւնը մեզի դիտութիւն եւ զգայնութիւն կը պարզեւէ: Անօթին կը հասկնայ անօթին վիճակէն: Մերկը կը կարեկցի մերկին: Սգաւորը կ'զգայ սգաւորին ցաւը: Թշուառը կ'արգահատի թշուառին: Վշտակցութիւնը մարդիկը իրարու կը մերձեցնէ, եւ համակրութեան կապով զանոնք կը միագործէ: Յաւակցութեան մէջէն բարեկամութեան կոկոնը կը ծլի:

Հարկ չ'կայ որ օրինակները բաղմապատկենք: Աստուած մեզ կ'անցնէ նեղիչ փորձութեանց մէջէն, որպէս զի մեր մէջ մշակէ Քրիստոնէական կեանքը, եւ ծաղկեցնէ Քրիստոնէական առաքինութիւնները: Ուրեմն, ի՞նչպէս կ'երեւնայ ձեզի. ո՞րը աւելի աղէկ է, ո՞րը աւելի փափաքելի է: Անխուով եւ անվիշտ կեանք մը անցնել, եւ համ-

բերութենէ, խոնարհութենէ, անձնազսպութենէ, քաղցրութենէ, սէրէ, կարեկցութենէ եւ համաման հանգամանքներէ զուրկ էութի՞ւն մը ունենալ, եթէ ոչ վիշտերու ենթարկուիլ եւ այս հրաշագեղ ու թանկարժէք առաքինութիւններով պճնազարգուիլ: Բարոյական հանգամանքներէ զրկուած անձ մը ի՞նչ արժէք կամ արժանիք կրնայ ունենալ: Երբոր հանգստաւէտ բայց ունայն կեանքը կը ճակատեցնենք վշտալից բայց լեցուն կեանքի մը հետ, բացորոշ է թէ ո՞ր կողմը գերակշիռ պիտի հանդիսանայ ճշմարիտ մարդու մը նժարին մէջ: Գիտակից մարդը անցաւ կեանքի մը չի ցանկար: Սենեկան, մեծանուն իմաստասէրը ըսած է. «Աղէկ բաները որոնք կը պատկանին բարեբաղդութեան փափաքելի են, իսկ աղէկ բաները որոնք կը պատկանին դժբաղդութեան հիացման արժանի են»: Եւ Շէյքսպիրն ալ կը յայտարարէ. «Քաղցր են օդտակարութիւնները դժբաղդութեան, որ նման տղեղ ու ժահրալից արջնագորտին (Toad), կրկին կը կրէ թանկազին գոհար մը իր գլխուն վրայ»:

Բարոյական եւ հոգեւոր հասակով մեծնալու համար վիշտերը անհրաժեշտ են: Նոյն իսկ մեր Տէրը «նեղութիւններու միջոցաւ կատարեալ եղաւ»: Ուստի թէ որ Յիսուսի կատարելագործութեան համար նեղութիւնները հարկաւոր եղան, անոնք ո՞րքան աւելի ստիպողական պարտին ըլլալ մեզի համար:

Այս խորհրդածութեանց լոյսին մէջ մեր բնաբանին ճշմարտութիւնը կը հասկցուի. «Վասն զի Տէրը իր սիրածը կը խրատէ, ինչպէս հայր մը իր սիրական զաւակին կ'ընէ»: Աստուծոյ սաստումը Անոր չի սիրելուն նշանը չէ, ընդհակառակը Անոր սիրելուն հաւաստիքն է. մեզ մոռցած ըլլալուն նշանը չէ, այլ չի մոռցած ըլլալուն փաստն է. մեզմէ բաժնուած ըլլալուն նշանը չէ, հապա մեզի այցե-

լուծիւն տալուն ապացոյցն է : Աստուած մեզ կը խրատէ , քանզի մեզ կը սիրէ : Հայր մը որ իր զաւակը չի յանդիմանէր , ոչ միայն անոր բարիք չ'ընէր , այլ անոր սոսկալի անիրաւութիւն կ'ընէ , ամենամեծ վնասը կը հասցնէ : Մերող հայր մը իր զաւակը անպատիժ չի թողուր : Միայն անփոյթ հայր մը իր զաւակը անխրատ կը ձգէ : Այսպէս ալ Աստուծոյ ամենախոր սէրը կ'արտայայտուի իր յանդիմանութեան մէջ : Աստուած մեզ կը ցաւցնէ , մեզ հոգալուն համար : Աստուած մեզ կը վշտացնէ , մեր բարիքը փնտռելուն համար : «Յիրաւի ամէն խրատ նոյն ատեն ուրախարար չի թուիր , հապա տրտմական , բայց ետքը արդարութեան խաղաղարար պտուղը կը հատուցանէ անով վարժուողներուն» (Եբր . 12:11) :

Մի քանի տարիներ առաջ , Փէնսիլվանիոյ Փաթսվիլ քաղաքին մէջ , ելեկտրական հաստ թելերէն մէկուն ծայրը կոտրած էր , եւ սալայատակին վրայ ինկած : Մր . Ֆրէտէրիք Հիլտէպրանդ , դլխաւոր ճարտարապետներէն մին , առանց տեղեակ ըլլալու կը քայլեր դէպի այդ ողջ թելը : Մր . Գ . Ֆ . Շլիցըր , որ քիչ մը հեռուն կը կայնէր , իրեն պոռաց որ թելէն զգուշանայ : Հանրակառքի մը պատճառած աղմուկէն , անոր ձայնը անլսելի մնաց : Շլիցըր տեսնելով որ Հիլտէպրանդ ուղղակի դէպի մահ կը դիմէր , դետնէն քար մը վերցուց եւ անոր կուրծքէն զարկաւ : Այս անակնկալ հարուածէն սթափած , անիկա բոլորտիքը նայեցաւ եւ տեսաւ թէ Շլիցըր մոլեղնարար իր ձեռքերը շարժելով , զինքը վտանգէն կ'զգուշացնէր : Այն երկվայրկեանին երբ թելին վրայ պիտի կոխէր , արդարարութիւնը իրեն հասած էր : Այդ հարուածը Հիլտէպրանդը փրկեց ստոյգ մահէն : Եւ նա աչքերէն արցունքներ թափելով շնորհակալութիւն յայտնեց իր ազատարարին :

Քա՛նի անգամներ , երբոր Տէրը արդարարութեան զաւազանը կ'իջնցնէ մեր գլուխներուն , մեզ մեծագոյն աղէտէ մը ազատելու համար , եւ կամ մեր ինկած փոսէն մեզ դուրս հանելու համար կ'ընէ :

Հետեւաբար , մենք պէտք չէ դանդատող ըլլանք խրատի հարուածներուն համար : Նոյն իսկ պարտինք շնորհակալ ըլլալ , որ խրատուելու արժանի կը սեպուինք : Քանզի ինչպէս որ իմաստունն ալ կ'ըսէ , «Ահա երանելի է այն մարդը գոր Աստուած կը խրատէ . ուրեմն Ամենակարողին յանդիմանութիւնը մի' անարգեր . վասնզի ինք կը վիրաւորէ ու կը փաթթէ . կը գարնէ ու իր ձեռքերը կը բժշկեն» . (Յոր 5 . 17 , 18) : Պզտիկ յանդիմանութիւն մը մեզի համար ահագին բարիքի եւ օրհնութեան պատճառ կ'ըլլայ : «Վասն զի մեր վայրկեանական քեթեւ նեղութիւնը առաւել քան գառաւել փառաց յալիտեանական գերագանցութիւն կը գործէ մեզի» (Բ . Կոր . 4:17) :



ԿԵՆԱՐԱՐ ՏՐՏՄՈՒԹԻՒՆ

«Վասն զի Աստուծոյ ուզածին պէս եղած տրտմութիւնը փրկութեան համար ապաշխարութիւն կը գործէ, որ զղջալու բան չէ. բայց աշխարհի տրտմութիւնը մահ կը գործէ»:

Բ. ԿՈՐՆ. Է. 10.

ԱՍՏՈՒԱԾՄԱՅԻՆ ծրագրին մէջ, վիշտերու գլխաւոր նպատակներէն մէկն է մարդուն կըթութիւնը: Աստուած նեղութիւններով մարդս կը կըթէ, ոչ թէ տեսականապէս, հասկա փորձառարար: Այս կերպ կըթութիւնը թէպէտեւ ծանր է եւ վշտալի, բայց եւ այնպէս հարկաւոր է եւ օրհնարեր: Ինչպէս որ բուսական աշխարհին մէջ լոյսը եւ անդորրութիւնը աճումի միակ միջնորդները չեն, ամպերը՝ փոթորիկները եւ անձրեւներն ալ ծաղկումի, գեղեցկութեան, ստղաբերութեան ազդակներ են, այնպէս ալ մարդկային կեանքի մշակումին մէջ մթութիւնները այնքան անհրաժեշտ են որքան փայլունութիւնները: Աստուած կը փափաքի վիշտերու միջոցաւ նկարագիրը յղկել, սիրտը մաքրագործել եւ հոգին կատարելութեան հասցնել:

Մարդոց մէջ երբեմն կը հանդիպիս այնպիսի անհատներու, որոնց բարոյականի ազնուութեան եւ նկարագրի վեհութեան վրայ կը հիանաս: Երբոր քննելու ըլ

լաս անոնց անցեալը, պիտի խուզարկես որ անոնք սաստիկ նեղութիւններու բովէն անցնելով աղնուացած են: Ուր որ կը հանդիպիս պատուական, առաքինի, սըրբակեաց անձնաւորութեանց, կրնաս վստահ ըլլալ թէ անոնք մկրտուած են փորձութեանց կրակով: Հիւանդանոցի մը պատին վրայ հետեւեալ իմաստալից խօսքերը փորագրուած են:

“The cry of man’s anguish went up to God;
 Lord, take away pain!
 The shadow that darkens the world Thou hast made;
 The close coiling chain
 That strangles the heart; the burden that weighs
 On the wings that should soar —
 Lord, take away pain from the world Thou hast made
 That it love Thee the more!
 Then answered the Lord to the cry of the world,
 Shall I take away pain,
 And with it the power of the soul to endure,
 Made strong by strain?
 Shall I take pity that knits heart to heart,
 And sacrifice high?
 Will ye lose all your heroes that lift from the fire
 White brows to the sky?
 Shall I take away love that redeems with a price
 And smiles at its loss?
 Can ye spare from your lives that would cling unto mine
 The Christ on His cross.”

Արարչագործութեան գլուխ գործոցը մարդն է: Եթէ Աստուած իր գլուխ գործոցը կերտելու համար, մարդը քիչ մը կը նեղէ ու կը վշտացնէ, ասիկա բոլորովին արդարանալի է եւ ընդունելի: Մեզի համար մե-

ծագոյն աղէտը պիտի ըլլար, ոչ թէ մեր վշտանալը, հապա չի վշտանալը: Երբեմն մարդոց դառն այցելութիւններով չի խրատուիլը իրենց համար մեծագոյն պատիժը եղած է: Ըստիս նեղութեան խրատուիլը շատ աւելի փափաքելի է քան չի նեղութեան պատժուիլը: Սաղմոսերգուին յայտարարութիւնը իրաւացի է. «Երանի այն մարդուն, գոր դուն կը խրատես, ով Տէր, եւ քու օրէնքէդ անոր կը սրվեցնես:» (Սաղ. 94:12): Ճօյս Քիլմըր յարմարօրէն կը գրէ.

“Lo, comfort blooms on pain, and peace on strife,
 And gain on loss,
 What is the key to everlasting life?
 A blood-stained cross.”

Մեր մասին Աստուծոյ դերագոյն փափաքն է, մեր կեանքերը դտել ու մաքրել: Մեզմէ ամէն մէկուն մէջ կան տեսանելի թերութիւններ, աղտոտութիւններ, չարութիւններ: Աստուած կ’ուզէ որ մենք ազատինք մեր թերութիւններէն, մաքրուինք մեր աղտոտութիւններէն, փրկուինք մեր չարութիւններէն: Անիկա կը փափաքի որ մենք զերծ ըլլանք այդ բոլոր աւելորդութիւններէն, որոնք կ’աւրեն մեր վայելչութիւնը: Եւ Աստուած այս բոլոր անկատարութիւններէն մեզ ազատելու համար, կ’ստիպուի մեզ նեղութեանց հալոցին մէջէն անցնել: Քանզի չի կայ զտոմի ուրիշ միջոց մը: Դուք զիտէք թէ գետնին տակէն պեղուած մետաղները զտուած դուրս չեն դար, հապա օտար նիւթերով եւ աղտոտութիւններով խառնուած կ’ըլլան, եւ գանոնք մաքրելու համար սաստիկաջերմ հնոցներու մէջ կը դրուին, եւ այդ տեղէն զտուած ըլլալով, դուրս կուգան: Ասանկ ալ բնական մարդը անպէտ եւ անմաքուր բաներով շաղուած է, եւ անիկա զտուելու համար պէտք ունի տաք հալոցի մը

դտարար արարքին (process): Եւ այս հալոցը նեղութիւններու հնոցն է: Ինչպէս որ հալոցին մէջէն չանցնող մետաղ մը չի կրնար գտուիլ, անանկ ալ հալոցին մէջէն չանցնող հողի մը չի կրնար գտուիլ: Կրակը կ'այրէ, բայց նոյն ատեն կը մաքրէ: Պողպատը կրակին մէջ փորձուած երկաթ է միայն: Շողշողուն եւ մեծարժէք աղամանդը ուրիշ բան չէ; եթէ ոչ սաստիկ ջերմութեան եւ ճնշումի ենթարկուած անուխ:

Ուր որ այրում չկայ, հոն գտում ալ չկայ: Այս պատճառաւ, Աստուած շատ անգամ անհատները եւ աղ-գերը ցաւերու եւ տառապանքներու բովէն կ'անցնէ, որպէս զի անոնց փտութիւնները այրէ, որպէս զի զանոնք բիւրեղացնէ: Այս այրումներու միջոցաւ, Աստուծոյ զլիսաւոր նպատակը ցաւցնել չէ, հապա մաքրել է: Աստուած կրկին ու կրկին այս ճշմարտութիւնը հռչակեց մարգարէներու բերնով: Անիկա Եսայի Մարգարէին բերնով յայտարարեց տառապող իր ժողովուրդին. «Ահա քեզ մաքրեցի... եւ քեզ նեղութեան հալոցին մէջ փորձեցի» (48.10.):

Դարձեալ, վիշտերու կարեւորագոյն նպատակներէն մէկն ալ, եթէ ոչ կարեւորագոյնը, մեզ Տէրոջ դարձնել է, Աստուծոյ մօտ բերել է: Աստուածային սրտին հօրագոյն տենչանքը, մարդիկը իրեն մերձեցնել է, մարդոց հողիները իրեն քաշել է: Չկայ բան մը որ Աստուծոյ սրտին այնքան հակա վիշտ կը պատճառէ, որքան մարդոց իրմէ ուժացումը, իրեն դէմ անսաստելը եւ մեղանշելը: Աստուծոյ սիրտը կ'արիւնի, երբոր կը տեսնէ թէ մարդիկ զինք կը մոռնան, եւ անփութօրէն իրենց գերագոյն բարիքը կ'անտեսեն: Սակայն, Աստուած մարդոց անփութութեան հանդէպ անփոյթ եւ անտարբեր չի կրնար կենալ: Անիկա Աստուածային փափաքով կը փափաքի, որ

մարդիկ իրեն զան, զինք ճանչնան, եւ իւր հայրական բարիքները վայելեն: Աստուած իր այս նպատակը իրագործելու համար ամէն միջոցի կը դիմէ, ամէն ճար կը գործածէ: Անիկա մեղանշող մարդիկը իրեն կը հրաւիրէ, անոնց սիրով եւ քաղցրութեամբ կը խօսի, անոնց կ'աղերսէ ու կը պաղատի: Սակայն երբոր մարդիկ Աստուծոյ «մեղմ ու բարակ ձայնը» չեն լսեր, յայնժամ անոնց սաստիկ եւ զօրաւոր շեշտերով կը խօսի. զանոնք կը սաստէ եւ կը յանդիմանէ: Եւ երբոր ասոնք ալ օգուտ չեն ունենար, յայնժամ Աստուած կ'ստիպուի աւելի խիստ միջոցներու դիմել, եւ զանոնք դառն ցաւերով եւ վիշտերով հարուածել, որպէս զի անոնք սթափին, իրենց վտանգաւոր վիճակը տեսնեն եւ զղջման ու դարձի գան: Այս կերպով, Աստուած շատ անգամներ գաւազան կը գործածէ մարդիկը յանդիմանելու եւ զգաստութեան բերելու համար:

Անշուշտ, Աստուած չի պիտի ստիպուէր այսպիսի խիստ միջոցներու դիմել, եթէ մարդիկ բարեբաստութեան մէջ զինք չի մոռնային, հանգստութեան մէջ զայն չանտեսէին, ուրախութեան մէջ անկէ չի հեռանային: Սակայն մարդկային փորձառութեամբ ապացուցուած իրողութիւն մըն է թէ մարդիկ ընդհանուր առմամբ հակամէտ են զԱստուած մոռնալ բարեբաղդութեան օրերուն մէջ. իսկ զԱյն յիշել դժբաղդութեան օրերուն մէջ: Հանգստութեան եւ բարօրութեան օրերուն մէջ մարդիկ սովորաբար յանձնապաստան, հպարտ, փառամոլ եւ ամբարտաւան կը դառնան. մինչդեռ նեղութեան եւ դժբաղդութեան օրերուն մէջ մարդիկ կը խոնարհին եւ զղջացող հողիով Աստուծոյ կը դիմեն: Կարիքը, տառապանքը, աղէտը ինքնաբերաբար մարդուս երեսը դէպ ի Աստուած կը դարձնէ: Մեր անկարողութիւնը մեզ բնազդաբար

Ամենակարողին կ'առաջնորդէ: Մեր յուսահատութիւնը մեզ բնականօրէն յուսոյ աղբիւրին կ'ուղղէ: Մեղանշող մարդուն համար, բարեբաղդութիւնը դժբաղդութիւն, իսկ ասպաշխարութիւնը դործող դժբաղդութիւնը իրական բարեբաղդութիւն կ'ըլլայ: Հոգեւոր տեսակէտէն բարեբաղդութիւնը յաճախ աւելի վտանգաւոր ծուղակ մը կ'ըլլայ քան դժբաղդութիւնը:

Միթէ անհատներու եւ ազգերու պատմութիւնները այս ըստեւ ճշմարտութիւնը չեն հաստատեր: Չէ՞ որ շատ ազգեր իրենց աճման ու ճգնումի օրերուն, կորովի, արդար, պարկեշտ, առաքինի եղած են. բայց երբոր հասած են յաջողութեան եւ փառքի դադաթնակէտին, եւ տիրացած են ամէն տեսակ ճոխութեանց եւ վայելքներու, յայնժամ եղած են հաճոյամուլ, թուլամորթ, շուայտ, անուղղայ, որոնց երեսէն վերջապէս անկման ու կործանման մատնուած են: Տաղնապներու դիմացող շատ մը ազգեր, չեն կրցած բարեբաստութեան դիմանալ:

Աստուծոյ մարդը Մովսէս վախ չունէր թէ Իսրայէլացիք Տէրը պիտի մոռնային, որքան ատեն որ անապատի նեղութիւններուն եւ վտանգներուն ենթարկուած էին. սակայն անիկա կը վախնար թէ անոնք Տէրը պիտի մոռնային, երբոր խոստացեալ երկրին մէջ հաստատուէին, եւ կաթ ու մեղր հոսող երկրին առատութիւնները վայելէին: Ուստի, նա իր ժողովուրդը այս հաւանական վտանգին դէմ կանխաւ դրուչացուց, իբր թէ մեծագոյն թշնամիին դէմ, եւ անոնց տուաւ սա խրատը. «Երբ քու Տէր Աստուածդ քեզ տանի այն երկիրը, որուն համար քու հայրերուդ՝ Աբրահամի, Իսահակի ու Յակոբի երդում քրաւ, որ քեզի մեծ ու գեղեցիկ քաղաքներ տայ, գորոնք դուն շինած չես. եւ ամէն քարիքներով լեցուած տուներ՝ գորոնք դուն լեցուցած չես, ու փորուած ջր-

կորներ՝ գորոնք դուն փորած չես, այգիներ ու ձիթենիներ՝ գորոնք դուն տնկած չես. ու երբ ուտես ու կշտանաս, գգոյշ կեցիր, որ չըլլայ քէ քեզ եգիպտոսի երկրէն, ծառայութեան տունէն հանող Տէրը մոռնաս» (Բ.Օրին. 6:10-12.):

Մովսէսին վախցածը տեղի ունեցաւ: Նեղութիւններու մէջ Տէրը վարող ժողովուրդը, ճոխութեանց մէջ Տէրը մոռցաւ: Միթէ նոյն բանը չի՞ կրնար ըսուիլ մեր ազգակիցներէն շատերուն համար: Տարագրութեանց եւ տառապանքի այդ սեւ օրերուն մէջ, մեր ազգակիցներէն շատեր, Աստուծոյ շատ աւելի մօտ կ'ապրէին, քան ապահովութեան եւ առատութեան այս օրերուն մէջ: Արիւնհեղութեանց եւ հալածանքի այդ սոսկալի օրերուն մէջ, անոնք շատ աւելի ջերմ սէր ու անկեղծ հաւատք ունէին, քան հիմա: Այդ թշնամի եւ այլապէս երկրին մէջ, անոնք շատ աւելի հաւատարմօրէն զԱստուած կը պաշտէին, եւ կանոնաւորապէս Աստուծոյ տուները կը յաճախէին աղօթքի եւ երկրպագութեան համար, քան այս ազատ եւ Քրիստոնեայ երկրին մէջ: Այո՛, շատ մը Հայեր՝ որոնք հայրենիքին մէջ Տէրը կը ծառայէին, հոս զայն մոռցած են: Ո՛չ, բարեկամներ, ազատութիւնը, հանգստութիւնը, բարեբաստութիւնը անանկ կարծուածին պէս մեծ բարիքներ չեն, եթէ մենք չի գիտնանք զանոնք շիտակ կերպով գործածել: «Քանզի ի՞նչ օգուտ է մարդուն որ բոլոր աշխարհը վաստկի, եւ իր անձը կորսնցնէ» (Մարկ. 8:36.):

Տէրը, անցեալին մէջ, զինք մոռցող Իսրայէլի ժողովուրդը դառնադէտ տառապանքներու մատնեց, որպէս զի իրեն ետ դառնան, եւ իրենց բարերարը ճանչնան: Աստուած իր անհուն սէրէն դրդուած այս հարուածներով իր մոլորած ժողովուրդը ցնցելու եւ ուղղութեան բերե-

լու աշխատեցաւ : Քանզի Նա գիտէր թէ «երբ նեղութեան մէջ մտնեն զիս կանուխ (կաթոգիւն) պիտի փնտռեն», *ինչպէս Ուսէա Մարգարէին բերնով յայտարարեց* (5 : 15.) : Այս էր նոյն Մարգարէին կեղերոնական պատգամը . «Եկէ՛ք ու Տէրոջը դառնանք, քանզի անիկա պատառեց, ու անիկա մեզ պիտի բժշկէ . անիկա գարկաւ, ու անիկա մեզ պիտի պատէ :» Այս խօսքերուն իմաստը աւելի լաւ կը հասկցուի, երբոր սա թարգմանութեամբ կը կարգանք . «Անիկա պատառեց, ՈՐՊԵՍ ԶԻ մեզ բժշկէ . անիկա գարկաւ, ՈՐՊԵՍ ԶԻ մեզ կապէ :» Անոր պատաստելը եւ դարնելը բարի նպատակով է : Անիկա կ'ուզէ բժշկել, առողջ օրհնել . եւ ասոր համար կ'ստիպուի ցաւցնել : Անոր պատաստումը վերաբոյժի մը պատաստումն է, որ հիւանդը բժշկելու համար կը կտրէ :

Աստուծոյ այս պատաստումը ի դերեւ չէլաւ : Ոմանք այս կտրումէն զգաստացան եւ իրենց Տէրը ճանչցան : Եսայի Մարգարէն ալ կը հաստատէ նեղութեանց բարբարաւ ազդեցութիւնը : «Ով Տէր, նեղութեան մէջ քեզ փնտռեցիք . քու պատիժդ անոնց վրայ եղած ատեն աղաչանք բրին» (26 : 16.) : Մահուան լուրջ վտանգներուն մէջ, մարդիկ ծանծաղ դուարձութիւններ չեն փնտռեր, այլ Ամենակալին բազումները կը փնտռեն : Իր ամբողջ կեանքին մէջ անաստուած ըլլալ խոստովանող մարդ մը, երբոր գործարանի մը մեքենաներուն մէջ բռնուեցաւ, սկսաւ բոլոր գործարանի մը մեքենաներուն մէջ բռնուեցաւ, սկսաւ Աստուծոյ օգնութիւն աղերսել : Մէկը իրեն հարցուց, «Դուն Աստուծոյ չես հաւատար, չէ՞» : Նա պատասխանեց, «Եթէ Աստուած մը չկայ, պէտք է որ ըլլայ, մարդս այս տեսակ անճար կացութենէ մը ազատելու համար :»

Մարդս զԱստուած ճանչնալու համար վիշտերու կը կարօտի : Անգղիերէն իմաստուն առածը կ'ըսէ . «Մարդուն անձկութիւնը Աստուծոյ պատեհութիւնն է» :

(Man's extremity is God's opportunity) : Շատ անհատներ Աստուծոյ մասին երբէք պիտի չի խորհէին, եթէ ցաւերու մէջ չիյնային : Շատ մը մեղաւորներ երբէք դարձի պիտի չգային, եթէ դժբաղդութիւններու չենթարկուէին : Ճշմարիտ է Սաղմոսերգուին ըսածը . «Քանի որ վշտացած չէի, կը սխալէի (կը մոլորէի)» (119 : 67.) : Թըշուառութիւնն էր որ Անառակ Որդւոյն քայլերը դէպի տուն դարձուց : Անօթութիւնն էր որ հօրը սէրը բողբոռ սէրէն աւելի հրապուրիչ ընծայեց : Սովը անոր փրկութեան միջնորդը եղաւ : Աստուած չարիքը բարիքի ծառայեցուց :

Անառակ Որդին առանձին չի կենար : Անիկա կը պատկերացնէ շատերուն փորձառութիւնը : Աստուած շատ անգամներ ցաւերը կը գործածէ, մարդոց սրտերը կակղցնելու, եւ զանոնք զղջման եւ արդարութեան առաջնորդելու համար : Սամիսոն իր յաջողութեան օրերուն մէջ, անաստ գտնուեցաւ Տէրոջ պատուէրներուն, եւ յանձնուեցաւ իր տուփական կիրքերուն : «Եւ անիկա չէր գիտեր որ Տէրը իրմէ գացեր էր :» Սակայն երբ արդահատելի դժբաղդութեանց հանդիպեցաւ, անկեղծ զղջումով Տէրոջ դարձաւ, եւ վերստացաւ իր գերմարդկային զօրութիւնը : Բիւրաւորներ, վիշտերու միջոցաւ Աստուծոյ առաջնորդուած եւ իրենց փրկութիւնը գտած են :

Աստիղացի Ֆրանչիսկոսը իր կեանքին մասին խորհել սկսաւ, երբ քսան երկու տարեկան հասակին մէջ վտանգաւոր հիւանդութենէ մը բռնուեցաւ : Անոր կեանքը եղած էր զեղխութեան, ծուլութեան, գիշերային հեշտանքներու եւ կոխներու կեանք մը : Եւ անիկա զրդուեցաւ որ իր հօրը տունը ձգելով նոր կեանք մը սկսի : Եւ այդ օրէն սկսելով հեշտամով Ֆրանչիսկոս սուրբ Ֆրանչիսկոսի այլափոխուեցաւ : Եւ անիկա աղքատութիւնը

իրեն ընդունեց իբր հարս, եւ քաղաքէ քաղաք շրջեցաւ, մուրրած ժողովուրդները ապաշխարութեան, անկեղծութեան, պարզութեան, պարկեշտութեան եւ սիրոյ հրաւիրելու համար: Աշխարհիս կեանք եւ լոյս սփռող Պենետիկղեան Միաբանութեան այս հիմնադիրին, երկտասարդ հասակին մէջ հիւանդանալը, թէ իրեն եւ թէ ամբողջ ցեղին համար անհաշիւ օրհնութիւն մը եղաւ:

Նմանապէս, ապերջանիկ ամուսնութիւն մը, եւ չորս տարի տեող ներքին մարտնչում մը, ձէնովացի Գաթրինը սուրբերու դասին բարձրացուց, եւ դայն շինեց Միջին դարերու անուանի Ֆլորէնս Նայթինկէյլը, եւ անոր ազդեցութիւնն ու յիշատակը անմահացուց պատմութեան մէջ:

Նոյնպէս, հիւանդութիւնը եւ իր սենեակին առանձնութեան մէջ անցուցած երեք մենիկ տարիները, Սիենացի սուրբ Գաթրինը պատրաստեց այն օրհնաւէտ եւ բեղմնալից կեանքին, եւ անոր կարճ կեանքը թէ քաղաքական եւ թէ հոգեւոր հսկայ ուժի մը վերածեց: Աշխարհի փառաշող սուրբերէն շատեր իրենց հոգեւոր յաղթութեան հասան մարմնաւոր տկարութիւններու եւ կըսկիծներու միջոցաւ: Անոնք վերահաստատեցին սա ճըշմարտութիւնը թէ «Աստուծոյ զօրութիւնը տկարութեան մէջ կը լրանայ»: Սամուէլ Բութզըրֆօլտ ըսած է. «Վատահ եմ թէ լաւագոյն է հիւանդ ըլլալ, պայմանաւ որ Քրիստոս դայ անկողինին քով եւ վարագոյրները քաշէ եւ ըսէ. «Քաջ եղիր, ես եմ քու փրկութիւնը», քան թէ առողջութիւն վայելել, եւ երբէք Աստուծմէ այցելութիւն չընդունիլ»: Կան վեհագի անդամալոյծներ, որոնք իրենց անթացուկերը կը կրեն, իբր թէ անոնք արքայական մականներ եղած ըլլային, որոնք իրենց անխաւոր աթոռներուն (wheel chair) վրայ կը շրջին, իբր թէ ար-

քունական կառքերու վրայ հեծած: Գեղգեղաձայն թռչունի մը մասին կ'ըսուի թէ իր կուրծքը փուշի մը կըրթնած ըլլալով կ'երգէ, քանզի այս կերպով ամէնէն քաղցր խաղերով կրնայ երգել: Վարդը ամէնէն անուշ կը բուրէ, երբոր անոր թերթիկները կը ճգմուին: Կեանքըն ալ ամէնէն անուշ կը բուրէ, երբոր անիկա փորձութիւններով կը համեմուի: Աշխարհս հոգեւորապէս շատ պիտի աղքատանար, եթէ երկրի վրայ ցաւ եւ նեղութիւն գոյութիւն չունենար: Յեղին գերբնտիր զաւակները իրենց փառքին հասած են տուայտանքներու ճամբայով, ինչպէս որ Քրիստոս ալ իր փառքին հասաւ խաչին ճամբայով:

Այս իրողութեան լոյսին մէջ մեր բնաբանին ճշմարտութիւնը ի յայտ կուգայ: «Վասն զի Աստուծոյ ուղածին պէս եղած տրտմութիւնը փրկութեան համար ապաշխարութիւն կը գործէ, որ զղջալու բան չէ»: Աղքատներ Մաքլարըն ըսած է. «Երանելի է այն յուսալքումը որ Աստուծոյ ձեռքերուն կը կառչի. հաստատուն է այն վրտասանութիւնը որ յուսահատութենէ դուրս կը ժայթքէ»:»

Ուստի, մենք տրտնջելու չենք, ընդհակառակը շնորհակալ եւ ուրախ ըլլալու ենք այդ տրտմութեանց համար, որոնք փրկութեան համար ապաշխարութիւն կը գործեն: Այս տեսակ տրտմութեանց մէջ զղջալու բան չկայ: Այս տրտմութիւններուն ետեւ բարի նպատակ մը ծածկուած է: Այս կսկիծներուն ետեւ սիրող հոգի մը կայնած է: Ատոնց միջոցաւ Աստուծոյ կ'աշխատի մեզ գտել եւ սրբել: Սակայն հոս հարցում մը կը ծագի թէ բոլոր տրտմութիւնները սրբարար կ'ըլլա՞ն. բոլոր վիշտերը փրկութեան համար ապաշխարութիւն կը գործե՞ն: Այս հարցումին ստիպուած ենք պատասխանել բացասական կերպով: Դժբաղդաբար, բոլոր վիշտերը մարդոց համար

փրկարար եւ օրհնաբեր չեն ըլլար: Մեր բնաբանին վերջին մասն ալ կը հաստատէ այս իրողութիւնը. «...բայց աշխարհի տրտմութիւնը մահ կը դործէ»:

Ուրեմն, ամէն տրտմութիւն կենարար չէ. կան տրտմութիւններ ալ որոնք մահաբեր են: Թէ տրտմութիւն մը կենսատու պիտի ըլլայ եթէ ոչ մահացու, ասիկա ենթակային անձէն կախում ունի: Աստուծոյ մտադրութեան մէջ ամէն տրտմութիւն փրկարար ըլլալու սահմանուած է: Եւ եթէ այսպէս չըլլար, պատճառը այն է թէ մարդիկ զանոնք այս կերպով չեն օգտագործեր: Կան անհատներ որոնք երկնային տրտմութեամբ կը տրտմին. կան անհատներ ալ որոնք աշխարհային տրտմութեամբ կը տրտմին: Միեւնոյն տրտմութիւնը երկու անձերու մէջ հակոտնեայ արդիւնքներ կ'արտադրէ: Մէկը ցաւերու ներքեւ կ'ընկճուի եւ կը յուսալքուի. եւ անոր բերնէն տրտունջներ, ողբեր, եւ նոյն իսկ անէծքներ կը լսուին: Միւսը ցաւերու ներքեւ կը բիւրեղանայ, եւ անոր տառապանքները կը շաղուին գոհութեան երգերով: Մարդուն մէկը «կորուսեալ վիշտեր» մակդիրով կ'որակէ, այն տե՛սակ վիշտերը, որոնցմէ ենթական չի յաջողիր ձեռք բերել այն օրհնութիւնը զոր Աստուած ծրագրած էր իրեն տալու: Ինչպէս որ կորուսեալ պատեհութիւններ կան, անանկ ալ կորուսեալ վիշտեր կան. վիշտեր որոնք առանց ոեւէ օգուտ հասցնելու եկած անցած են ենթակային վրայէն, որոնք բոլորովին արարդիւն եւ ամուր մը նացած են:

Յաւը անձերու միջեւ եղած իրական տարբերութիւնը երեւան կը հանէ. մարդուն ծուծը, իսկական կերտուածքը եւ նկարագիրը կը քօղաղերծէ: Ճօշ Պիլինկը ըսած է. «Կեանքը յեսանաքար մըն է: Թէ ասիկա կեանքը կը փշրէ եթէ ոչ կը փայլեցնէ, առկախ է այն ատաղձէն»,

որմէ նա շինուած է:» Յաւերու հնոցին մէջ, մարդիկ իրարմէ կը դատորոշուին: Ճշմարիտ մարդը փորձանքներու մէջ կը պահէ իր յոյսը, իր հաւատքը, իր քաջութիւնը, եւ հերոսաբար կը մարտնչի կեանքի դժբաղդութեանց դէմ: Մէկալը կը կորսնցնէ իր յոյսը, հաւատքը, բարոյական քաջութիւնը, եւ մէկ կողմ կը նետէ պատերազմի դէնքերը, եւ անձարակօրէն անձնատուր կ'ըլլայ բազդի քմահաճոյքներուն: Մէկը արտասուաց հեղեղներուն ներքեւ կը խորասուզուի. միւսը «արտասուաց հոլիտէն անցնելով աղբիւրի պէս կ'ընէ զանիկա» (Սաղ: 84:6.):

Ուստի, խնդիրը անձնականացնելով՝ հարցնեմ թէ տրտմութիւնը քեզի ի՞նչպէս կ'ազդէ. դուն ցաւերդ ի՞նչ տրամադրութեամբ կ'ընդունիս, դժգոհութեամբ թէ հաճութեամբ. դուն ի՞նչ տեսակ ատաղձէ շինուած ես. վիշտերը քեզ կ'ը շինե՞ն թէ կը քանդեն: Նեղութիւնները քեզ Աստուծոյ կը մօտեցնե՞ն, թէ անկէ կը հեռացնեն:

Մի՛ մոռնար թէ այս աշխարհին մէջ նեղութիւնները իրարու կը նմանին, բայց անձերը կը տարբերին: Եւ նեղութիւններու հակադրեցութիւնը կ'որոշուի մարդուն կեցուածքով եւ հայեացքով: Եւ մարդուն կեցուածքը եւ հայեացքը կ'որոշուի, Աստուծոյ հանդէպ մարդուն բռնած դիրքով: Այս կեանքին մէջ անհուն տարբերութիւն կ'ընէ թէ մէկը Աստուծոյ կը հաւատայ թէ ոչ: Աստուծոյ վրայ անկեղծ հաւատք եւ վստահութիւն ունեցող մէկը, ամենէն յուսահատական պարագաներու տակ իսկ անյոյս չի մնար, ամէնէն միտին վայրկեաններու մէջ իսկ անլոյս չի մնար: Աստուածային հաւատքը իրեն անհատնում զօրութիւն, քաջալերութիւն, բարոյական տոկունութիւն կը պարգեւէ: Եւ անիկա ամէնէն անտանելի տառապանքներուն մէջէն անցած ատենն իսկ, Յորին պէս

կրնայ յայտարարել, «քէել անիկա զիս սպաննէ, ես անոր պիտի յուսամ» (13:15.) : Աստուծոյ վստահող մէկը վիշտերու վրայ կը հեծնէ, փոխանակ վիշտերը իր վրայ հեծցնելու : Եւ անիկա իր լաւատեսութիւնը եւ արիութիւնը չի կորսնցներ :

Սակայն Աստուածային հաւատքէ զուրկ եղող մարդ մը տաժանքներու տակ կը խռովի, կ'ընկճուի, կը թաղուի : Ամէն դժբաղդութիւն իրեն համար փորձանք մը կը դառնայ : Քանզի անիկա կեանքի խարխիս եւ ապաւէն չունի : Խելացի մարդու մը ըսածին պէս. «Այն նաւը որ երթալիք նաւահանգիստ չունի, անոր ամէն մէկ հով փորձանք մըն է :»

Երանելի բան է հաւատք ունենալ : «Երա՛նի այն մարդոց որոնց զօրութիւնը Քեզմէ է :» Աստուծոյ հաւատալ, վիշտերու հանդէպ մարդուս հայեցակէտը կը փոխէ, եւ անոնց ծանրութիւնը կը մեղմացնէ : Հաւատացեալ մը չարիքէն բարիք կը հանէ. քանզի անիկա Պօղոս Առաքեալի նման վստահ կ'ըլլայ թէ «ամէն բաները բարիի գործակից կ'ըլլան անոնց որ զԱստուած կը սիրեն» : (Հռով. 8:28.) : Չի մոռնաք որ այս խօսքերը արտասանող Առաքեալը երկրիս վրայ ամէնէն շատ չարչարանք կրող անհատներէն մին եղաւ : Բայց եւ այնպէս անիկա յանդուգնօրէն կը յայտարարէ, «ԳԻՏՆՆՔ ՈՐ (կը հաւատանք ալ չըսեր) ամէն բաները բարիի գործակից կ'ըլլան, անոնց որ զԱստուած կը սիրեն» : Ճօրճ Միւլլըր, հաւատքի եւ աղօթքի այդ զարմանալի ախոյեանը, կուտայ սա հիանալի վկայութիւնը. «Հազար փորձութեանց մէջ, ոչ թէ հինգ հարիւրը հաւատացեալի բարիին գործակից կ'ըլլան, հազար իննը հարիւր ինիսուն իննը հատը, եւ մէկ ալ աւելին :»

Ուստի, բարեկամներ, վիշտերէն մի՛ ընկրկիք : Աղէտներէն մի՛ յուսահատիք : Առաքեալի յորդորին համակերպելով, «Արքուն կեցէք, հաւատքի մէջ հաստատ կեցէք, կտրիճներու պէս վարուեցէք, զօրացէք» (Ա. Կորն. 16:13.) : Դժուարին կացութեանց մէջ փոխանակ ողբալու, ձեր լաւագոյնը ըրէք : Լեղիէն անուշ հանելու աշխատեցէք : Ձեր տրամութիւններուն կենարար եւ փրկարար հանգամանք տալու ճիգ թափեցէք : Տէրոջ վրայ վստահութիւն ունեցէք : Ամենակարողին ապաւինեցէք : Ձեր նեղութեանց մէջ Աստուծոյ ծոցը նետուեցէք : Եւ Ան «իբ փետուրներովը պիտի ծածկէ, ու իբ քևերուն տակ պիտի ապաստանիք» (Սաղ. 91:4.) : «Աստուած մեր ապաւենն ու զօրութիւնն է. նեղութիւններու մէջ խիստ օգնական կը գտնուի» (Սաղ. 46:1.) :



ԱՍՏՈՒԱԾԱՅԱՅՏ ՎԻՇՏԵՐ

«Ողիա Յագաւորին մահուան տարին Տէրը տեսայ որ բարձր ու վերացած ածուի վրայ նստեր էր, ու անոր քղանցքը տաճարը կը լեցնէր»:

ԵՍԱ. 2. 1.

ՄԵՐ նախորդ խորհրդածութեան մէջ պարզեցինք թէ վիշտերու գլխաւոր նպատակներէն մէկը մարդիկը Աստուծոյ մօտ քաշել է, զանոնք ապաշխարութեան եւ փրկութեան մղել է: Նոյնպէս, վիշտերը զտող եւ մաքրագործող ազդակներ են մեր կեանքերուն մէջ: Կրակը կը զտէ մաքուրը աղտոտէն, կը մաքրէ հարազատը կեղծէն, կը զատէ մնայունը կորնչելիէն, կ'անջատէ արժէքաւորը փուճէն: Առաքեալի ըսածին պէս, մէկուն գործին ինչ տեսակ ըլլալը կրակը պիտի փորձէ: Եթէ մէկուն շինած գործը մնալու ըլլայ, ինք վարձք պիտի առնէ. եւ եթէ մէկուն շինածը այրելու ըլլայ, անիկա վնաս պիտի ֆաշէ. բայց ինք պիտի ազատի, սակայն այնպէս՝ իբր թէ կրակի մէջէն» (Ա. Կորն. 3:13-15.): Կրակը երեւան կը հանէ մարդուն թէ գործը եւ թէ իսկութիւնը: Աստուած մեզ փորձանքներով կը քննէ, եւ մեզ կը փորձէ, «ինչպէս արծաթը կը փորձուի»:

Ուստի, այս կեանքի մէջ ակնկալելու ենք որ փորձութիւններու քննութեանց պիտի ենթարկուինք: Պետրոս Առաքեալի սա խօսքերուն ճշմարտութիւնը ըմբռնելու ենք. «Սիրելիներ, օտար բան մը մի սեպէք այդ նեղութեան բորբոքը, որ ձեզ փորձելու համար կ'ըլլայ, որպէս թէ օտար բան մը ձեզի հանդիպած է» (Ա. Պետ. 4:12.): Փորձութեան նպատակը մեզ նեղել չէ, հապա փորձաքարի զարնել (test) է: Փորձութեանց մէջ մարդուն հաւատքը, անկեղծութիւնը, նուիրումը, արժանիքը կը փորձուի. իրական կշիռքը կը կշռուի: Փորձը ի յայտ կը բերէ ինչ որ մարդուն մէջ կայ, եւ ինչ որ չկայ:

Աստուած երբեմն մեր հաւատքը կը փորձէ թէ իր գիտութեան համար եւ թէ մեր դիտութեան համար: Մարդը անգործութեան մէջ որոշ չի գիտեր թէ մաքուր եւ ճշմարիտ հաւատքի մէջ է թէ չէ: Յաճախ, երբ կը կարծէ թէ հաւատքի մէջ է, հաւատքէն շեղած կ'ըլլայ: Երբ կը կարծէ թէ արթուն է, մրափած կ'ըլլայ: Երբ կը խորհի թէ կանգուն է, ինկած կ'ըլլայ: Մարդ կըրնայ անտեղեակ եւ անհոգ ըլլալ իր վտանգաւոր կացութեան մասին: Սակայն, երբոր մարդ կրակով կը փորձուի, անոր հաւատքը կը յայտնուի, անոր կայունութիւնը կ'ստուգուի: Փորձութիւնը մարդը կը յայտնէ իրեն: Փորձութեան մէջ մարդս կը գիտակցի իր զօրաւորութեան եւ կամ տկարութեան: Փորձի ներքեւ շատ մը տկարներ իրենց զօրաւոր ըլլալնին, եւ շատ մը ինքնահաւաններ իրենց անարժան ըլլալնին կը հասկնան: Այս կերպով, փորձութիւնը մարդս խոնարհ եւ ապաւինող (trustful) կը շինէ. խոնարհ՝ հանդէպ իր անձին, ապաւինող՝ հանդէպ իր Աստուծոյն: Մարդուն համար այս գիտակցութեան դալ, այսինքն իր տկարութիւնը եւ Աստուծոյ մէջ եղած զօրութիւնը հասկնալ, ամէնէն օրհ-

նեալ փորձառութիւնն է: Փորձերու միջոցաւ, երբ մէկ կողմէն՝ Աստուած մեր ապիկարութիւնը կը մատնանչէ, միւս կողմէն՝ մեր զօրութեան աղբիւրը մեզի կը ցուցնէ:

Մարդուն ժամանակ առ ժամանակ փորձուիլը իրեն համար հարկաւոր է, զայն հոգեւորապէս արթուն եւ կենսունակ պահելու համար: Նեղութիւնը մարդս կը գրգռէ հոգեւորապէս: Փորձութիւնը մարդս կ'ամրապնդէ հաւատքի մէջ, կ'արմատացնէ Աստուծոյ մէջ: Նեղութիւններու միջոցաւ, Աստուած հաւատացեալները աւելի տոկուն եւ անսասան կը շինէ: Երբոր Աբրահամ իր միակ սիրելի որդին զոհելու փորձով փորձուեցաւ, այդ փորձէն դուրս եկաւ հաւատքի ու վստահութեան մէջ աւելի արմատացած: Յոր՝ իր ծանր փորձութիւններէն մեծագոյն համբերութիւն եւ տոկունութիւն շահեցաւ: Մեր Տէրը Յիսուս Քրիստոս անապատի փորձութեանց մէջէն սրբացած եւ զօրացած դուրս եկաւ:

Փորձութիւնները կը սատարեն զօրացման: Աստուած պղտիկ փորձութիւններով մեզ տակաւ առ տակաւ կը զօրացնէ, եւ կը պատրաստէ աւելի մեծերուն համար, որպէս զի կարենանք անոնց դիմանալ, երբոր անոնք մեր վրայ կը հասնին: Փորձութեան վրայ տարուած ամէն մէկ յաղթութիւն, մեր մէջ պահեստի ուժի կը վերածուի: Ամէն անգամ որ փորձութեան մը կը յաղթենք, մեր պահեստի ուժը կը շատնայ, մեր ուժի ամբարը կը լեցուի: Եւ այս ամբարուած ուժով, մենք կարող կ'ըլլանք կեանքի ճշմարտեմբը անցնել ապահովաբար: Կեանքի ահաւոր փորձորիկներուն մէջ, բոլոր խարխուլ շինուածքները կը քայքայուին, սակայն հաստատուն չէնքերը կանգուն կը մնան: Իսկ կեանքի դիմացկունութիւնը ձեռք կը բերուի այն համբերատարութեամբ որ կը ցուցադրուի սլոգանիկ փորձութեանց մէջ: «Երանելի է այն մարդը որ փոր-

ձուքեան կը համբերէ. վասն զի եթէ փորձուելով ընտիր կը գտնուի, կեանաց պսակը պիտի առնէ, զոր Տէրը զինք սիրողներուն խոստացաւ» (Յակ. 1:12.):

Վիշտերը ոչ միայն կեանքը կը զտեն, այլ կը խորունկցնեն: Այն անձը՝ որ փորձանքի չի հանդիպիր, եւ խրախճանքներու մէջ կ'ոլորուի, անոր կեանքը ծանծաղ ու մահերեսային կ'ըլլայ: Անիկա զուրկ կ'ըլլայ այն լըրջութենէն ու խորութենէն, որ կեանքին նշանակութիւն եւ արժէք կուտայ: Երբոր թեթեւօլիկ եւ ծանծաղամիտ մարդ մը փորձանքի խարաղանով կը մտրակուի մէկէն կ'սթափի, լուրջ կերպարանք մը կ'ստանայ, եւ կեանքի խորունկ իմաստին եւ յետին նպատակներուն մասին խորհիլ կ'սկսի: Եւ այս կերպով, անոր խորհուրդները կը լայնան, տեսութիւնները կը բարձրանան, եւ կեանքը կը խորունկնայ: Վիշտը երբ մէկ կողմէն կեանքը կը բարձրացնէ, միւս կողմէն զայն կը խորունկցնէ: Եւ ասանկով բարիի գործակից կ'ըլլայ: Քանզի բացայայտ է թէ ծանծաղ կեանքը անիմաստ եւ ունայն է, մինչդեռ խորունկ կեանքը իմաստալից եւ լեցուն:

Ամենամեծ բարիքներէն մէկն ալ որ կը ծնի վիշտերու մէջէն՝ երկնային տեսիլքներն են: Չ'կայ մարդկային փորձառութիւն մը, որ այնքան մխիթարար, խրախուսիչ, կենսատու ըլլայ՝ որքան աստուածային տեսիլքները, որոնք կը հասնին վհատած մարդկութեան: Անոնք իրական ովասիսներ են չոր անապատները կենդանացնող: Վա՛յ այն ազգին, որուն տեսիլքները վերջացած են եւ տեսանողները կտրուած: «Առանց մարգարէութեան (vision) ժողովուրդը կը խոտորի» (Առակ. 29:18.): Յայտնութիւններն են որ դողդոջուն ծունկերը կ'ամրապնդեն, յուսահատ հոգիները կը յուսադրեն եւ ուղեկորոյս քայլերը կ'առաջնորդեն:

Այսպիսի կենսաբաշխ յայտնութիւններ յաճախ կը ժայթքեն վիշտերու խոռոչներուն մէջէն, ինչպէս որ պաղ աղբիւրներու ջուրեր դուրս կը խուժեն ապառաժներու ճեղքուածքներուն մէջէն: Աստուած շատ անգամներ իր լաւագոյն տեսիլքները կը շնորհէ վիշտերու կսկիծներուն եւ նեղութիւններու ճգնաժամներուն մէջ: Մենք առ հասարակ կը խորհինք թէ տեսիլքի վայրերը բարձր լեռներու կատարներ են: Ասիկա այսպէս է: Սակայն հոգեւոր աշխարհին մէջ՝ ինչպէս որ բարձրաբերձ եւ լուսավայլ լեռներու գագաթներ տեսիլքի վայրեր են, անանկ ալ անդնդախոր եւ մթին ձորերը տեսիլքի կեդրոններ են: Յաճախ Աստուած իր լոյսը կը փայլեցնէ, ամէնէն խոր մթութեան մէջէն: Յաճախ, խաւարը միջոց կ'ըլլայ լուսոյ աւելի շողշողուն կերպով ճառագայթելուն:

Ասոր բացատրութիւնը պարզ է: Մենք սեւէ բան լաւագոյն կերպով կրնանք տեսնել հակադիր գետնի (background) վրայ: Իրերը հակապատկերներու վրայ ամէնէն որոշ եւ ցցուն կերպով կ'երեւան: Չորօրինակ, ճերմակ կէտ մը սեւ քարետախտակին վրայ աւելի յստակ կը տեսնուի. աստղերը խաւարակուոն գիշերուան մէջ աւելի մեծ փայլունութեամբ կը փայլին: Նմանապէս, մարդ կուշտ ըլլալը անօթութեան մէջ աւելի լաւ կը հասկնայ. առատութիւնը չքաւորութեան մէջ աւելի կը դնահատէ, բարեբաղդութիւնը դժբաղդութեան մէջ աւելի աղէկ կ'ըմբռնէ, ուրախութիւնը տրտմութեան մէջ աւելի լաւ կ'զղայ, յաղթութիւնը պարտութեան մէջ աւելի լաւ կը դիտէ: Հետեւաբար կեանքի ամենացանկալի արտօնութիւնները եւ ամենամեծ վայելքները լիուրի վայելելու համար, մարդս պարտի զրկանքներու եւ նեղութիւններու մատնուիլ: Այն մարդը որ աղքատութենէ

կը հարստանայ, մեծագոյն գոհունակութիւն կ'ունենայ, քան այն անձը որ իր հօրմէն խոշոր հարստութիւն մը կը ժառանգէ, եւ զայն իր ճակտին քրտինքովը չի շահիր: Այն մարդը որ աննշան ընտանիքէ մը կը սերի, եւ ինքնազարգացումով եւ ինքնօգնութեամբ յաջողութեան եւ համբաւի բարձունքներուն կը հասնի, շատ աւելի երջանիկ կ'ըզայ, քան այն անձը որ արհեստական ընտանիքի մը եւ առանձնաշնորհեալ միջավայրի մը շնորհիւ նոյն վիճակին կը հասնի: Աղէտէ մը ձերբազատող մարդու մը ուրախութիւնը, ոեւէ աղէտի չի հանդիպող մարդու ուրախութենէն շատ աւելի ճոխ կ'ըլլայ: Ժողովրդային առածը կ'ըսէ. «Եթէ Աստուած աղքատը ուրախացնել ուզէ, նախ անոր աւանակը կը կորսնցնէ, եւ յետոյ անոր նորէն գտնել կուտայ:» Այս առածին մէջ մեծ ճշմարտութիւնը մը պահուած է: Կեանքի լաւագոյն փորձառութիւնները, հակադէր փորձառութիւններէն կը ծնին:

Այս պատճառաւ, Աստուած երբեմն մեզ փորձանքներու կը մատնէ, որպէս զի մեզ մեծագոյն յաջողութեանց հասցնէ. մեզ տրամութեանց մէջ կ'ընկղմէ, որպէս զի մեզ աւելի զեղուն ուրախութեան տիրացնէ. մեզ կ'ընկճէ, որպէս զի մեզ աւելի ճոխ կեանքի մը ժառանգորդը ընէ. մեզ խաւարի մէջ կը ձգէ, որպէս զի մեզ փառաւորագոյն լոյսին հանէ: Աստուածային կարգադրութեան մէջ նսեմաշուք ձորերը սահմանուած են յայտնութիւններու արդանդներ ըլլալ: Շատ անգամներ, Աստուծոյ առժամապէս մարդոցմէ սքողուիլը, անոր աւելի փառաշուք կերպով յայտնուելուն նախաքայլը եղած է: Աստուած տաղնասպներու մէջէն ծագեցուցած է իր երկնային լոյսը: Մարդիկ սաստիկ նեղութեանց մէջ Աստուծոյ տեսիլքը ունեցած են:

Թէ որ Յակոբ Նահապետ իր եղբորը երեսէն չի փախէր, եւ ամայի լեռան մը կողքին վրայ, ուժասպառ եւ յուսահատ վիճակի մէջ չի պառկէր՝ իր գլուխը դնելով կարծր քարի մը վրան, արդեօք պիտի կրնա՞ր տեսնել այն հիասքանչ եւ ափոփարար տեսիլքը, որ իր ամբողջ կեանքին նոր ընթացք եւ թափ շնորհեց: Յակոբին համար այդ տիրառիթ վայրը երկինքի մուտքը եղաւ: Լեռան ժայռերը այլափոխուեցան սանդուխներու՝ որոնք երկիրը կը միացնէին երկինքի, եւ որուն վրայէն Տէրոջ հրեշտակները կ'ելլէին ու կ'իջնէին:

Եթէ Մովսէս Փարաւոնի երեսէն չի փախէր, եւ Մադիամու երկիրը չապաստանէր, եւ հոնտեղ անբնակ լեռներու ամայութեան մէջ չի տքնէր, չի պիտի կրնար տեսնել Եհովային փառքը, որ իրեն յայտնուեցաւ բոցավառ փուշի մը մէջէն:

Եթէ Եղիա Մարդարէն Յեզարէլի վախէն անապատ չի փախէր, եւ քառասուն օր ու քառասուն գիշեր ճամբորդելով, ճարահատ ու վհատ, չապաստանէր Հօրէպ լեռան վրայի քարայրը, Աստուծոյ փառքը տեսնելու առիթը պիտի չունենար, եւ Տէրոջ «մեղմ ու բարակ ձայնը» լսելու վայելքը պիտի չի վայելեր:

Երբոր անապատ կ'ըսենք, մեր երեւակայութեան առջեւ կը պատկերանայ չոր եւ անբերրի վայր մը: Փիլիքական տեսակէտէն ասիկա այսպէս է, սակայն հոգեւոր տեսակէտէն անապատները ամէնէն բեղմնաւէտ եւ արգաւանդ վայրերը եղած են: Մովսէս Եհովան գտաւ անապատին մէջ: Յակոբ Տէրոջ տեսիլքը ունեցաւ ամայի վայրի մը մէջ: Եղիան Ամենակալին հետ հաղորդակցեցաւ անապատին խորերը: Պօղոս Քրիստոսի մասին իր հիանալի յայտնութիւնները ստացաւ Արաբիոյ անապատին մէջ: Մեր Տէրը իր երկնատուր պատգամները

եւ տեսիլքները ընդունեց ամայի վայրերու մէջ: Երբոր անապատը Տէրոջ ներկայութեամբ եւ փառքով կ'ոգեւորուի, յայնժամ անիկա կը դադարի զարշատեսիլ վայր մը ըլլալէ, եւ վարդաբոյր Սարօնի կը կերպարանափոխուի: Ամայութեան մէջ Աստուծոյ երեւումը Մարգարէին սա մարդարէութիւնը կ'իրականացնէ. «Անապատը եւ չոր երկիրը պիտի ուրախանայ. եւ անբնակ երկիրը պիտի ցնծայ, ու շուշանի պէս պիտի ծաղկի» (Եսա. 35:1.):

Արդեօք Եսային ե՞րբ ունեցաւ Աստուծոյ փառապանծ տեսիլքը, եւ ի՞նչ պարագաներու տակ ընդունեց մարգարէ ըլլալու կոչումը: Անիկա կը պատմէ ու կ'ըսէ. «Ողիա թաղաւորին մահուան տարին, Տէրը տեսայ որ բարձր ու վերացած աթոռի վրայ նստեր էր, ու անոր քղանցքը տաճարը կը լեցնէր:» Ողիա թաղաւոր Յուդայի տան վրայ թաղաւորեց յիսուն երկու երկար տարիներ, եւ անիկա «Տէրոջ առջեւ բարի եղածը ընող» բարի, արդար, ուղղամիտ արքայ մը եղաւ: Եւ անոր իմաստուն եւ շինարար տիրապետութեան տակ երկիրը բարգաւաճեցաւ: Այսպիսի աստուածավախ եւ կարող թաղաւորի մը մահը Յուդայի համար անդարմանելի կորուստ մըն էր, եւ անոր բաժանումը երիտասարդ եւ ազդանուէր Եսային խոր սուգի, մտահոգութեան եւ յուսահատութեան մէջ ընկղմեց: Եւ անիկա սկսաւ խորհիլ, «Արդեօք ո՞վ պիտի ըլլայ Ողիայի յաջորդը, արդեօք անիկա ի՞նչպէս պիտի կառավարէ երկիրը, արդեօք ի՞նչ պիտի ըլլայ երկրին վիճակը, արդեօք Ողիային նմանը մէյ մըն ալ պիտի տեսնուի»:» Եսային միտքը մռայլ խորհուրդներով եւ վախերով համակուած էր: Նա տրամութեան եւ խռովմունքի մէջ էր: Եւ ահա այս տագնապներու մէջ, Տէրը յայտնուեցաւ Եսային, իրեն նոր

յոյս եւ լոյս բերելով: Թէ՛ որ Եսային զգացումները թարգմանելու ըլլանք, անոր խօսքերուն պիտի տանք սա բանաձեւը. «Տիրութեան ու սուգի մէջ Տէրը տեսայ. խաւարին մէջ Տէրը խուզարկեցի:»

Չէ՞ մի որ Յովհաննէս Առաքեալն ալ իր երկնային հրաշալի տեսիլքները ընդունեց Պատմոս կղզիի ամայի աքսորավայրին մէջ, ուր Քրիստոսի համար կը չարչարուէր, եւ այս կերպով ի լոյս ածեց այն յայտնութիւնները որոնք բերաւոր չարչարուող հաւատացեալներուն անչափ մխիթարութիւն եւ քաջալերութիւն մատակարարած են: Ի՞նչ հիանալի տեսիլք էր ան, ջուրերով շրջապատուած ժայռուտ եւ նեղ կղզիի մը մէջ. «Եւ նոր երկինք մը ու նոր երկիր մը տեսայ. վասն զի առաջին երկինքը ու առաջին երկիրը անցան, եւ ա՛լ ծով չկար:» Ա՛լ խափանող արգելքներ, արդելափակող պատուարներ, կապտող շղթաներ չկային: «Ալ ծով չկար:» Աստուածայայտնութեան մոզական հպումին տակ, այն կապանքները որոնք կը կապէին Յովհաննէսի մարմինը, անոր հոգին ազատ արձակող թեւերու վերածուեցան:

Յովհաննէս Պրնեանն ալ բանտարկութեան ցաւերուն ու հալածանքներուն մէջ յղացաւ իր նշանաւոր գիրքը, «Քրիստիանոսի ձամբորդութիւնը», որ Սբ. Գիրքէն ետքը ամէնէն շատ սիրուած եւ կարգացուած գիրքը եղած է, եւ անթիւ Քրիստոնէաներուն հայթայթած է երկնային սիրովանք եւ խրախուսանք: Այս գիրքը երկրորդ Յայտնութիւն մըն է ցաւերու խռոցէն բղխած: «Քրիստիանոսի ձամբորդութիւնը» զոյուլթեան չի պիտի վար, եթէ բանտի ընկճող տաժանքները չըլլային: Յովհաննէս Պրնեանն ալ Եսայի մարգարէին պէս կրնար ըսել. «Վիշտերու մէջ Տէրը տեսայ. նեղութիւններու մէջ Փրկիչը գտայ:»

Ճօրճ Մէթհիսըն, Սկովտիացի մեծանուն քարոզիչը, իր հոգեչունչ քարոզներուն եւ Անգլիերէն երգարանները դեղազարդող պատուական երգերուն ներչնչումը, դառն ցաւերու եւ դժբաղդութեանց ծոցէն ստացաւ: Անիկա հաւանաբար իր ամէնէն ընտիր եւ հոգեյոյզ ոտանաւորը գրի առաւ, երիտասարդ տարիքին մէջ, երբ իր աչքին լոյսը կը կորսնցնէր եւ իր նշանածին սէրէն կը զրկուէր:

O, Love that wilt not let me go,
I rest my weary soul in thee ;
I give thee back the life I owe,
That in thine ocean depths its flow
May richer, fuller be.

O, Light that followest all my way,
I yield my flickering torch to thee ;
My heart restores its borrowed ray,
That in thy sunshine's blaze its day
May brighter, fairer be.

O, Joy that seekest me through pain,
I can not close my heart to thee ;
I trace the rainbow through the rain,
And feel the promise is not vain
That morn shall tearless be.

O, Cross that liftest up my head,
I dare not ask to fly from thee ;
I lay in dust life's glory, dead,
And from the ground their blossoms red
Life that shall endless be.

Քանի Ճօրճ Մէթհիսընի երկնաւոր աչքերը կը մըթազնէին, անոր հոգին երկնային լոյսով կ'ողողուէր:

Անոր մարմնաւոր աչքերուն գոցուիլը, պատճառ դարձաւ որ շատ մը հոգեւոր կոյրերու աչքերը բացուին:

Ահա ասանկ է: Աստուած յաճախ իր լոյսը կը ծաղեցնէ մթութեան ծոցէն. ինքզինքը կը յայտնէ ձախորդութեանց մէջ. իր պատգամները կը հաղորդէ սրտմտութեանց մէջ: Այս պատճառաւ, մենք պէտք չէ որ վիշտերը ամէն ատեն իբր աղէտ առնենք: Հապա պէտք է որ ըմբռնենք եւ իւրացնենք այն բաները, զորոնք Աստուած կ'ուզէ մեզի աւանդել անոնց միջոցաւ. պէտք է շանանք որ «տէրտ»երէն յայտնութիւններ ծնին: Ճէյմզ Մարթինօն կ'ըսէ, «Երկինք եւ Աստուած ամենալաւ կերպով կը տեսնուին արտասուքներու մէջէն. թերեւս շատ հազուադէպ պարագաներու տակ երբէք տեսնուին առանց ատոնց»: Նեղութիւնները մարդոց հոգեւոր զգայարանները կը գրգռեն, աստուածային շահադրդուութիւնները կը հրահրեն, եւ հոգիին կը պարզեւեն անտեսանելի տեսողութիւնը:

Աշխարհի մէջ, Աստուծոյ բոլոր գործողութիւնները թէպէտեւ չենք կրնար հասկնալ, սակայն կրնանք վստահ ըլլալ թէ հաւատացեալներու համար ամէն բանի մէջ բարի նպատակ մը կայ: Յովսէփ երբոր գերի ծախուեցաւ իր եղբայրներուն ձեռքով, եւ Եգիպտոսի զնդանին մէջ անիրաւօրէն կը չարչրկուէր, չէր կրնար հասկնալ թէ այս տանջանքները ինչո՞ւ համար կը կրէր. չէր կրնար բացատրել թէ այս խոշտանգումները ի՞նչպէս կրնար հաշտեցնել Աստուծոյ արդարութեան եւ ողորմածութեան հետ: Սակայն օր եկաւ որ հասկցաւ. ժամանակը եկաւ երբ առեղծուածը լուծուեցաւ:

Դուն ալ երբոր ձախորդութեան կը հանդիպիս, մի աճապարէր, արագ եւ խակ դատաւճիռներ մի արձակէր: Միայն թէ համբերատար եղիր: Աստուծոյ ապա-

ւինէ . անոր արդարութեան եւ ողորմութեան վստահէ : Քրիստոնեայի կեանքին ղեկը եւ քարտէսը սիրազեղ հօր մը ձեռքերուն մէջն է , եւ անիկա անոր նաւը կ'առաջնորդէ դէպ ի խաղաղութեան նաւահանդիստը : ԶԱստուած սիրողին համար լաւագոյն է այն բանը որ կը պատահի : Ուստի երբոր դժբաղդութեանց կը հանդիպիս տակն ու վրայ մի ըլլար , մտքիդ կասկածներ մի բերէր , կարճ խելքովդ ամէն բան անմիջապէս հասկնալու մի ջանար : Միայն թէ Տէրոջ վստահէ հաւատքով : Անոր յանձնուէ հաճութեամբ : Անոր ըսէ , «Օրհնեալ ըլլայ քու կամքդ :» Գիտցիր թէ ինչ որ քեզի անձանօթ է , Ամենազէտին ծանօթ է : Եւ երբ կատարեալ վստահութեամբ Տէրոջ կ'ապաւինիս , վստահ եղիր թէ ան «քեզ իր փեստըներովը պիտի ծածկէ ,» եւ «Ամենակարողին հովանաւորութեանը տակ պիտի հանգչիս :» Նեղութեան մէջ քու զօրավիզդ քու քովդ կը կայնի ու կ'ըսէ , «Մի վախճար , քանզի ես քեզի հետ եմ . մի զարհուրիր , վասն զի ես քու Աստուածդ եմ . քեզ պիտի գօրացնեմ եւ քեզի օգնութիւն պիտի ընեմ , ու իմ արդարութեանս աջ ձեռքովը քեզ պիտի բռնեմ» (Եսա . 41 : 10 .) : Անկեղծ հաւատացեալ մը երբէք անճար եւ անօգնական չի ձգուիր : «Թարի մարդը , քեւս իյնայ , պիտի չկործանի . վասն զի Տէրը անոր ձեռքը կը բռնէ» (Սաղ . 37 : 24 .) : Աստուած չի թոյլատրեր որ իրեն յուսացող մէկը յաւէտ խաւարին մէջ մնայ , այլ վերջապէս անոր ղիշերը ցերեկուան կը փոխէ :

Տր . Ուաչինկթօն կլէտորն , համբաւաւոր քարոզիչ եւ հաւատքի անխոնջ եւ մարտական ախոյեանը , երկար ու բազմաբեղուն կեանքի մը վախճանին մօտ գրեց հետեւեալ տողերը , որ հաւատքով քալող անձի մը տեսողութիւնը կը պատկերացնէ :

In the darkest night of the year, when the stars have
all gone out,
I know that I dare not fear, that faith is better than
doubt ;
And fierce though the fiends may fight, and long though
the angels bide,
I know that truth and right have the universe on their
side ;
That somewhere beyond the stars is a love that is
better than fate,
When the night unlocks her bars, I shall see Him—
and I will wait.

Ցարդ ըստածները շիտակ հասկցուած չի պիտի ըլլան եթէ սա կէտը յստակ չէ ըմբռնուած թէ վիշտը կեանքի վերջակէտը չէ , այլ միջակէտը : Կեանքի ճամբորդութեան մէջ նեղութիւնը հանդիպելիք կայան մըն է , եւ ոչ թէ յանդուելիք հանգրուան մը : Կեանքի թատերախաղութեան մէջ ցաւը լուկ միջադէպ մըն է , եւ ոչ թէ փակման արարուածը : Կեանքին նպատակակէտը մարդը նեղել չէ , հապա հաճեցնել է : Աստուած մարդս ստեղծած չէ վշտացնելու համար , հապա ուրախացնելու համար : Անոնք որ կը խորհին թէ այս աշխարհ եկած են սոսկ տանջուելու համար , գոյութեան մասին շատ թիւր եւ յոռետես տեսութիւն մը ունին : Քրիստոնէական հաւատքը մեզ յոռետեսութենէ կը փրկէ . եւ եթէ չի փրկէր , եւ մեր կեանքերը անուշ , փայլուն ու գուարթ չի չիներ , մեր հաւատքին մէջ տեղ մը սխալմունք մը կամ պակասութիւն մը կայ : Քրիստոս այս աշխարհ եկաւ որպէս զի հաւատացեալներու տրտմութիւնը փոխէ լման եւ անկորզելի ուրախութեան (Յովհ . 16 : 20 , 22 .) : Այս կեանքը եղբրդութիւն մը ըլլալու չէ սահմանուած :

Քրիստոնէական կրօնը Աւագ Ուրբաթով չի փակուելը, Կիրակիով կը փակուի: Գիշերուան սեւ սաւանով չի գոցուելը. արշալոյսի լուսաճաճանչ ողջոյնով կը գոցուի: Խաչելութեան ողբերգութեամբ չի վերջանար, յարութեան աւետիսով եւ յաղթանակով կը վերջաւորուի:

Ստեղծագործութեան կէտ նպատակը կեանքը կատարեալ երջանկութեան հասցնել է: Եւ վիշտերը մէջտեղ կուգան, ոչ թէ մարդուն երջանկութիւնը խափանելու համար, հասցա զայն ճոխ ու կատարեալ կեանքի տիրացնելու համար, իրական եւ լման երջանկութեան հասցնելու համար: Կեանքի ընթացքին մէջ, վիշտերը զիպուածական բաներ են, բայց եւ այնպէս կարեւոր եւ ստիպողական բաներ: Վիշտերը աստիճաններ են, որոնց վրայէն մարդ կը բարձրանայ մինչեւ երկինք: Գոյութեան վախճանը բերկրանք է: Աստուած համակ պայծառութիւն եւ ցնծութիւն է, եւ մթութիւնն ու տխրութիւնը չեն կրնար անոր առջեւ կենալ: Ան որ իր կողքը երկնային աստղերուն կը լծէ, կը յառաջանայ դէպ ի լոյս, եւ կը հասնի աստուածային փառքի եւ երանութեան:

Մինչեւ հոս կատարուած բոլոր ուսումնասիրութիւնները ամփոփելով կը հասնինք սա եզրակացութեան, թէ տիեզերքին մէջ բարոյական տնօրինութիւն մը կայ, Աստուած աշխարհս կը կառավարէ բարոյական օրէնքներով: Այս աշխարհին մէջ ամէն բան բաղդի ձգուած չէ, կոյր եւ անզգայ ուժի մը յանձնուած չէ: Այս տիեզերքին զեկը՝ զիտող, զիտցող, խորհող, զգացող, սիրող էութեան մը ձեռքերուն մէջն է: Այն նեղութիւններն ու վիշտերը որ երեւան կուգան այս աշխարհին մէջ, Աստուծոյ անտարբեր, անզուժ, անկարեկից ըլլալուն փաստերը չեն, ընդհակառակը անոր սիրող եւ հոգատար ըլ-

լալուն հաւաստիքներն են: Անվիշտ աշխարհ մը զուրկ պիտի ըլլար բարոյականութենէ եւ արդարութենէ: Վիշտերը ամենագորաւոր ապացոյցներն են Աստուծոյ արդարութեան ու բարոյական կառավարութեան: Ուրեմն, վիշտերը մեր հաւատքը խախտելու չեն, այլ հաստատելու են:



ԶԱՐԵՐԸ ԻՆՉՈ՞Ւ ԿԸ ՅԱԶՈՂԻՆ

«Ինչո՞ւ ամբարիշտներուն ցամբան
յաջող է»:

ԵՐԵՄ. ԺԲ. 4.

Փ ԱՓԱՔԵԼԻ է հաւատալ թէ այս աշխարհին մէջ բարոյական կառավարութիւն մը կայ: Սակայն մեր առջև տնկուող ցնցիչ երևոյթ մը մեր այս հաւատքը կը ցնցէ: Եւ մեր միտքը տակն ու վրայ ընող խնդիրը սա է. «Եթէ այս աշխարհին մէջ բարոյական տնօրինութիւն մը կայ, ուրեմն ինչո՞ւ համար արդարները չեն յաջողիր, և ամբարիշտները չեն ձախողուիր: Ինչո՞ւ համար յաճախ ասոր ճիշդ հակառակը կը պատահի, այսինքն բարիները կը թշուառանան, մինչ չարերը կը բարգաւաճին: Եթէ Աստուած իրապէս արդար է, պէտք չէ՞ որ ուղիղը միշտ յաջողցնէ, և ծուռը միշտ ձախողեցնէ: Թէ որ Ամենակալը իսկապէս իրաւացի է, պէտք չէ՞ որ ուղղամիտները վարձատրէ, և նենգամիտները պատժէ: Ուստի, աշխարհի վրայ երեւցած այս ներհակ երևոյթները ի՞նչպէս կարելի է համաձայնեցնել Աստուծոյ բարոյական կառավարութեան հետ:

Այս հարցը ամէնէն կնճռոտ եւ դժուարալուծելի հարցերէն մին է: Եւ հին ժամանակներէն ի վեր՝ խորհող շատ մը միտքերը զբաղեցուցած է, եւ շատ մը աստուածապաշտներու հաւատքը ցնցող անհասկնալի խնդիր մը եղած է: Ասիկա էր Յորին միտքը տազնապէցնող խնդիրը, որ անոր հողէն բողոքի հեղեղներ հոսեցուց: Միւնոյն խնդիրը կը տանջէր Երեմիա մարգարէին միտքը. «Ով Տէր, երբ քեզի հետ վիճիմ, դուն արդար պիտի գտնուիս. սակայն քեզի իրաւունքի վրայով պիտի խօսիմ. ինչո՞ւ ամբարիշտներուն քամբան յաջող է, ու բոլոր նեմգութիւն ընողները հանգստութիւն կը վայելեն: Դուն գանձեմ տնկեցիր, եւ անձեմ արմատացան: Անձեմ կ'աճին ու պտուղ կուտան:» (12:1,2): Մարգարէն մէկ կողմէն Աստուծոյ արդարութեան վրայ չի կրնար տարակուսիլ. բայց միւս կողմէն երեւոյթական հակասութիւնները զինք շուարմունքի կը մատնեն: Սա խորհուրդը թէ «ինչո՞ւ ամբարիշտներուն ճամբան կը յաջողի», զայն մտային կասկածներու մէջ կը ձգէ, խոռվմունքներու մէջ կ'ընկղմէ: Այս առեղծուածը ի՞նչպէս կրնայ լուծուիլ: Արդեօք մոր տեսողութիւնը սխալ է, եթէ ոչ Տէրը զուրկ է բացարձակ արդարութենէ եւ կարողութենէ: Այս հարցը այնքան կենսական է, եւ նոյն ատեն այնքան ուշադրաւ եւ անխուսափելի, որ կարելի չէ անոր առջեւէն անց խփել ու անցնիլ:

Հին Կտակարանի ուսուցումներուն համաձայն, այս բանը ասանկ պէտք չէ որ ըլլայ: Ըստ Հին Կտակարանի ուսուցումներուն, այս աշխարհին մէջ արդարը իր արդար վարձատրութիւնը եւ ամբարիշտը իր արժանի պատուհասը պիտի ընդունի. բարին պիտի յաջողի, իսկ չարը պիտի ձախողուի: Սաղմոսերգուն կը հաւատայ. «Անիկա (արդարը) ջուրի քամբաները տնկուած ծառի պէս

պիտի ըլլայ, որ իր ժամանակին իր պտուղը կուտայ. ու անոր տերեւը պիտի չքափի, ու ինչ բան որ ընէ ՊԻՏԻ ՅԱԶՈՂԻ: Այսպէս չեն ամբարիշտները, հապս մղեղի պէս՝ գոր հովը կը ցրուէ: Վասն զի Տէրը կը քանչնայ արդարներուն քամբան. բայց ամբարիշտներուն քամբան պիտի կորսուի» (1:3-6): «Վասն զի չարագործները պիտի կորսուին, սակայն Տէրոջը համբերողները երկիրը պիտի ժառանգեն» (37:9): Առակախօսն ալ կը յայտարարէ. «Ամբարիշտ մարդուն տանը մէջ Տէրոջը անէծքը կայ. բայց արդարներուն բնակարանը Անիկա կ'օրհնէ» (3:33): Եւ կրկին, «Արդարը մինչեւ իր անձին կշտանալը կ'ուտէ, բայց ամբարիշտներուն փոքր կարօտութիւն պիտի քաշէ» (13:25):

Հին Կտակարանին մէջ ընդարձակօրէն եւ կենդանի գոյներով նկարագրուած են այն դժբաղդութիւններն ու անէծքները, որոնց չարերը պիտի մատնուին. եւ այն վայելքներն ու օրհնութիւնները, զորոնք բարիները պիտի վայելեն: Գաղափար մը տալու համար մի քանի կօչումներ ընենք: Յորին երեք բարեկամները, մարդոց հատուցումներուն մասին իրենց տածած գաղափարները ամփոփեցին սա արտայայտութեանց մէջ. «Ազէ, միտքդ բեր, ո՞ր անմեղը կորսուեցաւ, եւ ո՞ր տեղ արդարները բնաջինջ եղան: Ինչպէս տեսայ, անօրէնութիւն հերկողները, եւ անիրաւութիւն ցանողները նոյնը կը հնձեն. Աստուծոյ շունչէն կը կորսուին, ու անոր ռեգումիւն հովէն բնաջինջ կ'ըլլան» (4:7-9): Եւ դարձեալ, «Անշուշտ ամբարիշտին լոյսը պիտի մարի, ու անոր կրակին բոցը լոյս պիտի չտեսնէ. անոր վրանին մէջ լոյսը պիտի լսուարի, ու անոր ճրագը անոր վրայ պիտի մարի: Անոր գորութեանը քայլերը նեղութիւն պիտի կրեն, ու անոր խորհուրդը գանիկա գետինը պիտի գարնէ: Վասն զի

իր ուսմանը ուսուցանի մէջ պիտի բռնուի, ու ցանցի վըրայ պիտի փալէ» (18:5-8.) : «Եւ անիկա անբազմապիսի մէջ բնակեցաւ, ու կործանելու մօտեցած անշէն տուններու մէջ : Անիկա պիտի չհարստանայ, անոր ստացուածքները հաստատ պիտի չըլլան, ու անոնց շատութիւնը երկրի վրայ պիտի չտարածուի» (15:28,29.) : «Բայց ամբարիշտներուն աչքերը պիտի նուազին, եւ անոնց ապաստանարան պիտի չգտնուի, եւ յոյսերնին հոգեվարութիւն պիտի ըլլայ» (11:20.) : «Զարը իր բարբառ օրերուն մէջ տանջամբ կը կրէ, ու բռնաւորին քիչ (համբուած) տարիներ պահուած են» (15:20.) :

Առակաց Գրքին մէջն ալ ասոնց համանման բազում համարներ կան : Սոսկ մի քանին մէջ բերենք : «Աղէկութեան համար փոյթ ունեցողը շնորհք կ'ստանայ . բայց ով որ գէշութիւն կը փնտռէ, անիկա իրեն պիտի հանդիպի» (11:27.) : «Արդարին գլխուն վրայ օրհնութիւններ կան . բայց բռնութիւնը ամբարիշտներուն բերանը կը գոցէ : Արդարներուն յիշատակը օրհնեալ կ'ըլլայ, բայց ամբարիշտներուն անունը կը փոխի» (10:6,7.) : «Զարագործը իր անօրէնութիւնները պիտի բռնեն . ու անիկա իր մեղքին չուաններովը պիտի բռնուի» (5:20.) : «Տէրօջը վախը օրեր կ'աւելցնէ . բայց ամբարիշտներուն տարիները պիտի կարճան : Արդարներուն լոյսը ուրախութիւն է . բայց ամբարիշտներուն ակնկալութիւնը պիտի կորսուի» (10:27,28.) : «Քանզի ուղիղները երկրի վրայ պիտի բնակին, եւ կատարեալները անոր մէջ պիտի մնան : Բայց ամբարիշտները երկրէ պիտի կորսուին, ու անօրէնները անկէ պիտի փրցուին» (2:21,22.) : *Ժողովողի հեղինակն ալ կ'ըսէ .* «Աստուած իր առջեւ հանելի եղող մարդուն իմաստութիւն, գիտութիւն եւ ուրախութիւն կուտայ . բայց մեղաւորին երկունք կուտայ» (2:

26.) : *Սաղմոսներուն մէջ ալ նոյն տեսակէն գաղափարներ կը յեղյեղուին :* «Զարութիւնը ամբարիշտը պիտի մեռցնէ, ու արդարը անիրաւոյները պիտի անբուին» (34:21.) : «Ամբարիշտներուն վրայ պիտի տեղան որոգայքներ, հուր, ծծումբ եւ խորշակ . այս պիտի ըլլայ անոնց բաժակին բաժինը» (11:6.) : «Ահա անոնք որ քեզմէ կը հեռանան կը կորսուին . դուն կը ստակեցնես ամէնը որ շնութիւն կ'ընեն՝ քեզմէ մոլորելով : Բայց Աստուծոյ մօտեմալս բարի է ինծի» (73:27.) : «Խաղաղարար մարդը բարի վախճան պիտի ունենայ . իսկ անօրէնները մեկտեղ պիտի կորսուին . ամբարիշտներուն վախճանը կորուստ պիտի ըլլայ» (37:38.) :

Մովսէս ալ շատ պարզօրէն եւ բացօրէն միեւնոյն գաղափարները կը շատազօլէ : Անիկա կ'ապահովցնէ Իսրայէլի որդիքը թէ եթէ Քանաանու երկրին մէջ Տէրօջ հաւատարիմ ու հնազանդ գտնուին, անոր առատ բարեքները և օրհնութիւնները պիտի տեղան իրենց տուններուն, դաւակներուն, ստացուածքներուն, արտերուն, պարտէզներուն եւ ամէն բանին վրայ : Սակայն եթէ Տէրօջ դէմ պարտազանց եւ ըմբոստ գտնուին, յայնժամ երկնային անէճքներ պիտի թափին իրենց վրայ, իրենց բոլոր բաները անիծեալ պիտի ըլլան, եւ իրենց վրայ պիտի հասնին աներեւակայելի աղէտներ, սարսափներ, թշուառութիւններ, ջաւեր, ախտեր, պալարներ, ժանտախտներ, սովեր, հարստահարութիւններ, գերեվարութիւններ, ջարդեր, սուրեր ու կրակներ : (Այս անէճքներուն սարսափելի մանրամասնութիւնները հասկնալու համար կարգայ Ղեւ. 26 : եւ Բ. Օրին. 28.) :

Դատաւորաց Գիրքը, այս հայեցակէտը պաշտպանելու մտօք զրի առնուած է : Այս Գրքին հեղինակը ջանացած է ցուցադրել թէ ամէն անգամ որ Իսրայէլի ցեղերը Տէրօջմէ զատուեցան, անկումի եւ ձախորդութեան

մատնուեցան. իսկ ամէն անգամ որ Տէրոջ յարեցան, զօրացան ու ծաղկեցան: Եւ այս կերպով անիկա աշխատած է փաստել թէ աստուածապաշտութիւնը բարեյաջողութիւն կը բերէ, մինչդեռ հաւատուրացութիւնը անյաջողութիւն:

Մարդարէութիւններն ալ լեցուն են այսպիսի արտայայտութիւններով, որոնք կը յայտնեն թէ ուղղութիւնն ու կրօնասիրութիւնը կ'առաջնորդէ բարեբաստութեան, մինչդեռ անօրէնութիւնն ու մեղքը կը տանի դժբաղդութեան: Եսայի բարդարէն կ'ըսէ, «Արդարին ըսէք որ իրեն աղէկ պիտի ըլլայ. վասն զի անոնք իրենց գործերուն պտուղը պիտի ուտեն: Վա՛յ անօրէնին, գէշ պիտի ըլլայ անոր, վասն զի անոր ձեռքերուն փոխարէնը իրեն պիտի տրուի» (3:10,11.): «Սիօնը իրաւունքով պիտի փրկուի, եւ հոն դարձողները արդարութեամբ: Բայց անօրէնները եւ մեղաւորները մէկտեղ պիտի ջարդուին, եւ անոնք որ Տէրը կը թողուն, բնաջինջ պիտի ըլլան» (1:27,28.):

Երեմիա մարդարէն ալ կը յայտարարէ. «Անոր եւ անոր սերունդին ու անոր ծառաներուն այցելութիւն պիտի ընեմ իրենց անօրէնութեանը համար, եւ անոնց վրայ պիտի բերեմ այն ամէն չարիքը զոր անոնց խօսեցայ» (36:31.): Եզեկիէլ մարդարէն ալ կը յայտնէ. «Անոնցմէ մարդ մը փնտտեցի որ իմ առջեւ կայնի, բայց չգտայ: Ուստի իմ բարկութիւնս անոնց վրայ թափեցի, զանոնք իմ սրտմտութեանս կրակովը սպառեցի. անոնց նամբաները իրենց գլուխը տուի, կ'ըսէ Տէր Եհովա» (22:31.):

Մաղաքիա մարդարէն ալ կը հաւաստէ, «Բանգի ահա փռուի պէս վառած օրը կուգայ, ու բոլոր հպարտները եւ բոլոր ամբարշտութիւն ընողները յարդի պէս պիտի ըլլան. ու գալու օրը զանոնք պիտի այրէ, կ'ըսէ գորաց

Տէրը, այնպէս որ անոնց արմատ կամ ոստ պիտի չթռնուի: Բայց ձեզի իմ անունէս վախցողներուդ, արդարութեան արեգակը պիտի ծագի, եւ անոր թեւերուն վրայ բժշկութիւն պիտի ըլլայ» (4:1,2.):

Օրինակները բազմապատկելու հարկ չկայ: Մէջ բերուած բոլոր համարներն ալ կը սորվեցնեն սա դասը թէ անօրէնութիւնը պիտի պատժուի եւ արդարութիւնը պիտի վարձատրուի: Այս վարդապետութենէն հետեւեցուած բնական եւ անխուսափելի եզրակացութիւնը սա եղած է թէ, անհատի մը կամ ազգի մը բարօրութիւնը անոր արդար ըլլալուն ապացոյցն է. ընդհակառակը, անհատի մը կամ ազգի մը դժբաղդութիւնը անոր անօրէն ըլլալուն նշանն է: Բարեյաջող եւ հարուստ անձ մը Աստուծոյ հաճութեան եւ շնորհաց արժանացած մարդ մըն է. մինչ թշուառ եւ չքաւոր անձ մը Աստուծոյ տհաճութեան եւ նողկանքին ենթակայ եղած մարդ մըն է: Թէ որ Աստուած կ'օրհնէ իր հաւնած ամէն մէկ անհատը, ասկէ կը հետեւի թէ Աստուծոյ կողմէն օրհնուած ամէն մէկ անձի վրայ կը կնքուի Աստուծոյ հաւանութեան կնիքը: Մինչդեռ Աստուծոյ կողմէն չօրհնուած ամէն մէկ անձի վրայ կը դեղերի Աստուծոյ տհաճութեան շուքը: Թէ որ մարդ մը կը յաջողի, Աստուծոյ մօտենալուն համար կը յաջողի. թէ որ մարդ մը կը ձախողի, Աստուծոյ ուժանալուն համար կը ձախողի: Այս վարկածին ամփոփումը սա է, բաղդաւորութիւնը նշան է բարութեան, դժբաղդութիւնը փաստ է չարութեան: Յոբին բարեկամները ճիշտ այս տրամաբանութիւնը դործածեցին, եւ անոր մեծ դժբաղդութիւնը վերադրեցին անոր մեծ անօրէնութեան: Ըստ այս տեսութեան, նիւթական կարողութեան չափը մարդու արդարութեան աստիճանին ճշգրիտ մէկ չափանիշն է:

Իբրեւ վարկած (theory) մը՝ այս վարդապետութեան ուսուցիչ ըսելիք չունինք: Սակայն, բնականօրէն մեր մտքերուն մէջ կը ծագի սա խորհուրդը, թէ արդեօք այս տեսութիւնը իրականութեան համապատասխան է, արդեօք չոր իրողութիւնները այս վարկածը կը վաւերացնեն: Արդեօք իրա՞ն է թէ ամէնէն բարեբաղդ անձերը ամէնէն բարի անձերն են. եւ ամէնէն դժբաղդ անձերը ամէնէն չար անձերն են: Արդեօք մարդուն արդարութեան որակը, անոր հարստութեան քանակով կ'որոշուի:

Նոյն խիստ անոնք, որոնք այս համոզումը ունին, դժուարութիւն կը քաշեն երկրիս վրայ պարզուած բոլոր երեւոյթները այս վարկածին յարմարցնելու, եւ այս տեսութեամբ բացատրելու: Կնճռոտ առեղծուածներ կան, որոնք այս բացատրութիւններով անլուծելի կը մնան: Եւ բացայայտ իրողութեանց լոյսին առջեւ ամէնէն թունդ վարդապետողներն իսկ կը շուարին ու կը թուլանան, եւ կ'ստիպուին ընդունիլ թէ երկրիս վրայ գտնուող ամէն բարդաւած անձ արդար չէ, եւ ամէն թշուառ արարած ամբարիշտ չէ:

Ասկէ աւելին կայ: Այս աշխարհին մէջ, յաճախ անօրէններ իրենց անօրէնութիւններով աւելի կը յաջողին: Անգութ եւ բռնաւոր հարստահարիչներ աւելի կը բարդաւածին: Խարեբայ եւ անիրաւ մարդիկ աւելի խոշոր հարստութիւն կը դիզեն: Կան դիւանագէտներ, որոնք դաւով, կաշառքով, կեղծիքով, նենգութեամբ կը շահին համբաւ, գորութիւն, առատութիւն: Շատ անգամներ, առաքինութիւնը ցնցոտիներ կը հագուի, մինչդեռ մոլութիւնը բեհեզներ: Շատ անգամներ, երբ հաւատացեալները նեղութեանց եւ փորձանքներու մէջ կը տառապին, անհաւատներ հանգստութեան ու զեղխութեան մէջ կը ձեմեն: Եւ անանկ կը թուի թէ Աստուած

անիութութեամբ կը նայի այս անարդարութեանց վերայ:

Գիրքը մեզի կ'ըսէ, «Թէ Աստուած պիտի դատէ արդարը ու ամբարիշտը»: Ուրեմն, արդար Տէրը ինչո՞ւ համար իր դատաստանը չի յայտներ: Տէրը կը յայտարարէ, «Ես մաշող կրակ եմ»: Ուրեմն, ինչո՞ւ բռնակալներն ու կողոպտիչները մաշող կրակով չի լափեր: Տէրը կ'ըսէ, «Ես իմ թշնամիներուս վրէժխնդրութիւն պիտի ընեմ»: Ուրեմն, ինչո՞ւ անիկա իր վրէժը չի լուծեր: Այս աշխարհին մէջ, ո՞ւր է արդարութիւն, ո՞ւր է իրաւունք: Այս հարցումները՝ Աստուծոյ վրայ վստահութիւն ունեցողներուն խիստ միտքերը կը խռովեցնէ: Յոր կը դիտէ երկրի վրայ պարզուած երեւոյթական անարդարութիւնը, եւ շուարումով ու ընդլցումով կ'աղաղակէ, «Գողերուն վրամները յաջողութեան մէջ են, ու գԱստուած բարկացնողները ապահով են, որոնց ձեռքը Աստուած առատութեամբ կը լեցնէ» (12:6.): «Ամբարիշտները ինչո՞ւ կ'ապրին, կը ծերանան ու խիստ կ'ուժովնան: Անոնց սերունդը իրենց հետ կը հաստատուի իրենց առջեւ, եւ անոնց գաւակները աչքերնուն առջեւ: Տուներնին խաղաղութեան մէջ է ու վախէ ագառ է, եւ Աստուծոյ գաւազանը անոնց վրայ չէ: Անոնց ցուլը կը գուգաւորուի ու դատարկը չելիբ. կովը իր որթը կը ծնանի ու չվիժեր: Իրենց պտտիկները ոչխարի հօտի պէս կը հանեն, ու անոնց տղաք ուրախութեամբ կը ցափկըտեն: ...Անոնք օրերնին գուարնութիւնով կ'անցնեն, ու մէկ վայրկեանի մէջ գերեզման կ'իջնեն» (21:7-13.): Յոր չի կարենալով մեկնել այս առեղծուածները, յուսահատութեամբ կը յարէ, «Երկիրը ամբարիշտներուն ձեռքը տրուեցաւ»: (9:24.):

Սաղմոսերգունն ալ անկարող կ'զգայ երկրի վրայ տեսնուած անարդարութիւնը կերպով մը բացատրել, եւ այրող սրտով մը կ'ըսէ. «Նախանձեցայ հպարտներուն, երբ ամբարիշտներուն յաջողութիւնը տեսայ. քանզի իրենց մահուան ժամանակն ալ ցաւեր չունին. մարմիննին ալ պարարտ է: Անոնք մարդոց նեղութեանը մէջ չեն, եւ ուրիշ մարդոց հետ չեն տանջուիր: ...Անոնց աչքերը պարարտութեան դուրս կ'ելլէ: ...Ահա անոնք են ամբարիշտները, որ միշտ յաջողութիւն ունին, ու հարստութիւն կ'աւելցնեն» (73:3-12.):

Երեմիա մարդարէն ալ կը տեսնէ երկրի վրայ ի յայտ եկող անիրաւութիւնը, եւ սա բառերով իր սրտին բորբոքը դուրս կը թափէ. «Ինչպէս վանդակը քոչուններով լեցուն է, այնպէս անոնց տուները նեղութեամբ լեցուն են. անոր համար անոնք մեծցան ու հարստացան. գիրացան, պարարտացան, եւ չարերուն գործերէն ալ գերազանցեցին. անոնք շիտակ դատաստան չեն ըներ, որքին իրաւունքը չեն պաշտպաներ, այսու ամենայնիւ գործերնին յաջող կ'երթայ» (5:27,27.): Եւ մարդարէն կը բողոքէ այս կացութեան դէմ ու կ'ըսէ, «Ինչո՞ւ ամբարիշտներուն նամբան յաջող է, ու բոլոր նեղութիւն ընողները հանգստութիւն կը վայելեն»: Ամբակում մարդարէն ալ կ'ընդվիզի չարերու յոխորտանքին դէմ, եւ կը բացազանչէ. «Ռուն, որուն աչքերը չարութիւն տեսնելէն մաքուր են, ու անիրաւութեան նայելու կարող չես, նեղաւորներուն ինչո՞ւ կը նայիս, ամբարիշտին իրմէ արդար եղողը կլլած ատենը ինչո՞ւ կը լսես» (1:13.):

Այս ակներեւ իրողութիւնները կը ժխտեն սա յայտարարութիւնը թէ «Աստուծմէ վախցողներուն բարութիւն պիտի ըլլայ. բայց ամբարիշտին բարութիւն պիտի չըլլայ» (Ժող. 8:12.): Եւ երեւան կը հանեն այս վար-

դաստուծեան թերութիւնը, եւ այս վարկածին անվաւերականութիւնը: Իրողութիւնը սա է որ այս աշխարհին վրայ ինչպէս որ երբեմն արդարներ կը յաջողին, անանկ ալ երբեմն ամբարիշտներ կը յաջողին. եւ ինչպէս որ երբեմն չարեր ձախորդութեանց ու վիշտերու կը հանդիպին, անանկ ալ երբեմն բարիներ ձախորդութեանց ու վիշտերու կը հանդիպին: Այս աշխարհին մէջ յաջողութիւնը արդարներուն վերապահուած չէ, ոչ ալ ձախորդութիւնը ամբարիշտներուն: Հասկա, թէ բաղդաւորութիւնը եւ թէ դժբաղդութիւնը հաւասարապէս բաժնուած են ուղղամիտներու եւ նենգամիտներու միջեւ: Հետեւաբար, սխալ պիտի ըլլայ մարդու մը բարեբաստութեանն անոր բարութիւնը եղրակացնել, եւ կամ անոր դժբաղդութեանն անոր չարութիւնը հետեւցնել: Կարելի չէ մարդու մը բարոյական արժանիքը չափել անոր տնտեսական արժէքով. մարդու մը անձնաւորութեան որակը կը չափեն անոր հարստութեան քանակով:

Ուրեմն, մարդ մը արդար ըլլալուն համար չի բարգաւաճիր, ոչ ալ անորէն ըլլալուն համար կը թշուառանայ: Աստուած կրնայ արդարին նիւթական բարեյաջողութիւն պարգեւել, բայց նոյնպէս կրնայ ամբարիշտին ալ բարեյաջողութիւն պարգեւել: Մէկ խօսքով, բարի ըլլալ մարդուն համար նիւթական յաջողութիւն չապահովէր, եւ չար ըլլալ մարդուն համար անպատմառ նիւթական անյաջողութիւն չի պատմառէր: Այս աշխարհին մէջ, ամէն դասէ մարդոց համար թէ օրհնութիւն եւ թէ աղէտ պատրաստ է:

Ոմանց մտքին մէջ, որ կ'ըմբռնեն այս ճշմարտութիւնը, սա հարցումը կը ծագի, «Թէ որ այս է իրողութիւնը, ուրեմն մենք ինչո՞ւ արդար ըլլալու կ'աշխատինք»: Թէ որ մեր «իրաւունքը մեր Աստուծոյն առջեւ

պիտի անտեսուելի,» ուրեմն մենք ինչո՞ւ Տէրոջ կը ծառայենք: Յոր՝ այս խորհրդածութեան եկաւ, երբոր՝ հակառակ իր անվիճելի արդարութեան, ամենասաստիկ տառապանքներու մասնուեցաւ, «Աստուծոյ համոյ ըլլալէն մարդուս օգուտ մը չկայ» (34:9.): Ժողովողի հեղինակն ալ ինքնիրեն սապէս կը մըմնջէ. «Որովհետեւ անվիտին պատահածը ինծի ալ պիտի պատահի, ուրեմն ես ինչո՞ւ համար աւելի իմաստուն եղայ. այս պատմառաւ իմ սրտիս մէջ ըսի որ այս ալ ունայնութիւն է» (2:15.): Սաղմոսերգուն ալ ուղիղ եւ անմեղ կեանք մը վարելէն մասնաւոր օգուտ մը չի տեսներ եւ յուսախար շեշտով մը կ'աւելցնէ, «Յիրաւի գուր տեղը իմ սիրտս մաքրեցի, ու իմ ձեռքերս անմեղութիւնով լուացի. որովհետեւ ամէն օր կը տանջուիմ, ու ամէն առտու կը պատժուիմ» (73:13-14.):

Արդարին՝ Տէրոջ կողմէն՝ անօրէնէն աւելի նպատակոր դիրք մը չի վայելելը, ինչպէս որ երբեմն հաւատացեալներու հաւատքը կը ցնցէ, անանկ ալ երբեմն անհաւատներու հպարտութեան ու յանդգնութեան աւելնալուն պատճառ կը դառնայ: Չարագործը երբոր իր չարութեան համար անպատիժ կը մնայ, իր չարութեան մէջ աւելի կ'արմատանայ: Երբոր կը տեսնէ թէ ստախոսութիւնը, խաբեբայութիւնը, անիրաւութիւնը իրեն համար չահաբեր կըլլան, իր ծամածուռ ճամբաներուն մէջ աւելի կը հաստատուի: Այս կերպով, Աստուծոյ համբերութիւնն ու ողորմութիւնը շատ մը կարծրասիրտ հոգիներու սիրտերը աւելի կը կարծրացնէ: Եւ անոնք այս կացութենէն սիրտ առած, յանդգնութիւնը կ'ունենան աստուածային օրէնքները ծաղրելու եւ Ամենակալը արհամարհելու եւ նոյն իսկ ուրանալու: Ասոնք Աստուծոյ զարմանալի լուութիւնն ու թոյլտուութիւնը կը հեղ-

նեն եւ բերաննին երկինքի դէմ լայն բանալով ամբարտաւան ժէսթով մը կը պոռան, «Աստուած ի՞նչպէս գիտէ, ու Բարձրելոյն քով գիտութիւն կա՞յ» (Սաղ. 73:11.): Անոնք խրոխտաբար Տէրը կ'անարգեն ու կը մերժեն, եւ Աստուծոյ դէմ կ'աղաղակեն, «Քաշուէ մեզմէ, վասն զի քու քամբաներդ գիտնալ չեմք ուզեր. Ամենակարողը ո՞վ է, որ անոր ծառայեմք. եւ եթէ անոր աղօթք ընեմք, ի՞նչ օգուտ պիտի ունենանք» (Յոր. 21:14,15.): Եւ անոնք քայլ մըն ալ առաջ կ'երթան եւ Տէրոջ ասպարէզ կը կարդան ըսելով, «Աստուծոյ ծառայութիւն ընելը պարապ բան է, եւ անոր պահպանութիւնը պահելէն ու գօրաց Տէրոջը առջեւ սուգով քայլէն ի՞նչ շահեցանք: Եւ հիմա մեմք հպարտներուն երանի՞ կ'ըսենք. ամբարշտութիւն ընողները անգամ բարեշէն կ'ըլլան, զԱստուած ալ կը փորձեն ու կ'ազատին» (Մաղ. 3:14,15.): Յաջողութեամբ յարբած անօրէնները սապէս կը յոխորտան, «Աստուծմէ մեզի օգուտ չկայ: Ուստի դայն մոռնանք, եւ մեր գործերը մեր ձեռքերով կարգադրենք. եւ մեր սրտին հաճոյ եղած շաւիղներէն ընթանանք:»

Ահա այսպէս կը խօսին ամբարիշտներուն լեզուները, այսպէս կը զրուցեն անոնց արարքները: Անոնք կ'անդոսնեն ուղղութիւնը, արդարութիւնը, առաքինութիւնը, հաւատքը: Արդեօք ճշմարիտ են ամբարիշտներու այս խորհուրդները, շիտա՞կ են անոնց այս զրուցուածքները: Արդեօք այս աշխարհին մէջ բարութեան համար վարձատրութիւն եւ չարութեան համար հատուցում չկա՞յ:

Այս կենսական հարցումներուն պատասխանը պիտի տանք յաջորդիւ: Այժմ, սաքանը ըսելով կը բաւականանանք թէ աշխարհի մէջ տեսնուած երեւոյթական հակասութիւնները ձեր հաւատքը թող չի խախտէ, Աստու-

ծոյ արդարութեան մասին ձեզ տարակոյսի թող չի մատնէ: Աստուած ուղիղ եւ արդար է, նոյն ատեն համբերատար եւ ողորմած: Մարդկային ամէն մէկ արարք իւր արժանի հատուցումը պիտի ստանայ: Անտարակոյս՝ ամբարիշտը պատիժի եւ արդարը վարձատրութեան պիտի տիրանայ: Այս մասին մաղի չափի կասկածանքի տեղ չկայ:

Հին Կտակարանին ուսուցումը սխալ չէ, պակաս է: Եւ այս պակասութիւնը լրացուած է Նոր Կտակարանով: Հատուցման մասին, Աւետարանին ուսուցումը աւելի լայնախոհ, բարձր եւ ճիշդ է: Այս կէտը դալիք ուսումնասիրութեանց մէջ պիտի պարզենք: Հոստեղ, բաւ է սաքանը ըսել թէ Հին Կտակարանին մէջ խոստացուած հատուցումները մեծաւ մասամբ նիւթական, մարմնաւոր, զգայական, աշխարհային են: Ասիկա ճիշդ չէ: Հատուցումը միշտ անմիջական չըլլար: Ամէն ատեն եւ անպայման տեսանելի եւ շօշափելի չըլլար: Աստուած հոգի է: Իսկական մարդն ալ հոգի է: Այս պատճառաւ բուն վարձատրութիւնը եւ պատիժը պէտք է որ հոգիին վերաբերի: Եւ իրողութիւնն ալ ասկէ կը բաղկանայ:

Աստուծոյ ծառայել պարապ բան չէ: Ամենաբարձրեալին աղօթք մատուցանել անիմաստ բան չէ: Ամենակարողին վստահիլ անօգուտ բան չէ: «Բարձրելոյն ծածկոցին տակ բնակողը, Ամենակարողին հովանաւորութեանը տակ պիտի հանգչի:»

Թ

Ի՞նչ է ԻՐԱԿԱՆ ՅԱՋՈՂՈՒԹԻՒՆ

«Աղէկ է քիչ բան արդարութեամբ, բան թէ մեծ եկամուտներ անիրաւուութեամբ»:

ԱՌԱԿ. ԺԶ. 8:

ՄԵՐ նախորդ ուսումնասիրութեան մէջ դիտել տրւինք թէ արդար ըլլալը մարդուս համար աշխարհային յաջողութիւն եւ բարօրութիւն չապահովէր. ոչ ալ անօրէն ըլլալը տնտեսական ճախողութիւն եւ թըշուառութիւն կը պատճառէ: Արդարութեան եւ բարեյաջողութեան մէջ անխղելի կապակցութիւն մը չկայ: Ճըշմարիտ չէ թէ ամէն հարուստ բարի մարդ է, եւ ամէն աղքատ չար մարդ է: Մարդ մը կրնայ անօրէնութեամբ ալ յաջողիլ, անիրաւութեամբ ալ հարստութիւն դիզել: Անհամար են թիւը անոնց, որոնք այս աշխարհին մէջ, խաբէութեամբ, կաշառակերութեամբ և անիրաւութեամբ բարգաւաճած են: Ճշմարիտ չէ սա խօսքը, թէ, «Աստուած արդար մարդը չի մերժեր, ոչ ալ չարերուն ձեռնտու կ'ըլլայ» (Յոր 8:20): Իրողութեանց չի համապատասխաներ, Եզրասին սա յայտարարութիւնը թէ «Աստուծոյն ձեռք բոլոր գանիկա փնտաղներուն վրայ է բարութեան համար, ու անոր գորութիւնը ու բարկու-

թիւնը ամէն անոնց վրայ՝ որոնք գանիկա կը թողուն» (Ց:22.): Այս աշխարհին մէջ չենք տեսներ գործադրութիւնը սա հաւաստումին թէ «Տէրը բոլոր զինք սիրողները կը պահէ, սակայն բոլոր ամբարիշտները կը կորսնցնէ» (Սաղ. 145:20.): Արդարեւ այս աշխարհին մէջ շատ մը ամբարիշտներ կը կորսուին, սակայն սուրբերն ալ կը կործանին, Յորի պէս արդարներն ալ կը հարուածուին:

Ուրեմն, ո՞ւր կը մնայ Աստուծոյ արդարութիւնը: Ինչո՞ւ համար Անիկա արդարին կողմը չի բռներ, եւ ամբարշտին դէմ չի կենար: Ինչո՞ւ համար արդար Տէրը արդարութիւնը չի գործադրեր: Այս դժուարին հարցման իբր պատասխան պէտք է ըսենք, որ ոչ թէ Աստուծոյ արդարութիւնը չի գործադրեր, հապա մեր ուզած ձեւով եւ եղանակով չի գործադրեր: Աստուծոյ տեսութիւնները մերինէն շատ լայն են. Անոր խորհուրդները մերինէն շատ բարձր են: Հետեւաբար, Անոր արդարութիւնը գործադրելու եղանակը մերինէն տարբեր է: Մենք չենք կրնար զԱստուծոյ անիրաւութեամբ ամբաստանել, մինչեւ որ Անոր միտքը չըմբռնենք, Անոր գործելակերպը չի հասկնանք:

Այս աշխարհի վրայ սաքանը անտարակուսելի իրողութիւն մըն է թէ արդար ըլլալը մարդս նիւթական բարիքներէն չի զրկեր: Ինչպէս որ երկրիս վրայ ամէն անօրէն հարուստ չըլլար, այնպէս ալ ամէն արդարը ազգատ չըլլար: Գտնուած են եւ դեռ կը գտնուին շատ մը անձինք, որոնք աստուածավախ եւ առաքինի կեանքեր վարած են, եւ նոյն ատեն տիրացած են աշխարհային առատ բարիքներու եւ ճոխ վայելքներու: Գտնուած են բազմաթիւ հողիններ, որոնք խղճամիտօրէն քալած են ուղիւթեան եւ իրաւունքի ճամբաներէն, նոյն ատեն մեծա-

պէս յաջողած եւ բարգաւաճած են: Արբահամ բծախնդրօրէն արդար ու աստուածավախ մարդ մըն էր, եւ Տէրը զայն շառլօրէն օրհնեց, եւ անոր հօտերն ու արջառները բազմապատկեց, եւ անոր ահագին զօրութիւն ու հարստութիւն պարգեւեց: Իսահակ եւ Յակոբ բարեպաշտ մարդիկ էին, եւ անոնք վայելեցին Տէրովը ճոխ ու բազմապիսի բարիքները: Յովսէփ ուղղամիտ ու մաքրասիրտ մարդ մըն էր, եւ Տէրը իրեն շնորհեց անակնկալ բարեբաստութիւն ու փառք: Դաւիթ արդար մարդ մըն էր, եւ Աստուծոյ իրեն պարգեւեց արտասովոր զօրութիւն, իշխանութիւն եւ հարստութիւն:

Կարծեմ թէ սխալած չի պիտի ըլլանք թէ իբր ընդհանուր սկզբունք մը հաւաստենք թէ այն ազգերը որոնք երկրիս վրայ աւելի արդար եղած են, անարդարներէն աւելի զօրացած եւ բարգաւաճած են: Պատմութեան մէջ աչքառու դիրք գրաւող բոլոր մեծ ազգերը եւ հօր պետութիւնները, իրենց բարեյաջողութեան եւ զարգացման օրերուն մէջ, իրենց յառաջդիմութիւնը կարելի եւ ըստոյդ ընծայող ընտիր յատկութիւններ եւ բարձր առաքինութիւններ ի յայտ բերած են: Շիտակ է թէ «Արգարտութիւնը ազգը կը բարձրացնէ. բայց մեղքը ժողովուրդներուն անարգանք է» (Առակ. 14:34.):

Անցեալները «Եթէնքիքի Մընքիլի» ամսօրեայ հանդէսին մէջ «Մաքրակրօնութիւն եւ Յաջողութիւն» խորագրին տակ ուշադրաւ ու հմտալից յօդուած մը երեւցաւ, ուր հեղինակը կը փաստէ թէ Ամերիկայի տարացաւ, ուր հեղինակը կը փաստէ թէ Ամերիկայի տարացաւ յառաջդիմութիւնը եւ բարգաւաճումը կարելի եղած է, այս երկրի հիմը դնող մաքրակրօններու կրօնական բարձր ըմբռնումներով եւ ուղիւ սկզբունքներով: Յօդուածագիրը կ'ընդունի թէ այս երկրի բնական հարստութիւնը, հողին բեղմնաւորութիւնը, կլիմայի զանա-

զանութիւնը, երկրի ընդարձակութիւնը, պատերազմական արհաւիրքներէ հեռաւորութիւնը, բնակչութեան արկածախնդիր ոգին եւ անխոնջ աշխատասիրութիւնը, եւայլն, մեծապէս նպաստած են այս երկրի արտասովոր ծաղկումին: Սակայն, կը յորէ նա, այս ազգահները անբաւական են բացատրելու Ամերիկեան բարեյաջողութեան ամբողջ բնեկեցութիւնը: Այս երկրի յառաջդիմութեան գլխաւոր ազգակը կրօնական ազգակը եղած է: Անիկա պատմական ամփոփ քողուածքով մը կը պարզէ թէ բարեկարգութեան թուականով կ'սկսի փորատիլ առեւտրականին եւ արհեստաւորին դէմ եղած աւանդական արհամարհանքը, որով կարելի եղաւ պատուազգաց մարդոց բոլորովին նուիրուել առեւտրական ձեռնարկներու, առանց կորսնցնելու ընկերական գիրք եւ բարոյական արժանապատուութիւն: Բողոքականութիւնը դրաւ ներկայ տնտեսական դրութեան հիմունքը: Բարեկարգութիւնը ջատագովեց «գործի նուիրականութեան» զաղափարը, եւ այս հարուածով խորտակեց միջին դարերու յառուկ եղող բարոյական երկուութիւնը, եւ կրօնական կեանքի հոսանքները ուղղեց դէպ ի գործնական ձեռնարկներ: Յօդուածագիրը պատմական ու տրամաբանական փաստեր ներկայացնելով կը ցուցնէ թէ մաքրակրօնութիւնը Ամերիկեան ժողովուրդին պարզեւեց ուղղամտութեան եւ ճշմարտախօսութեան բարձր չափանիշ մը, անոնց մէջ ծաղկեցուց բարոյականութեան ու ժրջանութեան վեհ առաքինութիւնները, շեշտեց գործի նուիրականութեան հայեցողութիւնը, քաջալերեց գործի մէջ ձեռներէցութիւնը, մշակեց ազատ խորհուրդի, ուսման եւ հետազոտութեան մարմաջը, դնելով արդի գիտական ու ճարտարարուեստական զարգացման հիմը, եւ այս կերպով կարելի դարձուց այս երկրի տնտեսական

հրաշալի զարգացումը: Եւ տարակոյս չկայ թէ կրօնական ազգակը Ամերիկայի բարգաւաճման մէջ կարծուածէն շատ աւելի մեծ դեր մը խաղացած է: Թէ որ մաքրակրօնութիւնը Ամերիկեան ծաղկեցման մէջ ունէ բաժին ունեցած չըլլար, յայնժամ հարաւային Ամերիկայի ժողովուրդներն ալ, որոնք գրեթէ միեւնոյն առաւելութիւնները կը վայելեն, Միացեալ Նահանգներու չափ բարգաւաճ պէտք է ըլլային, ինչ որ չեն: Ո՞վ կրնայ որանալ թէ երկրադունդի վրայ Բողոքական երկիրները աւելի յառաջադէմ ու բարգաւաճ վիճակ մը կը ներկայացնեն, քան այլակրօն երկիրները: Ասիկա զիպուածի մը արդիւնքը չէ. այլ կրօնքի ազդեցութեան հետեւանքը առօրեայ կեանքի վրայ: Առեւտրական յաջողութեան համար, վերջ ի վերջոյ, «ուղղամտութիւնը լաւագոյն քաղաքականութիւնն է» (honesty is the best policy): Եւ ուղղամտութիւնը միայն կրօնական հողին վրայ կը բնայ ծաղկել:

Անցեալները թերթի մը մէջ գաւեշտական ասացուածքի մը հանդիպեցայ, որ սակայն կէս կատակի ձեւով կարելոր ճշմարտութիւն մը կը յայտնէր. «Առաքինութիւնը կը վճարէ. S գերը ծուռ է, սակայն գիտէ թէ շիտակ ու նեղուածք ճամբան անոր ի՞նչ կ'ընէ, զայն \$-ի կը փոխէ (Virtue pays! The S is crooked, but look what a straight and narrow path does for it: \$.):

Պօղոս Առաքեալ կ'ըսէ, «Աստուածապաշտութիւնը մեծ շահավաճառութիւն է»: Ասիկա միայն մասամբ շիտակ է, եթէ լոկ նիւթական առումով առնուի: Սակայն պէտք է ընդունիլ թէ ամէն պարագային չի յաւմարիր: Աստուածապաշտութիւնը մարդուն անկասկած հանգստութիւն ու բարեբաստութիւն չի բերեր, երբեմն ալ նեղութիւն ու դժբաղդութիւն կը բերէ: Արդարեւորուն

նիւթապէս վարձատրուելուն անկեղծօրէն հաւատացող Հին Կտակարանի հեղինակներն իսկ չի կրցան տեսնուած բոլոր իրողութիւնները պատշաճեցնել տուեալ վարկածին: Եւ շփոթութեամբ հարցուցին. «Ինչո՞ւ ամբարիշտներուն ճամբան յաջող է. ինչո՞ւ արդարներուն ճամբան տաժանելի է»: Ուղեւոր չուղեւոր տղեղ իրողութիւնները իրենց առջեւ կը ցցուէին զարշատեսիլ ուրուականներու նման, եւ անոնք չէին կրնար այս հարցումներուն բանաւոր բացատրութիւն մը տալէ խուսափիլ: Հետեւաբար, անոնց կողմէն այս առեղծուածը լուծող, եւ կամ լուծելու աշխատող, բացատրութիւններ արուեցան: Այս բացատրութեանց մէջ կարեւորագոյնները հետեւեալներն էին:

1. Ոմանք ըսին, այս կեանքի առեղծուածները լուծելու մի՛ աշխատիր: Աստուծոյ զործելակերպը ըմբռնելու համար պարապ տեղ մի՛ տքնիր: Քանզի անիկա մարդկային մտքէ վեր է: Աստուծոյ արդարութիւնը մեր հասկացողութեան սահմանէն անդին կ'իյնայ: Որքան որ երկինքը բարձր է երկրէն, նոյնքան ալ անոր խորհուրդները բարձր են մերինէն: Ուստի պարապ տեղ խելքդ մի՛ յոգնեցներ: Անօգուտ հարցումներով ինքզինքդ մի՛ նեղէր: Մի՛ հարցնէր, մի՛ խուզարկէր, բացատրութիւններ մի՛ պահանջէր: Քանզի բացատրութիւն չես կրնար գտնել: Իրողութեանց առջեւ խոնարհէ: Նախախնամութեան կոյրօրէն յանձնուէ: Աստուծոյ զործը իրեն ձգէ: Դուն քու զործիդ խառնուէ:

2. Ուրիշ խումբ մըն ալ կար որոնք յոռետեսութեան սեւ ակնոցներ դրուած էին, եւ աշխարհի տաժանքներէն ձանձրացած ու կեանքի նեղութիւններէն զգուած էին: Ասոնց աչքին ամէն բան «ունայնութիւն ու հոգիի տանջանք» կ'երեւէր: Անոնք կը խորհէին թէ աշխատիլ, յոգ-

նիլ եւ հարստութիւն դեղել ալ պարապ բան է, քանի որ, Ժողովողի ըսածին պէս, «Ինձմէ ետքը գալու մարդուն պիտի քոյում գանիկա. եւ ով գիտէ թէ անիկա իմաստուն պիտի ըլլայ թէ անմիտ. բայց պիտի տիրէ իմ բունը աշխատութիւններու վրայ: Անիկա ալ ունայնութիւն է» (2:18,19): Անոնք կ'ըսէին, չբաւար ըլլալն ալ պարապ բան է, հարուստ ըլլալն ալ պարապ բան է, քանզի երկուքն ալ վերջ չունին: Ուստի այս կեանքին մէջ մարդ ցանկալու է ոչ բարեբաստութեան եւ ոչ իմաստութեան: «Վասն զի շատ իմաստութեան մէջ շատ տրտմութիւն կայ» (1:18): Եւ եթէ իմաստունին եւ թէ անմիտին «պատահած դիպուածը մէկ է» (2:14): Անիմաստ բան է անցաւոր բարիքներու տեսչալ, ու զանոնք հետապնդել: Ուստի, ունեցածովդ զոհացիր եւ կրցածիդ չափ խոսովմունքէ ու յոգնութենէ հեռու կեցիր: Ամբարիշտը յաջողի ալ նէ՛, վերջապէս իր ունեցածը չի պիտի վայելէ:

3. Ուրիշներ ալ կային որոնք այսքան յոռետես չէին, որոնց համար աշխարհային վայելքները տեսչալի բաներ էին, եւ որոնք նիւթական բարիքներու մէջ կը տեսնէին արժէք, եւ զանոնք կը նկատէին իբր երկնային տուրք եւ օրհնութիւն: Անոնք չէին կրնար ուրանալ թէ չարերն ալ բաժնեկից կ'ըլլան այս բարիքներուն: Եւ անոնք այս դժուարութիւնը բացատրելու համար կ'ըսէին, չարերը արդարեւ կը յաջողին, սակայն միայն ժամանակաւոր կերպով կը յաջողին, եւ անոնց յաջողութիւնը այս կեանքին մէջ վախճան մը պիտի ունենայ. անոնք վերջապէս պիտի իյնան: Եւ Առակախօսի ըսածին պէս, «Արդարները ամբարիշտներու իյնալը պիտի տեսնեն» (29:16): Սաղմոսերգուն ալ կը յայտարարէ. «Քիչ ժամանակէ ետեւ ամբարիշտը պիտի չըլլայ, եւ անոր տեղը պիտի

փնտոես, ու ինք պիտի չի գտնուի: ...Ամբարիշտը գորացած տեսայ, ու իր տեղը կեցող կանանց ծառի մը պէս տարածուած. բայց ան անցաւ, ու անա չկար. եւ գանիկա փնտոեցի, բայց չի գտնուեցաւ» (37:10, 35-38.): *Ուրիշ մէկն ալ կ'ըսէ, ամբարշտին յաջողութիւնը տեսնել «դժուար եկաւ իմ աչքերուս. մինչեւ որ Աստուծոյ սրբաբանը մտայ, ու անոնց վերջը իմացայ: Իբրաւ որ դուն գանոնք սահելու տեղերը դրեր ես» (73:16-18.): «Ես յիմարիմ արմատանալը տեսայ, բայց շուտ մը անոր բնակութիւնը անիծեցի» (Յոր 5:3.): «Ուստի քող անօրէնը բարգաւառի, բայց քէեւ հողի պէս արծաթ դիզէ, եւ տիզմի պէս հանդերձներ պատրաստէ. անիկա պիտի պատրաստէ, բայց արդարը պիտի հագնի, ու անմեղը արծաթը պիտի բաժնէ:» (Յոր 27:16, 17.):*

Տրուած այս բացատրութիւնը թէպէտեւ սիրտը կը ամոքէ, սակայն միտքը չի համոզեր: Քանզի իրականութեան մէջ, բոլոր չարեր չեն ինչար, գէշ վախճան չեն ունենար, իրենց ունեցածները չեն կորսնցնէր, թըռուտութեան մէջ չեն փճանար: Շատեր մինչեւ վերջ կը բարգաւառին, իրենց հարստութիւնը կը վայելեն, պերճանքներու մէջ կ'օրօրուին, եւ յետ մահուան իրենց ճոխ ժառանգութիւնը իրենց զաւակներուն կը ձգեն: Հետեւաբար այս բացատրութիւնն ալ ամէն դժուարութիւն չի լուծեր:

4. Կար ուրիշ դասակարգ մըն ալ որոնք կ'ընդունէին թէ այս աշխարհի վրայ արդարութիւնը լման ի դործ չի դրուիր, եւ անոնք յղացան սա վարդապետութիւնը թէ արդարութիւնը հանդերձեալ աշխարհին մէջ կը գործադրուի. մահուանէն վերջ արդարը իր հատուցումը, եւ ամբարիշտը իր պատիժը կ'ստանայ: Գերեզմանը մեղաւորին համար դատաստանին դուռը, իսկ արդարին համար

փառքի մուտքը կ'ըլլայ: Մահը ամբարիշտի բոլոր յաջողութիւններուն վերջ կը դնէ, եւ զայն յաւիտենական կորուստի ու տանջանքի կ'առաջնորդէ: «Անոնց վախճանը մահուան անբաններն են» (Առակ. 16:25.): «Ամբարիշտները դատաստանին մէջ պիտի չի կրնան կենալ» (Սաղ. 1:15.): Մաղաքիա մարգարէն ալ կը յարէ. «Փռուի պէս վառած օրը երբ իմ սեպիական գանձս ժողովեմ... դուք պիտի դառնաք, ու արդարին եւ ամբարշտին, Աստուծոյ ծառայութիւնը ընողին եւ անոր ծառայութիւնը չընողին տարբերութիւնը պիտի տեսնէք» (3:17, 18.): Ամբարիշտը յետ մահուան պիտի դիմադրուէ ցասկոտ Աստուծոյն դատապարտութիւնը, մինչդեռ արդարը պիտի լսէ անոր երջանկաբեր ողջոյնը: Այն օրը մեղքը մահ պիտի ծնի. իսկ արդարութիւնը կեանք: (Հոս իբր միջանկեալ բացատրութիւն ըսեմ թէ Հրէական աստուածաբանութեան մէջ դժոխքի վարդապետութիւնը շատ ուշ երեւան եկաւ, Պաղեստինական գերեզմանութիւնը շատ ուշ երեւան եկաւ, Պաղեստինական գերեզմանութիւնը շատ ուշ երեւան եկաւ, Պաղեստինական գերեզմանութիւնը շատ ուշ երեւան եկաւ: Սբ. Գրոց մէջ, անդունդ, տարտարոս, գուբ (չիօլ) բառը եւ դժոխք (կէհէննա) բառը հոմանիշ եւ նոյնիմաստ բառեր չեն:)

5. Այս բացատրութիւնը միւսներէն աւելի գոհացուցիչ ու շրջահայեաց է: Սակայն ատիկա չի բացատրեր արդարին քաջած աշխարհային նեղութիւնները: Չէ՞ որ այս աշխարհին մէջ արդարներն ալ անիրաւ կերպով կը տառապին, եւ նոյն իսկ կը փճանան: Ասո՞ր ինչ ըսենք: Ասիկա չի յարմարիր Սբ. Գրոց մէջ շատ մը հաւաստումներուն: Չէ՞ որ Սբ. Գրոց մէջ աստուածավայններուն կատարեալ ապահովութիւն ու խաղաղութիւն խոստացուած է: Ի՞նչպէս պիտի մեկնենք սա տեսակ հաւաստումները: «Արդարեւ ան պիտի փրկէ քեզ որսորդին որոգայները. ապականիչ ժանտամահէն: Քեզ իր փետուրներու»

վը պիտի ծածկէ, եւ իր քեւերուն տակ պիտի ապաստանիս: ... Հագար հոգի քու քովէդ, ու տասը հագար քու աջ կողմէդ պիտի իյնան, բայց քեզի հարուած մը պիտի չի մօտենայ: Միայն աչքերովդ պիտի նայիս, եւ ամբարիշտներուն հատուցումը պիտի տեսնես» (Մաղ. 91:3-8.): *Ի՞նչպէս պիտի բացատրենք սա աստուածային խոստումները.* «Երբ ջուրերէն անցնիս՝ ես քեզի հետ պիտի բլլամ, ու երբ գետերէն անցնիս, քեզ պիտի չկոխեն. երբ կրակի մէջէն քալես, պիտի չայրիս, եւ բոցը քեզ պիտի չբռնկցնէ» (Եսա. 43:2.):

Ասոր պատասխանը դալ քարոզիս մէջ պիտի տամ: Հոս կ'ուզեմ յիշել միայն Եսայի մարդարէին կողմէն տրուած բացատրութիւնը: Անիկա կ'ըսէ թէ, երբ արդարը ձախորդութեան հանդիպէ, Աստուած զայն զալիք մեծագոյն աղէտէն աղատելու համար, ասոր կ'ենթարկէ: «Արդարը կը կորսուի,» կ'ըսէ մարդարէն, «եւ ուշադրութիւն բնող մարդ չկայ. ու բարի մարդիկը աշխարհէ կը վերցուին, առանց մէկուն իմանալուն քէ արդարը (գալիք) չարիքին երեսէն կը վերցուի (is taken away from the evil to come): Անիկա խաղաղութեան մէջ կը մտնէ» (57:1.):

Թէ ամբարիշտը ինչո՞ւ կը յաջողի, դեռ ասոր դու՛հացուցիչ պատասխանը չի տուինք: Այս մասին անպատեհ չըլլար մի քանի լուսաբանութիւններ տալ:

ա. Ամէն մարդ, ինչպէս նաեւ չար մարդն ալ, իր աղէկ կողմերը եւ դրուատելի յատկութիւնները կ'ունենայ: Ինչպէս որ, սատանան ալ շատ չար է, բայց նոյն ատեն իր սոս քրտն: Չարը հատուցման արժանի է իր օգտակար կարողութեանց ու դործունէութեանց համար: Աստուած ամէն արժանաւոր բարեմասնութեան իր արժանի վարկը կուտայ: Օրինակի համար, մարդ մը չար

է, բայց նոյն ատեն մտացի է, աշխատասէր է, յարատեւող է: Աստուած այս բարեմասնութիւնները անվարձահատոյց չթողուր: Այս մարդը իր աշխատասիրութեան պտուղները քաղելու արժանի է: Այս աշխարհին մէջ սրամիտները դժբաղդաբար միշտ բարեմիտ չեն: Երկրիս վրայ ինչպէս որ ճարպիկ անհաւատներ կան, նոյնպէս ալ անճարակ հաւատացեալներ կան: Եւ ինչպէս որ հաւատացեալը իր անճարակութեան համար կը տուժէ, անանկ ալ անհաւատը իր ճարպիկութեան համար կը վարձատրուի: Չէ՞ որ մեր Տէրն ալ ըսաւ, «այս աշխարհին արդիւնները իրենց ցեղին մէջ լուսայ որդիներէն աւելի խելացի են:» (Ղուկ. 16:8.): Թովմաս էտիօրն շատ տարտամ կրօնական հաւատք ունեցող մարդ մըն է, սակայն անիկա մտքով հանճարեղ է, եւ անիկա գիտցած է իւր հանճարը արդիւնազործել, եւ աշխարհի ամէնէն անուանի եւ յաջողակ անձերէն մին հանդիսանալ: Անիկա կատարելապէս արժանի է իւր անխոնջ աշխատութեանց ձոխ հատուցման:

բ. Մենք չենք գիտեր թէ ո՞վ է իրական ամբարիշտը կամ արդարը: Մենք չարը կամ բարին սովորաբար մեր անձին հետ ունեցած կապակցութեամբ կը չարիքնք: Մեզի համար չար է այն անձը, որ մեզի վնաս կամ չարիք մը հասցուցած է. իսկ բարի է այն անձը որ մեզի օգուտ կամ բարիք մը հասցուցած է: Սակայն մարդու մը իսկական որակութիւնը որոշելու մէջ ասիկա շտակ չափանիշը չէ: Բարին ու չարը կրնան զատորոշուիլ, միայն միայն Աստուծոյ հետ անոնց ունեցած կապակցութեամբ: Իրական արդարը ան է որ Աստուծոյ հանդէպ հնազանդ է. իրական չարը ան է որ Աստուծոյ հանդէպ անհնազանդ է: Ասիկա միայն Աստուծոյ ծանօթ է: Անիկա գիտէ թէ ո՞վ է ամբարիշտը եւ ո՞վ է արդար

բը: Մեր ամէն արդար կարծած մարդը արդար չէ, եւ ամբարիշտ կարծած մարդը ամբարիշտ չէ:

դ. Աստուած բոլոր մարդոց վրայ հայրական աչքով ու դուզուրանքով կը նայի: Աստուած երկնաւոր Հայրն է բոլոր մարդոց: Անիկա հաւասարապէս կը սիրէ թէ՛ բարին եւ թէ՛ չարը: Անիկա գթաուատ ու բազմողորմ է: Անիկա մեզի պէս չի տեսներ, մեզի պէս չի խորհիր եւ չզղար: Մենք կ'ուզենք որ անողամը անմիջապէս պատժուի, անօրէնին զլիւուն երկինքէն կրակ թափի եւ անիկա այրի ու կորսուի: Սակայն Աստուած ցասկոտ դատաւոր մը չէ. սիրող Հայր մըն է: Անիկա ամբարշտին մեռնիլը չուզեր, հապա կ'ուզէ որ նա իր չար ճամբաներէն դառնայ ու ապրի (Եղեկ. 33:11.): Անիկա մեղաւորին տանջուիլը տեսնելով չի հրճուիր: Անիկա «իբարեւը կը ծագեցնէ թէ՛ չարերուն եւ թէ՛ բարիներուն վրայ, եւ անմեղ կը զրկէ թէ արդարներուն եւ թէ մեղաւորներուն վրայ» (Մատթ. 5:45.): Անիկա չարի ապատամբութեան համար կը վշտանայ. անոր հանդէպ կը համբերէ, եւ դայն դարձի բերելու կ'աշխատի: Մեղաւորին հանդէպ Աստուծոյ սէրն ու ներողամտութիւնը զարմանալի է: Եթէ չարերը երկրիս վրայ հանգստութիւն ու բարօրութիւն կը վայելեն, ասիկա մեծաւ մասամբ կը պարտին Աստուծոյ անհուն սիրոյն, համբերութեան եւ ողորմութեան:

դ. Չարերու յաջողութիւնը մասամբ ալ բացատրելի է աշխարհի շարութեամբ: Յորին յայտարարութիւնը մասամբ ճշմարիտ է. «Երկիրը ամբարշտին ձեռքը տրուեցաւ» (9:24.): Աշխարհին վրայ անօրէններ արդարներէն շատ են: Եւ աշխարհ չար ըլլալուն համար, չարերը կը բարգաւաճին: Չարերը չարերու մէջ վարկ կը դանեն: Թէ որ բոլոր մարդիկ բարի եւ ուղիղ եղած ըլ-

լային, չարերն ու նենգամիտները քաջաւերութիւն չպիտի դռնէին: Սակայն հիմա չարերը շարութեան համար խօսքը մէկ կ'ընեն: Փոխադարձ շահի վրայ կը համաձայնին, ընկերակցութիւն կը կազմեն: Անիրաւները կողոպուտի համար կը միաբանին: Թշնամիներ վաստակի համար կը բարեկամանան: Երկրիս վրայ շատ մը ամբարիշտներ, դրամին ուժով տիրական դիրքեր կը գրաւեն եւ կը մեծարուին, մինչդեռ անդին արժանաւոր բայց չքաւոր մարդ մը, ամէնուն կողմէն կ'անգոսնուի եւ ոտնակոխ կ'ըլլայ:

ե. Յաջողութեան եւ անյաջողութեան մասին մեր շափանիչներն ալ սրբագրութեան կը կարօտին: Մենք ընդհանրապէս կը խորհինք թէ դրամապէս հարստացող մարդ մը յաջող է, իսկ դրամապէս աղքատացող մարդ մը անյաջող է: Մենք չարաչար կը սխալինք երբ յաջողութեան կուտանք փոխանակ բարոյական դեռնի վերայ դնելու նիւթական գեանի վրայ կը դնենք: Ուրիշ կերպով կամ միջոցով յաջողող անձ մը միթէ յաջողակ կրնա՞յ նկատուիլ: Երբոր մարդ մը ծամածուռ ու խաղաղախ ճամբաներով հարստութիւն կը դիզէ, արդեօք յաջողա՞ծ կ'ըլլայ: Արդեօք կարելի՞ է յաջող նկատել մարդ մը, որ ամբողջ աշխարհը կը շահի, բայց իր հոգին կը կորսնցնէ: Արդեօք կարելի՞ է յաջողած կոչել մարդ մը, որ հարստութիւն դիզելու իր անյազ մարմաջին մէջ, իր ձեռքերը կ'աղտոտէ, իր նկարագիրը կը պղծէ, եւ կը կործենցնէ խղճմտանքի զգայնութիւնը, հոգւոյն սրբութիւնը, սրտին հանգստութիւնը, կեանքի առաքինութիւններն ու գեղեցկութիւնները: Ո՛չ, ո՛չ, նիւթականին համար հոգեւորը կորսնցնել, անցաւորին համար յաւիտեանականը դոհել երբէք յաջողութիւն չէ: Պնակ մը «ոսպապուրի» փոխարէն մեր «անդրանիկութեան իրաւունքը» ծախել երբէք խելացութիւն չէ:

Շատեր այս աշխարհին մէջ այս անմտութիւնը կը գործեն: Իրենց հողին կարմիր ոսկիով կը փոխանակեն: Անցաւոր բարիքի մը համար, անփոխարինելի եւ տարապայման գին մը կը վճարեն: Սակայն յաջս Աստուծոյ անոնք խղճալի վրիպակներ եւ անմիտներ են: Հետեւաբար, անօրէն հարուստներու փարթամութեան վրայ նախանձիւ անհարկի է: Վասն զի իրականին մէջ անոնք նախանձելի վիճակ չունին, հապա արգահատելի վիճակ: Բացարձակօրէն շիտակ են սա յայտարարութիւնները. «Ազէկ է քիչ բան արդարութեամբ, քան քէ մեծ եկամուտներ անիրաւութեամբ» (Առակ. 16:8.): «Արդարին քիչ բանը շատ ամբարիշտներու առատ ստացումածքէն ազէկ է» (Սաղ. 37: 16.):

Յաջողութեան իրական չափանիշը մարդու ներքին գիտակցութեան մէջ պէտք է փնտռել, եւ ոչ թէ արտաքին վիճակին մէջ: Իսկապէս յաջողած է ան որ բարձրագոյնը չի գոհեր ստորնադոյնին, եւ ամէն պարագայի տակ կը ցուցադրէ բարոյական կորովամտութիւն եւ արդարախոհութիւն: Այս տեսակէտէն, ցեղի ամէնէն յաջող նկատուած անձերէն շատեր իրականութեան մէջ անյաջողներէն են, եւ անյաջող նկատուածներէն շատեր ամէնէն յաջողներէն են: Ի՞նչ հիանալի բարձունքի վրայ կը կայնի Լինզըն, երբ կը յայտարարէ. «Հարկ չէ որ անպատճառ չահիմ, սակայն հարկ է որ անպատճառ ճշմարիտ ըլլամ. հարկ չէ որ անպատճառ յաջողիմ, բայց հարկ է որ ունեցած լոյսիս համեմատ ապրիմ»: (I am not bound to win, but I am bound to be true; I am not bound to succeed, but I am bound to live up to what I have).


Հարստութիւնը իր իսկութեան մէջ, միշտ իբր բարիք ընդունիլ ալ շիտակ չէ: Երբոր հարստութիւնը

մարդս աւելի աղնիւ, առատաձեռն, զոհաբերող, կարեկից եւ այլասէր կը չինէ, յայնժամ հարստութիւնը բարիք մը կ'ըլլայ. բայց երբոր զայն աւելի խրոխտ, անսպարժ, արհամարհոտ, անձնասէր, ազահ, կարծրասիրտ եւ անգութ կը չինէ, յայնժամ հարստութիւնը իրական անէծք մը կը դառնայ: Այս կարգէ մարդոց պատիժը իրենց հարստանալուն մէջն է:

դ. Այս աշխարհի վրայ իբր արդարութիւն գործողներ, եւ ոչ մէկերնիս արժանի ենք վարձատրութեան: Երկրիս վրայ, բառին բացարձակ իմաստով, արդար մը չկայ, եւ ոչ մէկ հատ: Ամէնքս ալ տկարութիւններով, թերութիւններով, մոլութիւններով, յանցանքներով լեցուն ենք: «Մեր արդարութիւնները դաշտանի լաթին պէս են»: (Եսա. 64:6.): Եւ եթէ մեր մէջ արդարութիւն մը կայ, անիկա մեր ձեռաց գործը չէ, հապա Գրիտտոսի շնորհաց մի պտուղը: Մենք արդարացած ենք Քրիստոսի շնորհքով: Մեր արդարութիւնը մեր մէջջէն չէ բղխած, այլ դուրսէն մեր վրայ դրուած է: Հետեւաբար, մենք մեր արդարութեանց համար, ոեւէ վարձատրութիւն ակնկալելու իրաւունքը չունինք: Եւ եթէ ոեւէ վարձատրութիւն պիտի ակնկալենք, միմիայն Քրիստոսի անհուն շնորհաց եւ սիրոյն յենելով է որ պիտի ակնկալենք: Վարձատրութիւնը արժանիքի խնդիր չէ, այլ շնորհաց խնդիր է:

Այս բոլոր խորհրդածութիւնները մեզ կ'առաջնորդեն սա եզրակացութեան թէ Աստուած ամբարիշտին պատիժը կը յապաղեցնէ, որքան ատեն որ կրնայ. իսկ արդարը կը վարձատրէ իր արժանիքէն դերիվեր չափով մը: Աստուծոյ ողորմութեան թեւերը տարածուած են թէ՛ բարիներու եւ թէ՛ չարերու վրայ: Միայն սա տարբերութեամբ թէ ցվերջ մերժուած ողորմութեան վախ-

ճանին արհաւիրք կայ, մինչդեռ իւրացուած ողորմութեան մէջ բժշկութիւն, խաղաղութիւն եւ երջանկութիւն կայ: Առակախօսի ըսածին պէս, «Արդարներուն ցանկութիւնը միայն բարութիւն է. բայց անօրէններուն ակնկալութիւնը բարկութիւն պիտի ըլլայ» (11:23.): Այս պատճառաւ, «Օրհնեալ է այն մարդը, որ Տէրոջը կ'ապաւինի, ու անոր յոյսը Տէրն է» (Երեմ. 17: 7.):



♠

ՅԻՍՈՒՍԻ ԳԱՂԱՓԱՐԱԿԱՆԸ ՎԱՐՁԱՏՐՈՒԹԵԱՆ ՄԱՍԻՆ

«Անոնք որ բարի գործեր են՝ կենաց յարուծեան համար, եւ անոնք որ չար գործեր են՝ դատապարտութեան յարուծեան համար՝ դուրս պիտի գան»:

ՅՈՂ. Ե. 29.

Սկի առաջ յայտնեցինք թէ Հին Կտակարանի մէջ ինչ պատիժներ սահմանուած են չարերուն համար, սակայն չի թուեցինք թէ ինչ բարիքներ խոստացուած են արդարներուն համար: Կարծեմ թէ անպատեհ չըլլար որ այս կէտն ալ քիչ մը աւելի ընդլայնուի:

Հին Կտակարանի գիրքերուն հեղինակները, ի մէջ այլոց՝ հետեւեալ օրհնութիւնները կը թուեն այն բարիքներու կարգին մէջ, զոր արդարները պիտի ընդունին բարեչնորհ Աստուծոյ ձեռքերէն: Աստուծոյ հնազանդիլ ու ծառայել, «Քեզի ու քեզմէ ետքը քու որդիներուդ աղէկ պիտի ըլլայ» (Ք. Օրին. 4:40. 5:30.): «Աստուծոյ օրէնքները պահել պիտի երկարէ քու կեանքդ» (Ք. Օրին. 4:40.): «Քեզի երկայն օրեր ու կենդանութեան տարիներ պիտի աւելցնէ» (Առակ. 3:2.). «քու ոյժդ պիտի նորոգէ» (Եսա. 40:31.). «աղէկ մը ծերացած գե-

րեզմանը պիտի մտնես» (Յոր. 5:26.) : «Քու սերունդդ պիտի օրհնուի ու պիտի բազմանայ» (Ծննդ. 22:17.) : «Քաղաքի մէջ օրհնեալ ու դաշտի մէջ օրհնեալ պիտի ըլլաս : Քու որովայնիդ պտուղը, քու երկրիդ պտուղը, քու անասուններուդ պտուղը, կովերուդ ծնունդը եւ ոչ-խարներուդ հօտերը օրհնեալ պիտի ըլլան : Քու կողովդ ու տաշտդ օրհնեալ պիտի ըլլայ : ...Տէրը ամէն ձեռք գարնելու բաներուդ մէջ օրհնութիւն պիտի դրկէ քեզի» (Բ. Օրին. 28:3-6,8.) : «Տէրը երկինքը քեզի պիտի բանայ. ու անձրեւները իրենց ժամանակին պիտի իջեցնէ» (Եղեկ. 34:26.) : «Քու խաղաղդ ու հունձիդ ու հացդ առատ պիտի ըլլայ : Աստուծմէ վախճողներուն բան մը եւ բարութիւն մը պակաս պիտի չըլլայ» (Սաղ. 34:9-10.) : «Անոնք պիտի չանօթեան ու չծարաւին» (Եսա. 49:10.) : «Անոնք պիտի ուտեն երկրի պարարտութիւնը : Թէ որ Աստուծոյ հնազանդ ըլլաս, նիւթ-ապէս պիտի բարգաւանիս : Հարստութիւնդ ու ոսկիներդ պիտի շատնան : Տարիներդ ուրախութիւնով պիտի անցնին» (Յոր. 36:11.) : «Տնծութիւն պիտի ստանաս եւ հեծութեան պիտի ազատիս» (Եսա. 35:10.) :

Արդարին սերունդը երկիրը պիտի ժառանգէ (Սաղ. 25:13.) . եւ անոնց ժառանգութիւնը յաւիտեանական պիտի ըլլայ (Սաղ. 37:18.) : Անոնք իրենց երկրին մէջ սպառնալուքեամբ պիտի բնակին, հանգիստ պիտի պառկին ու վախճնող մը պիտի չըլլայ . եւ անոնց երկրին մէջէն սուր պիտի չանցնի (Ղեւ. 26:6.) : Երբ Տէրոջը կ'ապաւինիս, Ան քեզի համար պիտի պատերազմի . ուստիներդ քու առջեւէդ պիտի վանէ (Բ. Օրին. 33:27.) : Քու քշնամիներդ պիտի կոտորուին ու քու առջեւէդ պիտի փախչին : Չպիտի պարտուիս . միշտ վրայ պիտի ելլես, ու գլուխ պիտի ըլլաս (Բ. Օրին. 28:7,13.) : «Տէրը

սովի ժամանակ քեզ մահուանէ պիտի ազատէ : Կործանումի ու սովի վրայ պիտի ծիծաղիս» (Յոր. 5:20,22.) : Զարեանքներէն, ժանտամահէն, սատակեցնող հարուածէն պիտի չվախնաս (Սաղ. 91:5,6.) : Քու բոլոր նամբաներուդ մէջ պիտի պաշտպանուիս : Տէրը պիտի լսէ երբոր իրեն կը կանչես (Սաղ. 4:3.) : Քու աղաչանքներուդ պիտի պատասխանէ (Յոր. 22:27.) : Քու սրտիդ խնդրումները պիտի տայ (Սաղ. 37:4.) :

Տէրը իրեն յուսացողներուն վահան ու ասպար պիտի ըլլայ . անոնց գորութիւնը ու փրկութեան վէճը պիտի ըլլայ (Սաղ. 28:8.) : Անոնց ապաւէն, ապաստանարան, հովանի պիտի ըլլայ (Սաղ. 62:8 121:5.) : Զանոնք իր փետուրներովը պիտի ծածկէ (Սաղ. 91:4.) : Զանոնք ամբարիշտներու ձեռքէն պիտի փրկէ (Սաղ. 97:10.) : Ամէն չարէն պիտի պահպանէ (Սաղ. 121:6.) : Անոնք յաւիտեան պիտի չսասանին (Սաղ. 15:5.) : Տէրը անոնց երթալու նամբաները պիտի ցուցնէ (Սաղ. 32:8.) : Անոնց նամբաները պիտի լուսաւորէ (Յոր. 22:28.) : Անոնց քայլերը պիտի հաստատէ (Սաղ. 37:27.) :

Հարկ չկայ որ այս ցանկը աւելի երկարենք : Այսօր կը բաւէ դադարիար մը տալու համար թէ արդարեւ ներուն ինչպիսի օրհնութիւններ վերապահուած են : Սափանը որոշ է թէ արդարին «վարձը խիստ շատ պիտի ըլլայ» (Ծննդ. 15:1) : Անիկա աստուածային շնորհներով պիտի չըջապատուի : Անիկա Տէրոջ մասնաւոր հաճութեան, խնամքին, դուրսդուրանքին, պաշտպանութեան առարկան պիտի ըլլայ : Կեանքի բոլոր օրերուն մէջ Տէրոջ բարեբարութիւնը եւ ողորմութիւնը իրեն պիտի բնկերանան (Սաղ. 23:6.) :

Ի՞նչպէս պիտի առնենք արդարներուն համար խոստացուած այս հատուցումները: Արդեօք ասոնք անհիմն եւ անիմաստ խօսքե՞ր են, եթէ ոչ արժէքաւոր ու իմաստալից ճշմարտութիւններ: Արդեօք ասոնք կ'իրադրածուի՞ն արդարներու փորձառութեանց մէջ, եթէ ոչ իրողութեանց չեն համապատասխաներ: Ասոնք կենսական հարցումներ են, եւ լուծում կը պահանջեն:

Իբր պատասխան այս հարցումներուն, պարտինք ըսել թէ այս խոստումները իրապէս գործադրուած են շատ մը հաւատացեալներու կեանքերուն մէջ, թէպէտեւ անոնց ամէնքը չեն գործադրուած բոլոր հաւատացեալներու կեանքերուն մէջ: Ասոնք պարապ խօսքեր չեն, հապա ճշմարտութիւն ալ կը պարունակեն: Աստուած՝ իրապէս, շատ մը աստուածապաշտները սովորու մէջ հոգացած է, ժանտախտներու մէջ հովանաւորած է, աղէտներէն պաշտպանած է, չարերու ձեռքերէն ազատած է, նեղութիւններու մէջէն ապահով անցուցած է, կորուստէ փրկած է: Աստուած՝ իրապէս իրեն յուսացողներուն զօրութիւն ու ամբողջ եղած է. իրեն ապաւինողներուն հովանի եւ ապաստանարան եղած է: Աստուած յաճախ իր հօր եւ ողորմած թեւերը իր զաւակներուն վրայ տարածած է, եւ չէ ձգած որ անոնց վնաս մը հասնի՝ երբոր ջուրերու եւ հուրերու մէջէն կ'անցնէին: Յովսէփի՝ բանտէն, Մովսէսի՝ Փարաւոնի ձեռքէն, Դանիէլի՝ առիւծներու գուրէն, Սեղրաք ու Միսաք եւ Աբեղնադովի՝ բորբոքած կրակի հնոցէն ազատուիլը եղական զէպքեր չեն պատմութեան մէջ: Ամենակարողը իր փրկարար ուժը ցուցադրած է շատ մը պարագաներու մէջ: Բարձրեալը շատ անգամներ ապացոյց տուած է թէ իր ձեռքը փրկելէն չէ կարճցած եւ իր ուժը օգնելէն չէ պակասած: Աստուած հրաշքներ գործող աստուած մըն է, եւ անիկա

շատ անգամներ իր ծառաները հրաշալի եղանակներով մեծ նեղութիւններէ փրկած է, խոր մթութենէ ի լոյս հանած է, մահաշունչ անցքերէն ապահով անցուցած է: Աստուած իրեն ապաւինողներուն իսկապէս զօրալիզ եւ օգնական եղած է: Եւ անիկա իր աստուածային բարիքները եւ օրհնութիւնները թափած է զինք սիրողներու վրայ:

Այսու ամենայնիւ, ճշմարտութեան արդար ըլլալու համար, պարտինք ընդունիլ թէ Աստուած ամէն պարագայի տակ իր զաւակները նեղութիւններէ եւ փորձանքներէ չէ խնայած: Աստուծոյ զաւակներուն մէջն ալ անօթի մնացողներ, տառապանք կրողներ, վիշտերու ենթարկուողներ՝ պակաս չեն եղած: Այն Աստուածը որ Պետրոսը բանտէն ազատած է, Յակոբոսի սպաննուելուն թոյլատու եղած է: Այն Աստուածը, որ Դանիէլը առիւծներու գուրէն ազատած է, Ստեփաննոսի քարկոծուելուն արդելք չէ եղած: Այն Աստուածը որ Յովսէփը զնդանէն հանելով թաղաւորութեան գլուխ բարձրացուցած է, Յովհաննէս Մկրտիչի զլիսատուելուն յօժարութիւն ցոյց տուած է: Քանի՛ բարեպաշտ Հայերը ստոյգ մահէն հըրաշքով փրկող Տէրը, ուրիշ հաւատացեալ Հայերու նահատակուելուն արգելք չէ հանդիսացած:

Անտրամաբանական է խորհիլ թէ Աստուած Գրիստոնեաներու մէջ տարբերութիւն եւ խտրութիւն դրած է, անոր համար որ անոնցմէ ոմանք միւսներէն բարի եղած են: Խորհիլ թէ Աստուած առաւելագոյն չափով բարի եղողները ազատեց, եւ նուազագոյն չափով բարի եղողները մահուան յանձնեց, ճշմարտութեան զէմ մեղանչել է: Գացողներուն եւ մնացողներուն մէջ այս տեսակ զանազանութեան գիծ մը քաշուած չէ: Պարզ իրողութիւնը սա է, որ նահատակուողները ազատուողներէն

նուազ արդար եւ նուազ սիրելի չեն եղած : Նոյն իսկ նահատակուողներէն ոմանք միւսներէն աւելի արդար եւ սուրբ եղած են : Աւելին կայ : Աստուած երբեմն բարիները մահուան կը յանձնէ , մինչդեռ չարերը մահէն կ'ազատէ : Ուստի խորհիլ թէ , «Ես ազատուեցայ՝ քանզի Աստուծոյ սիրելին էի ,» սխալ է : Սա վարկածը թէ «Ընտրեալները կը փրկուին , ոչ-ընտրեալները կը կորսուին ,» բոլորովին անհիմ է : Սա պարագան ալ կը ջրէ այս տեսութիւնը , թէ երբ Աստուած մէկ առթիւ հաւատացեալի մը կեանքին կը խնայէ , ուրիշ առթիւ մը նոյն անձի կեանքին չի խնայեր : Զօր օրինակ , Աստուած Երուսաղէմի մէջ Պետրոս Առաքեալը հրաշքով մը դուրս հանեց բանտէն , բայց Հռովմայ մէջ զայն չազատեց կայսեր ճիրաններէն : Արդեօք այս իրադարձութիւնը սրւո՞ր վերագրենք թէ Պետրոսի սէրը եւ նուիրումը իր Փրկչին հանդէպ նուազած էր իր կեանքի վերջաւորութեան մօտ : Ո՛չ երբէք : Միայն թէ Աստուած յարմար դատեց որ ինք իր Փրկչին պէս խաչուելով իր Տէրը փառաւորէ :

Ուրեմն , Հին Կտակարանի խոստումները պէտք չէ որ բացարձակ եւ տառական իմաստով առնենք : Հասկա պարտինք զանոնք ընդունիլ որոշ վերապահութեամբ : «Որովհետեւ դուն Տէրը քեզի ապաստանարան ըրիր , քեզի չարիք պիտի չհասնի ,» խօսքը ամէն անհատի եւ ամէն ժամանակի յարմարող բացարձակ խոստում մը չէ : «Նա քեզ իր փետուրներովը պիտի ծածկէ : Հազար հոգի քու քովէդ , ու տասը հազար քու աջ կողմէդ պիտի իյնան , բայց քեզի հարուած մը պիտի չմօտենայ» յայտարարութիւնը , ամէն անձի եւ ամէն պարագայի չի յարմարիր : «Երբ գետերէն անցնիս , քեզ պիտի չկոխեն . երբ կրակի մէջէն քայես , պիտի չայրիս» խոստումով տառապէս դործադրելի չէ : «Աստուած արդարը յաւիտեան իյնալու եւ

աստանելու չպիտի թողու» ասացուածը մարմնաւոր եւ Փրկիչքական իմաստով , բոլորովին ճշմարիտ չէ :

Սա իրողութիւնը շատ պարզ ըլլալու է մեր մտքերուն մէջ , թէ արար ըլլալը մեզ նեղութիւններէ ազատ չի կացուցաներ : Արդարներուն՝ ցաւերէ անպարտութիւն խոստացուած չէ : Սակայն ասկէ աւելի լաւ խոստում մը տրուած է . «Երբ ջուրերէն անցնիս , ԵՍ ՔԵԶԻ ՀԵՏ ՊԻՏԻ ԸԼԼԱՄ» (Եսա . 43:2.) : Աստուած պիտի ձգէ որ դուն խոր ջուրերէն անցնիս , սակայն քեզ միայնակ պիտի չթողու , քու օգնութեանդ պիտի հասնի , քեզ պիտի զօրացնէ ու յուսադրէ , քեզի համբերութիւն եւ կարողութիւն պիտի շնորհէ , քու հոգիդ կորուստէ պիտի փրկէ : «Արդարին ներգուծիւնները շատ են , բայց Տէրը ամենէն կը փրկէ զանիկա» (Սաղ . 34:19.) յայտարարութիւնը հոգեւոր իմաստով կատարելապէս ճշմարիտ է : «Նեղութեան մէջ անոր հետ պիտի ըլլամ» խոստումը ամէն ատեն եւ ամէն կերպով շիտակ է : «Անիկա իր սուրբերուն հոգիները (մարմինները չէ ըսուած) կը պահէ» (Սաղ . 97:10.) խօսքը բացարձակ ճշմարտութիւն մըն է :

Վարձքի խնդրոյն նկատմամբ մեր միտքերը լուսաւորելու համար հարկաւոր կը նկատենք Յիսուսի վարդապետութեանց ուսումնասիրութիւնը : Յիսուս ի՞նչ կը խորհի այս նիւթին շուրջ . այժմ ասոր անդրադառնանք : Երբոր Յիսուսի վարդապետութիւնները կ'ուսումնասիրենք , կը դիտենք թէ անիկա յաճախակի կը շօշափէ վարձքի կէտը , եւ կը յայտնէ թէ հատուցում մը կայ թէ՛ արդարին եւ թէ՛ անօրէնին համար : Մեր Տէրը գիտնալով մարդուն շինուածքը եւ հոգեբանութիւնը , քանիցս դիմում կ'ընէ վարձատրութեան զրգիւղին : Հետեւեալ համարները , որոնք կ'ուզենք մէջբերել անոր ասացուած-

ներէն իբրեւ նմոյշներ, կը պարզեն թէ նա ինչ կը խորհի վարձատրութեան էութեան ու որպիսութեան մասին:

«Եւ Յիսուս ըսաւ անոնց, շշմարիտ կ'ըսեմ ձեզի թէ մարդ մը չկայ որ թողուց տուն, կամ ծնողք, կամ եղբայրներ, կամ կին, կամ որդիներ Աստուծոյ թագաւորութեանը համար, որ պիտի չառնէ բազմապատիկ այս ստեղծման մէջ, եւ գալու աշխարհին մէջ յաւիտեանական կեանք» (Ղուկ. 18: 29, 30): «Վասն զի ով որ ձեզի գաւաթ մը ջուր խմցնէ իմ անունովս, նշմարիտ կ'ըսեմ ձեզի, անիկա իր վարձքը պիտի չկորսնցնէ» (Մարկ. 9: 40): *Մեր Տէրը ըսաւ, յաւիտեանական կեանքի ճամբան փնտռող հարուստ օրինականին.* «Գնա, ունեցածդ ծախէ եւ տուր աղքատներուն, ու երկինքը գանձ պիտի ունենաս, եւ խաչը վերցուր ու եկուր իմ ետեւես» (Մարկ. 10: 21): *Իր տաղանդները լաւ կերպով չահադրող ծառային ըսուեցաւ.* «Ապրիս, բարի ու հաւատարիմ ծառայ. դուն որ քիչ բանին մէջ հաւատարիմ եղար, քիչ շատ բաներու վրայ պիտի կեցնեմ, մտիք քու Տէրոջդ ուրախութեանը մէջ» (Մատթ. 25: 21): *Մեր Տէրը սորվեցուց թէ ողորմութիւն տուողը անվարձ չպիտի մնայ* (Մատթ. 6: 4): *Նա սպասաւորելու բարձրութիւնը յայտնելով ըսաւ,* «Եթէ մէկը ինծի կը ծառայէ, Հայրը պիտի պատուէ գանիկա» (Յովհ. 12: 26):

Արդարներու եւ անօրէններու ճակատագրին մասին, Յիսուս հետեւեալ դադարները յայտնեց: «Ու երբ Որդին մարդոյ իր փառքովը գայ... այն ատեն իր փառաց արժող պիտի նստի. եւ անոր առջեւ պիտի ժողովին բոլոր ազգերը, եւ գանձնիք իրարմէ պիտի գատէ, ինչպէս հովիւ մը ոչխարները այծերէն կը գատէ: Եւ ոչխարները իր աջ կողմը պիտի կայնեցնէ, ու այծերը իր ձախ կողմը: Այն ատեն Թագաւորը իր աջ կողմը եղողներուն

պիտի ըսէ, Եկե՛ք, իմ Հօրս օրհնածները, աշխարհի ըսկիզբէն ձեզի համար պատրաստուած թագաւորութիւնը ժառանգեցէ՛ք: ...Շշմարիտ կ'ըսեմ ձեզի, որովհետեւ այս իմ եղբայրներուս ամէնէն պտիկներէն մէկունը ըրիք, ինծի ըրիք: Այն ատեն ձախ կողմը եղողներուն ալ պիտի ըսէ. Մէկդի գացէ՛ք ինձմէ, անիծեալներ, յաւիտեանական կրակին մէջ՝ որ պատրաստուած է Սատանայի ու իր հրեշտակներուն: ...Եւ ատնիք պիտի երթան յաւիտեանական տանջանքը, իսկ արդարները յաւիտեանական կեանք» (Մատթ. 25: 31-46): *Որովհետեւ աւակով ալ մեր Տէրը միեւնոյն դասը սորվեցուց.* «Արդ ինչպէս որ որումը կը ժողովուրի ու կրակի մէջ կ'այրի, աշխարհին վերջն ալ այդպէս պիտի ըլլայ: Որդին մարդոյ իր հրեշտակները պիտի դրկէ, ու պիտի ժողովեն անոր թագաւորութենէն բոլոր գայթակղութիւնները, եւ գանձնիք որ անօրէնութիւն կը գործեն, ու կրակի հեռոյն մէջ պիտի ձգեն գանձնիք. հոն պիտի ըլլայ լալ ու ակռաներ կրնտել: Այն ատեն արեւի պէս պիտի փայլին արդարները իրենց Հօրը թագաւորութեանը մէջ» (Մատթ. 13: 40-43):

Յիսուսի ուսուցումներուն մէջէն հետեւեալ ճշմարտութիւնները ի յայտ կուգան:

1. Տիեզերքին մէջ բարոյական հատուցում կայ: Արդարին համար վարձք, իսկ անօրէնին համար պատիժ կայ: Անոնք որ ուղղամտութեամբ ու հաւատարմութեամբ կը դործեն, «կեցցես» պիտի ստանան: Բարութիւնը առանց արդիւնքի չէ: Բարի գործքերը ի դերեւ չեն: Ամենապզտիկ բարիքն իսկ իր վարձքը պիտի ընդունի: Աստուած մեր ամենաչնչին ծառայութեան համար մեզի վարկ պիտի տայ: Չարին բարերար եղող Աստուածը, բարիին ալ աւելի պիտի ըլլայ:

2. Արդարութիւնը բնածին չէ: Անհատ մը Աբրահամի դաւակ ըլլալուն համար, Աստուծոյ դաւակ եղած չըլլար, ընտիր եւ սեպհական ժողովուրդ եղած չըլլար: Արդարութիւնը ժառանգական բան մը չէ, այլ ստացական բան մըն է: Մարդուն արդարութիւնը կ'որոշուի, Աստուծոյ հանդէպ իր բռնած գիրքով: Արդար է այն մարդը որ Աստուծոյ հետ հաշտ և մտերմական է: Արդարութեան պայմանն է մեղքի հանդէպ ապաշխարհութիւն, Քրիստոսի հանդէպ հաւատք, Աստուծոյ հանդէպ հնազանդութիւն:

Արդարութիւնը դորձքերէն ալ չէ: Մենք դորձքերէն աւելի մեր հաւատքին ու տրամադրութեան համար վարձքի պիտի արժանանանք: Այսու ամենայնիւ, ճշմարիտ հաւատքը կը ծնի սուրբ կենցաղ եւ բարի դորձք: Հաւատքի եւ արարքի միջեւ կենսական կապակցութիւն մը կայ: Արդար մարդը իր պտուղներէն կը ճանչցուի: «Ոչ քէ ամէն մէկը ինծի Տէր, Տէր, կ'ըսէ, պիտի մտնէ երկինքի թագաւորութիւնը, հապա անիկա որ իմ երկնաւոր Հօրս կամքը կը կատարէ» (Մատթ. 7:21.):

3. Արդարը իր արդարութեան ու ծառայութեան լման հատուցումը այս կեանքի մէջ պէտք չէ ակնկալէ: Հաւատացեալ ըլլալուն համար, մէկը պէտք չէ ակնկալէ որ այս աշխարհին մէջ խաղաղութիւն ու պերճանք պիտի վայելէ: Շատ անգամներ, ասոր ճիշտ հակառակը կը պատահի: Արդար ըլլալ մարդուն վրայ պիտի հրաւիրէ նախանձ եւ ատելութիւն: Առաքիլի ըլլալ պիտի բերէ նախատինք ու գէշութիւն: Քրիստոնեայ ըլլալ պիտի բերէ նեղութիւն ու հալածանք: Աստուածապաշտութեան վարձքը անդորրութիւն չէ, այլ շատ անգամ տառապանք ու խաչ է: Յիսուս իր աշակերտներուն առջեւ սա ակնկալութիւնը գրաւ. «Իմ անուանս համար ամենուն ատելի պիտի ըլլաք» (Մարկ. 13:13.): Նա իր հետեւորդներուն

սա ժառանգութիւնը ձգեց. «Աշխարհի մէջ նեղութիւն պիտի ունենաք. բայց քաջասիրտ եղէք, ես աշխարհի յաղթեցի» (Յովհ. 16:33.):

Յիսուս այս դժուարութիւնները մարդոց առջեւ դրաւ, որպէս զի անոնց արդարութիւնը վարձատրութեան չի լծորդուի, եւ անոնք հատուցման սիրոյն համար աստուածավախ չըլլան, նկանակներու սիրոյն համար իրեն չի հետեւին: Անիկա ամէն կերպով աշխատեցաւ թուժք կանգնել մարդոց այսօրինակ շարժառիթներուն առջեւ: Յիսուս ուղեց որ մարդիկ արդար ըլլան, բուն ինքն արդարութեան սիրոյն համար. մարդիկ բարի ըլլան ոչ թէ անկէ քաղուելիք բարիքին համար, հապա անոր համար որ բարութիւնը ինքնին լաւագոյն բանն է: Բարութիւնը շատ աւելի թանկարժէք ու բաղձալի բան մըն է, քան տեւէ արդիւնը որ անիկա կրնայ յղանալ: Թէ որ արդարութիւնը տեւէ վարձք չունենայ, կրկին կ'արժէ արդար ըլլալ: Մեր Տէրը պարզեց թէ բարի եւ բարեգործ ըլլալ, առանց վարձքի ակնկալութեան, Քրիստոնեական կեանքի ամենասպեմ արտայայտութիւնն է: «Իսկ դուն երբ ողորմութիւն կ'ընես, ձայն ձեռքդ թոյ չգիտնայ աչ ձեռքիդ ինչ գործելը» (Մատթ. 6:3.): «Բայց ես ձեզի կ'ըսեմ Սիրեցէք ձեր քնամիները, օրհնեցէք ձեզ անիծողները, բարի ըրէք անոնց որ ձեզ կ'ատեն: ...վասն զի եթէ դուք ձեզ սիրողները սիրէք, ի՞նչ վարձք կ'ունենաք. չէ՞ որ մաքաւորներն ալ նոյնը կ'ընեն» (Մատթ. 5:44, 46.): Ամենամեծ առաքիլութիւնը սա է որ մարդ բարիք ընէ ու ծառայէ, առանց տեւէ փոխարէն սպասելու: Բարիքը միայն այս կերպով իրական բարիք կ'ըլլայ: Ճօրճ Սթիւարթին արտայայտութիւնը իրաւացի է. «Երբ որ բարութիւնը նիւթական կապերէն կը ձերբազատուի, մեծութեան սահմանին մէջ կը մտնէ: Բարութիւնը ինքը

նպատակ է. եւ անիկա ոեւէ կապ չունի վարձքի հետ: Երբ վարձքը կը լեցնէ մեր աչքերը, բարութիւնը կը մոռցուի:»

4. Արդարութեան վարձքը չէ նիւթական տուրքեր եւ աշխարհային բարեբաստութիւն: Մեր Տէրոջ բոլոր ասացուածներուն մէջ, միայն երեք կամ չորս նախադասութիւններ կրնան դոնուիլ, որոնք կ'ակնարկեն թէ աստուածապաշտութիւնը նիւթական բարեյաջողութիւն կը պատճառէ. եւ ասոնց ալ իմաստը անորոջ է: Յիսուսի բոլոր ուսուցումներուն ամբողջական իմաստը եւ ոգին այս տեսութեան համաձայն չէ: Մեր Տէրը իր Շետեւորդներուն չի խոստացաւ առատ դրամ եւ փառաւոր պաշտօններ:

Յիսուս հարստութեան մէջ նշմարեց վտանգ՝ առաւել քան օրհնութիւն, փորձութիւն՝ առաւել քան բարիք: Անիկա հարստութեան օգտակարութիւններէն աւելի չարիքներուն մասին ճառեց: Անիկա ամէն կերպով աշխատեցաւ որ պաղեցնէ հարստութեան տիրանալու անյագ տենչը: Նա քաջալերեց առեւտուրի մէջ ուղղութիւնը, եւ վաստակի մէջ դոհունակութիւնը: Անիկա ազահութիւնը անողոք շեշտերով դատապարտեց: Նա հարուստներու բարոյական դժուարութեանց ակնարկելով ըսաւ, «Որչա՛փ դժուար է անոնց որ հարստութիւն ունին՝ Աստուծոյ քաղաւորութիւնը մտնել» (Մարկ. 10:23): Աչակերտները զարմացան անոր այս խօսքերուն վրայ: Անոնք տակաւին սա զաղափարով կը տարուէին թէ հարուստ ըլլալը Աստուծոյ հաճութեան արժանացած ըլլալու նշան է: Բայց Յիսուս այս զաղափարը տակն ու վրայ ըրաւ: Եւ յայտարարեց. «Որչա՛փ դժուար է իմեցնել ՀԱՐՍՏՈՒԹԵԱՆ ՅՈՒՍԱՅՈՂՆԵՐՈՒՆ Աստուծոյ քաղաւորութիւնը մտնել: Դիւրին է որ ուղտը անցնի

ծակէն անցնի, քան թէ հարուստը Աստուծոյ քաղաւորութիւնը մտնէ» (Մարկ. 10:25): Յիսուս այս կտրուկ զաղափարները շարտայայտեց իբր վարկածային տեսութիւն, այլ իբր առարկայական համոզում, զոր գոյացուցած էր կեանքի դրական իրականութիւնները դիտելով:

Մեր Տէրը խոշոր եւ մնայուն արժէք մը չի նշմարեց դրամին մէջ: Իւր զաղափարով, նիւթական հարստութեան արժէքը ասոր մէջ էր որ անիկա կրնար փոխանակուիլ օգտակար բաներով եւ հոգեւոր հարբաստութեամբ: Ուստի նա դրամ ունեցողներուն սա յորդորը տուաւ. «Անիրաւ մամոնայէն ձեզի բարեկամներ շինեցէք» (Ղուկ. 16:9):

Մեր Տէրը պարզեց թէ հարստութիւն դիզելը անարժան է կեանքի նպատակակէտ ըլլալու: Եւ նա «անմտութիւն» սեպեց նիւթական հարստութեան համար բարոյական հարստութեան զոհարեումը: Անիկա նիւթապաշտութեամբ դրաւուած մարդոց ըսաւ. «Ի՞նչ օգուտ է մարդուն՝ որ բոլոր աշխարհը վաստկի, եւ իր անձը կորսնցնէ. կամ իր անձին համար ի՞նչ ազատչէք պիտի տայ մարդ» (Մարկ. 8:36): Անիկա լման համոզուած էր թէ «ոչ միայն հացով կ'ապրի մարդ, հապա այն ամէն խօսքով՝ որ Աստուծոյ բերնէն կ'ելլէ» (Մատթ. 4:4): Եւ անիկա յայտնեց, թէ անոնք որ կոյրօրէն ու անյագօրէն հարստութեան ետեւէն կը վաղեն, կեանքի ամենաթանկագին գանձերէն եւ ամենալաւ վայելքներէն կը զրկուին: «Ան որ իր անձը կը գտնէ, պիտի կորսնցնէ զանիկա, եւ ան որ իր անձը ինձի համար կը կորսնցնէ, պիտի գտնէ զանիկա» (Մատթ. 10:39): Մարդս չի կրնար դրամապաշտ ըլլալ, եւ նոյն ատեն աստուածապաշտ: «Մարդ մը չի կրնար երկու տէրոջ ծառայութիւն ընել: ...Չէք կրք-

նար ծառայել Աստուծոյ ու մամոնայի» (Մատթ. 6: 24.) :

Մեր Տէրը սորվեցուց թէ արդարութիւնը հարըստութեան հետ, եւ արժանիքը փարթամութեան հետ ոեւէ կապակցութիւն չունի: Նա ըսաւ, «Մարդուս ըստացուածքներուն աւելնալէն կախուած չէ իր կեանքը» (Ղուկ. 12: 15.) :

5. Յիսուս պարզօրէն սորվեցուց թէ արդարութեան վարձքը բարոյական ու հոգեւոր է: Արդար ըլլալ մարդս բարոյապէս կը փառաւորէ, հոգեւորապէս կը հարստացնէ: Արդարին հարստութիւնը իրմէ դուրս չէ, հապա իր մէջն է: Արդարութիւնը մարդուս մարմինը բեհեզներով եւ աղամանդներով չի ծածկեր, սակայն անոր անձնաւորութիւնը եւ նկարագիրը վեհութեան եւ առաքինութեան գոհարներով կը զարդարէ:

Արդարին ընդունելիք վարձքերը սա տեսակ բաներ են: Արդար ըլլալը մարդս Աստուծոյ կը մօտեցնէ. Աստուծոյ փրկութեան ու թողութեան կ'արժանացնէ: Անիկա դատապարտութեան արհաւիրքէն կ'ազատի: Աստուծոյ հոգատարութիւնը եւ առաջնորդութիւնը կը վայելէ: Աստուծոյ մշտատեւ ներկայութեան եւ ընկերակցութեան կը դիտակցի: Տէրով Հոգին անոր սրտին մէջ կը բնակի: Անոր մէջ զօրացնող ու սրբացնող ուժ կ'ըլլայ: Տէրը փորձութեան մէջ անոր օգնական կ'ըլլայ, նեղութեան մէջ զօրավիգ, յուսահատութեան մէջ յոյս: Նա կ'ընդունի Սուրբ Հոգիին մխիթարութիւնը: Անիկա «խաւարի մէջ չի քալեր, հապա կենաց լոյսը կ'ունենայ»: Անիկա Քրիստոսի անբացատրելի խաղաղութեան կը տիրանայ: Անիկա Աստուծոյ մասնաւոր սիրոյն առարկան կ'ըլլայ: Անոր հաւատքով մատուցած աղօթքները կը

լսուին: Անիկա ճոխ, սուրբ, յաւիտենական կեանքի կը տիրանայ:

Ասոնք դանձեր են որոնք երկրաւոր ստացուածքներու հետ երբէք չեն կրնար բաղդատութեան դրուիլ: Անոնք որ այսպիսի հարստութեանց տէր կ'ըլլան, իսկապէս հարուստ կ'ըլլան: Ասանկները իրապէս «երանելեաց» դասին մէջ համարուելու արժանի են: Ան որ կը տիրանայ անարատ ձեռքերու, մաքուր ու հանդարտ խղճի, արդարացած հոգիի, ուրախ սրտի, առաքինի կեանքի, աւելի մեծափարթամ է քան Րաքֆէլըրը կամ Փօրտը: Այս հարստութիւնները այնքան պատուական եւ անզին են, որ կ'արժէ դանոնք ձեռք բերելու համար ամէն նեղութիւն ու զոհողութիւն յանձն առնել: Ուրեմն, ամե՛ն հարուստ մարդը այն է որ ամէնէն առաքինի նկարագրի եւ ամէնէն կատարեալ կեանքի տէր է: Ամենափարթամ մարդը ան է որ աստուածային ու անկորնչելի դանձերու տիրացած է: Ամէնէն բարեբաղդ ու երանելի մարդը ան է որ առաջ կը խնդրէ «Աստուծոյ թագաւորութիւնը եւ անոր արդարութիւնը»:»

6. Յիսուս սորվեցուց թէ արդարութեան եւ անօրէնութեան լման հատուցումը այս կեանքի մէջ պէտք չէ սպասել: Այս աշխարհին մէջ աստուածային արդարութիւնը լման չի գործադրուիր: Օր մը պիտի դայ երբ արդարութիւնը իր տեղը պիտի գտնէ: Մեր Տէրը հոգիին անմահութիւնը եւ հանդերձեալ աշխարհի գոյութիւնը հաստատեց իբր ստոյգ իրականութիւններ: Անիկա դայ չի փաստեց, միայն յայտարարեց: Անիկա, իր կեանքի դործունէութիւնը եւ փիլիսոփայութիւնը հիմնեց այս ստուգութեան վրայ: Եւ նա յայտնեց թէ հանդերձեալ աշխարհին մէջ բարիին ու չարին տարբերութիւնը երեւան պիտի դայ. հոնտեղ՝ անոնք իրարմէ պիտի դատուին,

եւ իրենց արժանի հատուցումները պիտի ստանան : Հոն արդարութիւնը լման ի գործ պիտի դրուի : Դատաստանի օրը, բոլոր ննջեցեալները «որոնք բարի գործեր են՝ կենաց յարութեան համար, եւ անոնք որ չար գործեր են՝ դատապարտութեան յարութեան համար՝ դուրս պիտի դան :» Այն օրը արդարներուն համար հանդստութեան, ուրախութեան, փառաւորման օր մը պիտի ըլլայ . մինչդեռ չարերուն համար դատապարտութեան, խղճահարութեան, լաց ու կոծի օր մը պիտի ըլլայ : Այն օրը պիտի հասկցուի թէ Տէրոջ ծառայութիւն ընել պարապ բան չէ : Անոնք որ իրենց գանձերը երկինքի մէջ դիպած են, պիտի ժառանգեն իրենց յաւիտենական ժառանգութիւնը : Եւ «յաւիտեան Տէրոջ հետ» ըլլալու երանութիւնը պիտի վայելեն :

Այս պատճառաւ, հաւատացեալները երբոր Քրիստոսի համար կը նեղուին երկրի վրայ, պէտք չէ որ խռովուին ու յուսալքուին : Քանզի մեր Տէրը որ մեզմէ առաջ Գողգոթա ելած է, իր օրհնեալ բերնովը ըսած է . «Երանի անոնց որ հալածուած են արդարութեան համար, վասն զի երկինքի քաղաքութիւնը անոնցն է : ... Ցընծացէ՛ք եւ ուրախ եղէ՛ք, վասն զի ձեր վարձքը շատ է երկինքը» (Մատթ. 5 : 10-12) : Հաւատացեալը իրապէս ցնծալու եւ ուրախ ըլլալու ամէն պատճառ ունի, քանի որ իր նեղութիւնները վայրկենական են, մինչդեռ երջանկութիւնը յաւիտենական :

ԺԱ

ԱՌԱՔԵԱԼՆԵՐՈՒ ՀԱՅԵԱՑՔԸ

«Քանզի մեղքին վարձքը մահ է, բայց Աստուծոյ ձրի պարգեւը յաւիտենական կեանք՝ մեր Տէրոջը Յիսուս Քրիստոսի ձեռքով :»

ՀՌՈՎՄ. Զ. 23.

ՄՐԶԱՏՐՈՒԹԵԱՆ մասին, Յիսուսի գաղափարները ուսումնասիրելէն ետքը, կ'արժէ ուսումնասիրել Առաքեալներու գաղափարներն ալ : Առաքեալներու թուղթերը եւ Նոր կտակարանի միւս գիրքերը լեցուն են արդարներուն համար ճոխ վարձատրութիւններով : Մեր ժամանակը եւ տեղը չի ներեր որ այս նիւթին շուրջ արձանագրուած բոլոր համարները մի առ մի մէջբերենք : Չանոնք յարմարօրէն վերլուծել եւ դասաւորել ալ կարելի չէ : Սակայն պիտի աշխատինք, ըստ կարելւոյն՝ արտայայտուած կարեւորագոյն խորհուրդները մէջտեղ դնել :

Հաւատացեալին առաջին ու գերագոյն վարձքը փրկութիւնն է (Եփես. 1 : 7) : Հաւատացեալը կը փրկուի մեղքէն ու մեղքի պատիժէն : Անիկա կ'ազատի Սատանայի գերութենէն եւ իշխանութենէն (Գործք. 26 : 18. Կող. 1 : 13) : Անիկա կ'արձակուի մեղքի կապտոյ կա-

պանքներէն (Հռովմ. 6:22.): Անիկա կ'ազատի երկնա-
 յին բարկութեանէն (Հռովմ. 5:9.): Անիկա կը վայելէ
 հոգեւոր ազատութիւն (Գաղ. 5:13.): Անիկա կ'ար-
 ժանանայ աստուածային ողորմութեան (Ա. Պետ. 2:10.):
 Անիկա կ'ընդունի մեղքերու քողութիւնը (Կող. 1:14.):
 Անիկա կը ճգէ իր քշմամական դիրքը Աստուծոյ հան-
 դէպ, եւ անոր հետ կը հաշտուի (Հռովմ. 5:10.): Անոր
 հետ հաշտութեան դաշինք կը կնքէ. եւ Աստուած զայն
 կ'արդարացնէ (Հռովմ. 8:33.), իր շնորհովը (Տիմ. 3:7.):
 Աստուծոյ օտարացած ու մոլորած անձը, Աս-
 տուծոյ զաւակը կ'ըլլայ: Անառակ որդին կրկին կ'որ-
 զեզրուի (Եփես. 1:5.): Եւ Հոգին վկայութիւն կու-
 տայ իր հոգիին հետ, թէ ինք Աստուծոյ որդին է: Եւ
 անիկա իր ընդունած որդեգրութեան նոր հոգիով կըր-
 նայ զԱստուած կանչել Աբբայ Հայր (Հռովմ. 8:15,
 16.): Անիկա Աստուծոյ ընտիր ու սեպհական զաւակը
 կ'ըլլայ: «Տէրը կը փանչնայ անոնք որ իրն են» (Բ. Տիմ. 2:19.): Իր անունը կը դրօշմէ անոնց փակատնե-
 րուն վրայ (Յայտ. 22:4.), եւ անոնց անունները կ'ար-
 ձանագրէ կեանաց գրքին մէջ (Յայտ. 3:5.): Աստուած
 գանձնէ կը կնքէ, եւ անոնց կուտայ Հոգւոյն գրարը (Բ. Կորն. 1:22.):

Այսպիսով նոր յարաբերութիւն մը կ'սկսի, եւ նոր
 կեանք մը կը մշակուի Փրկիչին ու փրկեալին մէջ:
 Աստուած իր ընտրեալները կը կանչէ հաղորդ ըլլալու
 իր Որդւոյն (Ա. Կորն. 1:9.): Անիկա բաժնեկից կ'ըլ-
 լայ Յիսուսի անհուն շնորհքներուն: Անիկա կը փոխադ-
 րուի խաւարէն սքանչելի լոյսին (Ա. Պետ. 1:9.): Ա-
 նիկա լուսոյ որդի կ'ըլլայ (Ա. Թես. 5:5.): Անիկա լու-
 սոյ որդիներու պէս կը փայլէ (Եփես. 5:8.): Անիկա խա-
 ւարի եւ անհնազանդութեան որդիներու գործներուն հա-

յորդ չըլլար (Եփես. 5:7.): Անիկա բոլոր անիրաւու-
 րիւններէ կը սրբուի (Ա. Յովհ. 1:9.): Անիկա բարու-
 թիւնով, արդարութիւնով ու նշմարտութիւնով կը փայլէ
 (Եփես. 5:9.):

Քրիստոնեան ոչ միայն կը սրբուի իր մեղքերէն,
 հապա նաեւ կը սրբագործուի (sanctify) (Ա. Պետ. 1:2.
 Հռովմ. 15:16.): Անիկա կ'ընտրուի սուրբ եւ անարատ
 ըլլալու (Ա. Պետ. 1:15. Եփես. 1:4. 5:27.): Անիկա Աս-
 տուծոյ ընտրեալ սուրբերու եւ սիրելիներու պէս վրան
 կը հազնի գութը, ողորմութիւնը, քաղցրութիւնը, խո-
 նարհութիւնը, հեղութիւնը, երկայնամտութիւնը, համ-
 րերութիւնը, ներողամտութիւնը եւ ամենուն վրայէն կը
 հազնի սէրը, որ կատարելութեան կայն է (Կող. 3:12-
 14.): Անիկա կ'ըլլայ ձեռքով մաքուր, սրտով անա-
 դարտ, գործով արդար: Անիկա իր մարմինը սուրբ կը
 պահէ իբր Աստուծոյ տաճարը, որուն մէջ Աստուծոյ Հո-
 գին կը բնակի (Ա. Կորն. 3:16.): Անիկա կ'սպաննէ
 մարմնոյ կիրքերը եւ ցանկութիւնները (Գաղ. 5:21-
 24.): Անիկա կը թօթափէ մարմնոյ չար ու մեղսալից
 գործքերը: Անիկա կ'աճի ու կը շինուի իբր Աստուծոյ
 բնակարանը եւ սուրբ տաճարը, Առաքեալներու եւ մար-
 դարէներու հիման վրայ շինուած (Եփես. 2:20-22.): Ա-
 նիկա կը լեցուի Սուրբ Հոգիով, եւ կը պնակարդուի
 Հոգիի հրաշագեղ պտուղներով (Գաղ. 5:21, 22.):

Քրիստոնեան կը վայելէ Աստուծոյ առաջնորդութիւ-
 նը (Հռովմ. 8:14.): Անոր փայլերը կը լուսաւորուին ու
 կ'նշուին Աստուծոյ Հոգիով: Անիկա կը վայելէ Աս-
 տուծոյ հովանաւորութիւնն և պաշտպանութիւնը (Յայտ. 7:15.):
 Անիկա կը շրջափակուի Աստուծոյ անհուն սի-
 րով: Աշխարհի վրայ ոչ մէկ բան կրնայ այդ գեղուն սէ-

բը խափանել: Ոչ մէկ տառապանք կամ գորութիւն կամ արարած կրնայ հաւատացեալը Աստուծոյ սէրէն զատել (Հռովմ. 8:35,38,39.): Աստուած իրենները մասնաւոր սիրով մը կը սիրէ. մասնաւոր դուրգուրանքով մը անոնց վրայ կը դուրգուրայ: Եւ նա իր հրաշալի սէրը անոնց սրտերուն վրայ կը թափէ, այնպէս որ անոնց սրտին մէջ ալ կը ծնի զեզուն ու անխարդախ սէր, հանդէպ Արարչին եւ իրենց ընկերներուն, սիրոյ յարակից բոլոր պատուական յատկութիւններով անուցուն (Ա. Կորն. 13: Ա. Յովհ. 4:7,12,16,21.):

«Կատարեալ սէրը վախը մէկդի կը ձգէ» (Ա. Յովհ. 4:18.): Քրիստոնեան անվախ ու քաջասիրտ կ'ըլլայ, եւ հալածանքի ու նեղութեան մէջ ալ իր արիութիւնն ու լաւատեսութիւնը կը պահէ (Հռովմ. 8:15,17.): Քանզի անիկա վստահ է թէ բարի Տէրը զինք չարէն պիտի պահէ (Բ. Թեա. 3:3.): Եւ զինք չպիտի թողու իր կարողութենէն աւելի փորձուելու, հապա փորձութեան հետ ազատութեան միջոց մըն ալ պիտի տայ, որ կարող ըլլայ համբերելու (Ա. Կորն. 10:13.): Անիկա աներկբայ է թէ այն Տէրը որուն վստահած է կարող է զինք սայթաքել պահել (Յուզա. 1:24.), ու վրիպումէ եւ անկումէ ազատել (Բ. Պետ. 1:10.): Անիկա զիտէ թէ ինք նահատակուելու ալ ըլլայ, մարմինը սպաննող դահիճները չեն կրնար հոգին սպաննել:

Քրիստոնեան կը կանչուի յաղթութեան կեանքին: Անիկա գոհութեամբ կը լեցուի այն յաղթութեան համար, զոր կ'ստանայ Տէր Յիսուս Քրիստոսի ձեռքով (Ա. Կորն. 15:57.): Անիկա կը յաղթէ աշխարհին, կը յաղթէ մեղքին, կը յաղթէ իր «ես»ին, կը յաղթէ մահուան (Ա. Կորն. 15:54.):

Քրիստոնեան իր էութեան մէջ կ'զգայ անսահման հարստութեանց վայելքը: Անիկա զիտէ թէ իբր որդեգրուած զաւակ, ինք աստուածապատկան բոլոր բաներուն ժառանգորդն է, ամէն բանին տէրն է (Ա. Կորն. 3:21.), թէ իր բոլոր պէտքերը պիտի հոգացուին Աստուծոյ անհատնում շտեմարաններէն (Փիլ. 4:19.), թէ ինք մտահոգուելու եւ խռովելու պատճառ չունի՝ քանի որ զինք հոգացող մը ունի (Ա. Պետ. 5:7.): Քրիստոնեան մասնակից է սուրբերուն ժառանգութեան (Կող. 1:12.): Անիկա իրաւատէրն է աստուածային խոստումներուն (Եբբ. 10:36. Գաղ. 3:29.): Անիկա իբր հաշտուած որդի, Աստուծոյ ժածանց ու Քրիստոսի ժառանգակից է (Հռովմ. 8:17.): Եւ իբր այդ՝ Քրիստոսի բոլոր շնորհներուն եւ Աստուծոյ բոլոր բարիքներուն մուտ (access) ունի:

Այսքան մեծափարթամ մէկը չի կրնար տխուր ու յուսահատ զգալ: Եւ արդարեւ հաւատացեալը խաղաղութիւն ու խնդութիւն ունի Հոգւով Սրբով (Հռովմ. 14:17.): Անիկա ամէն միտքէ վեր եզող Աստուծոյ խաղաղութիւնը ունի (Փիլ. 4:7.), քանի որ անիկա կը վայելէ մեղաց թողութիւն ու խղճի հանգստութիւն (Հռովմ. 5:1.): Եւ անիկա «մեծ ուրախութիւն» ունի, քանի որ Աստուծոյ փառաց յոյսով կը հրմուի (Հռովմ. 5:2.): Քրիստոնեայի ուրախութեան աղբիւրը Տէրն է: Անիկա «ամէն ատեն» Տէրոջմով ուրախ կ'ըլլայ (Փիլ. 4:4.): Անիկա կերպ կերպ փորձանքներն իսկ բոլորովին ուրախութեան արժանի բան կը սեպէ, գիտնալով քէ անոնցմէ հաւատքի փորձառութիւն ու կատարելութիւն կը ծնի (Յակ. 1:2-4.): Անիկա նեղութեանց մէջ իսկ կ'ուրախանայ «անպատմելի եւ փառաւորեալ խնդութիւնով» (Ա. Պետ. 1:8.), քանի որ վստահ է թէ Քրիստոսի չարչա-

րանքներուն հաղորդ ըլլալէն վերջ, անոր փառքին յայտնուելու ատենն ալ ցնծութեամբ պիտի ուրախանայ (Ա. Պետ. 4:13.): Այս խորհուրդը իրեն լեցուն մխիթարութիւն եւ առաւել ցնծութիւն կը պարգեւէ (Բ. Կորն. 7:4.):

Քրիստոնեայի բերկրանքին ու քաջասրտութեան պատճառը «լռյսն» է (Հռովմ. 12:12.): Անիկա անհաւատներու նման անյոյս չէ (Ա. Թես. 4:12.): Յուսոյ Աստուածը զայն կը լեցնէ բոլոր ուրախութիւնով եւ խաղաղութիւնով հաւատարու մէջ, որ աւելի առատանայ յուսով (Հռովմ. 15:13.): Անոր «կանչուելուն յոյսը» (Եփես. 1:18.) զայն նորէն կը ծնի «կեանդանի յոյսի» համար (Ա. Պետ. 1:3.): Անիկա յոյսով կը փրկուի (Հռովմ. 8:24.): Եւ անիկա փրկութեան յուսոյն սաղաարտը իր գլուխը կը դնէ (Ա. Թես. 5:18.): Այս «երջանիկ յոյսը» հաւատացեալին հաստատ ու անշարժ խարխախ մը կը պարգեւէ (Եբբ. 6:19.), եւ զայն կ'առաջնորդէ, զգաստութեան, արդարութեան, բարեպաշտութեան, մաքրութեան, եւ անոր մէջ կ'արթնցնէ բարի գործքերու նախանձաւորութիւն (Տիտ. 2:12-14.):

Քրիստոնեային յոյսը անցաւոր յոյս մը չէ, այլ մընայուն յոյս մըն է, «յաւիտեական կեանաց յոյսն» է (Տիտ. 3:7.): Անոր յոյսը Յիսուսի Քրիստոսի վրայ հաստատուած է (Ա. Տիմ. 1:1-9: Քրիստոնեային Քրիստոսով ստացած կեանքը յաւիտեական է, թէ որակի տեսակէ թէն եւ թէ տեւողութեանց տեսակէտէն: Հաւատացեալը կ'անմահանայ, այս աշխարհին մէջ, ինչպէս նաեւ հանդերձեալին մէջ: Անոր համար մահը կը մահանայ: Անոր համար մահուան խայթոցը եւ գերեզմանին յաղթութիւնը կը վերնայ (Ա. Կորն. 15:55.): Մահը անոր համար կը նշանակէ աշխարհային ցաւերու վերջացումը,

յոգնեցուցիչ աշխատութեանց դադարումը, տեւական հանգստութեան սկզբնաւորութիւնը (Յայտ. 21:4-14:13-Եբբ. 4:3,9.): Մահը անոր համար կը նշանակէ վրանի նման եղող երկրաւոր տունը ետելը ձգել, եւ երկնքի մէջ եղող անձեռագործ յաւիտեական տունը փոխադրուիլ (Բ. Կորն. 5:1.), Աստուծոյ ձեռքով պատրաստուած փառաւորեալ քաղաքը չուել (Եբբ. 11:10-Յայտ. 21:2.): Քրիստոնեան իր հողեղէն մարմնոյն հողին յանձնուելէն չի խորշիր, քանզի լիայոյս է թէ Քրիստոսով մեռած մեռելները վերջին օրը յարութիւն պիտի առնեն, յաւիտեան Տէրոջը հետ ըլլալու համար (Ա. Թես. 4:12-16.): Յայնժամ հողեղէն կերպարանքը երկնաւոր կերպարանք կը հազնի, ապականացու մարմինը անապականութիւն կը հազնի, եւ այս մահականացու անմահութիւն կը հազնի (Ա. Կորն. 15:49,53.):

Այդ կեանքը երանելի ու փառալից պիտի ըլլայ (Բ. Կորն. 3:8,11.): Անոնք որ բարի գործքերու մէջ համբերութեամբ կը յարատեւեն, փառք ու պատիւ եւ անմահութիւն կը շահին (Հռովմ. 2:7.): Անոնք որ հաւատարմութեամբ Տէրոջ կը ծառայեն, «արդարութեան պրսակ»ին կ'արժանանան (Բ. Տիմ. 4:8.): Անոնք որ փորձութեանց մինչեւ վերջ կը համբերեն, «կեանաց պսակ»ը կ'ստանան (Յակ. 1:12-Յայտ. 2:10.): Անոնք որ «Աստուծոյ վայլածին պէս» կը քալեն, «փառաց անքառալ պսակ»ը կ'ընդունին (Ա. Թես. 2:12-Ա. Պետ. 5:4.): Այն ատեն երբ փառաւորեալ Տէրը փառքով կը յայտնուի, իրեններն ալ փառքով պիտի յայտնուին (Կող. 3:4.): Երկնային փառքը կարելի չէ ըմբռնել, միայն կարելի է երեւակայել: Յովհաննէս Առաքեալի ըսածին պէս. «Տակաւին յայտնի չէ թէ ի՞նչ պիտի ըլլանք, վասն զի անկա պիտի տեսնենք ինչպէս որ է» (Ա. Յովհ. 3:2.):

«Ան ատենը անանկ պիտի անհնամբ, ինչպէս որ անհնամբ» (Ա. Կորն. 13:12):

Երկնից մէջ երկրաւոր տառապանքները պիտի վերջանան: Խաւարը յոյսի պիտի փոխուի: Հոն այլեւս անօթենալ ու ծարաւիլ պիտի չըլլայ (Յայտ. 7:15): Հոն բոլոր արցունքները պիտի սրբուին (Յայտ. 7:17): Ա՛յ սուգ եւ աղաղակ ու ցաւ պիտի չըլլայ (Յայտ. 21:4): Ա՛յ բնաւ նգով պիտի չըլլայ (Յայտ. 22:3): Անոնք Աստուծոյ հետ պիտի բնակին, եւ Աստուած անոնց հետ (Յայտ. 21:3): Անոնք պիտի շրջապատեն Տէրոջ աթոռը, անոք երեսը պիտի տեսնեն, գայն պիտի պաշտեն, եւ իրենց գործը պիտի ըլլայ Տէրը փառաբանել եւ անոր ծառայել (Յայտ. 22:3-7:15): Եւ այս երանութիւնը յաւիտեանս յաւիտենից պիտի շարունակէ (Յայտ. 22:5):

Ահա արդարները այսպիսի վարձատրութիւններով պիտի վարձատրուին: Եւ որքա՞ն հիասքանչ ու ճոխ են յիշուած վարձքերը: Այս վարձատրութեանց մէջ նիւթական յաջողութեան ու բարօրութեան յիշատակութիւնը չկայ, դրամին անունն իսկ չի յիշուիր: Նիւթական ոեւէ խոստում հաւատացեալին աչքին առջեւ չի դրուիր: Սակայն նիւթական ոեւէ խոստում որքա՞ն ցած եւ ճղճիմ կը մնայ, տրուած հոգեւոր խոստումներուն քով: Հարստութիւնը, բարեբաստութիւնը, պատիւը, որոնց մարդիկ կը ցանկան որքա՞ն հասարակ եւ անկարեւոր բաներ կը մնան, երբ բաղդատութեան կը դրուին բարութեան, անմահութեան եւ երկնաւոր յոյսի ու փառքի հետ:

Ճշմարիտ է թէ Աստուծոյ ծառայող մէկը այս աշխարհիս վրայ առատ «կաթով ու մեղրով» պիտի չի սնանի. սակայն ին՞չ հոգ, քանի որ «կեանաց ծառէն» պիտի ուտէ (Յայտ. 2:7): Երկրի բերքերով ու պարարտու-

թիւններով պիտի չի պարարտանայ. սակայն ին՞չ հոգ, քանի որ «պահուած մանամայէն» պիտի կշտանայ (Յայտ. 2:17-9: ընտիր ու քմահաճ ըմպելիքներով պիտի չի պատուասիրուի. սակայն ին՞չ հոգ, քանի որ «կեանաց ջուրին աղբիւրէն» իր ծարաւը պիտի անցնէ (Յայտ. 21:6): սղոնց հանդերձներ ու բեհեզներ պիտի չի հագնի սակայն ին՞չ հոգ, քանի որ զառնուկին արիւնով մաքրուած՝ փրկութեան «ներմակ հանդերձները» պիտի հագնի (Յայտ. 3:5): Շքեղ ապարանքներու մէջ պիտի չի բնակի. սակայն ին՞չ հոգ, քանի որ «անձեռագործ յաւիտեանական տուն» երու մէջ պիտի բնակի (Բ. Կորն. 5:1): նախանձելի դիրքերու եւ բարձր պատիւներու պիտի չտիրանայ. սակայն ին՞չ հոգ, քանի որ «աստուածային փառք» ին պիտի տիրանայ, եւ երկնաւոր աթոռներու վրայ բաղմած, յաւիտեանս յաւիտենից պիտի թագաւորէ (Յայտ. 22:5): Քրիստոնեայի ժառանգութիւնները որքա՞ն աւելի պատուական ու թանկարժէք են, քան աշխարհիկ մարդոց ժառանգութիւնները:

Երբոր Նոր Կտակարանը կ'ուսումնասիրենք, կը տեսնենք թէ անոր մէջ Հին Կտակարանէն տարբեր մթնոլորտ մը կը բուրէ: Անոր մակարդակը շատ աւելի բարձր ու վեհ է. անոր տեսութիւնը շատ աւելի վսեմ ու շրջահայեաց է: Անոր հեղինակները երկրորդական խնդիրներով չեն զբաղիր, հապա էական ու կենսական խնդիրներով կ'զբաղին: Անոնք շօշափելի իրերու մակերեսին վրայ չեն պտտիր, այլ անտեսանելի աշխարհին խորութիւնները կը թափանցեն: Անոնք անխախտ ու մնայուն բաներու վրայ չեշտ կը դնեն: Անոնք բարոյական ու հոգեւոր արժէքները, նիւթական արժէքներէ դերիվեր կը դասեն: Անոնց ակնկալած հատուցումները մարմնաւոր չեն՝ հոգեւոր են, երկրաւոր չեն՝ երկնաւոր են, ժամանակաւոր

չեն՝ յաւիտենական են: Նոր Կտակարանին մէջ ներկաւուած խոստումները ապականացու եւ անցաւոր բաներ չեն, այլ անապականելի եւ անթառամ բաներ: Անոր մէջ խոստացուած ժառանգութիւնը հարստութիւն ու պերճանք չէ, հապա «աստուածային բնութեան հաղորդ ըլլալ» է (Բ. Պետ. 1:4): Հաւատացեալը երկրիս վրայ միւսական մոխրութեանց բուրգ մը պիտի չի կանգնէ, հապա «հոգեւոր տանար մը» պիտի կերտէ (Ա. Պետ. 2:5): Նոր Կտակարանի հայեացքին համաձայն՝ արդարութեան վարձքերը հոգիին կը վերաբերին, եւ հետեւաբար հոգեւոր են:

Նոր Կտակարանին մէջ, արդարութեան համար ոչ միայն նիւթական հատուցումներ չեն խոստացուած, հապա նաեւ ցաւեր ու նեղութիւններ մատուցուած են: Առաքեալները այս աշխարհէն բարիք մը չէին ակնկալեր, քանզի անոնք Յիսուսի օրինակը իրենց աչքին առջեւ ունէին. եւ անոնք զիտած էին թէ Աստուածորդին՝ որ կատարելապէս անմեղ եւ արդար էր, երկրիս վրայ տեղ մը չէր ունեցած որ հոն իր գլուխը դնէ, եւ իբր կեանքի վերջին հանգստարան իրեն խաչը մատուցուած էր: Եւ անոնք համոզուած էին թէ Յիսուսի քայլերուն հետեւել, իրենց ալ նեղութիւններ պիտի բերէր: Եւ իսկապէս, անոնք Քրիստոնէութեան համար սոսկալի զրկանքներու եւ հալածանքներու ենթարկուեցան, անլուր տաժանքներ ու տառապանքներ կրեցին, Քրիստոսի պէս՝ չարչարուեցան ու խաչուեցան: Բայց այս բոլոր նեղութիւններուն մէջ իրենց յոյսն ու քաջասրտութիւնը չի կորսնցուցին: Քանզի անոնք կատարելապէս վստահած էին Փրկչին, եւ համոզուած էին թէ ան զիրենք անվարձա-հատոյց չպիտի թողու: Անոնք վստահ էին թէ Աստուած անիրաւ չէ որ իրենց գործը եւ ծառայութիւնը մոռնայ,

ու ան սէրը որ իր անուանը համար ցուցուցին (Եբր. 6:10): Անոնք ապահով էին թէ «ամէն մէկը ինչ բարիք որ ընէ, նոյնը Տէրոջմէն պիտի ընդունի» (Եփես. 6:8): «Ինչ բարիք որ սերմանէ, յարմար ժամանակին պիտի հնձէ» (Գաղ. 6:9): Անոնք հաւատացած էին այն Տէրոջ սր տուած էր սա խոստումը. «Ահա իմ վարձքըս ինծի հետ է՝ ամէն մէկուն իր գործին համեմատ հատուցանելու» (Յայտ. 22:12): Ի՞նչ աներկրայ վըստահութիւն եւ զարմանալի հաւատք կայ Պօղոս Առաքեալին, հաւատքի այդ անվեհեր ախոյեանին, սա խօսքերուն մէջ. «Անոր համար սա չարչարաններն ալ կը կրեմ. բայց ամօք մը չեմ սեպեր, ինչու որ գիտեմ թէ որու եմ հաւատացեր, եւ համոզուած եմ որ իմ իրեն աւանդած բանս կրնայ պահել մինչեւ այն օրը» (Բ. Տիմ. 1:12):

Առաքեալներուն հաւատքը միայն այս աշխարհին համար չէր: Անոնց հաւատքը անդենական աշխարհն ալ կ'երկարէր: Անոնք զիտէին թէ այս աշխարհին վրայ արդարութեան լման իրագործումը չպիտի տեսնէին, նոյն իսկ անիրաւ տեղ վիշտեր պիտի կրէին (Ա. Պետ. 2:19): Թէ որ ուրիշ կեանք մը չըլլար, անոնց աշխատութիւնները եւ գոհաբերութիւնները պարսպ տեղը եղած պիտի ըլլային (Փիլ. 2:16): Ճշմարիտ էր Առաքեալին սա խօսքը, «Թէ որ միայն այս կեանքիս համար Քրիստոսի յուսացած եմք, մեմք բոլոր մարդոցմէ աւելի խղնալի եմք» (Ա. Կորն. 15:19):

Սակայն, անոնք համոզուած էին թէ ուրիշ աշխարհ մը կայ ուր արդար դատաստան պիտի տեսնուի, ուր յայտնի պիտի ըլլայ թէ «մեղքին վարձքը մահ է, բայց Աստուծոյ ձրի պարգեւը յաւիտենական կեանք՝ մեր Տէր Յիսուս Քրիստոսի ձեռքով», ուր անաստուածները պի-

տի պատժուին «բորբոքած կրակով» ու «յաւիտենական սատակով» (Բ. Թեա. 1:8,9.), ուր «անհնազանդութեան որդւոցը վրայ» պիտի իջնէ «Աստուծոյ բարկութիւնը» (Եփես. 5:6.), ուր անիրաււները պիտի ընդունին «անիրաւութեան վարձքը» եւ «տանջանքի համար պիտի գատուին» (Բ. Պետ. 2:9,13.): Մինչդեռ արդարները իրենց «հանգիստը» պիտի մտնեն, «յաւիտեանս» Տէրոջ ներկայութիւնը պիտի վայելեն, եւ անոր հետ պիտի թաղաւորեն (Բ. Տիմ. 2:12.):

Թերեւս պիտի առարկուի թէ ասիկա անդրաշխարհեան յոյս մըն է: Մենք դրական ու իրատես մարդիկ ենք: Մենք կը շահագրգռուինք այս կեանքով ու այս աշխարհով: Հանդերձեալի մասին որոշ բան մը չենք դիտեր. հանդերձեալը հոգերնիս ալ չէ: Մենք հիմակուան նայինք. աստեանական կացութեամբ մտահոգուինք:

Բնական է որ երկրի վրայ ապրող մարդ մը, երկրաւոր կեանքի նկատմամբ անհոգ չի կրնար ըլլալ, երկրաւոր բարեբաւտութեան հանդէպ անտարբեր չի կրնար դառնալ: Սակայն իրատես ու հեռատես մարդը հանդերձեալն ալ չի կրնար աննկատ թողուլ: Քանի որ այս կեանքը սոսկ ակնթարթի մը տեւողութիւնը ունի յաւիտենականութեան քով: Եւ ինչո՞ւ համար մարդը մէկ րոպէով հետաքրքրուի. եւ անթիւ դարերով չի հետաքրքրուի: Որքան ատեն որ Քրիստոնէական հաւատքը կը մնայ երկրիս վրայ, անմահութեան համոզումն ալ պիտի մնայ: Եւ լաւ կ'ըլլայ որ մնայ: Քանզի անդրշրիմեան դոյութեան հաւատքին կործանումը, մարդկութեան համար անդարմանելի դժբաղդութիւն ու նըդովք մը պիտի ըլլայ: Անմահութեան հաւատքը ցեղին համար, սրտասնդող, բարձրացնող, մաքրագործող, կենսաւորող, արդիւնագործող համոզում մըն է: Մինչ-

դեռ անմահութեան հերքումը՝ ցեղին համար, անասնացնող, վատասերող, ջլատող, յուսալքող դաւանութիւն մըն է: Միայն չարերը անդրաշխարհեան կեանքի չեն փափաքիր, վասն զի այս խորհուրդը արհաւիրքով կը լեցնէ զիրենք:

Եւ ինչո՞ւ համար աշխատինք յաւիտենականութեան հաւատքը կործանել, քանի որ ատիկա մեզ անելանելի շիտթումներու մէջ պիտի ընկղմէ, եւ անկարելի պիտի դարձնէ, տիեզերքի բարոյական կառավարութեան մէջ տեսնուած երեւոյթական անարդարութեան բացատրութիւնը: Պէտք չէ՞ ընդունինք թէ Յաւիտենական Էակին խոշոր ծրագիրներուն իրադրոծումը յաւիտենականութեան կը կարօտի: Աստուծոյ դոյութիւնը եւ անոր բարոյական նկարագիրը փաստելու համար, անդրշրիմեան դոյութեան իրականութիւնը ենթադրել անհրաժեշտ է:

Սակայն, շատերուս միտքերուն մէջ սա հարցը տակաւին իր լուծումը չէ դրած. «Ինչո՞ւ համար արդարը այս աշխարհին մէջ չի վարձատրուի, ինչպէս որ պիտի վարձատրուի հանդերձեալին մէջ»: Աղէկ չէ՞ր ըլլար, որ արդարը իր արդարութեան շօշափելի պտուղները վայելէր այս կեանքին մէջ ալ: Միթէ, այս կերպով, Աստուծոյ արդարութիւնը աւելի աներկբայօրէն չպիտի՞ սպացուցուէր, եւ հաւատացեալներուն հաւատքը աւելի անխախտօրէն չպիտի՞ հաստատուէր:

Ասոր պատասխանը արդէն մասամբ տուինք անցեալին մէջ, ուր պարզեցինք թէ կեանքի վերելքին մէջ, վիշտերը ունին իրենց որոշ օգտակարութիւնները, եւ թէ Քրիստոնեան հոգեւորապէս ճոխ կերպով կը վարձատրուի ներկայ կեանքի մէջ: Հոստեղ երկու յաւերուածական բացատրութիւններ եւս կուզենք տալ:

Առաջինը սա է թէ, մարդու ստեղծադործութեան գերագոյն նպատակը արարածին վայելքը չէ, այլ Արարիչին փառաւորումը: Գոյութեանց աշխարհին մէջ կարեւորագոյնը մարդը չէ, հասցա Աստուած: Մարդս չարաչար կը սխալի, երբոր ինքզինքը կը դետեղէ տիեզերական դրութեան կեդրոնը, եւ զԱստուած կը կծկէ աննշան մի անկիւն: Մարդս բոլորովին կը վրիպի, երբոր ինքնիւր մասին կը խորհի, եւ զԱստուած մոռացութեան կը մասնէ: Մարդս արժանի չէ այս կեդրոնական դիրքը զրաւելու: Չայս ընել այնքան մեծ սխալ պիտի ըլլար, որքան երկրագունդը դնել արեգակնային դրութեան կեդրոնը: Մարդկային գոյութեան յետին նպատակն է Աստուծոյ փառաւորումը: Հետեւաբար, Աստուծոյ կ'իյնայ ըսել թէ մարդս ինչ կերպերով պիտի փառաւորէ զինքը:

Ընդհանուր երեւոյթներէն կը տեսնուի, թէ Աստուած երբեմն մարդուն յաջողութիւնները կը ծառայեցնէ ինքնիւր փառաւորման իբր միջոց, եւ երբեմն ալ դժբաղդութիւնները կը գործածէ Իւր փառաւորման իբր միջոց: Մարդս կրնայ զԱստուած փառաւորել երբեմն ապրելով, եւ երբեմն ալ նահատակուելով: Եւ յաճախ կը տեսնուի թէ Աստուած աւելի կը փառաւորուի մարդոց ձախորդութիւններով, քան թէ անոնց բարեյաջողութիւններով: Թէ ասիկա է մեր Տէրոջ դադափարը, կը պարզուի իր ըսածներէն: Անիկա կը սորվեցնէ թէ կան վիշտեր որոնք մարդուն կը տրուին ոչ թէ իբր մեղքի պատիժ, հասցա իբր Աստուծոյ փառաւորման մի առիթ: (Յովհ. 9:1-3.): Մարդ մը իր տուայտանքներուն մէջ երբ կ'արտայայտէ Քրիստոնէական համբերութիւն, հանդարտութիւն, խնդութիւն, վստահութիւն, ատով զԱստուած փառաւորած կ'ըլլայ: Հետեւա-

բար, երկունքը մեծ նպատակի մը կը ծառայէ: Եւ մարդըս պէտք է ուրախ եւ մեծարուած զգայ, երբոր տառապանքներով Տէրը փառաւորելու պատեհութիւնը կը ընծայուի իրեն:

Երկրորդ պատճառ մը թէ Աստուած ինչո՞ւ մարդը այս կեանքին մէջ լիուլի չի վարձատրեր, սա է թէ Աստուած չուզեր որ մարդիկ արդար ըլլան, նիւթական հատուցման փափաքով եւ ակնկալութեամբ: Թէ որ երկրիս վրայ ամէն արդար բարեյաջող եղած ըլլար, յայնժամ ամէն մարդ արդար պիտի ըլլար, ոչ թէ արդարութիւնը իսկապէս սիրելուն համար, հասցա արդարութեան գեղատեսիլ արդասիքներէն հրապուրուելուն համար: Աստուած այս տեսակ արդարութիւն չուզեր: Նա կ'ուզէ որ արդարութիւնը շահախնդրութեան խորհուրդէն բոլորովին անջատուի: Աստուած նողկանքով կը նայի անոնց վրայ որոնք աստուածապաշտութիւնը շահի իբր միջոց եւ բարեյաջողութեան իբր լծակ գործածելու կ'աշխատին, եւ որոնց աչքին առջեւ վաստակը աւելի բարձր դիրք կը բռնէ, քան բարոյական վսեմութիւնը:

Այս կարգէ մարդիկ, արդարութիւնը կ'ստորնացրնեն իր խոնարհագոյն պատուանդանին: Անոնց համար Աստուծոյ արդարութիւնը տիրական տենչանք մը ըլլայ կը դադրի, եւ առեւտրական շահավաճառութիւն մը կ'ըլլայ: Անոնք ալ կ'աշխատին Աստուծոյ հետ առեւտրական դաշինք մը կնքել, նման Յակոբ Նահապետին որ Տէրոջ հետ հրէական սակարկութեան մը մէջ մտնելու ամբարտաւանութիւնը գործեց. եւ ըսաւ Անոր, «Եթէ իմ գացած ճամբուս մէջ զիս պահես ու պաշտպանես, եւ գացած տեղս ինձի բարեյաջողութիւն ու փարթամութիւն պարգեւես, ու զիս իմ հօրս տունը խաղաղութեամբ դարձնես, յայնժամ ես ալ քեզ պիտի պաշ-

տե՛մ իբրեւ իմ Աստուածս, եւ քեզի պիտի տամ բոյոր ինծի տուածներուդ տասանորդը:» Ի՛նչ գուեհիկ եւ անվայել ու զաղրելի սակարկութիւն: Ես կը զարմանամ որ Աստուած ի պատասխան Յակոբին չըսաւ. «Քեզի թող ըլլայ քու աստուածպաշտութիւնդ ալ քու տասանորդդ ալ: Գնա կորսուէ՛, դուն ալ քու դրամդ ալ:» Միթէ համայն ստեղծագործութեան Տէրը, Յակոբի տասանորդէ՞ն կը կարօտէր: Միթէ բոլոր ոսկիներու եւ ազամանդներու Տէրը Յակոբի լուծաներո՞վ պիտի հարստանար: Ի՛նչ տխմարութիւն, ի՛նչ ամբարտաւանութիւն:

Սակայն, քաւ լիցի որ ես այսօր իբր Յակոբ Նահապետին ամբաստանիչը ներկայանամ, քանի որ կը տեսնեմ թէ անկէ չորս հազար տարիներ յետոյ, Քրիստոնէական լոյսի ողողման մէջ, մարդոց շատերը դեռ անկէ տարբեր ու բարձր ըմբռնում մը չեն տածեր, եւ Քրիստոնէական կեանքի կը տենչան սոսկ վարձատրութեան համար, միմիայն անոր նիւթական արդասիքները վայելելու համար: Եղկելի՛ Քրիստոնէութիւն...:

Ճշմարիտ Քրիստոնէութիւնը վարձքի հիման վրայ չի կրնար կառուցուիլ: Հարազատ Քրիստոնէութիւնը սիրոյ յարաբերութիւն մըն է, Տէրով եւ մարդու միջեւ: Եւ անկեղծ սիրոյ յարաբերութեան մէջ, սակարկութիւն ու չահախնդրութիւն չի մտներ: Մարդս Տէրով կը ծառայէ, քանզի զԱյն «բոլոր սրտով ու բոլոր մտքով ու բոլոր զօրութեամբ» կը սիրէ, եւ ապաղային անկէ օգտուելու խորհուրդը իր մտքէն իսկ չանցներ: Սիրոյ յարաբերութեան մէջ շահադիտական շարժառիթ չի մտներ: Իրական սէրը տալու վրայ կը խորհի, առաւել քան ընդունելու վրայ:

Սէրը ինքնին մեծագոյն վարձատրութիւնն է: Ան որ կը վայելէ Աստուծոյ անպատմելի սէրը, արդէն գերադրապէս վարձատրուած է: Այստուածային ուրիշ տուրքերը այս աննման պարգեւին քով աննշան կը մընան: Աստուծոյ խանդակաթ սէրը ըմբռնելու երանութեանց երանութիւնն է: Աստուած ինքն է տուրքերուն մեծագոյնը: Աստուած մեզի համար աւելի թանկարժէք է, քան իր տուած ոեւէ մէկ տուրքը: Ամենամեծ խոստումը որ Աստուած տուաւ Աբրահամին՝ սա էր. «Մի՛ վախճար, Աբրահամ, ես եմ բու վահանդ, եւ բու խիստ մեծ վարձեդ» (այս է շիտակ թարգմանութիւնը. Ծննդ. 15:1.): Աստուած Աբրահամին համար աւելի արժէքաւոր էր, քան իւր տուած բոլոր բազում պարգեւները: Առանց Աստուծոյ, անոր տուրքերը մեծ արժէք մը չեն ունենար: Աստուած ինքն է վարձատրութեանց վարձատրութիւնը: Վասն զի ան որ զԱստուած ունի, ամէն բան ունի:

Այն անձը որ Աստուծոյ կը տիրանայ, կեանքի յարաբերութիւններէն չի տարուբերուիր, կեանքի նեղութիւններէն չի խոռվիր: Նա հանդարտութեան խարխիւր կը գտնէ իր հոգիին մէջ: Նա ամէն բանի մէջ կը նշմարէ Աստուծոյ մատը, եւ բարի կամքը: Նա իր հոգւոյն խողաղութիւնը կը գտնէ սա երջանկաւէտ համոզման մէջ թէ «Ամէն բաները բարիի գործակից կ'ըլլան անոնց որ զԱստուած կը սիրեն» (Հռովմ. 8:28.): Այս գիտութեան կառչելով, անոնք կը ծիծաղին դառնութեանց վրայ, կը մերժեն յուսալքուիլ, եւ ամենամութ ամպերն իսկ լուսափայլ եզերքներով կը շրջանակեն:

Այս երեւոյթին մի հրաշալի իրագործումը կը տեսնենք, հոգակաւոր Անդղիացի քարոզիչ, ձէրէմի Թէյ-

լըրի փորձառութեան մէջ: Երբոր անոր բոլոր կահկարասիները կողոպտուեցան, իր ընտանիքը տունէն դուրս փտարուեցաւ, եւ աշխարհային ամէն ինչ կորսնցուց, անիկա դեռ կրցաւ ըսել. «Մաքսաւորներու եւ ասպատակիչներու ձեռքը ինկայ. եւ անոնք ամէն բան առին ինձմէ: Ուրեմն հիմա ինձի ի՞նչ կը մնայ: Բոլորտիքս նայիմ: Անոնք ինձի ձգեցին արեւը եւ լուսինը, սիրող կողակից մը, եւ շատ մը բարեկամներ ինձի կարեկցելու, եւ մի քանի հատ ալ իմ օգնութեանս հասնելու: Ես տակաւիմ կրնամ բանախօսել, եւ անոնք ինձմէ առած չեն իմ խնդուն դէմքս եւ իմ դուարթ հոգիս եւ բարի խղճմտանքս: Անոնք դեռ ինձի թողուցած են Աստուծոյ նախախնամութիւնը եւ Աւետարանին բոլոր խոստումները, եւ իմ կրօնքս, եւ իմ երկնաւոր յոյսերս, եւ նաեւ իրենց հանդէպ իմ բարեսիրութիւնս: Ես տակաւին կը քննամ ու կը մարսեմ, կ'ուտեմ ու կը խմեմ, կը կարգամ ու կը խոկամ: Ան որ այսքան շատ եւ այսքան մեծ ուրախութեան պատճառներ ունի, կը սիրաբանէ կսկիծի եւ սրտմտութեան հետ, կը սիրէ այս բոլոր հաճոյքները, եւ կը նախընտրէ նստիլ իր պզտիկ ափի չափ փուշերուն վրայ:»

Ահա ստանկ է հաւատքի յաղթանակը: Անիկա դժբաղդութեանց ցանցերու մէջէն կը ցատկէ Աստուծոյ ծոցը, եւ անշիջելի լաւատեսութեամբ ու անպարտելի հաստատամտութեամբ կը բացագանչէ. «Թէեւ քզեմին ընձիւղ չտայ, ու որքերուն վրայ պտուղ չըլլայ, եւ ձիթեմիին բերքը ստէ, ու արտերը կերակուր չտան, եւ փարախէն ոչխարը կտրի, ու գոմերուն մէջ արջառ չի ըլլայ. տակաւին ես Տէրոջմով պիտի ցնծամ, իմ փրկութեանս Աստուծովը պիտի ուրախանամ» (Ամբ. 3:17, 18.):

ԺԲ

ՅՈՒՒՆ ՄՂՁԱԻԱՆՁԸ

«Հուս երկրին մէջ Յոր անունով մարդ մը կար.»

ՅՈՒ Ա. 1.

ԱՐԵԼԻ չէ վիշտերու հարցը փակել առանց ուսումնասիրելու Յորայ գիրքը, որ ամբողջութեամբ կ'ըզբաղի արդարի տառապելուն հարցով: Օգտակար կ'ըլլայ ուսումնասիրել այս գիրքը, տեսնելու համար թէ ատիկա ինչ լոյս կը սփռէ մեր նիւթին վրայ:

Կարելի չէ որոշապէս ըսել թէ Յորի պատմութիւնը որ աստիճան պատմական դէպք մըն է: Ոմանց գաղափարով, այս գիրքը վիպասանութիւն մըն է. ուրիշներու համոզումով, անիկա առակ մըն է՝ նման այն առակներուն որ մեր Տէրը խօսեցաւ. այլոց տեսութեամբ, անիկա պատմական մարդու մը իրական պատմութիւնն է: Ամենայն հաւանականութեամբ, պատմութեան մէջ Յոր անունով մարդ մը ապրած է: Հին ատենուան Հրէաները կ'ընդունէին Յորին պատմական գոյութիւնը, թէպէտեւ աւելի վերջը եկողներու մէջ այս մասին տարակուսողներ

գտնուեցան: Եղեկիէլ Մարգարէն, Յորին անունը կը յիշէ Նոյի եւ Դանիէլի անուններուն հետ մէկտեղ (14:14): Յորին աւանդութիւնը կը շրջէր հին Իսրայէլացիներու մէջ, ըստ որում, Յոր հին նահապետներու օրով ասորոյ նահապետներէն մին էր: Սակայն անիկա նկարագրուածին պէս, Հրէայ ցեղին չէր պատկաներ, այլ օտարազգի նահապետ մըն էր:

Աւանդութիւնը Յորին բնակութիւնը հաստատած է «Հուս» երկրին մէջ: Որոշապէս յայտնի չէ թէ «Հուս» երկիրը ճիշդ ո՞ր կ'իյնայ, բայց Միջագետքի մէջ ըլլալ կ'ենթադրուի: Յորը միջիթարելու համար եկող երեք բարեկամներու անունները եւ անոնց երկիրներն ալ Հրէական անուններ չեն: Այս պատճառաւ, անհաւանական չէ որ Յորին պատմութիւնը օտար ծագում ունի, եւ բերանացի շրջաբերութեամբ Հրէաներու մէջ մուտ գտած է, եւ Հրէայ բանաստեղծը դայն իր գրքին իբր բնաբան բռնելով, անոր շուրջ հիւսած է իր գրական հոյակապ կերտուածքը: Կարծեմ թէ ճշմարտութենէ շատ հեռու չենք ըլլար, թէ որ այս գիրքը նկատենք մասամբ պատմական եւ մասամբ ալ գրախօսական երկասիրութիւն մը: Ըստ Մարթին Լուտերի գաղափարին, Յորայ գիրքը, պատմութիւն է քերթողաբար գաղափարականացուած (history poetically idealized). Նա ըսած է, «Ես Յորայ Գիրքը կ'ընդունիմ իբր իրական պատմութիւն, բայց թէ ամէն բոն ճիշդ ասանկ պատահեցաւ եւ ասանկ եղաւ, ասոր չեմ հաւատար, հապա կը խորհիմ թէ հնարամիտ, բարեպաշտ եւ կրթուած մարդ մը գայն շարադրեց՝ ինչպէս որ է»:

Թէպէտեւ Յոր օտարազգի է, սակայն Յորայ գրքին հեղինակը անկասկածօրէն հանճարեղ ու կրօնասէր Հրէայ բանաստեղծ մըն է: Ամբողջ գիրքը կ'արտացոլացնէ,

հրէական աստուածաբանութիւնը, համոզումները, աւանդութիւնները եւ սովորութիւնները: Հեղինակին ո՞վ ըլլալը յայտնի չէ: Տարբեր մեկնաբաններ տարբեր անուններ թելադրած են, սակայն անոնց ամէնքն ալ զուտ ենթադրութիւններ են: Սաքանը յայտնի է թէ այս գրքը քին հեղինակը մեծատաղանդ գրական հանճար մըն է: Անիկա իր կարող գրելով փառապանծ ու զմայլելի նկար մը նկարած է: Համաշխարհային գրականութեան մէջ անոր նմանը հազուադէպ է: Հեղինակը գործածած է բարձր ու ճարտասան լեզու: Անոր բառագծումները համարձակ, զօրաւոր, նկարագրական են: Անոր ոճը կուռ, կտրուկ, արտայայտալից է: Անոր գրելը, հրաշագեղ ասացուածներով եւ գեղարուեստական հմայելի նկարագրութիւններով ու այլաբանութիւններով գեղուն է: Անիկա ճկուն բառախաղաց մըն է, որ կը խաղայ ոչ միայն խորհուրդներու վրայ, այլ նաեւ բառերու դարձուածքներուն վրայ: Անիկա փոխաբերութիւններու վարպետ մըն է: Անիկա գերընտիր քերթող մըն է՝ որ մեռեալ բաներուն հոգի կուտայ, հասարակ բաները կը պանծացնէ, եւ երեւակայութեան թռիչքով երկնաբարձ բարձունքներ կը սլանայ: Այս բոլոր շքեղութիւնները, գրքի տրամադիկ շարժման հետ միանալով, այս գրքին կ'ընծայեն չափազանց դիւթական ու հիասքանչ հանգամանք մը:

Յորայ գրքին նախաբանը եւ վերջաբանը, այսինքն պատմուածքի մասը, արձակ լեզուով գրուած է, մնացածը ոտանաւորի ձեւով: Եւ անիկա այնպիսի քերթուած մըն է, որ արտասովոր ձիրքերով օժտուած քերթողի մը բարձր կարողութիւնը ու հմտութիւնը մատնանիչ կ'ընէ: Կարելի չէ որ այսպիսի բանաստեղծութիւն մը յանպատրաստից արտասանուած ըլլայ, առանց երկար խորհողութեան ու աշխատասիրութեան յղացուած ըլլայ:

Յորայ գրքին գրական բնոյթին մասին ալ այլազան դափարներ արտայայտուած են: Ոմանց գաղափարով, այս երկը դիւցազններգութիւն (epic) մըն է. ուրիշներու մտածումով, ատիկա ուսուցողական (didactic) բանաստեղծութիւն մըն է. այլոց կարծիքով, անիկա ողբերգական տրամ (tragic drama) մըն է: Ամէն տարակոյսէ վեր է թէ այս գրքին մէջ դաս մը սորվեցնելու նպատակը կայ: Բանաւոր չէ խորհիլ որ այս գիրքը իբր տրամ գրի առնուած է, թէպէտեւ անոր թէ բանաձեւը եւ թէ աքտը տրամագիկ է: Անոր արարուածը (action) արտաքին ըլլալէ աւելի ներքին է, մարմնաւոր ըլլալէ աւելի մտաւոր է, եւ հոն ցուցադրուող յաջորդական պատկերները՝ իր դառն ճակատագրին զաղտնիքներով մաքառող մեծ հոգիի մը այլափոխուող եղանակները ի հանդէս բերող ներկայացումներ են:

Յորայ գրքին գրութեան թուականին մասին ալ այլազան գաղափարներ կը տիրեն: Սակայն, այժմ գրեթէ բոլոր հեղինակաւոր ուսումնականներու կողմէն ընդունուած է թէ այս գիրքը Հին Կտակարանի ամէնէն վերջը գրուած գրքերէն մին է: Այս գրքին մէջ, Աստուծոյ միաւորութեան ու բացարձակ տիրապետութեան ենթադրութիւնը, կուռքերու ու կռապաշտութեան մասին տեւէ ակնարկութեան բացակայութիւնը, հրեշտակներու վարդապետութեան երեւան գալը (որ շատ ուշ ծնած գաղափար մըն է), Սատանայի անուան յիշուիլը (այս անունը նախ քան Չաքարիա եւ Մնացորդաց Գիրքը չի յիշուիլ), Արամերէն եւ նոյն իսկ Արաբերէն բառերու գործածութիւնը, հսկայ աղէտի մը ենթադրութիւնը. երկրորդ Եսայիի (Եսա. 40-55:) ու Մաղաքիայի գրութիւններուն եւ Յորայ գրութիւններուն միջեւ տեսնուած ուշադրաւ նմանութիւնները եւ նոյն իսկ նոյնութիւնները, արդարին

անիրաւորէն պատիժ կրելուն վարդապետութիւնը, եւ ուրիշ ապացոյցներ կը փաստեն թէ այս գիրքը Յուդայի աքսորութենէն վերջը գրի առնուած է: Բարոյական մոլեգին պայքարներ պատկերացնող մեծ գրքեր, արհաւիրակ օրերու ծնունդներ են, ժամանակակից տառապանքներու եւ աղէտներու հայելիացումներն են: Յորայ, Դանիէլի եւ Յայտնութեան պէս գրքեր միայն ծայր աստիճան տանջակից օրերուն մէջ կրնան ծնունդ առնել: Հրէայ ազգը գերեվարութեան ատեն անցաւ այնպիսի նեղութեանց մէջէն, երբ արտեր ոտնակոխ եղան, ինչքեր ասպատակուեցան, քաղաքներ աւերուեցան, ժողովուրդներ ջարդուեցան ու աքսորուեցան: Մինչեւ այս ատեն, արդարին տառապելու վարդապետութիւնը երեւան չէր եկած Հրէից մէջ: Անոնք սնուցուած էին սա վարդապետութեամբ թէ «արդարը միշտ կը բարդաւաճի»: Սակայն, երբոր իրենց արհամարհած հեթանոս ցեղերը զերենք ընկճեցին, եւ շատ մը բարեպաշտ ու անմեղ հոգիները աննկարագրելի տագնապի մատնեցին, յայնժամ այս անհերքելի իրողութեանց առջեւ, շատերու միտքերուն մէջ կասկածներ արթնցան հին վարդապետութեան ճշմարտութեան մասին, եւ ատոր դէմ բողոք վերցնող (challenge) անձինք մէջտեղ եկան: Յորայ Գիրքը այս բողոքներու ամենաուժգին պոթիկումն է: Վերոյիշեալ եղելութիւնները, մեկնաբանները առաջնորդած են սա եղբակացութեան թէ Յորայ գիրքը յետ Պապելական ու Ասորական աքսորութեանց, հաւանաբար Եզրասի օրերուն մէջ գրի առնուած է, Գրիստոսէ իբր չորս հարիւր տարիներ առաջ:

Յորայ գիրքը զլիսաւորաբար հինգ մասերու կը բաժնուի:— (1) Յառաջաբան, 1-3 գլուխներ: (2) Յորի եւ իր բարեկամներուն բանավէճը, որ գրքին մեծագոյն մասը

կը գրաւէ, 4-31 գլուխներ: (3) Եղիուսի ուղերձը, 32-37 գլուխներ: (4) Եհովայի յայտարարութիւնը, 38-42:6 գլուխներ: (5) Վերջաբան, 42:7-14. Այժմ համառօտակի ուրուագծենք ասոնց բովանդակութիւնը:

1. Յառաջարան:— Հոս անպէտ կը համարենք կրկնել Յորին պատմութիւնը, զոր կ'ենթագրենք թէ ծանօթ է ձեր ամենուն: Պատմութեան կորիզը սա է թէ Յոր, որ թէպէտեւ «կատարեալ ու արդար եւ աստուածաւախ էր, ու չարութենէ ետ կը քաշուէր», Սատանայի ամբաստանութեամբ, փորձուելու համար ասեղ փորձանքներու կը ենթարկուի, եւ փորձութենէ յաղթական դուրս կուգայ: Կ'արժէ հոս լուսարանութիւն մը տալ Սատանայի մասին, որ շատերու միտքերը վրդոված է: Սատանայ կը նշանակէ հակառակորդ (adversary): Յորայ գրքին Սատանան (Satan) պէտք է որ նոյնացնենք մեր ըմբռնած Սատանային (devil) հետ: Յորայ Սատանան չար հոգի մը չէ, եւ ոչ ալ Աստուծոյ սոսիսը: Այս պատմութեան մէջ հակառակութիւն մը չկայ Աստուծոյ եւ Սատանայի մէջ, ընդհակառակը Սատանան՝ երկնաւոր խորհրդափողովին մէջ իր աթոռը կը գրաւէ «Աստուծոյ որդիներուն» եւ հրեշտակներուն հետ մէկտեղ: Սատանան Աստուծոյ կամքը եւ հրամանները ի գործ դնող ծառաներէն մին է: Եւ անոր պաշտօնն է մարդիկը մաղել, մարդոց անկեղծը կեղծէն զատորոշել, եւ առաքինութեան քօղին տակ պառկող մեղքը երեւան հանել, եւ մարդոց Աստուծոյ առջեւը կայնելու յաւակնութիւնը կործանել: Անոր գործն է հրակողութիւն ընել, որպէս զի Աստուծոյ բարեսրտութիւնը չարաչար չի գործածուի: Ամբողջ աշխարհ Սատանայի գործին դաշտն է: Անիկա մասնաւոր թշնամութիւն մը չունի մարդոց հանդէպ, միայն թէ իր պաշտօնին բերումով եւ շնական բնութեամբ, անոր որսերը սաստիկ փոր-

ծութեանց կ'ենթարկուին: Սակայն, իբր Աստուծոյ մի գործակատարը, ինք պատասխանատու չէ մարդոց տագնապներուն համար: Յորայ գիրքը զԱստուած կը ներկայացնէ իբր Յորի վիշտերուն պատճառը եւ պատասխանատուն, եւ ոչ թէ Սատանան:

2. Բանավէճեր Յորի եւ իր բարեկամներուն մէջ:— Յորին երեք բարեկամները եկան, որպէս զի իրեն ցաւակցին ու զինքը մխիթարեն: Անոնք Յորին հետ մէկտեղ վշտացան ու լացին: Եօթը օր, առանց խօսք մը զբուցելու գետնի վրայ նստելնին կը յայտնէ անոնց կարեկցութեան անկեղծութիւնը: Բայց անոնք չի կրցան Յորին ցաւը ըմբռնել, չի կրցան անոր «տէրտ»ը հասկընալ: Յորին հաւատքը կը խախտուէր, անոր հոգին Աստուծոյ կը դատուէր: Անոր կեանքին նաւը, փոթորկայտ յօյլ ծովու մը վրայ ժայռերուն զարնուելով խորտակուելու վտանգին մէջ էր: Անոր յուսոյ նշույնները կը մարէին: Անոր կեանքի աղբիւրները կը ցամփէին: Եւ Յոր՝ իր նուազող հոգին կենդանացնելու համար, իր բարեկամներէն օգնութիւն կը խնդրէր: Սակայն անոնք Յորին ակնկալութիւնները ի դերեւ հանեցին: Կարեկցութիւն ու մխիթարութիւն փնտռող հոգիի մը դայլախագեայ աստուածաբանութիւն հրամցուցին: Եւ փոխանակ զինքը սփոփելու, ալ աւելի նեղացուցին ու բորբոքեցուցին:

Յորին անհասկնալի եղող կէտը սա էր թէ ինք ինչո՞ւ անմեղ ըլլալով ցաւերու տէր կ'ըլլայ: Յորին միտքը տանջող խորհուրդը սա էր թէ ինք ինչո՞ւ կը խարազանուի, ի հեճուկս իր արդարութեան: Ոչ միայն վիշտ կրել, այլ զուր տեղ եւ յանիրաւի վիշտ կրել, ասիկա էր Յորը տխրեցնող ու տանջող պարագան: Նա արդար ըլլալու գիտակցութիւնը ունէր: Նա գիտէր թէ Աստուծոյ դէմ ունէ կերպով չէր մեղանշած: Ուստի անիկա չէր կրնար

Հասկնալ թէ ինչո՞ւ կը պատժուի: Ասիկա չէր կրնար սեւ իրողութիւնը Աստուծոյ բարութեան հետ հաշտեցնել: Եւ Աստուծոյ արդարութեան ու բարոյական բնութեան մասին իր տածած հին համոզումները կը խախտուէին: Երբոր Յոր իր արդար ըլլալը պնդեց, եւ Աստուծոյ անարդարութեան դէմ բորբոքած բողոքներ ու ամբաստանութիւններ արձակեց, իւր բարեկամները այլեւս չի կըրցան լռութիւն պահել, եւ Աստուծոյ պաշտպանութեան փութացին, եւ իւր վիշտերուն տարբեր բացատրութիւն մը տալու աշխատեցան: Ասիկա տեղի տուաւ երկար վիճաբանութիւններու:

Այս վիճաբանութիւնները երեք շրջաններէ (cycle) կը բաղկանան: Առաջին շրջանը կը գտնուի, 4-14 գլուխներու մէջ: Երկրորդ շրջանը կը ներփակուի 15-21 գլուխներուն մէջ. իսկ երրորդ շրջանը կը բովանդակուի 22-31 գլուխներու մէջ: Այս շրջաններէն ամէն մէկը վեց ճառախօսութիւններէ կը բաղկանայ. նախ բարեկամները կ'արտայայտուին, եւ ապա Յոր կը պատասխանէ իւրաքանչիւրին:

Խօսքը բացուեցաւ Եղիփազ Թեմանացիի կողմէն: Նա ճառեց Աստուծոյ գերազանց մաքրութեան մասին: Յորը մեղադրեց՝ ինքզինքը արդար նկատելուն համար, եւ յարեց. «Միթէ մարդը Աստուծմէ արդար կ'ըլլա՞յ. մարդը իր Արարիչէն մաքուր կ'ըլլա՞յ: Ահա անիկա իր ծառաներուն չի հաւատար, ու իր հրեշտակներուն վրայ ալ պակասութիւն կը գտնէ: Այ ո՞ր կը մնան անոնք՝ որ կանգնէն տուներու մէջ կը բնակին, որոնց հիմը փոշիի մէջ է, և որոնք ցեցէն առաջ կը նզովուին» (4:17-19.): Եւ նա Յորին ըսաւ, «Դուն քու խորհուրդներուդ մէջ կը սխալիլ. աղէ, միտքդ բեր, ո՞ր անմեղը կորսուեցաւ, եւ ո՞ր տեղ արդարները բնաջինջ եղան: Ինչպէս տեսայ,

անօրէնութիւն հերկողները եւ անբաւութիւն ցանողները նոյնը կը հնձեն, եւ Աստուծոյ շունչէն կը կորսուին» (4:7,8.): Եղիփազ՝ Յորի տանջանքներուն մէջ նշմարեց Աստուծոյ արդար հարուածը, ինչպէս նաեւ խրատականը: Վասն զի նա յարեց. «Ահա երանելի է այն մարդը գոր Աստուած կը խրատէ. ուրեմն Ամենակարողին յանդիմանութիւնը մի անարգեր. վասն զի ինք կը վիրաւորէ ու կը փաթթէ. կը զարնէ ու իր ձեռքերը կը բժշկեն» (5:17,18.):

Յորի բարեկամներուն մէջ երկրորդ խօսողը Բաղդատ Սօքեցին եղաւ: Ասիկա ծանրացաւ Աստուծոյ անթեքելի արդարութեան վրայ. եւ ըսաւ, «Միթէ Աստուած դատաստանը կը ծռէ՞. կամ Ամենակարողը իրաւունքը կը խափանէ՞» (8:3.): «Եթէ դուն մաքուր ու շիտակ ըլլաս, անիկա քու արդարութեանդ բնակարանին յաջողութիւն պիտի տայ» (8:6.): «Ամբարշտին յոյսը պիտի կտրուի... եւ անոր տունը հաստատութիւն պիտի չունենայ» (8:14,15.): «Ահա Աստուած արդար մարդը չի մերժեր, ոչ ալ չարերուն ձեռնտու կ'ըլլայ» (8:20.):

Երրորդ արտայայտողը Սոփար Նաամացին էր: Ասիկա ծանրացաւ Աստուծոյ անքնելի իմաստութեան վրայ: Եւ ըսաւ. «Աստուծոյ գաղտնիքը կրնա՞ս գտնել. Ամենակարողը կատարելապէս կրնա՞ս իմանալ: Անիկա երկինքին պէս բարձր է, ի՞նչ կրնաս ընել. դժոխսէն խորունկ է, ի՞նչ կրնաս գիտնալ» (11:7,8.): Եւ Սոփար յորդոր կարգաց Յորին որ անօրէնութիւնը իրմէ հեռացնէ, և աւելցուց, «Այն աստիճանը կրնաս պարզերես մնալ. հաստատ կ'ըլլաս ու բանէ մը չես վախնար: Քու քշուանութիւնդ պիտի մոռնաս: Եւ կեանքդ կ'սօրուան լոյսէն պայծառ պիտի ըլլայ» (11:15-17.):

Այս բարեկամներու արտայայտութիւնները Յորը ոչ ամոքեցին եւ ոչ ալ դոհացուցին: Անիկա երբեմն հեղնանքով, եւ երբեմն ալ ցասումով անոնց պատասխանեց: «Ես ալ ձեզի պէս խելք ունիմ», ըսաւ նա, «Ես ձեզմէ նուազ չեմ» (12:3.): «Ձեր գիտցածը ես ալ գիտեմ» (13:2.): «Ես գիտեմ թէ Աստուած անսահման կարողութիւն ու իմաստութիւն ունի» (9:1-10.): «Սակայն դուք սուտ խօսքեր կը հնարէք. ամէնք ալ ունայնութեան բժիշկներ էք: Երանի՛ թէ բոլորովին լուռ կենայիք. եւ այս բանը ձեզի իմաստութիւն պիտի սեպուէր» (13:4, 5.):

Յոր ուղղակի չի պատասխանեց իր բարեկամներու ըսածներուն, ինչպէս որ անոնք ալ ուղղակի չեն պատասխաներ Յորի ըսածներուն: Ամէն խօսող, իր միտքը զբաւոյն խորհուրդը կ'արտայայտէ: Յոր Աստուծով նախազբաւուած (preoccupied) է: Անոր դատը Աստուծոյ հետ է: Անիկա սիրտ չունի մարդոց հետ վիճելու: Նա կ'ըսէ, «Բայց ես Ամենակարողին խօսելու, եւ իմ իրաւունքներս Աստուծոյ ներկայացնելու կը փափաքեմ» (13:3.): Անիկա չի կրնար հանդուրժել իր անտանելի ցաւերուն, դառնութեամբ կը բացազանչէ, «Հոգիս կեանքէս ձանձրացաւ. համարձակ պիտի գանգատիմ, հոգիս դառնութիւնը պիտի խօսիմ: Պիտի ըսեմ Աստուծոյ, Մի՛ դատապարտէր զիս, յայտնէ ինծի թէ ի՞նչ բանի համար ինծի հետ կը վիճիս: Քեզի աղէ՞կ կ'երեւայ որ զիս հարստահարես, ու ձեռքերուդ գործը արհամարհես, եւ ամբարիշտներուն խորհուրդին լոյս տաս» (10:1-3.): Եւ նա Աստուծոյ երեսին կ'ըսէ, «Գիտես որ յանցաւոր չեմ, բայց չկայ մէկը որ քու ձեռքէդ ազատէ զիս» (10:7.): Յոր Աստուծոյ դէմ դատ կը վարէ, բայց պայքարին անհաւասար ու անօգուտ ըլլալը տեսնելով կը յարէ, «Վասն

զի ինծի պէս մարդ չէ, որ անոր պատասխան տամ, ու մէկտեղ դատաստանի երթանք: Միջնորդ դատաւոր մը չկայ մեր մէջ, որ կարենայ իր ձեռքը մեր երկուքին վրայ դնել» (9:32,33.): Դատաւարութեան մէջ Աստուած թէ դատակաց է եւ թէ դատաւոր: Անիկա քմահաճօրէն զիս կ'ընկճէ ու կը փլցնէ (12:14.): «Նա փոքորիկով զիս ննջեց, ու առանց պատճառի իմ վերքերս աւելցուց: Ձիս չի բողբոլ որ շունչ առնեմ, հապա դառնութեամբ զիս կը լեցնէ» (9:17,18.): «Գիտեմ որ զիս անմեղ պիտի չի համարես: Ամբարիշտ պիտի սեպուիմ. ինչո՞ւ համար գուր տեղը աշխատիմ: Եթէ ձիւնի ջրով լուացուիմ, ու ձեռքերս մաքրութիւնով սրբեմ, կրկին զիս փոսը կ'ընկրդմես» (9:28-31.): Աստուծոյ առջեւ արդար ըլլալն ալ անօգուտ է, քանզի «Անիկա արդարը ու ամբարիշտը մէկտեղ բնաջինջ կ'ընէ» (9:20-22.): Զինքը անխնայօրէն հալածելուն համար, Յոր Աստուծոյ դէմ դառնութեամբ կը լեցուի, եւ դանդառելով կ'ըսէ, «Ո՛վ մարդիկը Քննող, ինչո՞ւ համար զիս քեզի նշան առիր: Մի՞նչ եւ ե՞րբ ինձմէ ետ չես կեցար» (7:19,20.): «Առիծի պէս զիս կ'որսաս, եւ դարձեալ իմ վրաս յաղթող կ'ըլլաս» (10:16.): «Ինչո՞ւ համար երեսդ կը պահես, ու զիս քեզի քշնամի կը սեպես» (13:24.): «Ձեռքդ վրայդ վերցուր, ու քու երկիւղդ զիս չի գարհուրեցնէ» (13:21.):

Յոր իր վիճակէն յուսահատելով կը հառաչէ, «Արդ ինչո՞ւ համար զիս արգանդէն հանեցիր: Երանի՛ թէ չեղածի պէս ըլլայի» (10:18.): Եւ անիկա երբեմն կեանքէ աշնքան կը զոլուի, որ մեռնելու կը ցանկայ (6:9.): Սակայն, անիկա ապազայի համար ալ յոյս մը չունի: Անիկա չզիտէր թէ զերեզմանէն անդին հատուցում կամ բարեք մը կայ: Մահն ալ իր վրայ երկիւղ կը ձգէ: Գերեզմանին խոր ու անվերջ մթութիւնը զինք սոսկումով կը

համակէ: Այնպէս որ անիկա երկու արհաւիրքներու մէջ կը ճզմուի:

Յոր կը տեսնէ թէ Աստուծոյ հետ վիճելէն օգուտ մը չկայ: Նա Աստուծոյ դէմ կը զայրանայ: Սակայն Աստուծոյ բոլորովին ալ չի կրնար դատուիլ: Նա կ'ընդունի թէ Աստուծոյ հետ եղած յարաբերութիւնը ամէնէն ցանկալի օրհնութիւնն է, ամէնէն դերընտիր երանութիւնն է: Այս զգացումին ներքեւ, նա Աստուծոյ կը մօտենայ թախանձազին, եւ Աստուծոյ շնորհաց դիմելով կը պաղատի ու կ'ըսէ, «Արդար ալ ըլլամ, չպիտի վիճիմ. իմ դատաւորէս շնորհք պիտի խնդրեմ» (9:15.): Եւ նա ինքզինքը Աստուծոյ գթութեանը կը յանձնէ: «Ձիս քեզի դատաստանի՞ կը բերես» (14:3.): «Հովեմ քուած տերեւի՞ մը դէմ ահաւոր պիտի ըլլաս. կամ թէ չոր մղե՞ղ մը պիտի հալածես» (13:25.): Եւ անիկա կը թախանձէ Աստուծոյ, որ իր ձեռաց գործը չի կորսնցնէ: «Քու ձեռքերդ զիս ստեղծեցին, ու իմ բոլոր անդամներս կազմեցին, ու զիս բնաջի՞նջ կ'ընես: Կ'աղաչեմ, յիշէ որ զիս կաւի պէս շինեցիր, ու զիս հո՞ղ պիտի դարձնես» (10:8,9.):

Եւ ահա Յոր Աստուծոյ ողորմութեանը կ'ապաստանի: Աստուծոյ վրայ ունեցած հաւատքը աւելի կը զօրանայ, եւ կը յայտարարէ, «Թէեւ անիկա զիս սպաննէ, ես անոր պիտի յուսամ» (13:15.): Եւ այս դաւանութեամբ, Յոր կը հասնի հաւատքի եւ անձնատուութեան զազաթնակէտին: Անիկա կրկին կը հաստատուի Աստուծոյ մէջ: Եւ վայրկենապէս ալ իրեն անանկ կը թուի թէ Աստուած իր յոյսերը ի դերեւ չպիտի հանէ: Եւ հանդարտ ու վստահ սրտով մը կ'ըսէ, «Գիտեմ որ պիտի արդարանամ» (13:18.):

Ահա այսպէս Յոր իր հոգեկան աշխարհի յարափոփոխ յուզումներուն համաձայն, մէկ ծայրայեղութենէ միւս ծայրայեղութիւն կը ցատկէ: Մէկ բոպէին, Աստուծոյ իրաւացիութիւնն ու արդարախոհութիւնը կը հերքէ, մէկալ բոպէին, Աստուծոյ արդարութեան ու գթութեան կ'ապաստանի: Մոլեղին մղձաւանջներու մէջէն անցնող հոգիի մը համար, բնական է այսպիսի հոգեկան փոթորիկներու ենթարկուիլ:

Երկրորդ շրջանին մէջ, Յորին բարեկամները՝ մթթին դոյներով կը նկարագրեն ամբարշտին ճակատագրերը: Յորին մեղաւորութեան նկատմամբ իրենց համոզումները առաւելապէս կ'արմատանան, երբ կը տեսնեն թէ Յոր իրենց խօսքերէն չազդուիր, եւ ալ աւելի կը բորբոքի ու Աստուծոյ դէմ անվայել բողոքներ կը ժայթքեցնէ: Եւ անոնք ամբարշտին կրելիք ահռելի տանջանքները կը նկարագրեն ամէնէն ջղացունց ու սոսկացնող նկարագրութիւններով: Անոնք անշուշտ կ'ենթադրեն թէ իրենց ըսածները կը յարմարին Յորի փորձառութիւններուն: Անոնք Յորին առջեւ կը բռնեն հայելի մը, որուն միջոցաւ կը ջանան իրեն ցուցնել իր հարազատ պատկերը: Այս նկարագրութիւններով, անոնք կը յայտարարեն Աստուծոյ հատուցիչ (retributive) արդարութիւնը:

Բայց, թէպէտեւ անոնք մասնաւոր յառաջացում մը չեն ցուցներ իրենց փաստերուն մէջ, Յոր մտաւորապէս աւելի հանդարտ վիճակի մը կը հասնի: Աստուծոյ թըշնամական դիրքը մոլեղնաբար պարսաւելը, իր մէջ հակազդեցութիւն մը յառաջ կը բերէ, եւ Աստուծոյ մէջ կը փնտռէ իր ջատագովիչը (vindicator): Բարեկամներու նախատինքները զինք առ Աստուած կը մղեն, եւ անիկա արտասուելով կը պաղատի Աստուծոյ որ իր իրաւունքները պաշտպանէ: Սակայն իր իրաւունքները որմէ՞ պի-

տի պահանջէ: Չէ՞ որ Աստուած ինքն է որ Աստուծմէ պիտի պահանջէ իր իրաւունքները: Յայնժամ Յոր անցեալի Աստուածը կը հակադրէ ներկայի Աստուծոյն հետ, եւ կը խնդրէ Աստուծմէ որ իր հին տրամադրութեան վերադառնայ: Երկրորդ շրջանին, Յորին խորհուրդները կը հասնին իրենց գերաստիճանին (climax): Անիկա վըստահ կ'ըլլայ թէ իր աղաչանքները պիտի լսուին եւ Տէրը զինք պիտի արդարացնէ: Եւ նա կը խոյանայ հաւատքի սմեռաբարձը կատարին ու կը յայտարարէ, «Վասն զի գիտեմ որ իմ Փրկիչս ողջ է, եւ անիկա վերջին ժամանակը պիտի ելլէ երկրի վրայ: Ու թէեւ մորթես ետքը՝ այս մարմինս ալ փնանայ, տակաւին առանց մարմնոյ զԱստուած պիտի տեսնեմ (չիտակ թարգմանութեամբ), զոր ես, այո՛ ես, ինձի համար պիտի տեսնեմ, ու իմ աչքերս պիտի դիտեն զանիկա, եւ ոչ թէ ուրիշը» (19: 25-27.): Վերջապէս Յոր կը բարձրանայ սա համոզման թէ նոյն իսկ աշխարհային ցաւերու մէջ մեռնելու ալ ըլլայ, միւս կողմը պիտի ապրի, եւ Աստուծոյ արդարացումը (vindication) պիտի տեսնէ: Այս բարձր վըստահութիւնը, Յորի յաջորդ արտայայտութիւններուն կ'ազդէ:

Երրորդ շրջանին, Յոր կրկին կը ժխտէ իր բարեկամներուն ըսածները, եւ կը ջրէ անոնց սա վարդապետութիւնը թէ մարդս մեղքի համար կը տառապի: Եւ կը պարզէ թէ անօրէններն ալ կը բարգաւաճին, եւ երկար ու հանդուստէտ կեանք կը վայելեն: «Անօրէնը կ'ստանայ իր պատիժը երբ իր սերունդները կը տանջուին», այս փաստին Յոր կը պատասխանէ ու կ'ըսէ, «Պատիժ մը որուն անօրէնը զիտակից չէ, երբէք պատիժ չէ»:

Երրորդ շրջանին, Յոր կ'անտեսէ այն ամբաստանութիւնները որ Եղիփազ կ'արձակէ իր նկարագրին դէմ:

Եւ Աստուծոյ գործելակերպը ուրիշ կերպով կը բացատրէ: Բայց Յոր կրկին կը դառնայ Աստուծոյ հետ ունեցած յարաբերութեան, սակայն չի կրնար հասնիլ հաւատքի այն բարձունքին որ կը հասնի երկրորդ շրջանին մէջ: Եւ անիկա նորէն վար կ'իյնայ. եւ աշխարհի ոչբարոյական կառավարութիւնը կը դատապարտէ: Անիկա թէպէտեւ կը բաղձայ զԱստուած երես առ երես տեսնել, եւ անոր իր փաստերը ներկայացնել, սակայն անքննելի եւ անպատասխանատու Դատաւորը իրմէ կը ծածկուի, եւ իր ամնամակեղծ որոնումները կը խափանէ (baffle):

Բազդատի երրորդ ուղերձին, Յորին տուած պատասխանը կ'երեւի թէ մեծաւ մասամբ կորսուած է: Թերեւս այս անգամին Յոր այնքան կծու լեզու գործածեց, որ անպատկառ նկատուելով դուրս ձգուեցաւ: Վերջին անգամին, Յոր, իր անմեղութիւնը կը կրկնէ, իր նեղութիւններուն յանդիման ըլլալը կը յայտարարէ, եւ կը յայտնէ թէ համարձակութիւն ունի ասոր համար զԱստուած զիմազրաւելու: Ասով կը վերջանայ վիճաբանութիւնը, եւ Յորին բարեկամները պարտուած ըլլալով կը հեռանան:

3. Եղիուսի ուղերձը:— Եղիուս անուն ինքնահաւան երիտասարդ մը, որ ցարդ վիճաբանութեան ականջի հիւր եղած էր, այս կէտին միջամուխ կ'ըլլայ բանավէճին: Եւ անոնց ներողամտութիւնը հայցելէն վերջ, կը յայտարարէ որ թէ՛ Յոր եւ թէ՛ իր բարեկամները սխալած են: Աստուծոյ դէմ անվայել բառեր գործածելուն եւ ինքզինքը Աստուծմէ արդար նկատելուն համար, անիկա Յորը կը յանդիմանէ: Եւ Յորին բարեկամներն ալ կը մեղադրէ որ աւելի զօրաւոր ու համողիչ փաստեր չեն կրցած ներկայացնել: Եւ նա կը փորձէ, անոնց անյաջող

ձեռնարկը յաջողութեամբ ի դլուս հանել: Սակայն, Եղիուսի ըսածներուն մէջ, միւսներէն էապէս տարբեր տեսակէտներ ու զօրաւոր փաստեր չկան: Եղիուս կը փաստէ թէ վիշտերու դլխաւոր նպատակն է մարդոց կրթութիւնը: Անոնց միջոցաւ Աստուած մարդիկը կը խրատէ, եւ զանոնք ուրիշ աւելի վտանգաւոր փորձութիւններէն ու հաւանական մեղքերէն ետ կը պահէ: Խրատական վիշտը բուժիչ (curative) է. ազդարարողական վիշտը արգելիչ (preventive) է: Եղիուս նաեւ կը յայտնէ թէ շատ մը աղօթքներուն անպատասխանի մնալուն պատճառը, այն է թէ Աստուած չի պատասխաներ եւ կամ չուզեր պատասխանել, հապա սա է թէ մարդիկ Աստուծոյ չեն մօտենար շիտակ տրամադրութեամբ:

Եղիուսի յայտնած կարեւոր դադարարներէն մին ալ սա է թէ, բաւական չէ որ Յոբ ինքզինքը արդար նկատէ: Յոբ անմեղ է, միայն ինքնիւր տեսութեամբ: Իր մէջը կան յանցանքներ, որուն ինք տեղեակ չէ: Իր սըրտին մէջ կը սլքտան իրեն անծանօթ մեղքեր: Եւ Աստուած զինքը կը վշտացնէ, որպէս զի իր չգիտցած մեղանշականութիւնը իրեն գիտցնէ, եւ զինք զղջումի բերէ: Եւ Եղիուս կը պնդէ թէ Յոբին մեղքը իր հոգեւոր հպարտութիւնը եւ ինքնահաւանութիւնն է: Եւ անիկա այս կերպով կը ջանայ Յոբի նկարագրին թերութիւնը երեւան հանել, եւ անոր վիշտերուն մեկնութիւնը տալ:

Եղիուսի ըսածները կրնան շիտակ եղած ըլլալ ընդհանուր կերպով: Սակայն անոնք չեն բացատրեր Յոբին վիշտերը: Քանի որ Աստուած ինքը կը հաստատէ Յոբին անմեղութիւնը: Այս պատճառաւ, Եղիուսի փաստարկութիւններն ալ Յոբը չեն գոհացներ, եւ Յոբ անոնց պատասխաններն իսկ աւելորդ կը նկատէ:

4. Եեովային յայտարարութիւնը:— Վերջապէս Եհովան փոթորիկի մէջէն Յոբին պատասխան կուտայ: Եհովայի խօսքերը, Յոբին միտքը լուսաւորելէ աւելի արպաւորելու կը ծառայէ: Տէրը՝ փոխանակ Յոբի վիշտերուն մեկնութիւնը տալու, ընդարձակ նկարագրութիւններով, իր անհասկնալի իմաստութիւնը, իր անհուն կարողութիւնը, իր յաւիտենական ծրագիրները, իր դերագանց արդարութիւնը, բոլոր շնչաւոր արարածներու հանդէպ իր ջերմ հոգածութիւնը կը պատկերացնէ: Եւ ասոնց միջոցաւ, Յոբ Աստուծոյ մասին նոր տեսութեան մը կը տիրանայ: Աստուծոյ մեծութեան քով իր ապիկարութիւնը կ'զգայ, եւ անոր կը խօսի, «Ես քու վրայովդ ակամջի լրով լսեր էի, բայց հիմա աչքս կը տեսնէ քեզ» (42:5): Եւ Յոբ՝ առանց հասկնալու՝ իր գիտութեան վեր բաներ խօսած ըլլալուն համար զղջման կուգայ, եւ Աստուծոյ ներում կը խնդրէ:

5. Վերջաբան:— Տէրն ալ կը տեսնէ Յոբին խոնարհութիւնը, եւ կրկին կ'ողորմի իրեն: Անոր առողջութիւնը կը վերահաստատէ: Անոր ստացուածքը եւ դաւակները կրկնապատիկ կ'օրհնէ: «Եւ Յոբ ծերացած ու օրերը լեցուած» կը մեռնի:

Յորայ գիրքը ի՞նչ դասեր կը սորվեցնէ, ասոր պիտի անդրադառնանք յաջորդիւ: Այսօր սաքանը ըսելով կը բաւականանանք թէ Յոբ իր վիշտերուն դադարիքը հասկնալու անկարող կ'ըլլայ: Յոբին մտաւոր դժուարութիւնները եւ առեղծուածները չեն լուծուի: Եհովայի պատասխանն ալ բուն խնդրոյն վրայ յաւելուածական լոյս չի սփռեր: Եւ Յոբ իր հոգիի հանգստութեան կը տիրանայ՝ ոչ թէ մտքի համոզումով, այլ հաւատքի խոյացումով: Յոբ մանկական վստահութեամբ ինքզինք Աստուծոյ բաղուկներուն մէջ կը նետէ, եւ հոն կը գտնէ

իր վիշտերուն ամոքումը եւ իր հոգիին երջանկացումը: Եւ անիկա փորձառարար սա կարեւոր դասը կը սորվէ թէ ինք աստուածային նախախնամութեան յանձնուելու է, նոյն իսկ այնպիսի պարագաներու տակ, ուր անոր արարքները իրեն անհասկնալի կը մնան: Ինք պէտք է վստահ իր հոգեւոր բնազդներուն, առաւել քան իր մտաւոր վճիռներուն:

Յոր նոր ճամբայ մը կը գտնէ իր վիշտերէն ազատուելու համար: Անիկա իր վիշտերու պատճառին մասին նոր դիտութեան չի տիրանար: Սակայն իր տգիտութիւնը այլեւս զինք չի նեղեր, ոչ ալ դիտնալու փափաքով կը մտահոգուի: Քանզի անիկա կը փոխադրուի այնպիսի դաւառ մը, ուր այսպիսի խնդիրներ դոյութիւն չունին: Անիկա կը հասնի խաղաղութեան սահմանին, եւ կը համոզուի թէ ամէն բան աղէկ է, թէսլէտեւ չի հասկնար ասոր ինչո՞ւն եւ ինպէ՞սը: Ինչպէս որ արեգակի ճառագայթներուն առջեւ թանձր մառախուղներ կ'անյարտանան, անանկ ալ Աստուծոյ բարձր տեսիլքին առջեւ Յորին դժուարութիւնները կ'անհետանան: Յոր խնդրին լուծումը կը գտնէ, ոչ թէ մտքի լուսաւորութեամբ, հապա հոգեւոր փորձառութեամբ: Եւ անիկա կը յանդէսա ճշմարտութեան թէ, «Տէրոջը վախն է իմաստութիւնը, ու չարութենէ ետ քաշուիլը հանգարն է» (28:28):

ԺԳ

ՅՈՒՄՆ ԴԱՍԸ

«Եւ Յոր ըսաւ անոր (իր կնկան), դուն անգամ կնոջ մը պէս կը խօսիս. Աստուծոյ ձեռքէն միայն բարիքը ընդունինք, ու չարիքը չընդունինք. Այս ամենուն մէջ Յոր իր շրթունքներովը չի մեղանչեց»:

ՅՈՒՄ. 10.

ՄԵՐ նախորդ խորհրդածութեան մէջ տեսանք թէ երկար վիճարանութիւն մը ծագեցաւ Յորի եւ իր բարեկամներուն միջեւ, Աստուծոյ նախախնամութեան նկատմամբ: Այս վիճարանութեան մէջ, բարեկամներու բռնած դիրքը սա եղաւ, թէ Յորին գլուխը եկած աղէտները պատժողական հանգամանք ունին: Աշխարհի վրայ անմեղ եւ անապական մարդ չկայ: Մարդուն շինուածքը կաւէ է: Աստուած մարդոց հետ կատարեալ արդարութեամբ կը վերաբերուի: Աստուծոյ մէջ անիրաւութիւն չկայ: Նա բարիները կը վարձատրէ, եւ չարերը կը պատժէ: Հետեւաբար ամէն մէկ պատիժ, յանցանք մը կը մատնանչէ: Ամէն մէկ աղէտ, ենթակային մեղաւոր ըլլալը կը հոչակէ: Եւ պատուհասէ ձերբազատուելու եւ խաղաղութեան ու բարիքի տիրանալու միակ միջոցը զղջումով դարձի գալ է: Երբոր Յոր պնդեց թէ ինք մեղք մը գործած չէ, անոնք յայտարարեցին. «Դուն ճշմար-

տուժիւնը կը սքօղես, դուն յանցանքներդ խոստովանիլ չես ուզեր: Դուն մեղապարտ ու վատթար մարդ մըն ես: Դուն աղքատներու իրաւունքը կորդեր ես. որբերու եւ որբեւայրիներու իրաւունքը կերեր ես. աղտոտ վաստակով քու ձեռքերդ արատաւորեր ես. հարստահարութեամբ ու անդամութեամբ ինքդինքդ սղծած ես: Այս պատճառաւ Աստուած քու բոլոր ունեցածդ քու ձեռքէդ խլած է, եւ քեզ վիշտերով հարուածած է:» Անոնք Յոբի աղէտներու սաստկութեան մէջ նշմարեցին անոր մեղքին մեծութիւնը: Եւ անոնք յորդորեցին որ ինք առանց չքմեղանքի ապաշխարէ: Եւ աւելցուցին, «Եթէ Ամենակարողին դառնաս, դուս պիտի շինուիս: Անօրէնութիւնք քու վրաններէդ հեռացուր. ու ոսկին հողին վրայ պիտի դնես, ու Ոսկրի ոսկին՝ հեղեղատներու քարերուն վրայ: ...Անք պիտի աղաչես ու քեզի պիտի լսէ, եւ քու ուխտերդ պիտի կատարես: Եթէ դիտաւորութիւն մը ունենաս՝ քեզի պիտի յաջողի, ու քամքանքներդ վրայ լոյս պիտի փառագայթէ» (22:23-28.):

Մինչեւ աղէտին գալուստը, Յոբ ալ իր բարեկամներուն պէս կը խորհէր: Մինչեւ այն օրը, ինք Աստուծոյ առջեւ արդարութեամբ ու հաւատարմութեամբ քալած էր, եւ Աստուած ալ զինքը շնորհակցած էր: Ամէն անգամ որ Տէրոջմէ բան մը խնդրած էր, Տէրը իրեն պատասխանած էր: Սակայն, յանկարծ կապոյտ երկինքէն շանթ մը փայլատակած, եւ զինքը անխիղճօրէն խանձած էր: Եւ ինք անտանելի տառապանքներու ենթարկուած էր: Թէ որ Յոբ իրաւացի կերպով այս վիշտերու մատնուած ըլլար, առանց առարկելու անոնց առջեւ պիտի խոնարհէր: Սակայն անիրաւ տեղ չարչարուելուն համար, բողոքի ձայն բարձրացուց: Յոբ իր անմեղ ու արդար ըլլալուն գիտակից էր: Անիկա ոչ միայն ուրիշներուն ա-

նիրաւութիւն չէր ըրած, հապա անոնց՝ ձեռքէն եկած բարիքն ալ ըրած էր (27:4-6. 31:3-7.): Ուստի, Տէրը իրեն պէս առաքինի ու բարեգործ մարդ մը ինչո՞ւ այսպէս կը նեղէր, Յոբ ասիկա չի կրցաւ հասկնալ: Անելանելի լարիւրինդոսի մը մէջ ինկած էր: Թէ Ֆիզիքապէս, թէ մտաւորապէս եւ թէ հոգեւորապէս կը տանջուէր: Եւ անիկա այս տաղնապններու մէջ, անճար ու յուսահատ, իր ծնած օրուան անէծք կը կարդար:

Յոբ անկարող եղաւ իր դաւանած Աստուածը այս պէ՞տալի իրականութեանց հետ համաձայնեցնել: Եւ Աստուծոյ մասին իր գաղափարը չըջափոխուեցաւ: Եւ նա սկսաւ խորհիլ թէ Աստուած՝ ինքնիշխան, քմահաճ, անպատասխանատու, եւ ոչ-բարոյական էակ մըն է: Եւ անոր ամենազիտութիւնը եւ ամենակարողութիւնը, իր ոչ-բարոյականութիւնը կրկնապատիկ գէշ կ'ընէ:

Այս յոռետես մտածմունքները, Յորը ձգեցին սոսկումի ու յուսահատութեան մէջ: Այսու ամենայնիւ, անիկա չի կրցաւ բոլորովին անհաւատ դառնալ, Աստուծոյ մէջ բոլորովին վաղ անցնիլ: Անիկա երբ մէկ կողմէն Աստուծոյ կը վանուէր, միւս կողմէն անկէ կը քաշուէր: Ամէնէն յուսահատական վայրկեաններուն մէջ իսկ, անոր հոգւոյն մէջ Աստուծոյ հանդէպ անշիջելի տենչանք ու ձգում մը կար: Նա կը ցանկար Աստուծոյ հետ հաշտուիլ ու միանալ: Անիկա կ'զգար իր էութեան մէջ թէ Աստուծոյ հետ եղած յարաբերութիւնը կեանքի մեծագոյն բարիքն է: Եւ երբեմն իրեն անանկ կուգար թէ իր ներկայ փորձառութիւնները, արտայայտիչը չեն Աստուծոյ ներքնագոյն բնութեան: Իրական Աստուածը, վերջապէս իր արդարութիւնը պիտի ցուցնէ, եւ իր դժոխքը դրախտի պիտի փոխէ: Եւ Յոբ հաւատքի երկնասլաց թրուիչքով մը, թող ըլլայ մէկ բոլորէն համար, սա տեսիլքը

ունեցաւ, թէ անիկա այս մարմնոյ մէջ ալ չըլլայ, առանց մարմնոյ զԱստուած պիտի տեսնէ, եւ անոր արդարացումը պիտի վայելէ :

Սակայն պարտինք ընդունել թէ Յորին այս տեսիլքը, ստոյգ համոզում մը ըլլալէ աւելի տեսլական բաղձանք մըն էր : Անիկա հանդերձեալին մասին հաստատ վստահութիւն չունէր : Յորի օրերուն, որոշ համոզում մը չկար հանդերձեալի նկատմամբ : Յոր զուրկ էր այն «երկինքի» տեսութեան, զոր մենք ունինք, շնորհիւ Քրիստոսի յայտնութիւններուն : Յորին համար, անդիի կողմը սեւ վարագոյրով մը քողարկուած էր : Անիկա այս կեանքէ անդին բարեք մը չէր յուսար : Մարդու վախճանումով կը վերջանար նաեւ անոր վայելքները : Մարդու հոգին տարտարոսի (sheol) կ'երթայ : Եւ տարտարոսի մասին սա կարծիքը կը տիրէր, թէ այս վայրը գետնին տակ, մութ, ցուրտ, տխրամած, սոսկալի տեղ մըն է, ուրկէ ազատուել եւ ետ դառնալ չկայ : Հոն ստուերային էակներ, առանձին, միօրինակ, տաղտկալի, տխուր, երկիւղալի կեանք մը կը վարեն : Հոն աշխարհային դանաղանութիւնները կը վերնան, ամենասիրելի կապերը կը կըտրուին, եւ Աստուծոյ հետ յարաբերութիւնը կը խզուի : Հոն ուրուականի նման էակներ կէս գիտակից գոյութիւն մը կը քաջքեն, եւ տեսնելով մարմինին փտտումը գերեզմանին մէջ, կը տխրին ու կը կեղեքուին :

Այս տեսակ հաւատքով կարելի չէր որ Յոր հանդերձեալի վրայ յոյս դնէր : Յորին վերջին յայտարարութիւնները կը պարզեն թէ նա մէկ կողմ ձգեց այս դաւանանքը, իբր պարապ յոյս մը : Տրամի վերջին վարագոյրը ներկայացնելու համար, հանդերձեալին մէջ թատերաբեմ գոյութիւն չունէր : Հետեւաբար, եթէ Յոր պիտի արդարացուէր, այս աշխարհին մէջ պիտի արդարացուէր,

ու իր վայելքը վերստանար : Ուստի, Յոր Աստուծմէ խնդրեց որ իր իրաւունքը տեղը բերէ այս կեանքին մէջ : Եւ Աստուած ալ զինք մշտատեւ տարակոյսի եւ անյուսութեան մէջ չի ձգելու համար, իր նեղութիւններուն վերջ տուաւ, եւ «իր շրթունքներովը չմեղանչուելուն» համար, զինք առաջուանէն աւելի օրհնեց :

Յորայ գրքի գրուելուն մէջ որոշ նպատակ մը կայ : Անոր հեղինակը աստուածավախ մարդ մըն է, եւ անոր նպատակը չէ աստուածային հաւատքը խախտել, հապապան ա'լ աւելի ամրապնդել, եւ արդարի տառապանքին բանաւոր բացատրութիւնը տալով՝ Աստուծոյ անդրդուելի արգարութիւնը հաստատել : Բայց հեղինակը խնդրին կը մօտենայ ոչ թէ տեսական, հապա գործնական տեսակէտէ : Անիկա այս գիրքը չի գրեր, մարդկային վիշտերու փրկութիւնայական վերլուծութիւնը տալու, եւ կամ աստուածային նախախնամութեան այլազան հայեցողութիւնները պարզելու համար, հապա կը գրէ, որպէս զի վշտակիր հոգիներուն յոյս ու խրախոյս ներշնչէ : Անիկա ճնշուած հոգիներու առջեւ Յորը կը դնէ իբր տիպար օրինակ եւ հերոս : Եւ անիկա այս պատմութեամբ կը ջանայ տառապելները լուսաւորել, յուսադրել, մըխիթարել ու սրտապնդել : Անիկա Յորին օրինակով, կը աշխատի մարդոց խորհուրդներուն, հաւատալիքներուն եւ վարքերուն մէջ փոփոխութիւն ներմուծել :

Յոր թէպէտեւ անհատ մըն է, բայց եւ այնպէս դանդուածի մը պատկերացումն է : Յորի պատմութեան մէջ, Իսրայէլի պատմութիւնը կը հայելիանայ : Այս գիրքը անտարակոյս ազգային տեսասահման (scope) ունի, թէպէտեւ անիկա կեղծանունի տակ Իսրայէլի մարմնացումը չէ : Այսու հանդերձ Իսրայէլ կրնայ ինքնիւր եւ իր պատմութեան ցոլացումը տեսնել անոր մէջ, եւ Յորի

կեանքէն օրինակ առնելով, իր սպառազայ պատմութեան վերջակէտը նախատեսել: Յորին հեղինակը տարբեր աչքով կը նայի ազգային պատմութեան վրայ, եւ պատմական դէպքերուն կուտայ տարբեր նշանակութիւն եւ մեկնութիւն:

Յորայ գիրքը առաւելապէս նշանակալից եւ արժէքաւոր ընծայող կէտը սա է թէ, Յոր մեծ փորձութեան մը մէջէն դուրս կուգայ յաղթական: Անիկա կսկծալի վիշտերու տակ, կ'ընկճուի, կը մաքառի, կը արտնջայ, կը բորբոքի, կը յուսալքուի, նոյն իսկ Աստուծոյ դէմ ասպարէզ կը կարգայ: Սակայն անոնց մէջ չի խորասուզուիր, եւ ժողովողի հեղինակին պէս անյուսութեան ու յոռետեսութեան (cynicism) մէջ չի թաղուիր: Անիկա ատեն մը կը տատանի հաւատքի եւ անհաւատութեան մէջ, բայց վերջապէս հաւատքը կը տանի յաղթանակը: Եւ Յոր փոթորկալից խաւարի մէջէն դուրս կուգայ ի հանդարտ լոյս:

Թէ Յորայ գիրքը ճիշտ է՞նչ դասեր եւ ճշմարտութիւններ կը սորվեցնէ, եւ կամ սորվեցնելու կը ջանայ, ասիկա որոշապէս ըսել կարելի չէ: Տարբեր մեկնիչներ, տարբեր եւ նոյն իսկ ներհակ մեկնութիւններ տուած են: Սակայն մեր խոնարհ կարծիքով, այս գիրքը կը ձգտի հետեւեալ ճշմարտութիւնները սորվեցնել մարդկութեան:

1. Ամէն վիշտ մեղքի արդիւնք չէ. ամէն ցաւ ամբարշտութեան պատիժը չէ: Կան շատ մը վիշտեր որոնք մեղքի պտուղներն են. սակայն կան վիշտեր ալ որոնք մեղքի հետ կապակցութիւն չունին: Անմեղ մարդու մը չարչարուիլն ալ կարելի է: Ուստի ամէն վիշտ Աստուծոյ տհաճութեան մատնանիշը չէ: Աստուած երբեմն մարդս նեղութեանց կ'ենթարկէ, պատժողական նպատակէ տարբեր նպատակներով:

Այս պատճառաւ, շիտակ չէ կեանքի բոլոր դէպքերը մէկ ակնոցի մէջէն դիտել եւ մէկ բացատրութեամբ բացատրել: Շիտակ չէ աղէտներու ենթարկուող ամէն անհատը յանցանքներով ամբաստանել: Նեղութեան մէջէն անցնող անձի հանդէպ մարդոց պարտականութիւնը ամբաստանել կամ խճրճել չէ, հապա կարեկցիլ է, ցաւակցութիւն ու բարեկամութիւն արտայայտել է: Դատելու գործը, ինչպէս նաեւ իշխանութիւնը, Տէրով կը պատկանի: Թէ որ մարդ մը չի կրնար կարեկցիլ, դոնէ լուծութիւն պահելու շնորհը ունենալու է: Յորին բարեկամները մըտադիր էին ցաւակցիլ, սակայն անոնց խօսքերը քննադատութեան ու դատապարտութեան ձեւը առնելով, մըտախիթարար ըլլալէ դադրեցան, և խոցոտող խայթոցներ եղան: Չկա՞ն շատ մը մարդիկ որոնց մխիթարանքը միայն աւելի խոցոտում կը պատճառէ վշտահարին: Վշտացեալը մխիթարելն ալ արուեստ մըն է: Յարմար տեղին յարմար խօսքը խօսիլ իմաստութիւն կը պահանջէ: Մարդ մը չի կրնար ճշմարտապէս ցաւակցիլ, մինչեւ որ ինքզինքը չի դնէ ցաւատանջին տեղ, եւ անոր ցաւերը չի կրէ իր մարմնոյն վրայ: Վշտակից ըլլալու պայմանն է վշտակիր ըլլալ:

2. Մարդս պէտք չէ որ սրտմտած ատեն Աստուծոյ հետ վիճի ու կռուի: ԶԱստուած դատաստանի կանչել յիմարական յանդգնութիւն է: Մարդս իր սահմանէն անդին կ'անցնի երբ կը յանդգնի զԱստուած հարցաքննել: Մարդս ինչպէ՞ս կրնայ ինքզինքը Աստուծոյ հետ հաւասար մակարդակի վրայ դնել. եւ կամ ինքզինքը Աստուծոյ հետ բաղդատութեան դնել: Աստուծոյ մեծութեան քով մարդ փոշի կը մնայ. Աստուծոյ կարողութեան քով մարդ ապիկար կը մնայ. Աստուծոյ իմաստութեան քով մարդ անգիտակ կը մնայ: Ո՞վ է մարդ որ Ամենակարո-

դին նախախնամութիւնը պարփակէ, անոր արարքները ըմբռնէ, անոր նպատակները հասկնայ: «Որչափ երկիրն Երկրէ բարձր է, այնչափ իմ ցամբաներս ձեր ցամբաներէն բարձր են, եւ իմ խորհուրդներս ձեր խորհուրդներէն, կ'ըսէ Տէրը» (Եսա. 55:9):

Աստուծոյ շատ մը գործքերը մարդու համար խորհրդաւոր են: Աստուծոյ երբեմն կարգադրութիւնները մեզի համար անբացատրելի են: Մենք չենք կրնար Աստուծոյ ամէն մէկ արարքը հասկնալ, քանզի ամէն բան տեսնելու եւ ամէն բան գիտնալու կարողութենէն զուրկ ենք: Այս պատճառաւ սխալ է խորհիլ թէ ինչ որ մեզի համար անբացատրելի է, բացատրութիւն չունի: Մեր չգիտցածը գիտցող մը կայ. մեր չհասկցածը հասկցող մը կայ: Թերեւս պիտի զայ օր մը երբ մենք ալ պիտի հասկնանք շատ մը խնդիրներ, որ այսօր հասկնալու անկարող կ'ըլլանք, եւ յայնժամ շատ մը գաղտնիքներ պիտի քողաղերծուին:

Հետեւաբար մարդս պարտի խոնարհիլ Աստուծոյ մեծութեան առջեւ, պարտի դուրս ծոել անոր իմաստութեան առջեւ, եւ պարտի համակերպիլ անոր կարգադրութիւններուն: Մարդս երբէք խրոխտ եւ ժպիրհ կեցուածք մը առնելու չէ Աստուծոյ առջեւ: Ընդհակառակը միշտ Աստուծոյ նախախնամութեան յանձնուելու է, եւ խոնարհ սրտով մը ըսելու է, «Դուն ինձմէ աղէկ դիտես, դուն ինձմէ աղէկ կ'ընես»: Նեղութեանց մէջ, մարդս փոխանակ տրտնջելու հաւանելու է, փոխանակ բողբոջելու յօժարակամութեամբ ըսելու է. «Աստուծոյ ձեռքէն միայն բարիքը ընդունինք, ու չարիքը չընդունինք»:

Մարդը դատել սխալմունք է, զԱստուած դատել մեզք է: Ուստի, երբոր ցաւերու մէջ կ'ընկղմիս, զԱստուած յանցաւոր մի հաներ, զԱյն անդթութեամբ եւ անի-

րաւութեամբ մի ամբաստաներ: Երբոր քու պաղատանքներդ չեն լսուիր, մի վճուեր թէ Աստուած աղօթքի չի լսեր: Երբոր զԱստուած կը փնտոես ու չես գտներ, մի պնդեր թէ «Աստուած չկայ»: Քու դատումդ յապաղեցուր: Ճամբուդ ելքին սպասէ: Համբերութեամբ անոր կամքին յանձնուէ: Եւ օր մը երբ թուխ ամպերը կը վերնան, պիտի տեսնես արդարութեան արեգակին տաքուկ ու սիրազեղ ճառագայթներուն վերափայլումը:

3. Կան նեղութիւններ, որոնց նպատակը պատժել չէ, այլ փորձել է: Աստուած երբեմն տուայտանքներով մեր հաւատքը կը փորձէ: Այս տեսակ փորձանքը իրական փորձութիւն է: Փորձութիւնը միջոց մըն է մարդուն իսկական էութիւնը եւ արժանիքը երեւան հանելու համար, փորձաքար մըն է մարդուն համբերութիւնը ու տոկունութիւնը չափելու համար: Մարդուն բուն նկարագիրը երբէք չգիտցուիր, մինչեւ որ փորձի չենթարկուի: Փորձութիւնը զմեզ կը ճանչցնէ մեզի: Յորին տառապանքը այս իմաստը կը կրէր: Անիկա կը վշտահարուէր փորձուելու համար: Անոր նկարագիրը կը մաղուէր: Անոր հաւատքը կը քննուէր: Անոր հանդուրժելու կարողութիւնը կը կշռուէր: Անոր արժանիքը կը չափուէր: Անոր կսկիծներուն մէջ աստուածային ցասումի հետքը չկար: Աստուած այս վիշտերու միջոցաւ դինք կը փորձէր եւ կը կրթէր: Յոր կշիռքի մէջ կշռուեցաւ եւ ըման գտնուեցաւ: Անիկա փորձութենէ դուրս եկաւ իբր աւելի բարձր, առաքինի, զօրաւոր, համբերատար, արդար մարդ մը: Յորին փորձութիւնը իրեն համար աճում եւ շինութիւն գործեց:

Ահա ասանկ՝ Աստուած երբեմն մեզ կը նեղէ փորձելու համար: Փորձութեանց միջոցաւ, նա կ'աշխատի մեզ մարդել, կրթել, գտել, զօրացնել: Երբոր մենք յաղթա-

կան դուրս կուգանք մեր փորձութիւններէն, օրհնուած ըլլալով դուրս կուգանք, քանզի ատով մեր հաւատքը աւելի կ'արմատանայ, մեր նկարագիրը կ'աղնուանայ, մեր զօրութիւնը կ'աւելնայ, և մեր հոգեւոր կեանքը կը բարձրանայ: Հետեւաբար պէտք է որ նեղութիւններու մէջ անհամբեր եւ տրտնջող ըլլանք, հասկա պէտք է որ համբերութեամբ եւ տոկունութեամբ մեր տաժանքներուն տոկանք: Թէ որ նեղութիւններէն ուրիշ բան չի շահինք բայց միայն համբերութիւն եւ տոկունութիւն, բաւականաչափ բարիք մը շահած կ'ըլլանք:

4. Արդարութեան հատուցումը ստոյգ է եւ անխուսափելի: Երբոր մարդ մը իր փորձութիւններուն կը տուկայ, եւ ցմահ Տէրոջ հաւատարիմ կը գտնուի, իւր վարձքը անկասկած պիտի ընդունի: Ասիկա բացարձակ է: Այս մասին մարդ երբէք բաղդ չի խաղար, վտանգ (risk) չառնէր: Արդարութեան վարձքը անհրաժեշտ է: Հատուցումը կրնայ յամենալ, սակայն երբէք չի կրնար ցրնդիլ: Աստուած վշտակիր հաւատացեալը անսպասուած արժանաւոր կերպով պիտի վարձատրէ ու պիտի փառաւորէ. անոր իրաւունքները պիտի հատուցանէ: Յոր համբերատար արդարութեան վարձքը վերջապէս ստացաւ: Անոր վարձքը աշխարհային եւ նիւթական հանգամանք առաւ: «Կենդանի եւ երջանիկ ու յաւիտենական յոյս» է զուրկ եղող անձի մը վարձատրութիւնը ի հարկէ այս ձեւը պիտի առնէր: Դժբաղդաբար, Յոր չի կրցաւ վարձքի մասին Հին Կտակարանի մարդոց ըմբռնումներէն բարձր հայեցակէտի մը տիրանալ: Անիկա չի կրցաւ հասնիլ Քրիստոնէական հաւատքի սա վեհապանծ ստուգութեան, թէ կեանքը մշտատեւ է, հոգին անմահ է, կեանքի տրամբ մահուամբ չի փակուիր, հատուցումը հանդերձեալին կրնայ վերապահուիլ, եւ թէ արդարութեան իրական

վարձքը հոգեւոր է: Յոր թէպէտեւ չի կրցաւ այս ճշմարտութիւնները լման հասկնալ, բայց հասկցաւ սաքանքը թէ արդարութիւնը անվարձ չի մնար:

Ամէն տեսակէտէ կ'արժէ արդար ըլլալ: Աստուծոյ հնազանդ ու հաւատարիմ ըլլալ պարասլ բան չէ: Տէրոջմէ վախնալ ու չարութենէ ետ քաշուիլ անօգուտ բան չէ: Աստուծոյ զաւակը ըլլալ, օգտակար է մարդուս թէ ներկային եւ թէ ապագային համար: «Աստուածապաշտութիւնը ամէն բանի օգտակար է»: Հաւատացեալին «ախտութիւնը պարասլ չէ Տէրոջմով»: Արդարութեամբ ապրողներուն համար, «արդարութեան պսակը» կ'սպասէ:

5. Վիշտը ժամանակաւոր է, ուրախութիւնը տեւական: Յոր ատենուան մը համար տառապեցաւ, սակայն յետ փորձութեան հրճուեցաւ, յետ տաժանքի հանգստացաւ: Վիշտերը մշտատեւ չեն, անձկութիւնները անվերջ չեն: Անոնք վերջակէտ մը ունին: Թէ որ համբերելու ըլլաս լաւագոյն օրեր պիտի տեսնես: «Համբերութեան վախճանը խաղաղութիւն է» կ'ըսէ Տաճկական առածը: Այս կեանքի մէջ դժբաղդութիւններ ու վայելքներ զօրուած են: Բնատի երբոր չար օրերու կը հանդիպիս, բարի օրերը մի մոռնար: Փորձանքներու մէջ, Աստուծոյ հին բարերարութիւնները միտքէդ մի հաներ: Սա բառերը հաւատացեալին ամէն օրուայ հանկերգը պարտին ըլլալ. «Ո՛վ իմ անձս, օրհնէ Տէրը, եւ անոր բոլոր բարերարութիւնները մի մոռնար» (Սաղ. 103:2): Թէ որ արեւը այսօր քու վրայ չի փայլիր, թերեւս վաղը կը փայլի: Թէ որ բաղդը այսօր քու երեսիդ չի ժպտիր, թերեւս վաղը կը ժպտի: Թէ որ Աստուած այսօր բարկացոտ կը երեւի, թերեւս վաղը բարեգութ պիտի երեւի:

Յոր իր ամենատաժանելի կսկիծներուն մէջ, երբոր Աստուծոյ հին բարերարութիւնները վերյիշեց, մխիթարուեցաւ ու յուսադրուեցաւ: Եւ ինքնիրեն խորհեցաւ, «Քերեւս անցեալին մէջ ինծի ողորմող Աստուածը, ապագային նորէն կ'ողորմի:» Այս յոյսը զայն սրտասնդեց: Եւ անոր այս յոյսը վերջապէս արդարացաւ:

Կեանքի տրամին մէջ տրտմութիւնը միայն անցաւոր ու դիպուածական միջադէպ մըն է: Յաւը առժամեայ է, բայց ցնծութիւնը մնայուն: Սուգը մէկ օրուան համար է, բայց բերկրութիւնը անթիւ դարերու համար: Աստուծոյ յետին նպատակը մեզ վշտացնել չէ, այլ երջանկացնել է: Եւ Աստուած մեզ կը վշտացնէ, որպէս զի ա'լ աւելի երջանկացնէ: Հաւատացեալի մը կեանքը ողբերգական արարուածով չի վերջանար: Քրիստոնէական կեանքի վերջին կայանը Գողգոթան չէ, բուրումնաւէտ պարտէզն է: Քրիստոնէութեան ամենամեծ օրը Աւագ Ուրբաթը չէ, Աւագ Կիրակին է: Քրիստոնէութիւնը պարտութեամբ չի վերջանար, յաղթութեամբ կը վերջանայ: Հետեւաբար, ցաւը ժամանակաւոր է, բայց երջանկութիւնը յաւիտենական: «Ան որ կը յաղթէ, անոր ուտել պիտի տամ կենաց ծառէն՝ որ Աստուծոյ դրախտին մէջ է» (Յայտ. 2:7):

6. Կեանքի խորհրդաւոր հարցերուն լուծումը ձեռք կը բերուի, ոչ թէ մտաւոր ուղիով, հասկա հոգեւոր ուղիով: Վիշտերու բացատրութիւնը կ'ստացուի ոչ թէ միաբով, այլ հոգիով: Մարդս անկարող է կեանքի շատ մը առեղծուածները իմացական որոնումով հասկնալու եւ մեկնելու: Յոր ջանաց իր վիշտերուն գաղտնիքները հասկնալ: Նա աշխատեցաւ իր ցաւերուն տրամաբանական պատճառները քննել: Սակայն որքան քննեց, այն-

քան աւելի դժուարութեանց մէջ մխրճուեցաւ, ու մտաւորապէս վրդովեցաւ եւ այլայլեցաւ: Այդ ուղղութեամբ անիկա չկրցաւ իր վիշտերու գաղտնիքներուն թափանցել, իր տառապանքներուն պատճառը խուզարկել: Բայց նա տարբեր շաւիղ մը գտաւ: Եւ այդ շաւիղը հաւատքի շաւիղն էր, անձնատուութեան ու վստահութեան ճամբան էր: Այս ճամբայով Յոր կրցաւ խաղաղութեան գաւառին հասնիլ: Այս ճամբան, թէպէտեւ իրեն անմիջական մըտաւոր գոհացում չի տուաւ, բայց հոգեւոր գոհացում տուաւ, եւ զինքը հանդէսեցուց: Յոր՝ այն նշանակէտին որ չի կրցաւ հասնիլ մտաւոր թռիչքով, հասաւ հոգեւոր խոյացումով: Յոր մանկական վստահութեամբ ինքզինքը Աստուծոյ յանձնելով, վիշտի սահմաններէն վեր համբարձաւ, եւ «Տէրոջմով ուրախ» ըլլալու հրճուանքը վայելեց:

Յորին փորձառութիւնը իրական փորձառութիւն մըն է, որ կը համապատասխանէ Քրիստոնէական փորձառութեան: Քրիստոնէան չի կրնար կեանքի առեղծուածները իմացականութեամբ լուծել ու վերլուծել: Վիշտերու բացատրութիւնը մտաւոր գետնի վրայ չի տրուիր: Գաղտնիքներու լուծման մէջ, հոգեւոր փորձառութիւնը մտաւոր պրպտումէն առաջ կուգայ: Մարդս վիշտերու գաղտնիքներուն մէջ չի կրնար թափանցել, մինչեւ որ նախ Աստուծոյ փառապանծ տեսիլքը չունենայ, եւ Աստուծոյ հետ շիտակ ու մտերմական յարաբերութեան մէջ չի մտնէ: Փրօֆ. Ուիլբըմ ձէյմզ խորաթափանց հասողութեամբ կը յայտարարէ, «Կրօնքը խանդավառ տեսիլքի խնդիր է, աւելի քան տրամաբանութեան» (a matter of passionate vision than of logic): Մարդ այս տեսիլքը ունենալէն վերջ, վիշտերու իմաստը կ'ըմբռնէ: Աստուածային լոյսը կեանքի իրադարձութիւններուն վրայ նոր

լոյս մը կը պիտի : Աստուծոյ ներկայութեան գիտակցութիւնը մտքին խաւարը կը փարատէ, ինչպէս որ կը փարատէ հողիին խաւարը : Նախախնամութեան կնճռոտ հարցերը տեսական բացատրութիւններով չեն լուծուիր : Տեսական բացատրութիւնը, եթէ երբէք գայ, վերջէն կուգայ, երբ մարդ յետադարձ ակնարկ մը կը սեւեռէ կեանքի դէպքերուն վրայ, եւ կը տեսնէ թէ Աստուած զինք ինչ ճամբաներէ անցուցած եւ ինչպէս առաջնորդած է : Հաւատքի սուրբ դժուարութեանց հանդոյցը կը կտրէ : Աստուծոյ յանձնուիլ՝ մարդու ներքին ալեկոծումները կը հանդարտեցնէ :

Մարդոց մեծագոյն դժուարութիւնը մտաւոր չէ, հասարակ հոգեւոր է : Եթէ մարդիկ հոգեւորապէս ուղղուին եւ Աստուծոյ հետ իրենց յարաբերութիւնը շտկեն, անոնց մտաւոր դժուարութիւններուն մեծագոյն մասը պիտի հարթուի : Մարդ իր մտաւոր դժուարութիւնները լուծելու աշխատելէն առաջ իր հոգեւոր դժուարութիւնները լուծելու է : Տրամաբանական ընթացքը սա կարգով է . ոչ թէ նախ մտային կնճիռներու հարթում եւ ապա վրտասահութիւն, հասարակ նախ վստահութիւն, եւ ապա մտաւոր կնճիռներու հարթում : Աստուծոյ ճանաչումը շատ մը կնճիռներ կը վերջացնէ : Աստուծոյ գիտութիւնը շատ մը մղձաւանջները կ'անյայտացնէ : Աստուած է բոլոր առեղծուածներու դուռը բացող բանալին : Առանց Աստուծոյ մարդ օդին մէջ կը մնայ : Աստուծոյ վստահող մէկը ամբողջով վէմի վրայ կը կայնի :

Ուրեմն, տառապանքներու մէջ քու ընելիքդ Աստուծոյ դէմ նեղանալ եւ ցաւերուդ պատճառները հետազօտել չէ, այլ նախախնամական կարգադրութեան յօժարակամօրէն յանձնուիլ, եւ Աստուծոյ հանդէպ վստահող ու հնազանդ դիրք մը գրաւել է : Մրդողութեան ու ճրգ-

նումի ճամբով քու անձկութիւններէդ չի պիտի ազատուիս, բայց անձնատուութեան ու հպատակութեան ճամբայով, քու բեռներէդ պիտի ազատուիս :

7. Աստուած մարդուն համար ստիպողականութիւն է : Մարդ Աստուծոյ սէտքութիւն ունի : Մարդուս կեանքը Աստուծմէ առկա է : Մարդ առանց Աստուծոյ չի կրնար ապրիլ : Մարդս Աստուծմէ չի կրնար անջատուիլ : Մարդու սրտին խորութիւններուն մէջ անշիջելի տենչանք մը կայ Աստուծոյ համար : «Ինչպէս եղբրուն ջուրի վտակներուն կը փափաքի, այնպէս ալ» մարդու հոգին Աստուծոյ կը փափաքի : Մարդ կ'ղգայ իր բացարձակ կարօտութիւնը առ Աստուած :

Յոր՝ սաստիկ տաժանքներու մէջ, Աստուծոյ դէմ բողոքեց ու պոռպուց : Իր հաւատքը խորտակուելու աստիճան սասանեցաւ : Սակայն նա չի կրցաւ իր յարաբերութիւնը բոլորովին խզել Աստուծոյ հետ . նա չի կրցաւ աստուածային հաւատքի թելը կտրել : Աստուծմէ բոլորովին անջատուելու խորհուրդը զինք արհաւիրքով համակեց : Յոր ինքնիրեն խորհեցաւ . «Սեպէ թէ զԱստուած ուրանամ, սեպէ թէ հաւատքս խորտակեմ : Հետեւա՞նքը : Խոր մ'իջութիւն, բզկտող առանձնութիւն, քառասային խառնակութիւն, ահաւոր անյուսութիւն : Նոյն իսկ այս տեսակ մտածմունքի մը կարելիութիւնը, Յորը սոսկումով սարսեց : Եւ Յոր ինքնիրեն ըսաւ . «Ոխակալ ու անիրաւ Աստուած մը իսկ ոչինչէն նախընտրելի է : Չեմ կրնար առանց Աստուծոյ ըլլալ : Թէեւ անիկա զիս սպաննէ, ես կրկին անոր պիտի յուսամ :» Յոր Աստուծմէ չի կրցաւ զատուիլ : Անիկա ժամանակ մը տարուբերուելէ յետոյ, նորէն Աստուծոյ կառչեցաւ : Եւ այս յամառ կառչումը, զինք վերջապէս խաւարէն լոյս» և մահէն ի կեանք փոխադրեց :

Յորին այս փորձառութիւնը դարձանալիօրէն կը համաձայնի, Հայկական տարագրութեանց կրակներուն մէջէն անցնող ազգակիրցներէս մէկուն փորձառութեան, որ անչուշտ նմոյշն է ուրիշ շատերուն: Այս բարեկամս ինծի պատմեց ու ըսաւ. «Տարագրութեան ատեն սոսկալի նեղութիւններ կրեցի: Աստուծոյս սրբողեցայ: Անոր զէմ ըմբոստացայ եւ զայն լքել ուզեցի: Բայց չի կրցայ անկէ զատուիլ: Առանց Աստուծոյ չի կրցայ ըլլալ: Եւ կրկին անոր բազուկներուն մէջ նետուեցայ:»

Այո՛, մարդ առանց Աստուծոյ չի կրնար ըլլալ: Նա Աստուծոյ կը կարօտի: Մարդ տանջանքներու մէջ խսկ կ'զգայ թէ Աստուած է բարիքներուն զերագոյնը: Անկէ դուրս մարդուն համար հանգստութիւն եւ երանութիւն չկայ: Եւ մարդ հոս ու հոն իր դլուխը զարնելէ ետքը, վերջապէս Աստուծոյ թեւերուն տակ ապաստան կը փրնտուէ:

Յորին տանջանքները զինք Աստուծոյ մղեցին: Յոր տառապանքներու միջոցաւ Աստուծոյ աւելի մօտեցաւ: Եւ անիկա հուրերուն մէջէն ոչ միայն զԱստուած գտաւ, հապա լաւագոյն ու փառաւորագոյն Աստուած մը գտաւ: Վիշտերու մէջէն, Յոր աստուածային աւելի բարձր ու վսեմ տեսիլքի մը տիրացաւ: Անոր հաւատքը աւելի բիւրեղացաւ եւ արմատացաւ: Տր. Ճօզէֆ Ծ. Նիութըն կ'ըսէ Յորին մասին, «Եթէ Աստուծոյ փորձառութիւնը լոկ աբեւալոյսին պարփակուած մնար, նա մինչեւ վերջ իր գողտրիկ պղտիկ հաւատալիքը պիտի պահէր, շատերուն պէս օգտակար եւ ուղիղ կեանք մը ապրելով, եւ երբէք չպիտի կռահէր թէ ի՞նչ դանձեր մթերուած են անհով բարձրութիւններու եւ անալիք խորութիւններու մէջ: Առանց այս ողբերգութեան, անիկա երբէք պէտքութիւնը պիտի չզգար ազնուագոյն հաւատքի մը, եւ ոչ ալ զայն

պիտի շահէր: Կատաղի դէպքեր խարազանեցին իր հաւատքը եւ զայն կոտրեցին, ստիպելով զինքը որ իր կեանքին համար մաքառի, բայց անիկա այս տաժանելի դէպքերէն աւելի բարձր ու յայտնարար (revealing) հաւատք մը շահեցաւ, որ իր կարգին՝ կեանքի մթին իրականութիւնը ստիպեց որ իրեն լոյս հայթայթէ:» Երանի՛ թէ ամէն մարդու վիշտերուն մէջէն ծնանէր Աստուծոյ նոր ու վսեմ տեսիլքը, եւ ամէն ոք հասնէր մտքի անդորութեան եւ հոգիի «խաղաղութեան որ ամէն միտքէ վեր է:»

Աստուած է բոլոր գաղտնիքներու բանալին: Անով խնդիրներ կը լուծուին, դժուարութիւններ կը հարթուին: Անիկա ամէն «տէրտ»ի դարձանն է, ամէն վէրքի բալասանը: Աստուած է խեղճին օգնականը, տկարին դօրա՛վիզը, տատանեալին վէմը, տրտմեալին ուրախութիւնը, յուսահատին յոյսը, խռովեալին խաղաղութիւնը: Սբ. Օգոստինոսի ըսածին պէս, «Իմ հոգիս անհանգիստ է, մինչեւ որ Քու մէջդ չի հանգչի:»



ԱՍՏՈՒԾՈՅ ՑԱԻԸ

«Իրաւցնէ անիկա մեր ցաւերը
վերցուց, ու մեր վիշտերը իր վրայ
առաւ.»

ԵՍԱ. ԾԳ. 4.

ԵՍՍՅԵԱՅ գրքին 53-րդ գլուխը, Հին Կտակարանի բարձրագոյն կատարը կը ներկայացնէ: Ատոր մէջ, Մարգարէն՝ անդուգական ճարտարութեամբ և հիասքանչ նկարումներով կը պատկերացնէ արդարին փոխանորդաբար կրած նեղութիւնները: Այս հատուածով անիկա կը պարզէ ցաւերու բարձրագոյն արտայայտութիւնը: Այս նկարագրութիւններով, Մարգարէն՝ տառապանքի մասին հինէն բոլորովին տարբեր հայեացք մը մէջտեղ կը դնէ, նոր բացատրութիւն մը կ'առաջադրէ: Ցարդ տիրող զաղափարը սա էր թէ ամէն ցաւ յանցանք մը կը մատնանչէ: Սակայն, հոս Մարգարէն կը վարդապետէ թէ արդարն ալ կրնայ տառապանք կրել, ոչ թէ իր յանցանքներուն համար, հասցաւորներու յանցանքներուն համար, եւ անոնց անօրէնութեանց իբր փոխարէն: 1Այս տեսակ ցաւերու նպատակը չէ պատժել, բնդհակառակը պատիժը վերցնել:

Անտարակոյս, սլատմական դէպքերն էին որ Մարգարէն այս աննախընթաց ըմբռնումին մղեցին: Մարգարէն բորբոքած զգացումներով ակննատեսը եղաւ իր աղբին սրտակեղեք ընկճումին եւ խոշտանգումին. անիկա անհուն ցաւով դիտեց անոնց խոստացեալ երկրէն արտաքսումը եւ անոնց հարստութեանց փճացումը. անիկա ապշութեամբ տեսաւ խեղճերու կեղեքումը եւ անմեղներու ու հաւատացեալներու անարժան տաժանքը: Եւ անիկա անսասան հաւատքով կառչելով Աստուծոյ անդրդուելի արդարութեան եւ ողորմածութեան համոզումին, վերջապէս առաջնորդուեցաւ սա եզրակացութեան թէ վիշտերու մէջ պատուհասէն տարբեր նպատակ մը գըտնուելու է, նախախնամութեան հեռահաս ծրագրին մէջ: Այս խորհուրդները հուսկ յետոյ սա համոզման մէջ բիւրեղացաւ թէ արդարը անօրէնին տեղ կը տառապի փոխանորդաբար:

Եւ Մարգարէն իր այս նոր համոզումը ներկայացուց սա ներշնչեալ բացատրութիւններով. «Անիկա մարդոցմէ անարգուեցաւ ու երեսէ՛ ձգուեցաւ. վիշտերու տէր եւ ցաւերու տեղեակ եղաւ: ...Իրաւցնէ անիկա մեր ցաւերը վերցուց ու մեր վիշտերը իր վրայ առաւ. եւ մեմք գանիկա վիրաւորուած, Աստուծմէ՛ գարնուած ու չարիքի հանդիպած սեպեցիմք: Բայց անիկա մեր մեղքերուն համար վիրաւորուեցաւ, եւ մեր անօրէնութիւններուն համար ծեծուեցաւ. մեր խաղաղութեան պատիժը անոր վրայ եղաւ, եւ անոր վերքերովը մեմք բժշկուեցանք» (Ես. 53: 3-5):

Մարգարէն երբ այս խօսքերը կ'արտասանէր, անտարակոյս կը խորհէր իր աղբին արդար հատուածին վրայ. անիկա աքսորութեան մէջ ալ Տէրոջ հաւատարիմ մնացող իր հաւատացեալ ազգակիցները կ'անձնաւորէր

«Տէրոջ վշտակիր ծառայ»ին մէջ: Իր ըմբռնումով, իր աղբին աստուածավախ հատուածը երկունք կը քաշէր, անօրէն հատուածին համար:

Այս վարդապետութիւնը շատերուն զարտուղի կ'երեւի, օրէնքի եւ արդարութեան սկզբունքներուն հակառակ ըլլալ կը թուի: Ինչո՞ւ համար անսլարտ մէկը սլարտաւորին բեռը կրէ. ինչո՞ւ համար անմեղ ոմն յանցաւորին պատիժը վերցնէ: Ասիկա անիրաւութիւն չէ՞, անխղճութիւն չէ՞, արդարութեան խափանումը չէ՞: Չէ՞ մի որ ամէն մարդ իր անօրէնութիւններուն համար պիտի պատժուի, եւ ով որ ազոխ ուտէ, անոր ակռաները պիտի առնուին:

Այս հարցումին պատասխանը պէտք է տրուի ոչ թէ տեսական տրամախոհութիւններով, հասպա դրական եղելութիւններով: Մենք որքան ալ ուղենք կամ չուղենք, որքան ալ հաւանինք կամ չհաւանինք, տիեզերքի անօրինութեան մէջ կը տեսնենք սա կանոնին զործադրութիւնը թէ անմեղը կը տառապի յանցաւորին տեղ եւ անոր փոխարէն, արդարը կը կրէ մեղաւորին պատուհասը: Այս իրողութիւնը երեւոյթապէս անարդար կ'երեւի, սակայն անհասկնալի եւ անբացատրելի ալ չէ:

Մարդկային պատմութիւնը կը փաստէ սա ճշմարտութիւնը թէ ցեղին բարօրութիւնը եւ յառաջդիմութիւնը ձեռք բերուած է, ընտիր, վեհանձն, անձնուրաց անհատներու ինքնանուէր զոհարերութիւններով եւ զրկանքներով: Յեղին ազատագրութիւնը ապահովուած է, ազնիւ եւ այլասէր հոգիներու կամաւոր երկունքներով: Կրնա՞ք ինծի ցուցնել պարագայ մը ուր ազգ մը մէկ քայլ յառաջ դնացած ըլլայ, առանց մէկու մը ծանր աշխատութեան եւ անձնագոհութեան: Ազգերու վեհօգի ու հազուադիւրս զաւակներն են որ հանապազ կը չարչար-

ուրն իրենց ազգին համար, եւ իրենց ցաւերով կը զարգացնեն ու կը բարձրացնեն իրենց ցեղը:

Մարդուն մէջ այլոց բարիքին համար զոհուելու բընազգը կայ, որ մարդկային բնազգներու մէջ ազնուագոյնն է: Օրինակի համար, կամաւոր մարտիկ մը կը զինուորագրուի իր հայրենիքի զօրաբանակին մէջ, եւ տուն, սիրելիներ, հանգիստ ու վաստակ ետեւ ձգած, կը վազէ դէպի պատերազմի դաշտը: Ինչո՞ւ համար: Խնճոյքի՞ համար: Ո՛չ, ո՛չ, մարտնչելու համար, վերաւորուելու համար, իր արիւնը թափելու համար: Անիկա հերոսաբար կը կռուի, իր սիրելիներու ապահովութեան համար, իր հայրենիքի պաշտպանութեան համար: Սակայն ինք պատերազմէն ի՞նչ կը շահի: Ոչինչ: Անիկա շահ չունի, միայն կորուստ ունի: Սակայն անիկա մեծագոյն կորուստն ալ հաշիւի չառններ, եւ կը յօժարի մեռնիլ, որպէս զի ուրիշներ ազատ սպրին: Ճշմարիտ հայրենասէր մը երբէք հաշուական ու շահախնդիր չըլլար: Զինուոր մը պաղ տրամաբանութեամբ կրնայ խորհիլ. «Ես մեռնելէն վերջը եթէ հայրենիքս ազատ պիտի ըլլայ, ինձի ի՞նչ օգուտ: Ինչո՞ւ համար ես զոհուիմ բանի մը համար, զոր ես չպիտի վայելեմ»: Սակայն կամաւոր մը այսպէս չի խորհիր: Կեանքը պաղ տրամաբանութեամբ չի գործեր: Բնազգը եւ յօյրը կը զերակչոեն չոր դատողութեան, եւ կամաւորը կատաղած առիւծի մը նման, հրացանը ուսին՝ ռազմադաշտը կը սուրայ, երբ հայրենիքին կոչը կը հասնի իւր ականջին:

Ու՞ր պիտի մնային պետութիւններ, եթէ կամաւոր ռազմիկներ չի գտնուէին: Ինչպէ՞ս կարելի պիտի ըլլար ազգերու ազատութիւնը եւ գոյութիւնը պահել առանց անձնուէր ու անվեհեր պաշտպաններու: Յեղին քաղաքական ազատագրութիւնը միշտ ձեռք բերուած է արիւ-

նահեղութեամբ: Ժողովուրդներ թօթափած են բռնապետական իշխանութեանց ծանր լուծը, հեղեղանման արիւն թափելով: Իրիտանական ժողովուրդը տարիներով մաքառեցաւ ու տառապեցաւ մինչեւ որ շահեցաւ իր ժողովրդային իրաւունքը: Գաղղիացիք դետի նման արիւն հոսեցուցին, մինչեւ որ հաստատեցին հանրավարական դրութիւնը: Ամերիկան արիւնաքամ կռիւներ մղեց, մինչեւ որ ձեռք բերաւ իր ինքնավարութիւնը: Անիկա անթիւ կեանքեր ու գանձեր զոհեց մինչեւ որ հաստատեց խափշիկներու շղթայազերծումը: Ամէն մէկ ազգ իր ազատագրութիւնը շահած է, թէ արտաքին եւ թէ ներքին թշնամիներէն, կարմիր արիւն թափելով, հազարաւոր կտրիճներու կեանքերը փրկանք տալով:

Ուր որ հանրային արտօնութիւններ շահուած են, շահուած են պատարագուած կեանքերու շնորհիւ: Ուր որ ազգային դաղափարականներ իրագործուած են, իրագործուած են հրկիզուած կեանքերու շնորհիւ: Երբ դաղափարապաշտ մը դաղափարի մը համար այրելով կը մոխրանայ, անոր բոցերէն հազարներ կը փռնկին ու կը տողորուին: Նահատակի մը մահը, հազարաւոր դաղափարակիցներու ծնունդ կուտայ: Երբոր Չինաստան կը ջանար Տօլակըր թագուհիի բռնապետութեան շղթաները կտտրել, երկու երիտասարդ Չինացիներ հոգեւին կ'աշխատէին այս նպատակի իրագործման համար: Այս առաջնորդներէն մէկը վարպետ դրող ու խօսող էր, որ կըրնար ժողովուրդները համոզել ու յուզել: Միւսը անազմուկ՝ բայց գործ տեսնող գործիչ մըն էր: Թագուհին վտանգաւոր համարեց այս գործիչներու գոյութիւնը, եւ հրամայեց որ անոնք ձերբակալուին ու սպաննուին: Անոնց սպաննութիւնը պիտի կատարուէր չարչարալից կերպով: Անոնք դետինը պիտի պառկէին, անոնց ձեռ-

քերն ու ոտքերը ցիցերու պիտի կապուէին, եւ երկու կողմը ծունր դրած դահիճներ զանոնք մեղմօրէն պիտի ծեծէին պղտիկ արմաւենիէ դաւազաններով: Անոնք առնուազն 24 ժամ պիտի իջեցնէին այս մեղմ հարուածները, մինչեւ որ զոհերը անշնչանային: Այս երկու քաղաքական ամբաստանեալները, լարուած հրէշային դաւը իմանալով, փախուստ տուին ու ծովեղերըը հասան, ուր նաւ մը իրենց կ'սպասէր, զիրենք ապահով տեղ մը փոխադրելու համար: Նոյն պահուն՝ գործիչը դարձաւ միւս բարեկամին, եւ ձեռքը երկնցնելով ըսաւ, «Մնաս բարի:» «Յերթաս բարի», ըսաւ միւսը զարմացումով, «խնդրեմ, ի՞նչ ըսել կ'ուզես:» «Ըսել կ'ուզեմ», պատասխանեց անիկա, «թէ դուն ճարոն երթալու ես: Եւ հոն այդ ապահովութեան մէջ, նկարագրելու ես Զինաստանի փտութիւնները: Քու գրիչդ ներշնչուած է: Դուն կրնաս մարդոց հասկցնել: Իայց ես ետ կ'երթամ, յօժարակամ անձնատուր ըլլալու: Յայնժամ դուն կրնաս քու գրիչդ իմ արիւնիս մէջ թաթխել, եւ աշխարհին ծանուցանել թէ մենք չենք վախնար մեր կեանքերը վար դնել մեր հաւատացած բաներուն համար:»

Ազգերու հասարակական կեանքին մէջ ի՞նչ զարգացում, ի՞նչ բարեշրջութիւն որ յառաջ եկած է, ազգանուէր անհատներու անխոնջ ջանքերով եւ զոհաբերումներով յառաջ եկած է: Զուրը իր ակօսէն վեր չի բարձրանար՝ եթէ զայն վեր բարձրացնող արտաքին ուժ մը չըլլայ: Նմանապէս ազգ մը իր բնական վիճակէն վեր չի բարձրանար, եթէ զայն վեր բարձրացնող բարձր ու անձնուէր առաջնորդներ չի գտնուին: Ազգերու, ինչպէս նաեւ անհատներու կեանքերուն մէջ, ամէն մէկ յառաջխաղացում, անհատական համաչափ զոհաբերութիւն կ'ենթադրէ:

Երբոր կ'անցնինք դիտական ասպարէզը, հոն ալ կը տեսնենք միեւնոյն կանոնին ներդրածութիւնը: Գիտութիւնը միշտ կը զարգանայ գիտնականներու անձնագոհութիւններով: Ինչպէս որ քաղաքական աշխարհը, նոյնպէս ալ դիտական աշխարհը ունի իւր քաջարի հերոսները, իւր բարեխիշտտակ նահատակները: Գիտնականներ անձնուիրաբար իրենց կեանքերը վար կը դնեն, որպէս զի գիտութիւնը իւր մեծ յաղթանակները տանի: Առանց անհաշիւ ջանքի ու զոհաբերութեան, գիտութիւնը երբէք չպիտի յառաջանար, իր օգտաշատ արդասիքներով երջանկացնելով ընդհանուր ցեղը:

Մեծ գիտնականներ սովորաբար իրենց գիտական փորձերը կը կատարեն առանձնութեան մէջ, իրենց կըդդիացեալ աշխատանոցներուն (laboratory) մէջ: Եւ աշխարհ չի գիտեր թէ անոնք որքա՞ն անձկութիւն կը կրեն իրենց խուզարկութիւնները յառաջ տանելու համար: Անոնց անձնագոհութիւնները շատ անգամ իրենց նահատակութենէն ետքը երեւան կ'ելլէ, եւ աշխարհ երախտագիտութեան ու յարգանքի իբր արտայայտութիւն՝ յիշատակի կոթողներ կը կանգնէ անոնց անուան, երբ անոնց աճիւնները կը փտտին հողին ներքեւ: Անոնք կը ցանեն եւ աշխարհ կը հնձէ. անոնք կը զոհուին եւ աշխարհ ճոխագոյն կեանքի կը տիրանայ:

Աշխարհի ամէնէն կարեւոր եւ օրհնաբաշխ գիւտերը հնարողներէն շատեր, իրենց աշխատութեանց պտուղները երբէք չեն վայելած, եւ յաճախ թշուառութեան մէջ մեռած են: Քէփլը իւր կեանքը նուիրեց սաւառնակներու օրէնքները գտնելու: Անիկա եղաւ օգանաւորդութեան մեծ ոահվիրան. բայց ինք մեռաւ ծայրայեղ աղքատութեան մէջ: Ուաթս՝ որ շոգիի մեքենային հնարիչը քղաւ, իր կեանքին մէջ ահազին դժուարութեանց եւ յու-

սահատութեանց հանդիպեցաւ: Բօպէրթ Մայլըր, որ դը-
տաւ ուժի պահպանութեան (conservation) բնական օրէն-
քը, ծաղրանքով ու նախատինքով ողջունուեցաւ իր ժա-
մանակակիցներուն կողմէն: Ֆէրէտէյ՝ որ ելեկտրական
հոսանքները խուզարկեց, դնահատութեան չարժանացաւ՝
մինչեւ որ կէս դար անցաւ: Եւ իր քառասնեակ տարիքին
մէջ գլխու պտոյտէ ու ցաւէ տառապելով մահացաւ:

Գիտական ռազմադաշտին վրայ նահատակուողներուն
թիւը լեգէոն է: Եթէ ժամանակինս ներէր, կրնայինք եր-
կարածիք ցանկ մը ներկայացնել: Հոս կը բաւականա-
նանք մի քանի անուններու յիշատակութեամբ: Տօք. Ֆը-
րէտէրիք Հէնրի Պէթճըր, Ք-ճառագայթի մէջ կատարած
իր կարեւոր խուզարկութեանց համար, իր մատներէն
եօթը հատը դո՛ւ տուաւ, եւ տակաւին յամառօրէն կը հե-
տապնդէ իր բազմօգուտ հետազոտութիւնները: Տօքթ.
Միհրան Գասսապեան իսկապէս իր կեանքը դո՛ւնեց Ք-ճա-
ռագայթի փորձարկութեանց ասպարէզին վրայ: Չինաս-
տանի մէջ գործող Միսիոնար բժիշկ մը, մտադրեց դար-
ման մը գտնել աղիքի որդին (hugworm) համար, որոնց-
մէ Չինացիները մասնաւորապէս կը տառապին, տարեկան
բիւրաւոր զոհեր տալով: Սոյն բժիշկը այս որդին վրայ
քննութիւններ կատարելու համար ուրիշ միջոց մը չգտաւ
զայն Ամերիկա ներածելու, եւ անոնցմէ մի քանի հատ
կամայաբար կուլ տուաւ, որպէս զի հոս իր վրայ փորձեր
կատարելով, այս ահռելի չարիքին առջեւը առնելու մի-
ջոց մը գտնէ:

Իկնաս Ֆիլիփ Սէմըրվայս, Հունգարացի բժիշկ մը,
գիտեց որ ծննդաբերութեան առթիւ հազարաւոր դժբաղդ
մայրեր տենդէ բռնուելով կը մեռնին: Մինչեւ 1846 թը-
ւականը, Վիէնայի ծննդաբերական հիւանդանոցներուն

մէջ, որ ամէնէն խոշորը եւ նշանաւորն է ամբողջ Եւրո-
պայի մէջ, ամէն հինգ մօրմէն մէկ հատը, նոյն իսկ երե-
քէն մէկը կը մեռնէր: Տօք. Սէմըրվայս երկար քննու-
թիւններէ յետոյ, յանդեցաւ սա եղրակացութեան, թէ
այս մահացու տենդը հիւանդին կը փոխանցուի բժիշկ-
ներու անմիջորպաղերձ ձեռքերէն: Այս հուշակաւոր բը-
ժիշկը երբոր այս տենդի վարակիչ ծագման մասին առա-
ջին անգամ իր տեսութիւնները հրատարակեց, իր ար-
ուեստակիցները զինք ծաղրեցին, եւ ամէն կողմէն իր
վրայ բուռն յարձակումներ գործեցին: Սակայն բժշկա-
կան աշխարհը վերջապէս ստիպուեցաւ ընդունիլ անոր
հաւաստումներուն ճշգուծութիւնը: Բայց այս մեծ գիւտին
տէրը, իր կրած անվերջ հալածանքներուն իբր հետե-
ւանք, մտային խանդարման ենթարկուեցաւ, եւ յիմա-
րանոցի մը մէջ արգելափակուեցաւ, եւ անողոք բաղդի մի
հեղնական արուեստակութեամբ, տասն չորս օր յետոյ
մեռաւ նոյն ինքն այն տենդով (septic fever) որուն առ-
ջեւը առնելու համար իր կեանքի բոլոր օրերուն մէջ մար-
անչած էր, մատին վրայի պղտիկ մէկ վէրքէն վարակ-
ուելով եւ թունաւորուելով:

Ահա այսպէս, գիտութեան զարգացման համար,
գիտնականներու կեանքեր զոհուած են իբր նոխազ, որ-
պէս զի անոնց անձնազոհութիւններով աշխարհ բարելա-
ուի: Արդարեւ, անոնք աշխատած են, մինչդեռ ուրիշներ
անոնց աշխատանքին մէջ մտած են:

Այն սկզբունքները որոնք կը տիրեն քաղաքական եւ
գիտական մարդերու մէջ, առաւելապէս կը տիրեն բա-
րոյական եւ հոգեւոր ոլորտներու մէջ: Բարոյական աս-
պարէզին մէջ, առաքինիներ կը տառապին անօրէններու
համար: Հոգեւոր աշխարհին մէջ, անմեղներ կը տուայ-
տին մեղաւորներնեւ տեղ: Արդարներուն վրայ կը

դրուելի, անարդարներուն լուծին մէկ մասը: Եւ հաւատացեալներու տաժանքներով, անհաւատ աշխարհին բեռը կը թեթեւնայ, պատիժը կը մեղմանայ: Բարիներու անձնուրացութեանց ի տես, Աստուած կը գթայ չարերու վրայ: Բարեպաշտներու հաւատքին ի տես, Աստուած կ'ողորմի անհաւատներուն: Աստուծոյ զաւակներուն հրեշտանդութեան համար, Աստուած կը ներէ ըմբոստներուն: Իրաւունք սիրողներու արդարութեան սիրոյն, Աստուած կը խնայէ անիրաւներուն եւ անդգամներուն:

Սակայն Աստուած միայն իր հաւատարիմ զաւակներուն վրայ չի դներ փոխանորդային տառապանքի լուծը: Աստուած իր վրայ կ'առնէ տառապանքի ամենամեծ բաժինը: Արարիչն է տիեզերքի մեծագոյն տառապողը: Ամենակալն է տառապողներու գլխաւորը: Անիկա ցաւատանջ մարդկութեան հանդէպ անտարբեր չէ: Անիկա տիեզերքէն դուրս քաշուած չէ: Անոր կեանքը կենսականօրէն կապուած է մարդոց կեանքերուն: Անոս զգայուն ու փափախուն սիրտը, յողնած ու բեռնաւորուած էակներու հանդէպ անփոյթ եւ անդգայ չէ: Աստուած վշտակից է համայն վշտակիր մարդկութեան:

Գարեւի չէ որ իրողութիւնը ասկէ տարբեր ըլլայ, եթէ Աստուծոյ էութիւնը սէր եւ ողորմութիւն է: Սէրը անպատճառ կը տառապի, երբ սիրոյ առարկան նեղութեան մէջ կը տեսնէ: Աստուած մարդոց սիրող ու բարեխնամ Հայրն է: Այս իրողութեան իբր յայտարար, Նա «իր արեւը կը ծագեցնէ թէ՛ չարերուն եւ թէ՛ բարիներուն վրայ, եւ անձրեւ կը զրկէ թէ՛ արգարներուն եւ թէ՛ մեղաւորներուն վրայ:» Ինչպէս որ երկրաւոր հայր մը իր զաւակներուն վրայ կը գուրգուրայ, նոյնպէս ալ երկնաւոր Հայրը իր զաւակներուն վրայ կը գուրգուրայ: Երբոր անոնցմէ մէկը անձկութեան մէջ կը տեսնէ, անոր հետ

կը նեղուի. երբոր տանջանքի մէջ կը տեսնէ, անոր հետ կը կսկծայ. երբոր անոնցմէ մէկուն ըմբոստութիւնը կամ մեղանշումը կը տեսնէ, անոր համար կը կեղեքուի. երբոր անոր չարութիւնը կը տեսնէ, անոր համար կը սրտմտի: Հունաւոր մարդուն ցաւը շատ պզտիկ է, Անհուն Հոգիի ցաւին քով:

Եթէ «Անառակ Որդի»ին առակը մեզի ոեւէ բան կը սորվեցնէ, կը սորվեցնէ այս դասը թէ Աստուծոյ սիրտը անհուն եւ անխափան սիրով կը փափախէ իր զաւակին համար, նոյն իսկ իր ապերախտ ու անհնազանդ եւ ապիրատ զաւակին համար, եւ թէ անիկա զթոտ զգացումներով կը հետեւի իր մոլորեալ զաւակին ծուռ քայլերուն, եւ երբ անիկա ապաշխարելով կը վերադառնայ, զայն կը ողջագուրէ անհասկնալի փափկութեամբ ու ներողամտութեամբ: Ո՞ր հայր կայ՝ որ իր որդւոյն տրտմութեանց կարեկից եւ ցաւերուն բաժնեկից չըլլար:

Անգամ մը տղայ մը մեղադրելի յանցանք մը դործած էր: Անիկա երեք օր դպրոցէն փախած էր խարելով: Հայրը տեսաւ թէ տղան պէտք է պատժուի: Ուստի զայն իր քով կանչեց եւ անոր ըսաւ. «Որդիս, երեք օրէ ի վեր քու կեանքդ դործնական ստութիւն եղած է: Ասոր համար պատիժի արժանի ես: Իբր պատիժ, երեք դիշեր պարտիս առաստաղին ներքեւ առանձին պառկիլ:» Առաջին դիշերը, տղեկը ձեղնայարկը զրկուեցաւ առանց լոյսի եւ մէկ վերմակով: Սակայն, կերպով մը, տղուն մեկնելէն յետոյ, տարօրինակ լուծութիւն մը իջաւ հօր եւ մօր վրայ: Անոնք ճրագին երկու կողմը նստած էին, սակայն իւրաքանչիւրը կը տեսնէր թէ միւսը չէր կարդար: Ուշատես, անոնք պառկելու համար ննջասենեակին քաշուեցան: Ժամանակը անցաւ, բայց անոնց աչքը քուն չի մտաւ: Վերջապէս հայրը խզեց տիրող խոր լու-

Թիւնը՝ ըսելով, «Մայրիկ, դուն չես քնանար:» «Ո՛չ, հայրիկ,» պատասխանեց նա, «չեմ կրնար քնանալ: Բայց դուն ալ չես քնանար:» «Ո՛չ, չեմ կրնար քնանալ: Մութ ձեղնայարկին մէջ առանձին պառկող խեղճ տղուն մասին կը խորհիմ. եւ ատոր չեմ կրնար դիմանալ: Ես անոր քով պիտի երթամ, մայրիկ:» Եւ ահա հայրը ձեղնայարկը ելաւ, եւ հեծեծացող արգահատելի տղեկին քով կծկուեցաւ, եւ հայր ու որդի իրարու փաթթուեցան, եւ մինչեւ առտու միատեղ քնացան: Երկու գիշերներ եւս հայրը տղուն հետ միատեղ ձեղնայարկը պառկեցաւ՝ մինչեւ որ լման պատիժը վճարուեցաւ:

Ասանկ ալ, Աստուծոյ բազմողորմ սէրը չի կրնար հանդուրժել որ յանցաւոր մարդը առանձինն պատժուի, եւ նա ցաւակից կ'ըլլայ տառապող մարդուն, եւ անոր պատիժը կ'ստանձնէ: Իւր յորդահոս սէրը չի ձգեր որ խեղճ մարդը տանջուի առանց ամբողջի: Եւ Աստուած մեղաւորին հետ մէկտեղ ցաւ կը քաշէ: Կսկիծը՝ խոցոտուած սիրոյն անբաժան ընկերն է: Եւ որքան որ մեծ, զգայուն եւ բուռն է սէրը, այնքան աւելի խորունկ եւ սուր կ'ըլլայ անոր ցաւը: Աստուծոյ էութիւնը սէր է: Անոր սէրը ովկէանի չափ անհուն է, հետեւաբար անոր վիշտն ալ ովկէանի չափ խորունկ:

Ուստի, Աստուծոյ մասին մեր բմբռնումը սա ըլլալու չէ թէ անիկա երկնից բարձունքներուն մէջ անփոյթ եւ անխռով կերպով բազմող տիրապետ մըն է, հապա սա ըլլալու է թէ նա անկատար ու թշուառ մարդկութիւնը, կատարելութեան եւ երջանկութեան հասցնելու համար ճգնող եւ երկունք քաշող սիրազեղ Հայր մըն է: Մենք պարտինք միշտ ի մտի ունենալ թէ մարդուն ցաւը Աստուծոյ ցաւն է, մարդուն տառապանքը Աստուծոյ տառապանքը, մարդուն նկրտումը Աստուծոյ նկրտումը, եւ

մարդուն կորուստը Աստուծոյ կորուստը:

Աստուած մարդոց հետ վշտակիր ու վշտակից է: Եւ ասոր ամէնէն կարկառուն վկան եւ տեսանելի ապացոյցն է Գողգոթայի Ոսչը: Ոսչը Աստուծոյ արիւնող սիրտը կը յայտնէ: Ոսչը կը հռչակէ թէ Աստուած ոչ միայն անորէն լուծը կը կրէ, այլ նաեւ անոր մեղքերուն պատիժը կը քաշէ: Այո՛, Աստուած ինքզինքը կը պատժէ մեղքին համար, եւ մեղաւորին տեղ: Անիկա փոխանակ մեղաւորին վրայ թափելու իւր արդար ցասմունքը, ինքն-իւր վրայ կը թափէ: Աստուած կը նախընտրէ ինքզինքը ցաւատանջ տեսնել քան թէ յանցաւորը: Անխարդախ սիրոյ վշտակցութիւնը միշտ տուայտանք կը պատճառէ: Այս պատճառաւ, Աստուած է տիեզերքի ամենամեծ տառապողը:

Թէ որ Աստուած ինքզինք չի խնայեր անսահման ցաւէ, արդեօք անիրաւութիւն գործած կ'ըլլայ, եթէ քեզի ալ կը հանէ փոխանորդային ցաւի բաժին մը: Դուն չի՞ պիտի ուզէիր ցաւ քաշել, եթէ քու նեղութեամբը ուրիշներու բեռը պիտի թեթեւայ եւ վիշտերը պիտի մեղմանան: Դուն չպի՞տի յօժարէիր զոհուիլ, եթէ քու կորուստովդ շատեր պիտի շահին:



ՓՈԽԱՆՈՐԴԱՅԻՆ ՏԱՌԱՊԱՆՔ

«Իմ արդար ծառաս իր անձը մահուան մատնեց, ու յանցաւորներուն հետ սեպուեցաւ. եւ շատերուն մեղքը վերցուց, ու յանցաւորներուն համար միջնորդութիւն ըրաւ.»

ԵՍՍ. ԵԳ. 12.

ՓՈՒՆԱՆՈՐԴԱՅԻՆ տառապանքը (vicarious suffering) եղելութիւն մըն է հոգեւոր աշխարհին մէջ: Անհերքելի իրողութիւն մըն է թէ արդարը կը տառապի անարդարին համար: Մեղքին ցաւերը միայն մեղաւորին չի սահմանափակուիր, այլ անմեղին վրայ ալ կը տարածուի: Արդարը բաժնեկից կ'ըլլայ անօրէնի չարչարանքներուն: Այս իրողութեան պերճախօս նկարագրութիւնը կը տրուի, Եսայի Մարգարէին կողմէն, «Մեսիական Մարգարէութիւն» կոչուած 53-րդ գլխուն մէջ: Այս ներշնչեալ հատուածին մէջ դժուած պատկերը զարմանալիչօրէն կը յարմարի Նազովրեցիի պատկերին: Կարծես թէ Մարգարէն Յիսուսը տեսած է իր աչքերով, եւ զայն կը նկարագրէ կատարեալ ճշդութեամբ եւ բծախնդիր մանրամասնութեամբ: Յիսուսի անձին մէջ իսկապէս կը մարմնանան այս նկարագրութիւնները՝ ամբողջութեամբ:

Անոր կեանքին մէջ տառականօրէն կատարուեցաւ այս մարդարէութիւնը:

Մեր Տէրը դարմանալիօրէն զերծ էր անձնասիրական ուէ միտումէ: Անիկա բնաւ ինքնիրեն համար չ'ապրեցաւ: Անիկա մոռցաւ ինքզինքը, և բոլորովին ուրիշներու համար ապրեցաւ, տառապեցաւ և մեռաւ: Անոր ցուցուցած անձնազոհական երևոյթը անդուգական է ցեղի պատմութեան մէջ: Անիկա չէ թէ մերթ ընդ մերթ հերոսական անձնուրացութիւններ գործեց, ինչպէս երբեմն հերոսներ գործած են, հասլա յարատեօրէն և հաստատօրէն (consistently) անձնուրացութեան կեանքը ապրեցաւ: Անոր ամբողջական կեանքին մէջ չէս կրնար մատնանշել դէպք մը, որուն մէջ անձնասիրական նշոյլ մը արտայայտուի:

Անիկա բոլորովին նուիրուեցաւ ցեղի բարւոյն: Անիկա բժշկեց հիւանդները, միսիթարեց տրտմեալները, յուսադրեց յուսահատները, կերակրեց անօթիները, օգնեց թշուառներուն և անօգնականներուն: Անիկա տիպար մարդասէրը եղաւ: Անիկա կարօտ մարդոց ծառայեց փափկասուն և գթոտ անձնուիրութեամբ: Անիկա վշտակերը եղաւ տառապեալ մարդկութեան: Անոր մէջ աշխարհ գլխաւ կարեկից և բազմողորմ բարեկամ մը: Անիկա բարիք գործելով չըջեցաւ:

Մեր Տէրը ոչ միայն մարդասիրաբար ապրեցաւ, հասլա նաեւ այլասիրաբար մեռաւ: Անոր անձնուրացութիւնը շարունակեց մինչև գերեզմանին դուռը: Անոր զոհաբերող կեանքը փակուեցաւ ինքնազոհ պատարագումով: Անոր ինքնամոռաց կեանքը իր գերաստիճանին հասաւ իւր փոխանորդային մահուամբ:

Փոխանորդային մահ կոչեցինք, քանզի անիկա իւր յանցանքներուն պատիժը չի կրեց: Անիկա ինքնիր մեղքերուն համար չի պատժուեցաւ: Արդարեւ անիկա ոճ-

բազործի մը պէս սպաննուեցաւ, սակայն առանց ուէ ոճիր, և ևս իսկ յանցանք մը գործած ըլլալու: Զայն խաչին յանձնող անխիղճ դատաւորը, զայն դատապարտեց սա դատաւճիռով, «Ես անոր վրայ յանցանք մը չեմ գտներ:» Անիկա չարիք մը գործած ըլլալուն համար չի խաչուեցաւ: Անիկա համակ բարութիւն եղած էր: Անիկա արդարութեան ու անմեղութեան անթերի մարմնացումը եղած էր: Եւ անիկա իբր անմեղ ողջակիզուեցաւ մեղաւորներու ձեռքով:

Հետեւաբար, մեր Տէրով խաչելութիւնը սովորական մարտիրոսութիւն մը չէր, անակնկալ աղէտ մը չէր, անխուսափելի եղերեբութիւն մը չէր: Թէ որ ասանկ եղած ըլլար, մեր Տէրով մահը ուրիշ մարտիրոսներու մահէն տարբեր իմաստ մը եւ գերագոյն արժէք մը պիտի չունենար: Անիկա եթէ ուզէր, կրնար խուսափիլ Գողգոթայի մղձաւանջէն: Անիկա եթէ կամէր, կարողութիւն ունէր իր թշնամիներու ճանկերէն ազատուելու, նոյն իսկ զանոնք բնաջնջելու: Սակայն անիկա իր գերմարդկային կարողութիւնը չի ծառայեցուց անձնափրկութեան: Անիկա փախուստ չի տուաւ անձնազոհութեան: Անիկա չի հեռացաւ իր ոխերիմ ոտխներէն: Ընդհակառակը անիկա ուղղակի և վճռականօրէն յառաջացաւ դէպի թշնամիներու բանակատեղին: «Անիկա հաստատօրէն իր երեսը դարձուց Երուսաղէմ երթալու:» Անիկա ստոյգօրէն գիտէր թէ Երուսաղէմի մէջ իրեն կ'սպասէ ծեծեր, նախատինքներ, փուշեր և տանջալից մահ: Բայց և այնպէս անոնցմէ չ'ընկրկեցաւ: Ազատ կամքով դէպի Երուսաղէմ չուեց: Յօժարակամօրէն խաչի չարչարանքներուն յանձնառու եղաւ:

Անիկա գերագոյն նպատակի մը համար այս աշխարհ եկած էր, և մտադիր չէր իր նպատակէն շեղուիլ: Գող-

դոթայի կատարին վրայ, իւր անողոք թշնամիները՝ դամերու անտանելի ցաւերուն վրայ փարթեցին հեզնանքի կճող խայթերը՝ ըսելով, «Ուրիշներ ազատեց, ինքզինք չի կրնար ազատել: Եթէ Աստուծոյ Որդին է, թող հիմա իջնէ խաչէն եւ իրեն հաւատանք:» Մեր համբերատար եւ ներողամիտ Տէրը այս անդիմադրելի ծաղրանքներուն ու լուտանքներուն չի պատասխանեց, անոնց պահանջած հրաշքը գործելով: Անիկա եթէ կամէր, կրնար խաչէն վար իջնել եւ իր աստուածային զօրութիւնը ցուցադրել: Սակայն մեր Տէրոջ համար նպատակը եւ գաղափարականը գերիվեր էր կեանքէն: Անիկա եկած էր ուրիշները ազատելու համար: Եւ անիկա չպիտի կարենար ուրիշները ազատել, եթէ ինքզինքը ազատելու ըլլար: Անիկա չպիտի կրնար մարդոց Փրկիչը ըլլալ, եթէ իր անձը փրկելու հետամուտ ըլլար: Անիկա կեանք եւ փրկութիւն բերելու համար աշխարհ եկած էր, եւ անիկա քաջ դիտէր թէ կեանք տալու պայմանը, ինչպէս նաեւ տիեզերական օրէնքը՝ մեռնիլ է: Կեանքը միայն մահով կը ծնի: «Եթէ ցորենին հատը հողին մէջ իյնալով չ'մեռնի, ինք մինակ կը մնայ, ասպա եթէ մեռնի շատ արդիւնք կը բերէ:»

Չայս դիտնալով, մեր Տէրը ուրիշները ազատելու համար, ինքզինքը չ'ազատեց. ուրիշները փրկելու համար ինքզինքը զոհեց: Անիկա մեղաւորներու սիրոյն համար իր կեանքը իբր փրկանք տուաւ: Անիկա մեղքի համար չարչարուեցաւ, եւ մեղաւորին համար խաչուեցաւ: «Անիկա մեր մեղքերը իր մարմինովը խաչափայտին վրայ վերցուց, որպէս զի մենք մեղքերէն ազատինք ու արդարութեան համար ապրինք:» Մեր Տէրը տոգորուած էր մէկ տիրական փափաքով, այն էր՝ անօրէնութեան պատճառաւ Աստուծոյ անջատուած հոգիները միացնել Աստուծոյ, եւ ինկած ու մեղքերով մրոտած մարդիկը բարձ-

ճրացնել Աստուծոյ որդիներու բարձր մակարդակին եւ սրբութեան: Նա գիտէր թէ ասիկա դիւրաւ իրագործուելիք դործ մը չէ: Ասոր համար բարձր գին մը վճարել հարկ է: Եւ անիկա այս գինը վճարեց, որպէս զի մարդիկ Աստուծոյ հետ հաշտուին, եւ բարի ու սուրբ կենցաղի մը տենչովը փոնկին: «Աստուած Յիսուս Քրիստոսի ձեռքով աշխարհս իրեն հետ հաշտեցուց:» Անիկա մեղքին պատճառաւ, Աստուծոյ եւ մարդու միջեւ բացուած անդնդախոր վիհը կամրջեց:

Յիսուսի չարչարանքը փոխանորդային էր: «Անիկա մեր մեղքերուն համար վիրաւորուեցաւ, եւ մեր անօրէնութիւններուն համար ծեծուեցաւ, եւ մեր խաղաղութեան պատիժը կրեց:» Անիկա մեղքին դառնութիւնը ճաշակեց: Անիկա մեղքին վերքերը իր մարմնոյն վրայ կրեց: Անիկա մեղքին անէծքը իւր վրայ առաւ: Անիկա անմեղ ըլլալով՝ մեղի համար իբր մեղաւոր եղաւ. այո՛, մեղի համար մեղք եղաւ, որպէս զի անոր վերքերովը մենք բժշկուինք:

Անոր մահը փոխանորդային էր: Անոր մարմինը ուրիշներու համար կտրուեցաւ: Անոր արիւնը շատերու համար թափուեցաւ մեղքերու թողութեան համար: Հետեւաբար, Գողգոթայի վրայ կատարուած խաչելութիւնը սովորական խաչելութեան դէպք մը չէր, այլ քաւարար արարք մը, փրկարար անձնագոհութիւն մըն էր: Այդ մահէն կեանք յառաջ եկաւ: Այդ խաչէն փրկութիւն ծագեցաւ: Խաչեալ Յիսուսը, Փրկիչ Քրիստոս եղաւ:

Այս գերագոյն գոհողութեան զայն մղող դրդիչ ուժը սէրը եղաւ: Սէր մը որ զեղուն եւ անպարփակ է. սէր մը որ անկեղծ եւ ինքնամոռաց է. սէր մը որ զուրգուրալից ու համակիր է. սէր մը որ տառապեալին հետ կը տառապի եւ անկեալին համար կը ցաւի. սէր մը որ մոլորա-

ծին ետեւէն կ'երթայ եւ կորսուածը կը փնտռէ. սէր մը որ ինքզինքը կը զոհէ մեղապարտը դատապարտութենէ ազատելու եւ յաւիտենական կեանքի առաջնորդելու համար :

Յիսուսի անդիմադրելի քաջողութիւնը եւ զօրութիւնը իւր անբացատրելի սիրոյն մէջն է : Անոր դիւթական սիրոյն մէջ առինքնող մագնիսականութիւն մը կայ : Այդ բուն ու ինքնազոհ սիրոյն առջեւ քարացած սրտեր կը կակղնան, ամբարտաւան հոգիներ կը կոտորուին : Խաչեալին վրայ ահնարի մը նետել, անոր սիրազեղ եւ պաշատող նայուածքը տեսնել, եւ անկէ չազդուել կարելի չէ : Երբոր Մունզաքսի նկարիչին նշանաւոր իւղաներկ պատկերը, «Քրիստոս Պիղատոսին առջեւ», կը ցուցադրուէր Գանատայի քաղաքներէն մէկուն մէջ, կոշտ ու խոժոռադէմ դիւղացի մը եկաւ, եւ հարցուց «Յիսուս Քրիստոսը հո՞ս է :» Պատասխանեցին թէ պատկերը ներսըն է : Մարդը մուտքի դրամը վճարեց. եւ ներս մտնելով, պատկերին առջեւ կայնեցաւ : Քանի կը դիտէր Յիսուսի դէմքը, դիւղացիի դիմադծին արտայայտութիւնը այլափոխուեցաւ, անոր խոժոռ նայուածքը փափկութիւն զգեցաւ, անիկա երկիւղած եւ պաշտող դիրք մը ստացաւ, եւ անոր աչքերէն արտասուքի կաթիլներ սկսան թափել : Այդ կոպիտ մարդը խորապէս աղդուած էր իր մեղքերուն համար չարչարուող Փրկչին սրտառուչ նայուածքէն : Եթէ Խաչեալին սիրազեղ նայուածքը չի կրնար Աստուծմէ ուժացած անձի մը սրտին դպչել եւ զայն դարձի բերել, ուրիշ ոեւէ զօրութիւն չի կրնար :

Զի խորհիք թէ փոխանորդային տառապանքը միայն Փրկչին վերապահուած բան մըն է : Ամենուս համար կարելի է փոխանորդաբար տառապիլ, ուրիշներու համար երկունք քաշել : Մարդուն հոգեկան շինուածքը, փոխա-

նորդային տառապանքը անխուսափելի կը դարձնէ : Եւ որքան որ փափուկ, զգայուն, բարձր եւ այլասէր է մարդու հոգին, այնքան աւելի սուր կ'ըլլայ անոր փոխանորդային ցաւը : Բարեսիրտ ու սիրատու զոհ մը անխուսափելիօրէն կը տառապի անկեալին ու թշուառին համար : Կարեկցութիւն ու գթութիւն ունեցող էակ մը չի կրնար խոյս տալ փոխանորդային կսկիծէ : Կեանքի ցուցասրահը փոխանորդային տառապանքի պատկերներով նախշուն է : Մայր մը փոխանորդաբար կը տառապի եւ երկունք կը քաշէ, թէ Ֆիլիքսապէս եւ թէ հոգեւորապէս, իր որովայնի ծննդեանը համար : Հայր մը կը տանջուի իր անառակ որդւոյն համար : Ամուսին մը կը խոցոտուի իր անհաւատարիմ կենակցին համար : Արդարը կը տառապի անօրէնին համար : Դաստիարակ մը վիշտ կը կրէ իր անհոգ եւ յետադէմ աշակերտին համար : Բժիշկ մը կը նեղուի, եւ երբեմն իր կեանքը կը զոհէ հիւանդին համար : Անգամ մը՝ կէս օրէ մը վերջ, բժիշկ մը արտօրնօք պզտիկ աղջկան մը անկողինին քով կանչուեցաւ : Աղջիկը ցաւերու մէջ կը դալարուէր : Անոր կեանքին համար շատ քիչ յոյս կար, բայց թերեւս գործողութիւն մը իւր կեանքը փրկէր : Աղջիկը աճապարանօք հիւանդանոց տարուեցաւ, եւ ճարտար բժիշկը միսը ճեղքեց, որպէս զի թունալից թարախը մաքրէ : Իւր աճապարանքին մէջ, բժիշկը ինքնիւր ապահովութեան համար բաւականաչափ զգոյշ չի գտնուեցաւ, եւ գործողութեան պահուն իւր բթամատը կտրեց : Անիկա գիտէր թէ այդ ճեղքը ի՛նչ կը նշանակէր : Եթէ գործողութիւնը չի դադրեցներ, եւ իր մատին անմիջական խնամք չի տանէր, հաւանաբար անիկա պիտի տանէր իր ձեռքը, բազուկը եւ կամ կեանքը : Սակայն անիկա իր հիւանդը չի ձգեց երկվայրկեան մըն իսկ, մինչեւ որ անոր կեանքը ազա-

տեց : Նոյն հիւանդանոցին մէջ, երկու օր վերջը, բժիշկը իր հոգին աւանդեց : Անիկա իր կեանքը տուած էր ուրիշի մը համար :

Ինչպէս որ մարդիկ կրնան տառապիլ ուրիշներու համար, անանկ ալ Քրիստոնեաներ կրնան տառապիլ Քրիստոսի համար : Ասիկա է տառապանքի բարձրագոյն աստիճանը, վսեմագոյն ձեւը : «Քրիստոսի չարչարանքներուն կցորդ» ըլլալով, Քրիստոնեան մասամբ փոխարինած կ'ըլլայ Քրիստոսի սէրը եւ շնորհքը : «Քրիստոսի չարչարանքներուն հաղորդ» ըլլալով, Քրիստոնեան յայտնած կ'ըլլայ իր Քրիստոնէական նուիրումը եւ երախտագիտութիւնը : Պօղոս Առաքեալ Կողոսացուց թուղթին մէջ կը գրէ թէ ինք ինչ եղանակով չարչարակից եղած է Քրիստոսի. «Հիմա ուրախ եմ ձեզի համար կրած չարչարանքներու վրայ, ու Քրիստոսի կրած նեղութիւններուն պակասութիւնը իմ մարմինիս մէջ կը լեցնեմ, անոր մարմինին համար՝ որ եկեղեցին է» (1:24.) : Կարծես թէ Յիսուսի կրած նեղութիւններուն մէջ պակասութիւն մը մնացած ըլլար, զոր Քրիստոնեան իր մարմնոյն մէջ կրած նեղութիւններով պիտի լրացնէր :

Ասիկա, առաջին նայուածքով այլաբանական կամ չափազանցեալ արտայայտութիւն մը ըլլալ կը թուի : Միթէ Քրիստոսի չարչարանքները անկատար մնացած են : Միթէ Քրիստոնեան կարող է Քրիստոսի նեղութիւններուն պակասը լեցնել : Անշուշտ, փրկագործութեան ծրագիրը ի կատար հանելու տեսակէտէն, Քրիստոսի չարչարանքներուն մէջ պակաս մը չէ մնացած : Անիկա փրկութեան գործը լման կատարած է : Սակայն այս փրկութիւնը մարդոց տրամադրելի ընելու տեսակէտէն, Քրիստոսի չարչարանքները լրացած չեն : Եւ այս մասին մէջ է որ Քրիստոսեան Քրիստոսի չարչարակից պիտի ըլլայ :

Աստուծոյ թագաւորութիւնը երկրիս վրայ յառաջ տանելու կողմանէ, հաւատացեալը իր Փրկչի չարչարանքներուն հաղորդ պիտի ըլլայ : Այն անձը որ Քրիստոսի կենակից կ'ըլլայ, նաեւ անոր չարչարակից կ'ըլլայ : Եւ ան որ չարչարակից կ'ըլլայ, իւր անձին վրայ կը կրէ այն չարչարանքներուն վէրքերը, այն նեղութիւններուն նշանները : Քրիստոնեայ ըլլալ կը նշանակէ Քրիստոսի հետ խաչուիլ, եւ Պաշտելին հետ խաչակիր ըլլալ : Ան որ Քրիստոսի եւ Քրիստոնէութեան համար չի յօժարիր նախատինք, հալածանք, նեղութիւն կրել, անիկա չի կրնար Յիսուսի աչակերտը ըլլալ : Ան որ չի կրնար Քրիստոսի համար զոհել ու զոհուիլ, չի կրնար անոր հետեւորդը ըլլալ : Ան որ չի կրնար խաչ տանիլ, չի կրնար Քրիստոսի յաղթանակներուն մասնակից ըլլալ :

Քրիստոնեան պէտք է Քրիստոսի հետ խաչ տանիլ, սակայն այս խաչակրութիւնը պէտք չէ ըլլայ դժկամակութեամբ ու դժգոհութեամբ : Այս կէտին մէջ ալ Քրիստոսեան պէտք է նմանիլ իր Տէրով : Ինչպէս որ անիկա իր խաչը կրեց յօժարակամօրէն եւ սիրով, նոյնպէս ալ Քրիստոնեան պարտի իր խաչը կրել կամովին եւ հաճոյքով : Քրիստոնեան Քրիստոսի համար իր կրած նեղութիւնները պէտք չէ նկատէ բեռ մը, զրկանք մը, կամ աղէտ մը, հապա իրական առանձնաշնորհում մը : Մեծ Առաքեալը այս մասին շիտակ հայեացքը ունի : Անիկա կ'ըսէ, «Վասն զի ձեզի տրուեցաւ Քրիստոսի համար՝ ոչ թէ միայն անոր հաւատալ, հապա անոր համար չարչարուիլ ալ» (Փիլ. 1:29.) : Առաքեալը Քրիստոնէական չարչարանքը կը նկատէ իբր նուիրական տուրք մը, պատուական պարգեւ մը : Եւ Պետրոս Առաքեալն ալ կը գրէ. «Եթէ արդարութեան համար չարչարուիք ալ, երանելի էք : ... Վասն զի աւելի ազէկ է բարեգործութիւն ընելով

չարչարուիլ, եթէ Աստուծոյ կամքը այն ըլլայ, քան թէ չարագործութիւն ընելով» (Ա. Պետ. 3:14,17.):

Մեր Տէրն ալ կը փափաքի որ հաւատացեալներ իրեն չարչարակից ըլլան ուրախութեամբ: Անիկա կ'ըսէ, «Երանի՛ր անորնց որ հալածուած են արդարութեան համար, վասն զի երկինքի քաղաքութիւնը անոնցն է: Երանի՛ր է ձեզի, երբ կը նախատեն ձեզ ու կը հալածեն, եւ սուտ տեղը ամէն կերպ գէշ խօսքեր կը խօսին ձեր վրայ ինծի համար: Յնձացէ՛ք եւ ուրախ եղէ՛ք, վասն զի ձեր վարձքը շատ է երկինքը» (Մատթ. 5:10,11.):

Ինչպէ՞ս կարելի է խաչը, պարգեւ մը, արտօնութիւն մը, երանութիւն մը նկատել: Ինչպէ՞ս կարելի է չարչարանաց մէջ ուրախ եւ գոհացող ըլլալ: Ասիկա տարօրինակ եւ անբանաւոր պահանջ մը չէ: Քրիստոնեան ուրախ պիտի ըլլայ ոչ թէ չարչարանքներու համար, հասկա չարչարանքներու մէջ, սա վստահութեամբ թէ այդ չարչարանքներէն օգտակար արդիւնքներ եւ բարի արդասիքներ առաջ պիտի դան: Քրիստոնեային չարչարանքները անիմաստ եւ անօգուտ չեն, ինչպէս որ Քրիստոսի չարչարանքները անիմաստ եւ անօգուտ չէին: Անոնց մէջ աստուածային բարձր նպատակ մը կայ: Եւ ի տես այս փառաւոր նպատակին, Քրիստոնեան կրնայ սիրայօժարութեամբ ու ցնծումով խաչակիր ըլլալ: Քրիստոնէական չարչարանքներէն ինչ օգտակարութիւններ եւ բարիքներ կը ծնին, ասոնց կարգին թուեմ երեք բաներ:

1. Քրիստոնէական նեղութիւններու միջոցաւ, Քրիստոնեան հոգեւորապէս կ'աճի, կը բարձրանայ ու կը զօրանայ: Յիսուսի համար չարչարանք կրել, հաւատացեալին համար հոգեւոր օրհնութիւն մը կ'ըլլայ: Քրիստոսի համար տրուած կորուստը, Քրիստոնեայի վաս-

տակի տոմարին մէջ անցնող շահ մը կ'ըլլայ: Անիկա Յիսուսի համար իր կեանքը կորսնցնելով, զայն կը գտնէ: Անոր նեղութիւնները պատճառ կ'ըլլան որ անիկա հաւատքի մէջ աւելի արմատանայ: Անիկա տառապանքներու միջոցաւ, Աստուծոյ աւելի կը մօտենայ: Անիկա հալածանքներու ու չարչարանքներու մէջ, վստահութեան եւ ապաւինումի դասը կը սորվի: Նեղութիւններու մէջ, Քրիստոնեային կեանքը աւելի կը գտուի ու կը սըրբագործուի: Երեւոյթական չարիքը, հաւատացեալին համար իսկական բարիք մը կ'ըլլայ:

2. Քրիստոնեային կրած չարչարանքներով Տէրը կը փառաւորուի: Քրիստոնեայի խաչելութեան մէջէն, Պաշտեալը փառքով կը փայլի: Քրիստոսի համար չարչարուելով, Քրիստոնեան Քրիստոսի համար կը վկայէ ամէնէն պերճախօս կերպով: Յիսուսի չարչարակից ըլլալով, հաւատացեալը Յիսուսի նկարագիրը, հոգին, կեանքը կը ցուցադրէ: Քրիստոնեան իր չարչարանքներով կը յայտնէ թէ ինք Քրիստոսի հաւատարիմ մէկ աշակերտն է: Քրիստոնեան իր վէրքերով կ'ապացուցանէ թէ ինք Քրիստոսի մէկ անձնուէր զինուորն է: Քրիստոնեայի խաչակրութեան մէջ կը պարզուի անոր զոհաբերող ոգին: Քրիստոնեայի անձնուրացութեանց մէջ կը յայտնուի՝ ամէնէն հրաշալի եղանակով, Յիսուսի նմանութիւնը: Ահա այսպէս, Քրիստոնեաներու չարչարանքներով Քրիստոս կը փառաւորուի: Եւ եթէ Քրիստոնեային զերազոյն նպատակը եւ փափաքը իր Տէրը փառաւորել է, այն պարագային, Քրիստոնեան իր նեղութիւնները կըրնայ առանձնաշնորհում եւ ուրախութիւն նկատել:

3. Քրիստոնեաներու չարչարանքները Աստուծոյ թափաւորութիւնը ծաւալելու միջոց եւ սատար կը հանդիսանան: Պատմական իրողութիւն մըն է, որ Քրիստոնեա-

ներու հալածանքները Աւետարանի ծաւարման ամէնէն ազդու միջոցը եղած են: Քրիստոնեաներու դէմ եղած հալածանքները որքան որ շատցած են, հաւատքի եկողներուն թիւն ալ նոյն համեմատութեամբ շատցած են: Հալածանքը ոչ թէ Քրիստոնէութեան խափանուելուն, այլ ա՛լ աւելի պրոպականտ ըլլալուն եւ տարածուելուն դործիքը եղած է: Երբոր Երուսաղէմի մէջ, առաջին աշակերտներուն դէմ հալածանք սկսաւ, ատիկա պատճառ մը եղաւ որ Քրիստոնէութիւնը ամբողջ Հրէաստանի, Սամարիայի եւ չրջակայ երկիրներու մէջ տարածուի: Ստեփաննոսին նահատակութիւնը, Պողոսի դարձի դալուն եւ Աւետարանի հռչակման ազդու միջոցը եղաւ: Պողոսի ծայրայեղ նեղութիւնները Քրիստոնէական հաւատքի հոռետերը ցրուեց մինչեւ երկրիս ծայրերը: Անոր կապանքներուն շնորհիւ, Քրիստոնէութիւնը մուտ գտաւ մինչեւ Հռովմի կայսերական պալատին մէջ: Պողոս շրջաթայուեցաւ, բայց Աստուծոյ խօսքը արձակուեցաւ: Հրոտովմէական կայսրութեան կողմէն Քրիստոնէութիւնը ջնջելու համար կատարուած կատաղի ջանքերը պատճառ եղաւ որ ինք նուաճուի եւ Քրիստոնէական տիրապետութեան առջեւ գլուխ խոնարհեցնէ:

Միշտ այսպէս եղած է: Քրիստոնէութեան ամէնէն զօրաւոր, կենսունակ եւ յաղթական եղած շրջանները, Եկեղեցիին հանդիստ եւ անխռով եղած շրջանները եղած չեն, ընդհակառակը ամէնէն նեղուած ու վրդովեալ շրջանները եղած են: Եկեղեցին տաժանքներու մէջ կենսաւորուած ու ծաղկած է, մինչդեռ հանգստութեանց մէջ լճացած ու բթացած է: Հալածանքներու մէջ հաւատացեալներ աւելի աստուածամօտ, ջերմեռանդ, արթուն եղած են: Հաւատացեալներ իրենց վէրքերով անհաւատները Փրկչին հրապուրած են: Քրիստոնեաներու կեանք

քերը օրհնարեր եւ բեղմնալից եղած են իրենց զոհարելութեանց համաչափօրէն: Քրիստոնեաներու պտղաբերութեան չափը միշտ համեմատական եղած է անոնց անձնազոհութեանց չափին:

Աշխարհի փրկութիւնը Քրիստոնեաներու խաչելութեամբ ի կատար պիտի հանուի: Աստուծոյ թաղաւորութիւնը, այս աշխարհին մէջ, խաչուող Քրիստոնեաներու միջոցաւ յառաջ պիտի ընթանայ: Խաչուող Քրիստոնեաներն են որ ցեղին նոր կեանք եւ ոգեւորութիւն պիտի ընծայեն: Խաչն է Քրիստոնէութեան ուժաղբիւրը (dynamic): Թէ որ աչքի առջեւէն անցնես Աստուծոյ դործին մէջ մեծ գործ տեսնող անուանի առաջնորդներու կեանքերը, պիտի տեսնես թէ անոնց ամէնքն ալ, առանց բացառութեան, Քրիստոսի համար զրկանքներ քաշած, խոշտանդուած, վիրաւորուած, նահատակուած են, բայց անոնց աճիւններուն մէջէն, հարիւրներով եւ հազարներով, նոր ծիրեր եւ անձնուրաց կեանքեր բուսած են: Մարտիրոսներու արիւնները Եկեղեցիին սերմը եղած է:

Այս ճշմարտութիւնը գիտնալուն համար, Ճան Նաքս, Սկովտիացի բաղմաջան եւ անձնուէր բարեկարգիչը՝ բացառանչեց, «Ով Գողգոթա, զիս մկրտէ քու մէջդ եղած զօրութեամբ. այն ատեն Ճան Նաքս պիտի մեռնի, սակայն ճշմարտութիւնը ապրելով պիտի տիրապետէ:» Այո՛, Ճան Նաքս մեռաւ, սակայն Քրիստոս իր մէջ վերապրեցաւ, Քրիստոնէութիւնը իր միջոցաւ վերակենդանացաւ:


Եթէ Աստուծոյ թաղաւորութիւնը մեր խաչելութիւնով պիտի յառաջդիմէ, չա՞րժէր որ մենք անոր համար խաչ կրենք: Եթէ մեր անձնազոհութեանց շնորհիւ Քրիստոս փառքով պիտի պսակուի, պէտք չէ՞ որ մեր խաչերը նկատենք երանելի առանձնաշնորհում եւ գերազանց

պատիւ : Առաքեալները ասանկ նկատեցին : Երբոր անոնք հաւատքի համար հալածուեցան, «ուրախացան որ Տէրոջը անուանը համար արժանի եղան անարգուելու :»

Եւ անոնց ուրախութիւնը կը բաղմապատկուէր, երբ ի միտ կը բերէին թէ նեղութիւնները աստիճաններ են, որոնց վրայէն կը բարձրանային դէպի գերազոյն երանութիւն : Անոնք չարչարուելու մէջ փառաւորուելու նախաքայլը եւ երաշխիքը կը տեսնէին : Եւ անոնք յոյսով կրնային ըսել . «Մեր վայրկենական թեթեւ նեղութիւնը առաւել քան զառաւել փառաց յաւիտենական գերազանցութիւն կը գործէ մեզի :» «Աս ժամանակիս չարչարանքները բան մը չեն դալու փառքին քովը՝ որ մեզի պիտի յայտնուի :» Այս քաղցր համոզումը նեղութիւններու խայթը կը մեղմացնէր : Եւ անոնք ցնծութեամբ կը կրէին իրենց խաչերը : Ի՛նչ երջանիկ փորձառութիւն :


Արդեօք դուն ալ ունեցա՞ծ ես այս փորձառութիւնը : Դուն ալ ինքզինքդ երանելի նկատա՞ծ ես, երբ Քրիստոսի եւ Քրիստոնէութեան համար նեղուելու արտօնութիւնը վայելած ես : Քրիստոնեան պէտք չէ որ դժգոհութիւն յայտնէ երբ հաւատքին համար նեղութիւն կը քաչէ : Ո՛վ խաչակիր բարեկամ, մի՛ յուսահատիր, քաջալերուէ՛ : Վստահ եղիր թէ երբ «Քրիստոսի չարչարանքներուն կը ցորդ կ'ըլլաս, անոր փառքին ալ հաղորդ» պիտի ըլլաս : Աչքերդ յառէ Փրկչին, «հաւատքին առաջնորդին ու կատարողին», եւ կեանքի ճամբորդութիւնդ շարունակէ՛ երգելով ,

«Օրհնեալ է խաչս՝ պիտի տանիմ,
Մինչեւ որ մահն ինձ գայ,
Ու վեր ելլեմ, պըսակս առնեմ,
Ինձի պըսակ մը կայ :»



Վ Ր Ի Պ Ա Կ

Էջ	Տող	Սխալ	Ուղիղ
7	22	«moral»ը	«մօրալ»ը
17	14	անդետական	անդէտականներու
42	23	ողէտներու	աղէտներու
53	29	նպատակի	նպատակին
59	10	դասեր	դասեր
74	12	վչտակիր	վչտակից
81-93	1	ԿԵՆԱՐԱՐ ՎԻՇՏԵՐ	ԿԵՆԱՐԱՐ ՏՐՏՄՈՒԹԻԻՆ
116	10	բարգարէն	մարգարէն
131	11	եթէ	թէ
141	1	ԳԱՂԱՓԱՐԱԿԱՆԸ	ԳԱՂԱՓԱՐԸ
144	31	աստուած	Աստուած
146	30	խոստումով	խոստումը
147	4	արար	արդար
151	19	ամենավեմ	ամենավսեմ
161	12	ժանանդ	ժառանգ
162	7	«լոյսն»	«լոյսն»
162	26	տեւողութեանց	տեւողութեան
178	2	ղափարներ	գաղափարներ
182	30	սխալիւ	սխալիս
184	12	պատասխանեց	պատասխաներ
184	20	կրնար	կրնալով
197	5	չմեղանչուելուն	չմեղանչելուն
233	18	Քրիստոսեան	Քրիստոնեան
64	30-րդ եւ 31-րդ տողերը	տեղափոխելով կարգա	
133	26	«մէջ» բառը սրբէ	
138	28	«what» բառէն վերջ աւելցուր	«light» բառը
157-167		Ջակերտի մէջ չառնուած պարբերութիւնները Ա-րամեան գրով ըլլալու չեն :	
186	12	«բեղի» բառէն վերջ աւելցուր	«հեա»



«Ազգային գրադարան»



NL0152327

